




3286

EX MUNIFICENTIA  
FERDINANDI III. M. E. D.

DIE 3. IUNII 1791.

9.7.59

357



11.

2

175

---





PAVLINI A S. IOSEPHO

CLER. REG. SCHOLARVM PIARVM  
PRAEPOSITI GENERALIS

# ORATIONES XXIII

HABITAE

IN ARCHIGYMNASIO ROMANAE  
SAPIENTIAE

PRAEFATIONEM  
DE INGENIO ORATORIO

ADDIDIT


IOANNES PETRVS MILLERVS

GYMNASII VLM. RECTOR, HISTOR. ET GRAEC. LING.

P. P. EIVSDEMQUE REI PVBLICAE BIBLIOTHECARIVS

SOCIET. LATINAE IENENS. AC TEVTONICAE HELMSTAD.

COLLEGA HONORARIVS




A. S. CIO IO CC LVI.



VLM AE

SVMTIBVS IO. FRIDER. GAVMII





L E C T O R I  
HUMANITATIS STUDIOSO  
P. S. D.  
IOANNES PETRVS MILLERVS.

*M*agnum et laetabile fortunae beneficium est, bene nasci, atque pauci eo nomine, opinor, toti quidem sibi displicent. Amat unusquisque proprias naturae dotes, ac, tametsi alias in aliis subinde viderit haud paullo luculentiores; tamen et in suo modulo non aegre adquiescit. Quidni vero, quum diuersae rerum notiones apud homines existant, animorum etiam adfectiones, quae potissimum cientur istis, varias obseruaremus? Etenim optabile habetur, quod iudicio probamus; sed non alia res citius opinionem boni prae se ferre solet, quam in cuius usu et possessione nostras etiam non

nullas esse partes autumamus. Videas hoc inter alia, quum primum, quid sit, bene natum esse, e diuersis comperire velis. Nam hic alii fortasse, prouti cuiusque genius suadebit, splendidos maiores, alii membrorum artuumque adfabre conformatorum robur, alii formosae faciei veneres, aliique item alia laudabunt, atque illa quidem in se minime spernenda, sed quae ad externam tantum hominis conditionem attinere videantur: at qui animum praecipuo ducendum loco didicerunt, eos fere prosperum habere ortum iudicabunt, qui ingenio sint praediti soluto, id est, quod non leniter tantum, et expedite citra aliquam offensionem, sed et efficaciter ad disciplinae atque disquisitionum rationes veniat; cuiusmodi in Theaeteto, caeteroque minime formoso, Theodorus quondam praedicauit, et quo se contentum esse Socrates, interprete PLATONE\*, declarauit. Et quid in seuerioris sapientiae alumno amplius philosophorum ille princeps postulare potuisset, quam ut facile inueniat, quod ipse dicere instituit; ut, quae alii exponunt, rite capiat; ut denique

---

\* Εὖ ἰδοὺ, ὅτι οἱ δὲ πάντες ἐνέτυχον, (καὶ πάντες πολλὰ πηληγίακα) εἶνα παρὰ δόμην ἔτα θαυμάως τὸ πεφυκότα.  
Et quibusdam intercessit: ὁ δὲ οὕτω λαίως τε καὶ ἀπταισῶς,  
καὶ

denique solute de re quapiam argumentari discat? Nam si ea indole quis a natura sit instructus, ut earum facultatum semina in se conclusa habeat, fieri vix potest, quin, magistri paullulum sollertioris ope accedente, huiuscemodi ingenium, ut ager fertilis et bene cultus, laetior in dies floreat, et, quanto crebrius industria ac sapiente rerum usu exercetur, tanto etiam uberiores fructus, quam priuatim, tum in publica societate, ferat. Et quam bene uniuerso generi humano protinus consultum foret, si pars maior saltem ea indole in lucem ederetur! verum enim vero pauci fidere tam fausto nati sunt: et quum natura alios his dotibus insignes, aliosque aliis muneribus instructos velit: ecquid nobis faciendum aliud restaret, nisi ut ingenia solerter exploremus, atque eos, quos natura mater paullulum benignius respexit, quoquo studio et artificiosa diligentia erudiamus? Inter ea ne de hisce quidem opinandum erit, ac si ad quasunque artes, atque literarum studia tractanda aequè apti essent. Saepe enim aliquis ingenio praeclaro pollet, et quum

*ad rem aliquam perficiendam adhibetur, animi sterilitatem sui ipse demiratur, cassum et inutilem se in re publica futurum esse cernens, si hoc unum, aut potissimum tractare iuberetur. Vicissim vero est et alius, qui ingenii dexteritati parum alioqui fidens. operi cuidam forte manum admouet, et ob successus solito maiores aegre sibi ipse credit; nescius buc usque, se bis talibusque rebus peragendis a natura esse destinatum. Et hinc quidem intelligimus, quid sit, quod M. TVLLIVS, in quo natura vere, nisi fallimur, experta fuit, quam disertum atque eloquentem hominem formare possit, eo libro, quem de claris oratoribus \*\*) inscripsit, in M. Scauro atque P. Rutilio, praeclaris admodum Romanis, non ingenium omnino, sed tamen ORATORIVM INGENIVM desideravit. Ut enim non eadem penitus philosophi et oratoris partes sunt, sic etiam hi viri, quamquam eruditi, et in Stoicis propemodum perfecti erant, doctrina, nec non peracuta meditatione sua non impediuerunt, quo minus in agendis causis aliquando inopes aestimarentur. Videlicet non amat populus exile et ad-*  
*strictum*

---

\*\*) cap. XXIX.

*strictum veluti orationis genus, cuius comparandi gratia philosophi laborant, sed liberius quodammodo et multiplex nec raro etiam magnificum audire gestit: quare, qui in dialecticis consumunt curas, atque ad has quaestiones extricandas suomet ingenio feruntur, popularem raro admodum adfensionem consequuntur.*

*Caeterum, si volupe est, agedum, virtutem oratorii ingenii iam paullo explicatius intueamur. Virtutem, inquam, ut ne totum illud, et quod plane comprehendere debet, male disseccetur: quamvis etiam virtutes adpellare potuissem, quoniam non una tantum laus, perfectioque, nobis hic ostenditur. Et quum suus unumquemque sensus facile admoneat, duas animi in nobis omnibus inesse facultates, quarum alteram intelligentiae, alteram voluntatis verbo insignire solent: equidem priorem illam maxime respiciens hoc primum volo, ut, qui ad orandum se accingit, commode et expedite alios docere possit. Nempe quum orator persuadere audientibus contendat, illud quidem tota mente ac perpetuo tenere debet, ut ignotae rei nullum; ita etiam obscurius propositae obscurum quidem, atque in utramvis partem anceps, nusquam vero clarum*

atque expeditum aliquod iudicium haberi posse. Quanto autem hic ingenio sit opus, ut retrusa, ut perplexa, ut contorta, et quae alia sunt difficilia, non eruamus tantum, sed et tricis suis plane exsoluamus, pluribus non explicabo, quum id ipsum quilibet, me etiam tacente, diuinare possit. Nec enim, Cicerone iudice, dicere quis bene potest, nisi qui prudenter etiam intelligat; ubi quidem otiosum esse non existimamus, quod intelligendi vim prudentia perfusam quasi, et scienter temperatam velit. Et videmus aliquando, qui sat bene res, et rerum omnia adiuncta animo comprehenderunt: sed qui nihilominus in lucem ad dicendum in re grauiori aliqua traducti magno nisu nihil docent, et a scopo suo nimium diuertunt. Hoscine nos autem rite ac prudenter autumabimus intellexisse, quae intellexerunt? Hoscine nos oratores diceremus, qui orando animos discendi auidos illaqueant, et propensa audientis voluntate, oratorii ingenii defectu, abutuntur? imo vero maius aliquid prudentia, quam diximus, intelligendi infert, quam quod a quibusuis, dicere instituentibus, sperari atque expectari posset. Neque enim trita et vulgaria narrare, sed rem vulgo minus notam scienter, perite,

et



et ornatè explanare, oratoris est. Itaque is multa inuenire, multa ratiocinando cernere et comperire debet, si id nominis cum dignitate quadam sustinere velit. Postmodo quum multa secum ipse cogitauit, alia mox adbibenda illi cura erit, ut, quaecunque est dicturus, non tam sua ex conditione metiatur, aut ex forma, qualem ipse fuit animo complexus; quam ex mente audientis, et ad huius maxime intelligentiam se atque cogitata sua omnia conformet. Sed id ipsum omnium artificum praecepta, ut opinor, superat; nec impetrari aut haberi alio ex fonte potest, quam ex ipsa indole, cui haec facilitas, hic vigor, atque hoc acumen, iam ingenerata esse debent. Adde, quod his veluti limitibus, tam arctis, tota haec prudentia nequaquam circumscribi possit. Vere enim ea in his quidem incipit; nec tamen longius progressa temere consistit prius, quam ad metam quoque auditores commode perduxerit. Igitur iam pensitatis rebus omnia ad actionis genus, id est, ad negotii praesentis institutum refert, utque fidem faciat dicendis, rationes alias ex rei, loci, temporisue, alias ex personarum indole scienter elicit, promittque; numero baud quidem ita fidens, ut delectu, in

quo sapiendi studium vel maxime versari, usus ipse quemuis edocere potest. Et quum alia ex aliis oriri, et nonnulla fere negligi ab audientibus, nonnulla autem pluris fieri solere, aliunde constet; ea quidem singula celeriore mentis motu colligit in unum; sed mox etiam in se regreditur, ac meditata sua ita ordinat, ut illa fini suo congrua, et ad persuasionem apta fore arbitratur. Nimirum ut non malus imperator in exercitu aduersus hostem educendo non tam multitudinem, quam robur, spectat, atque aciem disponens fortiores a peioribus seiungit quidem, sed utrosque tamen eo loco collocat, quo opera illorum in conflictu utilissima videntur: sic orator quoque suis veluti ordinibus argumentorum utitur, et alia in fronte, alia a tergo ponit, caeteris debilioribus in medio relictis, ut a primis illis vel ducantur, vel ab ultimis impulsa magis roborentur. Eadem iam prope modum de sententiis, quae quasi animam constituunt orationis, dicere licebit; utpote quae itidem ingenii sunt opus, et iudicio ad rerum hominumque indolem curate conformari debent. Et qui umquam bene cadere eadem illae possent, si a vero, vel ab re proposita, omnino alienae, vel accitae saltim paullo longius, auribus

*auribus intelligentiorum inculcentur? Vere enim huiuscemodi naturae nostrae sensus est, ut, nisi consuetudine sit plane deprauatus, verum diligit, et odio in falsum accendatur; ea animi commotione ut, si quae mentita veritatem magni fecimus aliquamdiu, statim ex quo falsi sunt comperta, respiciamus. Neque vero cautiore esse arbitramur eos, qui sententias composito acumine plus iusto polliunt, adcumulantque supra modum. Simul atque enim vel alterutrum fit, vel utrumque, tantum abest, ut auditor de subiecta re uberius instituat, ut ad istas multo potius non secus, quam ad flores mire pictos, adhaerescat, ac sermonis integri interea ex oculis dimittat cursum. Nouerunt olim istud, qui florente Latio dicendi arte valuerunt, principesque oratorum visi sunt, quapropter etiam aetate Tullii acuminem non ita frequens usus erat: etiamsi horum posteri et successores pleraque repente commutarunt, atque uberi dicendi generi acutum, grauiori molle, simplici ac naturali amputatum, et pudico maculosum, vel ambitiose infucatum, pessimo consilio substituerunt. Sed hi poenas imprudentiae iam dudum luunt, et quum vitium non aliunde magis contraxisse videantur, quam quod*  
*nimum*

nimum placere contenderunt; sequitur, ut, quid in ea re probari queat, strictim indicemus. Omnino autem ea quoque laus in oratorio ingenio inesse debet, ut amoena quadam ratione delectare sciat. Nec infitiandum, partem huius curae verba sibi vindicare, partem vero ad res ipsas esse referendam. Etenim qui verba adeo non curat, ut et inquinare loqui non revereatur, aut in iis deligendis, collocandis, atque comprehensione maxime idonea deuinciendis nil laboret; nae hunc ruri semet continere, et cum squalidis banc vitam agere oportet, siquidem nequidquam ad urbanum oratoris decus adspirauerit. Quae vero in ornandis verbis regula habetur, eadem in variis sententiis illuminandis itidem seruanda erit. Sed fortasse rectius intelligar, si haec duo uno elocutionis nomine adpellem, quae in uniuersum oratori sic est commendanda, ut iudicibus iustitia, patronis causae suae paullo plenior cognitio, medicis notitia remedium, nautis siderum distinctiones, atque belli duceb. scientia virtusque militaris commendari solent. Nam hi omnes si non penitus et quasi proprias possideant has memoratas laudes, utique ne nomen quidem suum tuebuntur, et quum opera ipsorum requiratur,

retur, ipsi sese deridiculo exponent. Sane vero, si sermones serere, et loqui, omnes, quotquot homines censentur, qualicunque modo sciunt; quid est tandem, in quo oratorem, elocutione vacuum, a reliquis distinguas? possunt alii, quocunque modo velint, sensa animi cum aliis communicare, possunt ornamenta quaevis spernere, possunt sine suauitate dicere, nonnunquam etiam a norma linguae ordinaria non nihil aberrare: at orator omnium eorum nihil potest, quum orator verus esse sine eloquentia non possit. Scilicet hic maxime, et paene solus est, a quo non modo rectum et sincerum, sed et pulchrum, in sermone baud immerito requirunt auditores. Pulchrum vero generatim nihil aliud vocamus, quam quod rationem continet perfectionis, in quantum nempe illa rite etiam percipitur. Atqui huius sensum quum natura cunctis ingenuerit, et ratio confirmet, quid est, quare studium illius in oratione exfularet? Euimvero parum abest, quin ingratos et propemodum iniurios in DEVM esse dicam, qui orationem, hoc est, munus illud longe maximum, quo omnis hominum societas in mundo continetur, ita eleuant, ut de sollicito illius cultu et ornatu parum esse laborandum

*dum opinentur. Accedit vero, quod et delectationi ita faueat naturae auctor, ut, quodcunque fecit, pulchrum fecerit, eoque non inepte auctor quoque pulchritudinis existimetur. Caeterum non negem, pulchrum aliquando sibi fingere mortales, quod ad pulchri regulas exactum tam excellens nomen minime meretur. Nec enim, quia res perfecti speciem et quasi formam habet, ea etiam continuo perfecta est. Mentitur ista saepenumero colorem, et, si eam propius attentiusque spectes, vana esse deprehenditur. At quod vere pulchrum est, varietate primum animos demulcet, erigitque vel paullatim, vel celeriore motu, ea efficacia, ut attentiores illi ipsa quidem contemplatione fiant, et, quo magis multitudine visorum occupantur, eo magis etiam iisdem oblectentur. Neque vero metuendum est, ut hanc varietatem oratorium ingenium decenter adsequatur. Habet enim illud in verborum maxime delectu, quo orationem, tamquam aliquam imaginem, condignis vestibus exornet. In promptu ei sunt vocabulorum copia, proprietates, vis, pondus, dignitas, decorum, granditas, et alia, quae ipsi plane seruiunt, quemadmodum cuiuslibet natura membri id exigere videtur. Perinde autem*

*in*

*in his quidem se orator gerit , ut interpres , qui , si catus fuerit ac prudens , res ab aliis noscendas iis signis effert , quae iam ante sint adcommodata rebus , easdemque planius declarent. Verba autem nostra , siue voces , signa rerum sunt , nec adeo putandum , aliquanto minus ineptire , qui res tenues , exiles , ac demissas , grandibus magnificisque ; magnas et excelsas autem vulgi usu tritis et humilibus vocabulis designat : quam qui delphinum siluis adpingit , fluctibus aprum.\*)*

*At si congruus verborum modus a conditione rerum pendet , quae , haud dici potest , quantum et natura sua differant , et attributis ; oratio fortasse , tot varietatibus distincta , male sibi met constabit ! Et fatendum nobis est , sic euenire posse , si quis debita dexteritate non instructus oratoris munia obire velit : interim vel ob id ipsum , ac ne quid huiusmodi contingat , excellenti indole ingenioque opus erit. Illud vero nervos suos non nequidquam , vel conatu irritato , intendet , ut , quod varium in sese , simul etiam aequabile compareat , et inter tot disparia perfectus tamen aliquis consensus obseruetur. Omnino autem ea partium diuersitas*

*tas*

---

\*) HORAT. *art. poet.* v. 30.

tas et dissimilitudo adeo perfectioni, atque pulcro ex perceptione huius orienti, nihil obsunt, ut legitime tractatae potius ad eam mire faciant. Quid enim? annon corpus quoque nostrum diuersissimis, non forma tantum, sed et mole, partibus conglutinatum est, quae tamen per diuinam conditoris sapientiam tam apte inuicem cobraerent, ut in ea etiam compage, qua coaluerunt, itidem cum quodam iustae magnitudinis decore inter se conueniant, et ordine non minus, quam mensura, venustissime conspirent? Ad haec ergo, vel non nimis dissimilia exempla orator verba sua, et verborum ambitus, et sententiarum orbes diligentius conformat; haec sollerti quadam imitatione aliquantulum exprimere, et licet saepe cum difficultatibus sit conflendum, ingenii virtute tamen vincere conatur. Atque hunc in modum ille quidem aridi simul opprobrium deuitat, ieiunique adpellationem effugit. Caeterum non ista tantum cauet; sed ut parum, ita quoque nimium auersans, limites utrinque seruat. Et est sane vitium, quod Graeci uno nomine κακοζήλιαν vocant, oratoribus insidiosè nocens, reliquisque odiosum, quando id, quod ultra modum est virtutis, peruicacius adpetitur, et  
copia



*copia ingenii vi iudicandi non, ut fas est, temperatur. Eo autem temere admissio fieri non potest, quin peruerse omnia agantur. Nempe quomodo prudentioribus placeret, quod non deceat? qui vero decens etiam existimari posset, quod mensuram recti supergreditur? Exige vel semel tantum ad decori atque dignitatis modum id, quod aliter, quam sat est, fingitur; et aduertes illico, opinor, abundare quiddam hominis naturae inimicum, et a pulchritudine longissime remotum. Sed, si ipse facile hoc persentiscis, caue putes, vulgum talia percipere non item posse. Etenim mirabile est prorsus, quum in faciendo plurimum intersit inter doctum atque rudem, quam non multum tamen illi aliquando differant in iudicando. Pauci sunt, opinor, qui modorum atque numerorum musicorum rationes tenent; at, si paullulum ab iis, qui banc artem tractant, adfectione fuerit erratum, docti et indocti se offensos putant. Neque dispar nobis horum quidem numerorum atque vocum ratio videtur. Nam si homines hoc faciant in iis rebus, ad quas cognoscendas a natura minus habent instrumenti; quid non in diiudicandis verbis possent, quorum sensus seu significatus ipsimet naturae suae sunt infixi, atque con-*

)( )(

*suetudine*

*suetudine longissima corroborati? Itaque ingenium, quod oratori conuenit, huiusmodi immodica et redundantia libenter mittit, quin minuta etiam interdum praeterit, maiori animo adgrediendam esse eloquentiam cum FABIO QVINCTILIANO \*) censens, quae, si toto corpore, ut ille ait, recte valeat, polire ungues, et reponere capillum, non existimat ad curam suam pertinere. Restat, ut ad tertium virtutis gradum accedamus, quo ingenium, quod adpellamus oratorium, id spectat maxime, ut auditorum animi adposite commoueantur. Et hic sane omnis vis, et cuncta lumina ipsius sese exserunt: tametsi usus eius non ubique sit eodem modo requirendus. Ecquid enim loquimur? quid argumenta ponderamus, atque ordine concinno ponimus? quid item suauiter conciliare animos, et delectare iuuat, nisi etiam orationis tam sollicitae ad auditorum studia compositae obtineamus fructum? hoc est, nisi illos plane etiam ad eum motum, quem et causssae ratio, et scopus noster postulauerit, vocemus? Quam multa autem hic occurrant studiose obseruanda, breuiter haud facile declarauerimus, quapropter*

---

\*) Institut. orat. L. VIII. prooem. p. 662. seq. ed. P. BVRMANNI.

*propter etiam non nisi potiora attingemus. Dicendum quippe est non de re una, nec eodem semper loco, nec ad homines eosdem, neque ex iisdem causis; quae res, siue attributa rerum, tamen omnem ordinem agendi variant, et adeo ingenium exposcunt, quod in omnes formas se conuertat, ac ducendis aliis non minus aptum sit. Tum vero interest, ut bene aliquis cognoscat, et, qua potest fieri sagacitate, velut odoretur, qui sint auditorum mores, quatenam publica persuasio, quid pars maior sentiat, existimet, exspectet, velit? quare hoc, vel illud, probent; quibus modis tandem flecti, excitari, atque alio, si opus fuerit, deduci queant? Quamque adeo aperta pectora non omnes gerant; sed nonnulli vere sint profundi, et in se reducti; non difficile, opinor, erit ad intelligendum, quam repente omnis illa ars dicendi, a rhetoribus excogitata, ea quidem in re defectura sit, ni tota ab ingenio, ut ita dicam, animetur. Sed nec omnis causa, de qua verba facienda sunt, requirit, ut ad auditorum animos mouendos grauiter agamus. Nam si res tenuior aut parua sit, quid ibi motus excitare, atque faces admouere attineret? Attemperandus multo potius est sermo rei, et, si haec sedatum et com-*

positum orationis genus velit, non cunctanter obsequendum est; quum certe etiam in mentes hominum nil aequè influat, quam si et dicta nostra fluere ex ipsa rerum atque hominum natura videantur. Eadem prudentia tum forte adhibenda est, quum in flectendis animis oratione vel fortissima nos parum esse profecturos praesenserimus. Habet enim noster animus sublimè quiddam atque hinc non facile auscultat arroganti. Arrogans censetur autem, qui vim parat aliis, iisque liberali disciplina institutis; quare etiam plerumque ista via nil efficitur, quam ut in auditorum animis tumultus quasi aliquis exoriatur, qui vim rationis turbat, atque ipsam veri impedit cognitionem. Quodsi vero nihil quidquam horum intercesserit, et causa plane postulet, ut armis grauioribus ab oratore dimicetur; quis non videt, ab ingenio subministrari optima subsidia debere? Itaque optabit ille quidem, ut in huiusmodi negotio perficiendo aliquam commotionem animorum auditores ultro adferant, quum, ut est in proverbio, currentem incitare sit facilius, quam comouere languescentem: at, si etiam spes illa decollarit, ipse tamen ideo non languet, sed, ut concitare possit, concitata mente rem adgreditur. Ibi ergo non ignarus,

ignarus, plurima commotione mentis, pauciora autem rei veritate, iudicare homines solere, primus omnium personam induit, quam ceteris adcommo-  
dare e re sua arbitratur. Atque in hoc mentis sta-  
tu quis amorem, odium, cupiditatem, iracundiam,  
timorem, spem, laetitiam, dolorem, ac misericor-  
diam, itemque alias his talibus propinquas vel ad-  
fectiones animi, vel perturbationes, latius descri-  
bat, quas hic unus commoda occasione data ciet,  
atque sic omnino ciet, ut hi motus singuli in ipso  
iam impressi esse videantur. Nec sane ea huius rei  
est facilitas, quam multi fingunt, forsitan et aliis  
in rebus laudabilibus, certe quidem in dicendo mi-  
nime exercitati. Non enim, sicuti sententiae, et  
argumenta, paruo vel mediocri negotio promuntur:  
ita etiam propensiones hominum mouere in procliu  
est. Abhorrent isti aliquando a sententia dicentis,  
et ad sensum de industria tam diu retinent, quam diu  
se habere putant, quo opinionem tueantur. Ii ergo,  
nisi callide, prudenter, et cum ratione agas, tuam  
animi, et vocis, et quarumvis virium contentionem  
forsitan ridebunt, et incendium, quod excitare vo-  
luisti, subito restinguent. Ac tum fere opus erit,  
ut, quod rei postulat conditio, amplecti, et utrasque,

*lenius, acrius, agendi partes nauiter explere scias, aliterque te ad temperatiores, aliter ad concitatiores motus animi componas. Vellem quoque, fieri si possit, ut mens tua mediis in turbis penitus composita maneret. Nam qui impetu pro ratione utens recta, consentanea, et caussae profutura adcuratius distinguere valeret? Caeterum si reliqua vulgaria ingenia tot, tamque variis difficultatibus obiectis facile perterrefiunt; oratorium admittitur, ut eo fortius perrumpat. Hinc iam ante quoquo studio sollertiae cogitat, exquirat, prospicit, et parat, quae iuuare in ancipiti fortunae casu possint, et, si usus ferat, animis eiusmodi aculeos infigit, qui non facile euelli queant.*

*Sed quo usque tandem oratorii ingenii virtutem, siue dotes, persequemur, quae omnino tam mirabiles multiplicesque sunt, ut eloquentia nec ipsa eas singulas narrare, nedum, prouti cuiusuis dignitas meretur, exornare posse mihi videatur? Equidem*

*bic*

\* ) Paulinus Chelucci a S. Iosepho, natus Lucae in Etruria a. d. 25. April. A. C. 1682. nomen familiae Clericorum Reg. Scholarum Piarum dedit a. 1699, et transacto studiorum tirocinio a. 1705. rhetoricae magister in prima sui ordinis domo S. Pantaleonis de Vrbe constitutus, post haec vero studiorum praefectus aequo Vrbinates dictus est. Quum hic fidem et ingenium egregie probasset suum, Romam euocatus Collegio Nazareno non solum docendis disciplinis mathematicis operam insignem praestitit, sed et duodecim omnino annos illi praefuit. Eloquentiae fontes in Archigymnasio Romanae Sapientiae aperuit  
iam

*hic digitum ad partes aliquas, et quasi capita, in quibus illud antecellere inprimis, atque admirandum se praebere solet, leuiter intendi: omnem vero vim illius si quis plane exponendam arbitretur, is haud dubie ne rei quidem magnitudinem adhuc perspexit; atque ego malim, inscientiam quodammodo spectari meam, quam loquacitatem adcusari. Habes vero hic Orationes, quae si exornatae pluribus ingenii, et quidem oratorii ingenii luminibus non videntur, frustra tibi singulas sermonis elegantias explanauerimus. Namque in intelligendis atque iudicandis hominum ingenio pollentium operibus itidem ingenio nonnumquam opus est. Recitauit eas aliquando vir reuerendissimus, PAVLINVS A S. IOSEPHO,\*) quum in Romanae Sapientiae Archigymnasio eloquentiae prouinciam moderaretur, et orator non Romanis tantum suis visus est, sed etiam permultis aliis intelligentibus et eruditis viris, inter quos honoris causa hic praecipue laudamus veterem fautorem nostrum, virum longe celeberrimum, IOANNEM ERHARDVM*

KAP-

---

iam inde ab a. 1713, et quam digna ratione hanc prouinciã administrauerit, orationes inter alia ipsius opera loquuntur. Nec virtuti eius praemia maiora defuerunt. Namque in comitiis ordinis sui generalibus a. 1742. inter illos quatuor est cooptatus, qui *Assistentes Generales* adpellantur, et quum a. 1751. Iosephus Augustinus Delbequius a S. Nicolao; Alquieriensium in Sardinia antistes factus esset, ipse primus ordine Assistens Vicari Generalis nomine successit. Et modestiae illius quidem iam sufficere is honor videbatur; verum Benedictus XIV. merita ex aequo aestimare solitus, dato Breui Apostolico, *Generalem* illum salutari iussit.

KAPPIVM, eloquentiae in academia Lipsiensi professorem meritiſſimum, qui iam anno R. S. CIOIOCCXXVIII. priorem, anno autem huius ſaeculi LIII. poſtēriorem harum orationum partem recudendam in Germania curauit. Expreſſit ille autem exemplaria Romana ann. CIOCCXXVII. et CIOCCXLVIII, ſua libertate uſus, atque ita, ut, quae bene prorſus et egregie, quae uelimus pure atque emendate a PAVLINO dicta eſſe animaduertiſſet, pariter moneret; id quod ipſi etiam auctori non diſplicuiſſe, ſatis conſtat. Et quum ea ita ſint, nos quidem animum non temere induxiſſemus, laborem iterare iam ab alio ſuſceptum, niſi reuerendi viri, qui in noſtra Sueuia Pias, quas adpellant, Scholas dirigunt, exemplarium inopiam cauſſati nouam a bibliopola, viro honeſtiſſimo, editionem rogitaſſent, eamque eo fere habitu diſtinctam, quem auctores claſſici, nouiſſimo decennio in lucem publicam a nobis miſſi, induerunt. Ita vero mea ſimul opera requiri coepit, promiſſumque, ratum fore, ſi prooemii in modum quidquam commentari ac praefigere luberet; ſed non aliud quid huic operi ad commodatius, quod impertirem, ſuppetebat, quam quod modo de ingenio oratorio, et virtutibus illius, dixi. Dab. e muſeo, Vlmae Sueuorum, prid. Id. Auguſti, A. R. S. CIOIOCCCLV.

ORA.





## *Orationum*

*Paulini a S. Iosepho  
Series.*

- I. *De neglectu literarum humaniorum, et earum corruptela, - - - - - pag. 5*
- II. *De patrocinio bonarum artium - - - 14*
- III. *De laudibus Leonis X. in anniuersariis eius parentalibus - - - - - 25*
- IV. *De infelicitate illiteratorum, - - - 37*
- V. *De forensi Latinitate expurganda, - - - 46*
- VI. *De usu et necessitate eloquentiae in foro et bo-  
diernis iudiciis, - - - - - 60*
- VII. *In optimis studiis lente festinandum, - - - 69*
- VIII. *De expedita discendi ratione, - - - 77*
- IX. *De laudibus Leonis X. in anniuersariis eius  
parentalibus, - - - - - 81*
- X. *De ingeniorum delectu ad studia literarum ha-  
bendo - - - - - 87*
- XI. *De laudibus Leonis X. in anniuersariis eius pa-  
rentalibus - - - - - 93*
- XII. *De*



<b>XII.</b>	<i>De literis et eloquentia cum ceteris disciplinis coniungendis</i>	107
<b>XIII.</b>	<i>De M. Tullio Cicerone imitando,</i>	115
<b>XIV.</b>	<i>De studio poetarum ad literas et eloquentiam necessario,</i>	124
<b>XV.</b>	<i>De praematura ingenii sui opinione,</i>	130
<b>XVI.</b>	<i>In sciōlos I.</i>	135
<b>XVII.</b>	<i>In sciōlos II.</i>	141
<b>XVIII.</b>	<i>De laudibus Leonis X. in anniuersariis eius parentalibus,</i>	149
<b>XIX.</b>	<i>De optimis artibus nobili iuuentuti necessariis,</i>	154
<b>XX.</b>	<i>De probitate viro literato necessaria,</i>	163
<b>XXI.</b>	<i>De vi et potestate literarum,</i>	172
<b>XXII.</b>	<i>De laudibus Leonis X. in anniuersariis eius parentalibus,</i>	178
<b>XXIII.</b>	<i>De felicitate viri literati,</i>	184





*Eminentissimo Principi*  
**ANNIBALI**  
**S. R. E. PRESBYTERO CARDINALI**  
**ALBANO**  
**CAMERARIO**

*Paulinus a S. Iosepho, Scholarum Piarum.*

**D**ELIBERANDVM diu mihi non fuit, cui praecipue hoc Orationum volumen inscriberem, ANNIBAL, Cardinalis amplissime. Humanitas illa singularis, qua olim ex his vnam, nomini tuo nuncupatam, exceperas, fatis mihi certum dederat benenolentissimae voluntatis tuae testimonium. Nec dubitare poteram, te optimis artibus patrocinio vnquam defuturum, quas a puerida comites, et in omni fortunae gradu dignitatis tuae administras, habuisti. Videbam praeterea, te CLEMENTIS XI. Pont. Max. immortalis memoriae Principis, patrni tui, gloriam studiosius aemulari: et ad illum non modo Ecclesiasticae vitae integritate, doctrinae studio, clementia, benignitate ceterisque virtutibus in diem propius accedere, sed etiam in promouendis literarum studiis eius veltigiis diligenter insistere. Qua de re vt plurima et illustria dederis argumenta, illud tamen praecipua laude dignissimum puto, quod, summo splendore ac regio prope sumptu, typis diuulgari curaueris elegantissimas eius epistolas, quas Breuia dicunt: tum etiam Consistoriales Orationes et Homilias, quae et veteris eloquentiae maiestatem, et perfectioris vitae doctrinam et instituta, continent. Quamobrem tibi debet plurimum perpetuoque debet literaria Respublica: cum id munificentia tua ad omnem literatorum posteritatem traduxerit, quod aetatis nostrae singulare fue-



rat beneficium. Quocirca amantissimo patruo maiorem gratiam referre non poteras: nec, quae sempiternae illius memoriae nunc excitanda curas, in Basilica Diui Petri, splendidissimi mausolei saxa, diuturniorem ei famam tribuent: quandoquidem sunt quoque, ut Satyricus inquit, sua fata sepulchris. Nulla autem aetas, nulla temporum obliuio, clarissima obruet eius ingenii monumenta, nec vetustas vlla literatissimi Principis memoriam conficiet. Quid vero dicam de iis, quae Urbini, perueteri literatorum hominum municipio, ad bonarum artium decus magnifice ac liberaliter a te fieri, accepimus? Haud satis tibi fuerat, perficiendis Collegii scholis opem contulisse liberalissimam, ut, quae patrui tui beneficentiae incoeptum, tibi vni deberent praeclari operis complementum. Vetusissimae quoque voluisti Academiae dignitati consulere; et, quemadmodum artes omnes, ut M. Tullius ait, societate quadam inter se continentur: ita peramplo vnius loci ambitu singula earum studia coniungere tibi placuit. Proinde magnificentioribus aedibus, a fundamento excitatis, Gymnasium publicum cum Collegio Scholarum Piarum ita connexum atque contiguum effecisti, ut plura in vnum Collegia quasi coalescant, et vnum amplissimae Academiae corpus constituent. Nec sane minus de literis es optime meritus, ob typographiae artem, in eadem Vrbe, ad veterem splendorem, restitutam, cuius nitoris et elegantiae quasi praegustatio sunt, Rituale Romanum, Pontificale maioris Hebdomadae, et alia, iam edita, rei sacrae destinata, volumina. Quae quidem typorum praestantia quanto optimis studiis futura sit vsui, tum etiam quanto tuae bono ac splendori patriae, cui benefaciendi finem nullum facis, nemo non videt. Haec autem tua ad literas amplificandas ornandasque maxime propensa voluntas omnem mihi dubitandi locum eripuit, quin Orationes has meas, quae fere omnes ad studia literarum pertinent, benigne suscipias, tuoque patrocinio tuearis: cum praesertim in tuo, prope dicam, natae atque educatae sint solo, in Romano scilicet Archigymnasio, quod te, studiorum suorum perpetuum vindicem ac patronum, veneratur et colit. Quod si hoc meae erga te obseruantiae argumentum, ea, qua praestas, incredibili benignitate exceperis, certe me et collegas meos, ad tuas praeclaras virtutes celebrandas, magis magisque excitabis.



A D  
LECTOREM.

**P**RODIERANT iam in lucem aliquot ex his Orationibus, partim summis Romanis Pontificibus, partim Eminentissimis Cardinalibus, singulae singulis, inscriptae. Erga quos eadem ut perpetuo maneant officia, visum est aequum, epistolas quoque ipsis praefigere, cum quibus primo editae fuerant. De illis vero, quae in parentalibus Leoni X. habitae sunt, id praemoneo, quotannis idem argumentum, apud nos vulgatissimum, pertractari; preinde, ut quid novi videatur afferri, illud esse aliqua novitatis specie conuestiendum. Ceterum, si cui orationes eiusmodi, aut reliquae minus probentur, is, per me licet, ne legat.

---

ADOLPHUS A S. GEORGIO

*Cler. Regul. Pauperum Matris Dei Scholarum Piarum.*

PRAEPOSITVS GENERALIS.

**C**um librum, cui titulus: Orationes habitae in Archigymnasio Romanae Sapientiae a P. Paulino a S. Iosepho, nostrae Religionis Sacerdote Professo, et in eodem Archigymnasio publico Eloquentiae Professore, compositum, duo ex nostris, quibus commissum fuit, recognouerint et approbauerint, ut typis mandetur, si iis, ad quos spectat, videbitur, facultatem in Domino concedimus. In quorum fidem etc. Datum Romae, in aedibus nostris Scholarum Piarum apud S. Pantaleonem, die 22. Aprilis, 1727.

*Adolphus a S. Georgio, Praepositus Generalis.*

(L.S.)

*Antonius a S. Michaelis, Secret.*

Reg. fol. 231.

I M P R I M A T V R,

Si videbitur Reuerendissimo Patri, Sacri Palatii  
Apostolici Magistro.

*N. Baccarius, Episcopus Boianen. Vicesgerens.*

## A P P R O B A T I O.

**O**RATIONES, quas P. Paulinus a S. Iosepho, publicus Eloquentiae Professor, habuit in Archigymnasio Romano, Reuerendissimi P. F. Gregorii Selleri, Sacri Apostolici Palatii Magistri, iussu, legi et lectas probavi, cum in iis nihil animaduerterim, quod vel Orthodoxae Religionis placitis aduersetur, vel, quod probatis moribus minus consentaneum videatur. Illas praeterea, quae in lucem edantur, dignas iudico; quod, qui non fucatam, sed sinceram eloquentiam amant et consecretur, ex iis, habent, quae cum laude imitentur, et discant, qua ratione artem Oratoriam laudabilius excolant, ut Oratio naturali exurgat pulchritudine, nulloque timore foedata, vel nugis pueriliter exculsa, dignam laudem mereatur. Mecum eadem plane sensuros, arbitror, omnes, quos non lateat, quae recte conscribendae Orationis laudanda ratio merito commendetur.

*Ita censeo ego F. Thomas Maria Minorelli, Ord. Praed. Sae.  
Theol. Mag. Bibliothecarius Casanatensis & Coenobio Minerui-  
tano, IV. Kal. Aprilis, MDCCXXVII.*

I M P R I M A T V R.

Fr. Gregorius Selleri, Ordinis Praedicatorum,  
Sacri Palatii Apostolici Magister.



DE  
NEGLECTV  
L I T E R A R V M  
H V M A N I O R V M  
ET  
EARVM CORRVPTELA  
O R A T I O . I.

HABITA VI. NONAS MAII  
AN. MDCCXIII.



*Amplissimo et Clarissimo Iuveni*

D. ALEXANDRO

A L B A N O

Summi Pontificis

CLEMENTIS XI.

FRATRIS FILIO

EQVITI HIEROSOLYMITANO

*Et Magno Prioratus Armeniae Bauius.*

PAVLINVS A S IOSEPHO

SCHOLARVM PIARVM.

**Q**uae nuper, te audiente, in abno Urbis Archigymnasio de Humanioribus literis publice disserui; ea sunt omnino, quae saepe et grauius, pro iniuncti officii ratione, tibi diligenter prae oculis habenda esse monueram. Ex quo enim contigit, ad haec mitioris literaturae studia me tibi ducem praebere; duo fuere praesertim, quae in animo penitus tuo, qua ratione, qua exemplis desigere magnopere studui: nimirum literarum censum citra sudorem parari non posse, neque optimas disciplinas consueuisse oscitantibus in ora delabi; sed imitandam nobis esse pertinacem indomitamque Maiorum industriam, quorum eruditionem aemulamur et gloriam: deinde, minime sperandum esse in Humanioribus literis feliciter progredi, nisi discendi labor cum optima studiorum ratione coniungeretur. Ad quam licet primo pertinere videatur tum docendi methodus, quae ex Quintiliano neque operosa, neque fusis praeceptionibus constans esse debet, sed breuis et simplex; tum solida praeceptorum doctrina, longoque usu subacta; tamen nihil est, quod literario progressui plus conferat, quam veterum ac politiorum auctorum lectio accurata et diuturna; Quemadmodum nihil perniciosius magisque cauendum, quam librorum prauae corruptaeque latinitatis frequentior usus et familiaritas. Quae quidem omnia cum tibi aliisque studiosis adolescentibus serio ac frequenter progressu non poenitendo ingressissem: idcirco demandata mihi nuper, ex singulari Summi Pontificis, CLEMENTIS XI. Patris tui, benefici



## *Epistola nuncupatoria ad Alexandrum Albanum. 7*

beneficentia, tuaque potissimum opera, Eloquentiae provincia in Romano Lyceo, argumentum hoc ipso utilius, quo publicis lectionibus praeluderem, se mihi usquam non obtulit, quodque magis ad rem commode caderet. Illud vero, quam pronis auribus quantaque animi voluptate, exciperent, quotquot aderant, primae eruditionis et dignitatis Viri, tu ipse testis, imo et praeco humanissimus. Hoc itaque mihi certe fuerat satius, quin et supra vota; non tamen tibi, qui ut quamprimum oratio ipsa publici iurii fieret, etiam atque etiam efflagitasti. In qua quidem re humanitati tuae diutius mihi reluctandum non fuit, quod sperem eidem orationi maximum pondus accessurum esse ac nomen; si tu studio, industria optimorumque librorum consuetudine atque usu, auspiciato compleueris, quam sustines non vulgarem literariam expectationem. De quo cum spem mihi certiores praebeant non modo egregia indoles tua, et supra aetatem iudicii maturitas, cum insigni morum gravitate coniuncta; sed etiam singularis illa animi propensio tam erga literas, quam literatos, quos vehementer amas, libentissime excipis, eosque fovendos esse et palam dicis, et, quae potes, impense curas, votis tuis ultro, ac libens obtempero; orationemque publico iudicio committō, tuo tamen nomini inscriptam; ut te ingenuae et castae latinitati non tam candidatum, quam patronum et vindicem literaria Respublica futurum intelligat, et mecum officiosa animi gratulatione veneretur.

**N**eminem vestrum ignorare arbitror, eam semper fuisse consuetudinem, ut, quamprimum quispiam ad hanc amplissimam eloquentiae sedem accederet, solenni quadam indicta concione, quicquid virium, aut artis in dicendo sibi comparasset, eo potissimum conferret, ut in humanioribus literis et eloquentia utilitatem maximam cum dignitate coniunctam esse contenderet. Quae quidem consuetudo licet mihi reprehendenda minime videatur, ab huiusmodi tamen instituti ratione, et ipsamet argumenti magnitudo, et summa auditorum dignitas, necessario me renocat, alioque abducit. Quid enim est, quod ad optimarum artium ornamentum tam ingeniose exco-gitari, aut diserte dici possit, quod longe infra earum amplitudinem non iaceat, vel ab eloquentissimis viris ianpridem occupatum, splendideque ex hoc ipso loco pertractatum non fuerit, aut etiam multiplici vestrae eruditioni obscurum esse censeatur? Nemo profecto, nemo

vestrum, aut eorum, qui ad-sunt, ignorat, quantum splendoris et gloriae, quantum praesidii ac virium rebus cum privatis tum publicis conferat literarum studium et eloquentia. Omnes probe intelligunt, ab illis veluti e fonte promanare, non modo iam civis et Republicam, verum etiam (quod certe momenti maioris est ac ponderis) in Religionem ipsam tot tantaque praesentissima com-moda, ut de iisdem asserendum esse putaverim, quod praeclare Tullius de amicitia, (\*) quod nempe si quis eas de medio tolleret, solem e caelo sustulisse videretur. Quocirca ne actum agere videar, aut crambem recoctam, ut aiunt, proponere; nihil de literarum dignitate, aut praestantia, nihil de necessitate eloquentiae, vel usu in medium proferam: sed illud tantum totis industriae viribus contendam inquirere, quid potissimum causae sit, quod hac nostra tempestate, in tanta scilicet ceterarum omnium artium gloria scientiarumque incremen-

A 4

to,

---

(\*) *Laelius de amicitia c. 13.*

to, humaniores literae potius in dies collabi, et ad interitum vergere videantur; cum iam fere reperitur nemo, qui nedum vberiori illa eruditionis facultate, qua maiores nostros tantopere inclaruisse miramur, quodammodo sit ornatus; sed neque latini sermonis castitatem et elegantiam sibi omnino tribuere audeat. Arduum fortasse fuerit ac periculosa plenum aleae argumentum; vobis tamen, Patres Amplissimi, et iis omnibus, qui humaniores literas studio, aut amore aliquo prosequuntur, ut puto, optandum maxime; ingenuis vero adolescentibus, qui literarum earundem studiis initiati sunt, opportunitum illud omnino fore confido.

Mirari plerique solent, quoniam improbo literarum fato contigerit, quod, tamen hoc aeuo hominum ingenia nihilo, quam antiquitus, deteriora sint, imo saepe et in multis praestantiora esse videantur; nemo tamen existat, qui cum sapientissimis illis literarum pateatibus, qui olim floruerunt, de ingenio doctrinaeque laude contendere audeat. Nonne, inquit, in granioribus magisque arduis disciplinis solertiam veterum ingeniumque aetas nostra non aequauit modo, verum etiam longe lateque superauit? Recentiorum percurrite Philosophiam: quot doctrinae solidioris in ea progressus! quot nonae hypothese, limatori indicio elaboratae, validoque rationis et experientiae praesidio communitae! quot naturae reconditoris arcana, quorum causae omnium opinione difficillimae, imo humano ingenio prorsus imperuiae esse censebantur, instituta recens philosophandi ratio acute penetrant, clarissimeque detexit! Mathematicis vero disciplinis quantum splendoris atque amplitudinis ex singulis fere aetatibus, praesertim vero superiori saeculo accessit? Profecto nulli veterum innotuerat Loga-

rithmorum genesis, neque Algebrae speciosae methodus, neque fluida Caelorum natura, aut iricorporea Saturni maiestas, ac sexcenta alia rerum pulcherrimarum inuenta, quibus aetas nostra se merito sapientiorum esse gloriatur. Praeterea iuniorum solertia cum rem medicam progressu non poenitendo ampliauerit; cumque rei militaris scientia complures, memoria nostra, inclaruerint duces, qui veterum gloriam fortitudine, consilio rebusque gestis facile superarunt; qua ratione contigerit, esse neminem, qui literarum fama et eruditionis laude antiquitati palmam praeripere audeat; sed satis sibi gloriae ducat, si multo sudore multisque vigiliis eo tandem peruenerit, ut ab antiquorum praestantia non longissime abesse videatur? Adeone deterior literarum conditio, ut in tanta ingeniorum vbertate ceterarumque scientiarum progressu, illae propemodum destitutae iaceant, ac ne passum quidem progrediantur? Ego saepe fatalem huiusmodi literarum calamitatem duplici causae potissimum tribuendam esse iudico; & quod studio industriaeque maiorum longe impares sumus, et quod longissime ab optima studiorum ratione recessimus. Cui duplici literarum infortunio, ut tempestiue, si fieri possit, occurratur; constitui, hodierno die utrumque oratione persequi, et utrumque ea, qua potero, studiosae iuuentuti praecauere.

Et quidem ad ea semper maiori animorum contentione incitamus, quae pluris facimus, impensiusque aestimamus. Pulcherrimas res atque optimas nullo frequenter studio prosequimur, non quod illae reuera negligi dignae sint, sed quod nobis negligendae esse videantur. Neque enim tantum ab ipsa rerum pulchritudine ac dignitate, quantum ab earum opinione atque aestimatione mouemur. Quamobrem cum literas Maiores

res nostri in eo pretio ac dignitate semper habuerint, ut in ipsis maximum vitae ornamentum, ac summum Reipublicae bonum situm esse putarent, mirandum non est, easdem tam singulari amore ardentique studio complecterentur. Vehementius illi plane literariae dignitatis famam deperibant, quam ambiciosissimus quisque fasces, consulatus, imperium: parandaeque sibi eruditioni acrius insudabaut, quam avari homines pecuniae fortunisque augendis. Postremo magis illi de literis, quam nos de aris, fociisque tutandis, solliciti. Ex quo ingenti erga literas studio fieri solebat, ut omnibus aliis abdicatis ex animo curis, in hanc vnam incumberent, et in hanc veluti metam totos industriae nervos intenderent. Quocirca incredibile nemini videatur, eos tantopere literarum amore succensos, ceteris sibi voluptatibus interdixisse, rei familiaris curam abiecis-  
 se, somno, cibo potnque frequentius abstinuisse, quo celerius ad earum gloriam assurgerent. Vulgare est ac tritum, summum illum dicendi magistrum, Demosthenem, quo nemo vnquam laboriosius, nemo per plura naturae obstacula eloquentiae verticem adiit, plus olei consumsisse, quam vini, omnesque artifices antelucana industria superasse. Non ignorabant siquidem viri prudentissimi, labore minime vulgari venalia esse eruditionis ac literarum praemia. Non ignorabant, ad literarum studia aequae illud pertinere, quod de Philosophia omnium ore perccebit, postulari videlicet totum hominem. Hinc Cicero, homo plane ad eloquentiam et eruditionem factus, cum diligentius causam requireret, cur in tantis eloquentiae praemiis tantaque gloria, pauci tamen reperirentur, qui in eius laude proficerent, oppor-

tune docuit, hanc esse praecipuam, quod ea studiorum genera omnem sibi animum omuemque sollicitudinem vindicarent. Omittendae sunt, inquit, omnes voluptates, reliquenda studia delectationis, ludus, iocus, conuiuium. sermo etiam paene omnium familiarium deserendus.

Quae quidem ne cui ad amplificandam literarum famam magnifice enuncata esse videantur; cogitate mecum, Auditores, quot quantaque caelo, terra marique occurrant, quorum cognitio non levis ac perfunctoria, sed plena ac bene subacta ad eos necessario pertinet, qui in eiusmodi disciplinis laudem aliquam assequi meditantur. Quanta enim fabularum eruditio! Quanta Poetarum, aut carminum varietas! Quanta historiarum rerumque ab orbe condito gestarum series! Haud parum certe negotii facessit tot auctorum plenam solidamque cognitionem consequi, et tam multiplex dicendi genus probe accurateque dignoscere posse, ac distinguere. Alii siquidem in dicendo robusti ac nervosi: alii molliores et magis ad elegantiam proni. Hic festiuitatis et leporis plenus; acrius ille probat, vrgetque efficacius. In hoc phrasis terfa, facilis, non affectata, maximam spirans suauitatem. Sublimior in alio, succo plenior, totaque ad grauitatem plane senatoriam composita. Praeterea cum omnes artes, ut ait praeclare Tullius, quae ad humanitatem pertinent, habeant quoddam commune vinculum, et quasi cognatione quadam inter se contineantur; dubitari minime potest, quin nulla sit scientia, aut ars liberalis, cuius cognitione aliqua tinctus esse non oporteat, qui ad literarum et eruditionis gloriam contendit. Si quis enim Dialecticam, Mathematicam, Ethicam, Politicam, aliasque Philosophiae partes, ne longe qui-

A 5

dem

dem a vestibulo salutauerit, non modo de tot tantisque rebus, quarum notitia ab iis fontibus haurienda est, neque vnum verbum facere audebit, sed neque plene intelligere poterit poetas ipsos, oratores, aut historicos in eo disciplinarum genere praeclarissimos. Quis enim Plinium, Plutarchum, Quintilianum, aut Virgilium ipsum tam multa de Physica, multa de Geographia, ac de Astronomia multa subtiliter solideque pertractantes intelligat, qui nondum primas earundem scientiarum lineas duxerit? Necessè erit profecto in euoluendis huiusmodi libris, tanquam ad scopulos passim haereat, vel saltem ita balbutiat, ac si sphingem aliquam offendisset, aut monstra immania enuntianda essent.

Quae quidem omnia cum sudorem industriamque exigant, et maximam et diuturnam, mirandum non est, veteres tam assiduo ac pertinaci labore in literario puluere defudasse. Intelligebant illi, plane nullam sapientiae viam esse imperulam, si conatus accessisset ac labor, qui improbitate sua omnia vincit. Intelligebant in arduo montis domicilium habere musas; verum eo quoque industria volari posse, si aliter perueniri non possit. Cum itaque experientia didicissent magistra id, quod Graecus ille Metrocles sapienter discitabat, nimirum res alias omnes emi posse pecunia, literas vero tempore; nihil erat omnino, quod tam accurate ac tam religiose seruandum esse putarent, quam tempus. Hinc vel exiguum diei particulam per otium desidiamque traducere, impendium omnium gravissimum censebatur. Ac proinde ne momentum sibi otiose unquam efflueret, quod potui, quod cibo, quod itineri tribui necesse erat, cum aliquo eruditionis studio confundum esse volebant. Quandoquidem ex Plutarcho accepimus, eam fuisse maiorum consuetudinem, ut

dum lectica iter agerent, aut recitantem aliquem audirent, aut nonnulla sibi ex lectione annotarent, aut etiam non raro aliis dictando, non tam tempus, ut poetae loquuntur, fallerent, quam traducerent fructuosissime. Hinc memoria proditum est, illum promum condum vniuersae eruditionis, quem nulla unquam silebit posteritas, C. Plinium se uere rigideque nepotem suum obiurgasse, quod illum, omiffa lectica, vidisset deambulantem. Poteras, inquit, has horas non perdere. Tanti scilicet putabant studiosissimi viri, vel minimi temporis habere rationem; illud totum periisse rati, ex quo sibi aliquis sapientiae prouentus non accessisset.

At nos, (pudet me, magnopere pudet, proiecram temporum nostrorum ignantiam cum indomita maiorum diligentia conferre) nos, inquam, quibus, ut Seneca dolebat vehementer, tempore nihil est vilius, illud partim tuendae accuratius, quam par est, valetudini, partim somno, partim conuiuiis, partim etiam muliercularum more, calamistris et speculo effundimus liberalissime. Ac deinde quod aulae officii, quod voluptatibus, quod ludis, quod auaritiae, aut ambitioni superest tempus in literis et eruditione reponimus. Non est ergo, cur miremur, maioribus nostris tanto inferiores nos esse doctrina, qui tantopere infra ipsos sumus laborandi studio. Merito ab eorum gloria tam longe aberramus, quorum non imitamur industriam: quam reuera imitandam sibi unusquisque proponeret, si quod erga literas studium in nobis reliquum superesset. Sed relanguit iampridem, relanguit in plerisque hominum amor erga optimas disciplinas. Restinctus est omnino vetus ille ad honestas artes ardor animorum atque contentio. Inueterauit enim iam opinio quaedam, non modo literis humanioribus perniciofa, verum etiam scientiarum

tiarum omnium ordini maxime periculosa, in hoc studiorum genere nihil gloriae, nihil diuitiarum esse sperandum. Ac proinde non sine grauissimo animi dolore, quotidie videmus adolescentes egregia indole, ingenioque praestantes, vix delibatis Grammaticae rudimentis, vix rudioribus subauditis ex Dialectica vocibus, statim coeco quodam impetu ad Hippocratis aphorismos, vel ad Iustiniani codicem properare; illic tantum gloriae, illic diuitiarum certissimam spem propositam esse dicuntur. O praecleara sciorum consilia! O praeposteram aetatis nostrae sapientiam! Itane pessime rebus suis consultum esse voluerunt Bembi, Sadoleti, Cortesii, Antoniani, qui omnes in Senatum Apostolicum cooptati fuere, alique paene innumeri, strenui literarum cultores, ut aetatem omnem per summum laborem in iis studiis contererent, ex quibus nulla sibi utilitas, nulla amplitudo, aut dignitas oriretur? Sed omittamus infantissimos istos literarum aestimatores, quorum audaciam in iudicii seueritatem vocare, neque locus, neque temporis angustia permittit. Contemnunt modo, quae citra infamiam ignorare non possunt. Deferant mularum castra, si placet; exeant, proficiantur. Etenim non desunt nobis in hac Vrbe, veteri optimarum artium domicilio, ex tota Italia, imo ex tota fere Europa adolescentes optimi, qui cum praestantia ingenii animorum ardore coniuncto, sapientiam impensissime amant, et in deliciis et amoribus habent honestissimas disciplinas. Non desunt, neque deerunt vnquam viri clarissimi, de literaria Republica optime meriti, qui literas per omnem aetatis gradum ita coluere, et colunt, ut ad eas sustentandas atque ornandas omnino nati esse videantur.

Quid tamen est, quod in tanta scholarum frequentia, in tanta ingeniorum vi, studiorumque

contentione, vix tamen vnus, aut alter hodie reperiatur, qui ea latini sermonis integritate atque elegantia valeat, quae olim duobus circiter ab hinc saeculis, post restitutas scilicet a summorum Pontificum, et a Mediceae Familiae munificentia literas, tantopere in hac Vrbe, imo per Italiam omnem effloruit? Tunc enim Angelus Politianus, tunc Hermolaus Barbarus, tunc Ianus Parrhasius, Philippus Beroaldus, Romulus Amalaesus, Paulus Iouius, alique sexcenti floruerunt, qui latino sermone adeo perpolitati limatique fuere, ut ad Ciceronem ipsum, Caesarem, Liuium, Cornelium Nepotem ceterosque Romanae linguae scriptores castigatissimos, munditia styli et elegantia visi fuerint perquam proxime accessisse. Nunc vero, qui hanc laudem optimo sibi iure omnino tribuere possit, vix aliquem esse nouimus. Quae quidem Instructio calamitas cuiquam fato praecipue sit tribuenda, non vna est eademque omnium opinio. Contendunt nonnulli, principem causam esse methodum, docendique rationem, qua hodie in Grammaticae scholis homines nostri vtuntur: cum illa adeo perturbata, adeo obscura, et inanium praeceptorum tricis vndique implexa esse videatur, ut iam miseri adolescentes diutius Grammaticae ambagibus, quam olim labyrintho Cretensi Theseus, immorari cogantur; ideoque meliores aetatis annos non in ipsa Romanae linguae vi ac puriori stylo, sed in negotiosa canonum minutissimorum congerie, appendicibus, scholiis, observationibus traducant: quarum diuturno et importuno tinnitu haud raro adolescentium aures et ingenia ita lassantur, ut ad ceteras disciplinas malint crudi adhuc et elingues festinare, quam in ipsis grammaticorum subsellis turpiter consensescere. Alii vero, emundioris fortasse naris, causam omnem huiusce damni esse dicunt, magistrorum optimorum

timorum inopiam : nimirum hoc aeno scholarum quidem maximam esse frequentiam, magistros vero perquam paucissimos. Vulgarem iam esse consuetudinem, Grammaticae institutiones literasque humaniores ab illis doceri, qui aliis ipsi magistris reuera indigerent; atque artes illas, quas olim in scholis tradere consueverant senes primae auctoritatis profundaeque eruditionis, qui exemplo suo adolescentulos ad honestarum artium studia cohortari et quodammodo incitare videbantur, ab imperitis modo hominibus ac novis pertractari, qui ad Orbilii ferulam non semel essent remittendi.

Quas quidem caussas quamquam ego et perspicuas et gravissimas esse non dubitem; adhuc tamen grauiorem aliam in medium afferre statui, ex qua supremum latini sermonis exitium ac pestem proficisci, haud obscure intelligetis. Ad deturpandam enim latinae linguae castitatem nihil magis valere contendendo, quam corruptae depravaetaeque latinitatis libros frequenter evolvere. Horum profecto familiaritate, horum commercio, ut in sole ambulanti euenire solet, latina oratio paulatim immutari consuevit, ac decolorari. Hinc tam multos naeuos, hinc tot maculas ac sermonis vitia contraximus. Cum enim omnis loquendi facultas necessario a nobis accipienda sit tum ex vocibus, tum ex ea dicendi forma, quam vel auribus, vel lectione percipimus; si legendi studio corruptas voces dicendique barbariem contraxeris, sermonem quoque impolitum ac semibarbarum consilari necesse erit. Quid vero defaecatum ac purum ex lutulentis quorundam scriptorum libris haurire possis, in quibus praeter latina aliquot vocabula, vel obsoleta et ab Enandri saeculo repetita, vel recens in Latium temere immissa, nihil est omnino, quod Latium ipsum redolere videatur? Et tamen tam multi hac nostra tem-

pestate eo deuenerunt amentiae, ut optimis quibusque auctoribus valere iussis, semilatinos istos recentiores, fucis plenos, nullius fucci ac sanguinis, in deliciis et amoribus habeant, libentius peruolunt, iisque solenne dicant sacramentum. Qua quidem re latino sermoni fatum perniciosius esse non video; praesertim vero si adolescentes, quorum mentibus mollioribus, quicquid ex lectione percipiunt, haerere solet tenacius, eo librorum lenocinio oblectari, atque iis diutius immorari consuecant. Quod enim in illis neque dictionis Tullianae robor, neque Caesaris, aut Liuii perpolitam elocutionem, neque sententiarum vim, leporem et elegantiam, quae passim in Plauto, Terentio, Sallustio aliisque compluribus nitidissimae latinitatis parentibus, minime reperirent, et propterea in lisdem euoluendis olenum reuera et operam perderent; dolendum quidem esset vehementer, sed tamen aliqua ratione ferendum. At vero cum ex ea lectione, aut breuitate hauriant sibyllinis foliis obscuriorem, aut ventosum ampullatumque dicendi genus, quod caelum ipsum audacia petit; cum tumultuariam ineptiarum vocum congeriem et desultoriam vbique orationem offendant; qua ratione fieri potest, per Deum immortalem, ut tam pestiferam labem minime contrahant, neque in tam proiecta latinae linguae corruptela periclitentur? Hinc profecto, hinc oritur affectata illa dicendi breuitas nostrorum hominum, quae in antithetis frigidisque argutiolis tota est: hinc languida illa omnino et elumbis oratio, quae plus aequo sententiosa videri amat: hinc comptula et fucis pigmentisque ad nauseam vsque colorata eloquentiae facies: hinc denique stylus, in plerisque tam barbarus, inconditus et exoticus, ut non tam Romanam, quam italicam dictionem foedissime oleat.

At fatalis huiusmodi librorum pestis ex eo mihi perniciosior esse videtur, quod homines eorum studio perinde ac Circae poculo imbuti, a saniori iudicio tam longe abeant, ut limatissimos quosque scriptores paruipendant, ac purissimae latinitatis succum omnino fastidiant. Quapropter ab ipsis Romanae eloquentiae princeps M. Tullius nimis verborum nimiaeque loquentiae reprehenditur: imus ac pedester Virgilius: Florus siccus ac ieiunus; asper multisque in locis censoria virgula notandus Quintilianus. In qua quidem iudicandi ratione, aut nientis omnino impotes, aut iis aegris similibi esse videntur, quibus sapore, ex aegritudine corrupto, optimus quisque cibus fastidio solet esse ac stomacho. Desipit nimirum infans fucosae latinitatis amatoribus nativa et inaccessata latinae linguae simplicitas. Desipit aequabile dicendi genus, gravitatem spirans et elegantiam. Desipit demum, quicquid ampullis et sermone granditate non resonat. Ac proinde Choerilos suos et Codros semper manu et ore fouent, iis impensissime oblectantur; qua possunt, laudibus efferunt, et ubique praedicant. Quia etiam, si quid virum ad scribendum, aut dicendum habeant, teterrimam illam sermonis corruptelam tam studiose minuteque affectant, ut nisi iisdem magistris suis amentiores, eorundem tamen ameniam haud parum feliciter aequasse videantur.

Quae cum ita sint, Auditores, quis vestrum satis superque non intelligit, supremum latino sermoni excidium ex depravatae latinitatis lectione potissimum derivari; eiusque fursus libros tantopere perniciosos, ultra Saurobatas et glaciale Oceanum explodendos omnino esse, atque amandandos? Vtiam ipsi eadem poenarum severitate ex literaria Republica proscriberentur, qua expungi exterminarique so-

lent ex Catholico Orbe nequissima Nouatorum volumina! Vtinam iidem tam obvio ac facili publicae lucis aditu intercluderentur! Nisi enim haec malo tandem tempestive occurratur, labentibus in diem et ad interitum vergentibus literis, si qua adhuc ex latina lingua superest umbra, breui ex hac Vrbe profus totaque Italia evanescet.

Opem itaque veltrant, Adolescentes optimi, implorat imminens literarum calamitas et ultimum Romanae linguae discrimen. Vos veteris earundem gloriae vindices assertoresque ereptae dignitatis estote. Vestrum sit, studio ac labore efficere, ut exoticarum dictionum pulsa barbarie, suus Romanae linguae splendor et politioribus disciplinis dignitas relictuatur. Quod quidem nullo negotio perficietis, si ineptissimis reiectis libris, induttriam omnem studiuniquae in evolvendis antiquis incorruptaeque latinitatis auctoribus conferatis. Hos diligenter ac saepissime legite: hos perpetuo manibus atque oculis percolutate, et ad verbum, si fieri possit, ediscite. In horum vim, gravitatem et aculeos intueri, maxime fructuosum. Horum sedula imitatione stylum elimatum, elegantiae plenum atque omnino latinum breui comparabitis. In quo quidem imitandum vobis ob oculos ponite praeclarissimum Urbis et Orbis exemplum, Pontificem Maximum, Clementem XI. cuius summa latini sermonis integritas et eloquentia plane Romana non alios certe redolet fontes, nisi veteres ac politissimos Romanae linguae scriptores. Ex diuturna horum lectione maturaque imitatione conciliavit sibi sapientissimus Princeps venustum illud, graue ac sententiosum dicendi genus, quod in eo et nos tantopere demiramur, et quamdiu eloquentiae honestisque artibus honor erit ac nomen, posteritas omnis

omnis immortalitati commendabit. Ego vero pro hoc publico eloquentiae munere, quod mihi nuper ex singulari sua erga me beneficentia idem sanctissimus Pater demandavit, non nisi purissimum quemque latini sermonis auctorem publicis lectionibus interpretandum suscipiam; et, quantum in me erit,

operam dabo, ut ingenui Adolescentes, qui huc literarum humaniorum studio conveniunt, ex assidua veterum optimorum librorum familiaritate atque usu latini sermonis integritatem ament, eamque sedulo imitari studeant; ut quantum fieri potest, veteri splendori Romana lingua restitatur.

DE  
PATROCINIO  
BONARVM ARTIVM  
ORATIO II.

HABITA XV. KALEND. NOVEMBRIS  
AN. MDCCXIII.

*Eminentissimo Principi*  
ANNIBALI  
S. R. E. Diacono Cardinali  
ALBANO  
Summi Pontificis  
CLEMENTIS XI.  
FRATRIS FILIO  
PAVLINVS A S. IOSEPHO  
SCHOLARVM PIARVM.

**C**ogitanti mihi, PRINCEPS EMINENTISSIME, cuius systerem patrocinio hanc, non tam orationem meam, quam causam bonarum artium honestissimam, occurrit statim Romanus Pontifex, patris tui; cui cum multis aliis nominibus, tum  
illo



illo potissimum a me debebatur, quod cum ipse per omnem aetatem tam literarum, quam literarum et fuerit, et sit amantissimus Pater, idcirco huiusmodi argumento vim auctoritatemque maximam conciliasset. Sed quid non inani timor consilium vicit ac votum meum. Timui, ne ingratus illi ac molestus fierem, dum maxime gratus et officiosus esse contenderem. Cum enim de studiofis bonarum artium patronis tota res esset, ac nemini non esset exploratissimum, omnem illius vitam, fortunas ac dignitatem cum earundem bonarum artium studio ac tutela fuisse coniunctissimam, haud potui, citra quandam communis existimationis laborem, de eodem in hac re omnino silere: quod tamen, pro singulari sua inuictaque modestia, iniucundum illi ac permolestum fore, certe scio. Nam ipse, ut de M. Catone ait Sallustius, cum bonus esse malit, quam videri, laudes omnes auersatur suas, inque omnem, qua potest, aditum intercludit. Verum cum diu cognitum mihi perspectumque esset, liberalium artium patrocinium ad Albanam domum auito quodam et haereditario iure pertinere, non tam difficile fore duxi, alium quemquam ex ipsa domo humanissimum studiorum fautorem reperire, quam quis prae ceteris eligendus esset, statuere. Quandoquidem omnes, quotquot in ea sunt, viros doctos et eruditos complecti ac fouere impensissime solent, et, ut de L. Lucullo legimus, literarum familiaritate magnopere delectantur. At quamobrem te aliis omnibus ex tum praeclara familia praefereendum esse non putarem, Cardinalis amplissime, qui ut dignitate atque auctoritate, sic literis et sapientia longe ceteris antecellis? Te itaque unum oratio haec mea, seu potius optima arte, quarum causa instituta est, te, inquam, unum implorant; tuoque faustissimo nomine ornari cupiunt ac propugnari. Et sane earum causam desirere non potes, nisi velis et tuam deferere; eas quippe omnes ita in te uno complecteris, ut cum ipsarum fortuna, qualucunque illa sit, necessario tibi coniunctio quaedam ac societas intercedere videatur. Imo nisi id, quod reuera est, dissimulare velis, splendidissimam illam, qua resulges. Purpurae dignitatem disciplinarum earundem beneficio praecipue referre debes acceptam: cum nemini obscurum sit, eam fuisse tibi propositam, non, ut alias, ex Pontificis amore, aut ipsius meritis impertiendam, sed tuam. Quibus vero, nisi optimarum artium praesidio instructus, illam tibi iudicii maturitatem et in rebus gerendis industriam comparasses, qua in leuamen laborum ac Pontificiae sollicitudinis partem opportune venire posses, atque in Ecclesia et in Evangelio laborare cum Clemente? Nemini ergo mirum esse videatur, si diem, in quo tibi tandem ex Orbi totius suffragiis summaque Urbis laetitia, constitutus fuit amplissimus honor, singulari aliquo erga literas beneficio distinctum ac notatum maxime volueris. Cum enim tunc forte à transalpina Legatione Urbini commorareris, accepto vix Purpurae delatae nuncio, confestim te annuo censu Abbatiae, quam Sanctae Mariae de Citria dicunt, ad annos aliquot abdicasti, ut eiusmodi liberalitatis subsidio ad nostrum Vrbinate Collegium, paterna iam tum recens Clementis XI. beneficentia excitatum, ampliores scholarum sedes accederent. Qua quidem re illud aperte testatum esse voluisti, clarissimae dignitatus accessionem te liberalibus disciplinis acceptam maxime profiteri, ac tuae propterea voluntatis erga illas tam illustrem dedisse praerogatiuam. In quo id primo commendatione dignum esse putauerim, quod scilicet partem de annuo censu tibi detrachere eo ipso tempore non dubitaueris, quo intelligebas, ad illud te euectum esse fastigium, quod quo magis a priuati hominis fortuna recedit, eo grauiore in rem familiarem ac seruitium domesticum sumptus exigat necesse est. Eodem accedit, quod ea aetate hoc ipsum feceris, qua nihil est, quod luculentiori Ecclesiae patrimonio magis obstaré possit videatur, quam ipsa cum Pontifice cognatio ac necessitudo.

Iam

*Iam enim Ecclesiastica bona, quae ceteris quam latissime patent, iis, qui sanguine cum Pontifice coniuncti sunt, mediocritatis cuiusdam lege ac terminis definiuntur. Quamobrem haud vulgare amoris tui indicium erga literarum studia tum plane exhibuisti, cum amplificandis Vrbinateus Collegii scholis aureorum aliquot milia liberalissime contulisti. Cuius quidem munificentiae memorem animum non modo optimae artes, Collegii illius incolae, perpetuo habiturae sunt, sed vniversus quoque noster Scholarum Piarum Ordo huiusce liberalitatis memoriam tui nominis immortalitati commendabit. Ego interim, vt tibi pro his aliisque praeclaris erga nos meritis, eiusdem Ordinis totius nomine gratias agerem, exiguum hoc pertenuis ingenii mei munus offerre statui. Quod tamen si ea, qua praeditus es, humanitate exceperis, id mihi beneficii cuiusdam noui instar erit; quo illud etiam efficies, vt maius aliquando gratiae erga te voluntatis meae proferam argumentum.*

**S**i quis vestrum fortasse putet, Patres amplissimi, me hodierno die ad dicendum idcirco accessisse, vt intermissum iampridem ac diuturna cessatione torpentem bonarum artium amorem in adolescentium animis excitare, eosque ad studiorum cursum alacrius instaurandum cohortari atque inflammare contenderem, is certe fallitur, et ab instituti mei ratione longissime aberrat. Satis enim intelligo, quae ac quanta sit eorundem erga optimas disciplinas alacritas, quanta ingeniorum contentio ac doctrinae cupiditas; cuius adipiscendae studio partim patriam, qua nihil solet esse iucundius, partim fratres, aut parentes charissimos, partim ampla paternae domus commoda, omnes profecto vacuae dulcissimaeque vitae otium fortiter denouerunt. Quid igitur a me tam sapienter excogitari, aut, pro scientiarum amplitudine, tam discrete dici valeat, quod ipsos in annuversaria hac studiorum instaurazione ad huiusmodi laudem magis incitare possit, et calcaria, vt aiunt, sponte currentibus addere? Id mecum cum ipse diu reputarem, illud tandem sese obtulit animo, me nihil ad rem opportunius, quodque magis bonarum artium dignitatem auget, posse suscipere, quam si perantiqua illa disciplinarum laudatione praetermissa, perniciosis quorundam hominum opinionibus oc-

currerem, quibus haud raro iuuenes ab incepto studiorum cursu deducti solent, aut saltem maxime retardari. Percrebuit enim non modo Romae, sed et apud exteras nationes, literatorum quorundam sermo, scientias hac nostra tempestate eam ob causam nequaquam, vt olim, pristina dignitate ac gloria vigere, quod nunc veteres illi optimarum artium Maecenates minime reperiuntur; ac proinde quod illae plerumque intra mediocritatem consistant, quod multis in locis aut misere iaceant, aut in dies collabi videantur; id neque senescenti earundem artium aetati, neque effoetis ingeniorum viribus, sed rei literariae fauentium paucitati omnino esse tribuendum. Quae quidem opinio cum non solum fautores ipsos literarum beneficentissimos, qui reuera nunc sunt, haud mediocri iniuria afficere, sed etiam in scientiarum existimationem infamiam quandam ac labem inducere videatur: rem totam diligentius examinare constitui, et quoquomodo oculis consilioque vestro subiicere; vt illud tandem de re grauissima iudicium feratis, quod contumelia propugnatoribus bonarum artium illata, quod ingenuis iusta disciplinis infamiae nota, quod denique sapientia vestra postulare videbitur. Illud itaque primo mature accurateque video mihi esse inquirendum, an reuera patrocini penuriae debeat

debeat aequo iure tribui vulgaris ea studiorum ratio doctrinaeque mediocritas, quam in multis notiorum hominum esse conspiciamus; cum tamen ipsi ea ingenii facultate sint praediti, ut primum eruditionis locum sibi vindicare potuissent. Deinde omnes industriae vires eo conferam, ut planum faciam, vnumquemque literatorum posse, si velit, sibi studiisque suis amplam conciliare fortunam. Quod quidem argumentum cum sit huiusmodi, ut non modo ad amplificandam bonarum artium dignitatem accommodatum esse videatur, verum etiam commodum maximeque idoneum incitandis iuuenum animis praemiorum spe ad earundem bonarum artium studia diligentius repetenda: profecto dubitari non potest, quin et illud clarissimis istis disciplinarum magistris summopere probetur; tum etiam vobis futurum sit iucundissimum, amplissimi Patres, qui ad sustinendam Romani huiusce Archigymnasii estimationem et nos per omnia humanitatis officia prosequi consuevistis, et quantum in vobis est, in id enixe incumbitis, ut in dies bonarum artium splendor augeatur.

Acerba quidem ac permolesta semper fuit eorum querela, qui in Maecenatum paucitatem mediocritatem bonarum artium omnino reiiciunt. Quorum inueterata opinio ne videatur, quasi indicta causa, a nobis velle damnari, eam vobis, quam breuissime potero, in hoc ipso orationis aditu exponam. Quot sunt, distant, hac nostra aetate praestantissimi ingenio viri, qui prope summum scientiarum verticem attigissent, si studiosum ac beneficum ducem hortatoremque sibi aequa obtulisset fortuna? Essent nimirum nostra quoque hac tempestate, qui cum ipso Romanae eloquentiae antesignano de doctrinae principatu dicendique facultate contenderent. Neque

hodie deessent nobis, qui summis illis Poetarum magistris Terentio, Virgilio et Horatio diem indicerent, eosque quasi verbo Praetoris de veteri gloriae possessione deturbarent. Enim vero ubi nunc principes illi viri, bonarum artium firmamenta doctrinaeque praesidium, qui ad alendos sustentandosque literarum cultores ab ipsis propemodum Gratiarum manibus facti esse videbantur? Innumeris quidem clarissimis ac veluti primae magnitudinis luminibus literaria careret Res publica, nisi summo scientiarum bono superiores aetates patronos musarum munificentissimos attulissent. Nam neque Euripidem, aut Pindarum poetica, neque eloquentia Demosthenem, aut Socratem philosophia tantopere praedicaret, cum si omnes tum propter infimum fortunae gradum, tum propter rei familiaris angustiam ad artem potius aliquam facitandam, quam ad literarum otium nati esse viderentur. Memoria quippe proditum est Euripidis matrem vitam vendendis oleribus tolerasse; et quemadmodum tibiicinis filium fuisse Pindarum, ita Socratem ex tenuissima obsetrice procreatum accepimus. Quid vero de Demosthene, qui fabrilis genere ortus in obscura ferramentorum officina a parentibus susceptus fuit atque educatus? Quamobrem quae diuinis adeo ingeniis otia studiorumque rationes pertenuis fortunae paternae census denegauerat, his cumulatissima ac plane regia donauit Maecenatum beneficentia. Etenim Macedoniae Rex, Archelans Euripidem, Pindarum vero Hieron, Syracusanus, aluit summaque liberalitate complexus fuit; ac sicuti diuinum quoddam tutelae numen in praeclearissimo Graecorum Imperatore Alcibiade inuenit Socrates, ita singulos Reipublicae Atheniensis ciues Statorem quasi Iouem Demostheni fuisse non ignoramus.

Et quidem rei literariae hostem importunum, feralem acerbissimumque, domesticam egestatem esse non putet, qui minime videt, quot praeclara ingenia in dies conficiat exterminetque publicae, aut priuatae inopiae calamitas. Quis eum, cui res domi angustior sit, magnopere curet purioris latinitatis elegantias ex Plauto, vel Terentio seligere, aut Aequiponderantium leges cum Archimede, aut sectionum Conicarum acumina cum Apollonio contemplari, aut denique Democriti, seu Aristotelis opiniones inquire? Acrior illi profecto inest sollicitudo de minuenda rei familiaris difficultate, quam de excolenda augendaque eruditio; studiumque ponet vehementius in noua aliqua victus sibi comparandi ratione, quam in perscrutando ex antiquitatum rudieribus, quaenam fuerint Graecorum leges et instituta, quinam vetustissimi Urbis huiusce ritus, mores atque consuetudines. Quotidiana siquidem ac permolesta alendae vitae cura, praeterquam quod meliorem diei partem de literaria contemplatione detrahit, illud etiam affert haud vulgaris incommodi, quod virum, honesto loco natum, ita commouet ac perturbat, ut deinceps optimarum artium studio imparem se omnino sentiat minimeque idoneum. Quod quidem malo didicit suo officina illa leporum atque elegantiarum Ouidius, quem promptiori ad carmina ingenio, quam vnumquemque nostrum ad verba adeo fuisse legimus, ut vel eius ore nunsae, vel ipse musarum ore loqui putaretur. Is enim ubi primum amandatus in Pontum egestatem afflictaeque domus praesensit calamitatem, se statim non tam Diis penatibus, fortunis, coniuge liberisque destitutum, quam ingenio ac diuina illa mentis ubertate exhaustum confectumque ingemuit; cum ne meditatione quidem diu-

turnoque studio ea consequi posset, quae antea sponte sua ac propemodum ipso iuuito effluere videbantur. Quod sane admirationi tantam iis esse poterit, qui non intelligant, eam esse studiorum naturam, ut animum sibi ab omni perturbatione vacuum maximeque tranquillum postulent. Neque alia de causa crediderim veteres in edito monte musis domicilium posuisse, quam quo clarius significarent, supra omnem curarum aleam illos esse oportere, qui optimis disciplinis solenne dixissent sacramentum. Quo pacto igitur studiis praestantioribus ii operam nauent, qui perpetuis curarum iactantur fluctibus, neque ullam habent, in quam se recipiant, quietis ac tranquillitatis stationem? Qua ratione ea ipsa studia, quae primis veluti lineamentis ac rudi penicillo leuiter adumbrauerant, aliquando absoluant atque perficiant, nisi possint horam exiguan per honestissimum otium traducere?

At vero dubia hic vestrum ora haud obscure illud indicare videntur: esse nimirum in hac Vrbe totaque Italia innumeros paene viros, qui cum non minus praestantissimum a natura ingenium, quam opulentas a maioribus suis facultates otiumque acceperint, singularis tamen doctrinae laude supra vulgus haudquaquam excellent. Praeterea plura hodie in tot religiosis familiis, quam olim Athenis, scientiarum patere lycea, quae hominibus ingenio pollentibus literarum otium solitudinemque praebeant abundantissime. Immerito igitur domesticae difficultati, aut Macenatum penuriae vertitur, si plerique eorum, qui primos in literis ordines ducere potuissent, gregarios inter milites agant. Ac propterea quod illi modico eruditi, quod semidocti in literatorum plebe numerentur, eorum profecto vitio dandum, quod ad alta nati humi  
reperere

reperere malint, et excellentius quicquam audere cum possint, minime curent. Quid? minime curent? Equidem curarent, opinor, si propofitis praemiis, ac veluti sublato ad meliora sperandum signo, cohortarentur et ad studia sua diligentius expolienda, ac magis accurate cogitateque limanda inflammarentur. Quemadmodum enim Miltiadis Imperatoris tropaea Themistoclem ad praecleara facinora e somno excitant; ita innumeros fere homines per hosce dies videremus, qui veterino excusso, pro aris focisque decertaturi in arenam summa literarum gloria descenderent. Verum si quis forte in ea opinione versetur, quod ad promouendam doctrinae laudem satis superque sit hominibus ingenii vim, quietem otiumque suppetere, praemiorumque spe nulla optimas disciplinas ali posse atque augeri; is plane studiorum indolem doctrinaeque naturam minime nouit. Neque enim scientiarum iter tam planum, aut ita violis rosisque confutum esse quisquam prudens existimauerit, ut illud percurrentibus nulla reluctetur difficultas nullusque labor. Quocirca vos, Patres amplissimi, et quotquot hic adestis bonarum artium aut aedificae, aut professores, testes appello. Vos quippe diuturno didicistis experimento, quam negotiosam grauissimamque prouinciam is subeat, cui in liberali aliqua facultate principatus tenendi cupiditas innascitur. Praetereo siquidem omittendas esse, ut admonet disertus M. Tullius, voluptates omnes; et non modo ludum, iocum atque conuiuium, verum etiam sermonem ipsum omnium paene familiarium deferendum. Praetereo, illa eadem delectationis studia relinqui oportere, quae cum naturalem quandam cum ingenio cognationem atque affinitatem habeant, si deferantur, maximum, et incredibile sui

creant desiderium. Mitto, inquam, haec omnia tanquam nullius, aut perexigui putarentur esse momenti. At quis non intelligat, quot annos ad primas doctrinae laudes consequendas in literario pulvere vehementer enixeque sit defudandum? Quot labores molesti ac difficiles ineundi? Quot dies noctesque permagno valetudinis incommodo summoque etiam nonnunquam vitae discrimine libris rerumque contemplationi inhaerendum? Nam quae tam firma corporis valetudo, aut tantus animi vigor, quem pertinax studiorum contentio paullatim infringere non soleat atque omnino labefactare? Dubitari plane non potest, quin ex ipsa studiorum assiduitate importuni saepe ac maxime periculosi procreentur morbi, qui aut vitae curriculum intercipient, aut vires tam grauitate conficiant, ut cum iisdem ad extremum vsque spiritum necesse sit misere colluctari. Quod igitur non solum maximis laboribus, sed etiam dura corporis afflictatione summoque capitis periculo comparari debet, tamen in eo honestas sit plurima, raro homines, praemio nullo proposito, persequuntur. Quinimo plerique ab ipso prorsus abhorrent, quod scilicet vitam, qua mortalibus nihil potest esse iucundius, ea viuendi consuetudine perditum iri intelligant.

Satis igitur opportune Romana Respublica tot tantisque honoribus amplissimisque praemiis rei militaris studium cumulauit, ut in illis summatim et quasi compendio recensendis Alexander ab Alexandro, Rosinus, Lipsius, Graeuius alique complures integra paene volumina confecerint. Nouerant quippe sapientissimi viri ad eiusmodi vitae genus laboris maxime plenum ac periculi, nisi homines praemiorum nouitate ac magnitudine allicerentur, perpauco fore, qui tam grauem ac per-

riculosam viuendi rationem pro salute ciuium, aut sola gloriae cupiditate susciperent. Cum itaque literarum studia diuturnitate laborum militarem disciplinam facile superent; neque minus ex hac domestica et umbratili studiorum exercitatione ac pugna, quam ex hostium medio agmine sit capite periclitandum, mirum non est, si fere nemo reperiatur, qui sola gloriae spe nulloque praemio ductus tam difficilem ac plenam aleae prouinciam subeat. Fuit, fuit quondam ista in literaria Republica virtus, ut pro literis homines non modo bona, fortunas ac patriam, sed ipsam quoque vitam, si opus esset, constantissime offerrent; neque aliud praemium, quam doctrinae laudem, aut praeclaram quampiam veritatis notitiam quaerent. At relanguit iam pridem vetus ille studiorum ardor gloriaeque cupiditas, quam nisi tempestiue Maecenatum beneficentia excitet atque inflamet, de literis actum erit omnino. Quapropter quod ipsae nunc apud exterarum nationes, ubi olim in sordibus situae iacuerant, potissimum vigeant, quod mirum in modum efflorescant, id sane singularis munificentia praestitit potentissimorum Principum, qui, vel inter diuturnos bellorum strepitus, et quotidianas armorum sollicitudines, optimas disciplinas ali ac foueri posse, raro quodam liberalitatis exemplo, demonstrarunt. Quamobrem nisi veterem Italiae gloriam cum exteris gentibus in contentionem literariae existimationis vocare iniquum esse videretur, aut me, hominem in Italia natum, eas ipsis doctrinae primas, quas illae sibi arrogantis fortasse tribuunt, vltro velle permittere; hic iam in medio proponerem, quousque apud illas regiae beneficentiae cumulus bonarum artium fortunam amplificauerit, et ad summum prope honoris gradum euexerit.

Nullam quidem ex ingenuis artibus scientiarumque ordine esse videretis, quae nova aliqua gloriae accessione non prodiret ornatio longaeque illustrior. Videretis Ecclesiasticam historiam antiquis expletam anachronismis dubiisque locorum anfractibus expeditam ad exactissimas Chronologiae leges ac Geographiae normam optime restitutam. Videretis Theologiae maiestatem iam inanum quarundam quaestionum labe vindicatam, ac Sanctorum Patrum praesidio ita communitam, ut deinceps bacchanti hostium audaciae non sophistarum nugas, sed sanctissimorum hominum religionem, non leuium syllogismorum ratiunculas, sed solidam Catholicae veritatis doctrinam opponat. Quid vero Geometriam, quid Analyticam, Mechanicam, Astronomiam ceterasque Mathematicas disciplinas, quas omnes eo amplitudinis euectas esse prospiceretis, ut audeant iam ad veterem Graeciae gloriam prouocare? Quid multiugem Romanarum Graecarumque antiquitatum eruditionem, critices studium ac paene omnium notionem linguarum? Et quidem earundem omnium bonarum artium hanc vnam esse vocem audiretis orationemque communem: Quod nos, vetustatis squalore polito, splendidiorem faciem viuidioremque consequutae simus, quod tot tantisque auctae ornamentis ad maximum et vix optandum dignitatis fastigium peruenerimus; id non tam cedit in laudem doctissimorum hominum, qui nos multo labore multisque suis vigiliis expolire et elegantius ornare conati sunt, quam singularis beneficentiae nostrorum Principum, qui amplissima dona in literatorum sinum largiori manu effuderunt. Horum sane liberalitas clarissimos vndique professores exciuit, qui nos iacentes erigerent erectasque magnificentius exornarent. Horum beneficio acceptum referimus

referimus domicilium, quò nos extorres egentesque perbenigne receptae sumus. Horum largitati opes, fortunas, honores: horum studio. Sed satis, iam satis. Haec enim, Auditores, non tam mea, quam eorum, qui bonarum artium mediocritatem Maecenatum crimini vertunt, vetus ac permolesta fuit oratio. Quae cum meliorem partem temporis eius, quod mihi definitum fuerat ad dicendum, surripuerit; video iam me iis premi angustiis, ut, ne diutius abuti videar patientia vestra, eorum, quae initio dicenda mihi proposueram, necessario compendium faciam. Illud itaque primum contendo in hac Vrbe, praecipua bonarum artium sede, huiuscemodi querimoniae locum nequaquam posse patere. Si quis enim ea esset audacia, ut assereret, vilo vnquam tempore in Vrbe Roma defuisse certissimos munificentissimosque literarum fautores, hunc impudentiae ac mendacii grauiter coarguerent haec ipsa saxa ac parietes, qui summam Leonis X. beneficentiam erga optimas disciplinas testatam maxime faciunt; atque omni posteritatis memoriae praedicant, Leonem X. ad perpetuum literarum ornamentum Romanum hoc Archigymnasium instaurasse, ac bonarum artium magistris perampla decreuisse stipendia. Deinde etiam, reliquorum Summorum Pontificum serie ducta, nullo negotio demonstraretur, Romae literas potius deesse potuisse, quam literis patrocinia. Quis enim, ut antiquiores aetates missas faciam, Gregorios, Urbanos, Alexandros, Clementes, Innocentios, Pontifices Maximos, memoria repetat, qui in illis praesidium ac firmissimum propugnaculum literas habuisse non videat? Quid vero nunc de Clemente XI. Pontifice sapientissimo ac bonarum omnium artium amantissimo? De quo in hac re praesertim tamen, ut

de Carthagine ait Sallustius, tacere satius sit, quam pauca dicere, nemini tamen vestrum obscurum esse arbitror, illum tam bene de optimis disciplinis iam esse meritum, ut quas aliorum Summorum Pontificum immortalitati statuas, signa ac monumenta in Capitolio ceterisque publicis in locis Senatus Populusque Romanus posuit; vel quod illi elegantiorum Urbis formam induxerint atque ampliore, vel quod veteres obeliscos, aut marmoreas columnas ad eam ornandam erexerint, vel tandem quod vberissimis aliunde deriuatis aquis, non tam fontes, quam flumina in Urbem commode inuexerint; eae omnes Clementi XL. cum iis nominibus, tum maxime literarum titulo, tanquam literarum earundem literatorumque parenti beneficentissimo excitandae esse videantur. Etenim quanam opes, qui honores, qui magistratus, aut quae dignitas in Vrbe fuit, quam a studiosissimo literatorum Principe consequi non potuerit qualiscunque honestissimam bonarum artium commendationem cum integritate morum coniunctam prae se ferret, etiamsi homo exteris ac transalpinus hospes Romam aduenisset? Quocirca illud satis sit dicere, quod Purpuram ipsam, maximum ac singulare Pontificiae amplitudinis praemium, eloquentiae ac doctrinae venalem fuisse expositam vidimus.

Quae cum ita sint, Auditores, superest iam, ut eo, quo altera orationis pars sponte sua vergere videtur, animum intendatis, dum breuissime doceam, quonam pacto vnusquisque literatorum sibi et studiorum suorum comparare possit vindicem ac patronum. Quod quidem statuo nemini fore difficile, si labore industriaque conetur doctrina ac literis inter ceteros eminere. Sit enim quispiam latini sermonis elegantia politus, aut singulari dicendi facultate ornatus,

feu mathematico in puluere egregie versatus, hunc procul dubio principes viri honore prosequi, hunc ciuitates publica quasi legatione accersere, hunc reges maximis praemiis ad se pertrahere summo studio ac voluntate certabunt. Quod sane argumentum non modo antiquioribus repetitis exemplis, verum etiam recentissimis rebus plenum omnino facere possem, nisi aut doctissimorum hominum amicitiae nimis tribuere, aut eorum existimationi de industria blandiri velle viderer. At quos tandem quaeso litteratorum prae ceteris maiores nostri fouere, summoque loco habere consueverunt, nisi eos tantum, qui ingenio doctrinaque magnopere excellerent? Platonem quidem tantam a Dionysio Syracusano gratiam iniisse compertum est, ut ei, Syracusas aduenienti, non solum Rex idem obuiam ierit, sed etiam regali rheda, cuius Rex ipse moderabatur habenas, exceperit, ac triumphali plausu ingentique populi acclamatione ipse urbem aduexerit. An Cliniae, an Tymaeo, aut Philolao aliisque sexcentis, qui per illud tempus in maxima frequentia erant philosophi, obuium se dedit Dionysius, curru recepit suo, et ad ampliore triumpho celebritatem idem ipse regio paludamento ornatus aurigam egit? Tanta profecto honoris amplitudo nequaquam iis defertur, qui philosophantur in triuiis, aut barba tenus philosophi, ut ait M. Tullius, existimantur; sed illis sine controuersia debetur, qui optimarum rerum cognitione atque exercitatione philosophi personam grauissime sustinent. Vnus itaque Plato honorificentissime excipitur, vnus opibus fortunisque a Syracusano Rege cumulatur, quod vnus inter ceteros praestantiori doctrina caput extollat, quod vnus ingenii ac philosophiae princeps, quod denique vnus tantam sibi apud omnes conciliauerit aucto-

ritatem, ut ipse Romanus orator cum Platone errare, quam cum aliis philosophis vera sentire maluisset. At fortasse id temere factum, et ad Platonis fortunam plus habuit momenti libido Principis et arbitrium, quam sapientiae singularis praerogativa. Ac proinde quod quispiam, quemadmodum Plato, aliquem studiorum suorum vindicem habeat liberalissimum, id non tam doctrinae conditioni, quam praeclaro fortunae beneficio tribuat necesse est. Ita ne vero? At Reipublicae litterariae annales diligentius euoluant, qui hoc modo ratiocinantur. Id vnum aetatum omnium consensu atque auctoritate firmatum inuenient, eos videlicet tantum gratia ac liberalitate Principum floruisse, qui non litus legere, sed in altum disciplinarum prouehi minime dubitauerint. Heroicis enim illis bonarum artium temporibus, in quibus cum eadem insigniter vigerent, tanta quoque erat philosophorum poetarumque copia, ut sicuti exercitus in legiones et cohortes, ita illi in lectas ordinesque diuiderentur, eos duntaxat apud primarios viros omni humanitatis officio receptos fuisse accepimus, qui earundem bonarum artium haberentur instar imperatorum. Patebat quidem Caesaris Augusti domus clarissimis poetarum duceb. Publ. Virgilio et Q. Horatio, quam tamen Chaerilis et Cluuienis aliisque eius notae versificatoribus patuisse non legimus. Cum illis scilicet, quod et acumine ingenii et elegantia styli ceteris palmam eripuissent, humanissimi Principis familiaritas omnis erat atque coniunctio: eorum aspectu, sermone atque consuetudine frequentissime recreabatur.

At piget me tamdiu exemplis huiusmodi esse immoratum, qui rem ipsam statim oculis subiicere quodammodo potuissem. Quid quaeso est, Auditores, quod ex popularibus hisce artibus ea ipsa,



ipsa, quae aliis fructus insignes contulit, eadem aliis decoquere soleat nulloque esse adiumento? Nam quotidie videmus nonnullos caelandi, aut pingendi studio haud mediocres sibi fortunas comparasse, quibus artibus alii vix tantum pecuniae trahant, quantum tolerandae quomodo vitae sit satis. Nonne discrimen hoc ex eo potissimum ducitur, quod cum illi praeclari castigatique opifices, hi contra mediocriter in ea facultate versati esse existimentur, si quod affabre accurateque elaborandum sit opus, reiciuntur hi, inuitantur illi, ac perhonorifica mercede proposita conducuntur? Studiosos itaque sui ac paene dixerim Maecenates habent caelandi, aut pingendi artes, modo eae vulgares nequaquam esse censeantur. Vtilitatis afferunt plurimum, non inficior; sed iis tamen, qui ingenio industriae ad eandem artium principes propius accesserint. Praeterea florentissimae illae duae artes, Medicina ac Iurisprudentia, in quibus prae ceteris omnibus, ut sermo communis inualuit, opes maximas atque honores fortuna collocasse creditur, an tales sunt, ut earum praesidio homines honori opibusque feliciter velificentur, tametsi iisdem leuiter tincti nulum sibi nomen existimationemque confecerint? Fautores certe non habent plurimos, qui aegrotos medicaminibus, aut qui legum formulis iugulant patrimoniam. Verum qui in istiusmodi facultatibus praestantissimi recensentur, eos gratiam inire auctoritatemque, apud optimates sibi conciliare videmus, eosque ad amplificandas fortunae copias, aut ad honores maximos consequendos viam sibi munire expeditissimam. In quo quidem orationi meae firmiorem, quam opus sit, fidem compleres, quos hic video esse, viri clarissimi exemplo suo satis commode faciunt. Quemadmodum igitur quod eius generis artes nonnul-

lis fructuosae non sint, imo potius iacentes ac steriles, impudentia singularis esset, id non tam professorum mediocritati, quam earundem artium vitio, aut iniquissimae temporum conditioni tribuere; ita fere intolerabilis videtur esse eorum audacia, qui ex leui quadam literarum umbra cum neque opes, neque fortunas trahere poterint, literas ipsas iacere clamitant, nullosque per hosce dies inueniri bonarum artium patronos, nulla superesse studiorum praemia. At desinant tandem aliquando, desinant per Deum immortalem tam impudenter ac stulte conqueri. Ipsi profecto iacent, non artes. Iplis utpote feriatis remissisque ingenii desunt semperque deerunt patrocinia, nunquam vero strenuis literarum cultoribus. Praemia nulla extant; sed ipsis mehercule nulla, qui oscitantes ea consequi neque labore, neque industria conantur. Excellendum est itaque praestantiori disciplinarum studio, excellendum: tum vero deesse non poterunt praemia, neque fautores munificentissimi; cum minime defuerint in hac Vrbe, ut recentiores consulto praeteream, Francisco Philelpho, Pomponio Laeto, Iano Parrhasio, M. Antonio Mureto sexcentisque aliis, primariae eruditionis viris, qui egregia quapiam doctrinae laude floruisse; cum memoriae traditum sit eundem Muretum Romae ad politioris literaturae et eloquentiae ornamentum annuo fuisse mille aureorum stipendio Gregorii XIII. liberalitate donatum. Non defuerunt, inquam, non solum ingentes opes, sed etiam amplissimae dignitatis splendor Petro Bembo, Iacobo Sadoletto, Guilielmo Sirleto, Caesari Baronio, Roberto Bellarmino aliisque quamplurimis; qui quandoquidem eruditionis ac doctrinae praestantia se supra ceteros extulissent, Summorum Pontificum providentia, sedula fem-

per meritorem indagatrix, fecit, ut dignitatis quoque amplitudine ac purpura supra ceteros eminent.

Quae cum ita se habeant, vos iam probe intelligitis, Adolescentes optimi, quousque vestra duenda sint studia, quo aetatis, quo induitiae nervos intendere oporteat, ut studiorum fructus feratis locupletissimos atque pulcherrimos. Non vulgaris doctrinae ratio, non popularis quaedam mediocritas, sed summus scientiarum apex fortiter est attendendus, si optimas disciplinas maximo vobis usui et ornamento esse velitis. Quamobrem ne patiamini ab suscepto studiorum cursu deduci, aut saltem industriam vestram retardari ex pernicioso eorum sermonibus, qui vulgato quasi proverbio distant, iam bonarum artium studia profligata esse ac prope deposita, quod neque sint hac nostra aetate literarum praesidia, neque vlla: ut olim proposita musis praemia. Contemnite, obsecro, ac pro nihilo ducite querelas eiusmodi inanesque clamores. Sunt equidem Romae, sunt maxima literarum praemia, sunt studiorum fautores propugnatoresque gravissimi, neque defuerunt unquam: et si antea defuissent, certe Clemente XI. Pont. Max. non deerunt; qui cum sit et

omni doctrinae genere cumulatissimus, et tot iam tantisque argumentis voluntatem suam in bonarum artium studia significauerit, omnem vobis profecto dubitandi locum eripuit, quia Romae ad opes, ad magistratus, ad imperia, ad purpuram etiam ipsam innocentia vitae ac doctrinae nobilitate assequendam aditus uniuersis pateat amplissimus. Cum igitur tam liberum unicuique vestrum sit beneficentissimi Principis animum promereri, quam literis et eruditione excellere; iam plane cognoscitis, Maecenates vobis minime defuturos, nisi per otium inertiamque vobis vos ipsi defueritis. Quod quidem eo grauius esset reprehendendum, quo maior est horum clarissimorum diligentia professorum, quorum labores in hoc Romano lyceo utilitati vestrae feruiunt, quorum conatus omnes, vigiliae ac studia ad vos ornandos erudiendosque maxime referuntur. Vestrum igitur sit, pari animi cura ac diligentia efficere, ut eorundem labori industriaeque maximus in vobis vberimusque fructus respondeat; atque hinc ea consequi possitis dignissima praemia, quae vobis non minus Romani Pontificis beneficentia, quam doctrinae amplitudo ac praestantia pollicentur.



DE  
LAUDIBVS  
LEONIS X.  
IN  
ANNIVERSARIIS EIVS  
PARENTALIBVS  
ORATIO III.  
HABITA VIL IDVS FEBRVARII  
AN. MDCCXIV.

Sanctissimo Domino Nostro

CLEMENTI XI.  
PONT. OPT. MAX.

PAVLINVS A S. IOSEPHO

SCHOLARVM PIARVM.

**T**ANTVM adest, ut conquirendae sint causae, cur tuo potissimum nomini, CLEMENS, Pontifex Maxime, hanc Orationem inscribam, ut, potius suae argumenti magnitudo, siue loci, ubi habitata est, dignitas spectetur, ea iure suo omnino ad te pertinere videatur. Beneficentiam quippe illam et amorem erga bonarum artium studia plane singularem, quem in Leone X. suscepimus et admirati sumus, equis in te pariter maximum et flagrantissimum esse non videat? Neminem profecto latet, optimas disciplinas per omnem tibi aetatem usque eo a prima pueritia in deliciis fuisse et amoribus, ut deinde in omni fortunae gradu iu magis semper quam tibi met vixisse videari. Itaque non est, cur miremur, quod hoc ipsum Romanum Archigymnasium, per antiquum bonarum artium domicilium, tam sapienter splendideque a Leone X. instauratum, a te eximio diligi tibi quae praecipue cordi esse intelligimus. Quin etiam, si per summam turbulentissimorum temporum difficultatem id licuerit, aliquando fore speramus, ut quam olim in amplissimo hoc loco sub Leone consequutae fuerunt optimaes artes celebritatem, ea, te Pontifico, desse nullo modo possit. Quod plane efficies, si ea ipsa, quae ad sempiternam Academiae huius dignitatem praesidi, quoque Leo sapientissime decreuit, quaeque iam nonnihil temporum vicissitudo immutauit, pristino iuri restitui. Hinc enim erit, ut quae per Orbem uniuersum latissimae Archigymnasii huius peruagata est fama, sub literatissimo Principe maxime vigeat; neque sit, cur Leonis aetati, quae aurea literarum aetas fuisse dicitur, nostris hinc temporibus quiquam inuideat. Quod profecto si semel eueniat, quibus tum laudibus nomen tuum ad caelum efferemus? Quas immortales gratias haec tibi nostra Academia publica auctoritate quotannis persoluedas statuet? Sed ut ut haec sint, ego u plane non sum, qui ventura tempora recentioresque causas consectari debeam, propter quas me tibi quam maxime obstrictum esse profitear. Tot iam praeclara in me meritum tuorum suppetunt argumenta, ut ingratus omnino essem atque immemor, nisi ea, quae acceperim, quanti a me facienda sint, satis agnoscerem, idque aliqua saltem significatione testarer. Quorum vero praecipue beneficiorum nomine? Eorumne, quibus nostrum Scholarum Piarum Ordinem tam liberaliter cumulasti tot praesertim Seminarium, aut Collegium, Albae, Cortonae, Rheatae, Amalphi, Urbini beneficentia tua insigniter amplificatum? Magna quidem sunt haec ac sane digna, ut noster ipse Scholarum Piarum Ordo uniuersus te parentem beneficentissimum perpetuo et agnoscat et colat et veneretur. Cum tamen mihi cum nostratibus omnibus communia ea sint, non tam priuati

privati unius hominis, quam commune omnium exigunt grati animi monumentum. An igitur beneficii eius quod proprium est, nomine gratias agam, quod videlicet perhonorificam mihi eloquentiae in hoc Romano Archigymnasio provinciam dederit, ac me nominis prope nullius hominem ad summam huiusce loci celebritatem euexerit? Id certe, siue ingenii mei mediocritas siue loci huius, qui eloquentissimo cuique semper patuit, amplitudo spectetur, maius est, quam tibi unquam pater pro beneficio gratias agere possim. Longe tamen maius est aliquid, quod splendore suo cetera obruit, et quod mihi maximi ac praecipui beneficii loco semper erit, diligentiae scilicet industriaeque meae demandasse ornatissimum et ad virtutis indolem plane factum suum, fratri tui filium, ALEXANDRUM, ut in bonarum artium studio ei quasi manus facem praerferrem, et commonstrarem viam, qua per summa quaeque virtutis maiorum suorum vestigia insisteret. Id certe tanti apud me est, ut ceterum omnibus, quaecunque illa sint, beneficium tuis silentio praetermissis, hoc unum potissimum esse censeam, atque hoc tantum uno me gratum ac memorem esse maxime cupiam. Etenim cum non deessent homines, ingenii et eruditionis fama praestantes, qui ad hoc munus obeundum impense studium atque operam profitebantur suam, ea tamen fuit tua humanitas, ut me militem quasi gregarium iis praeferrere velles, qui primos in literis ordinis ducere videbantur. Quamvis autem non ita me ignorem, ut id mihi tribuam, et non tuae potius humanitati, quam tenuitati meae acceptum ferendum esse videam; malui tamen tam praecleari commemoratione beneficii modestiam meam in suspicionem vocari, quam ingratum animi notam mihi eius silentio iniuri. Quia vero id satis esse nullo modo potest, ut aliqua saltem ex parte huiusmodi beneficentiae respondeam, si nulla alia re, at certe industria ac diligentia operam dabo, ut studiorum cursum, multa iam cum laude susceptum, clarissimus idem luuenis ita aliquando absoluat perficiatque, ut tua de me iudicia sustineat; atque ipse perpetuum extet tibi memoris gratique animi mei monumentum.

**S**i vilo vnquam tempore Vrbem hanc ingenti luctu ac moerore propemodum incredibili concidisse putauerim, ut plangor in tectis, in templis aetatum omnium concursus, silentium in curia, vastitas et solitudo in foro, vbique moestissima rerum facies obuerfaretur; tunc, opinor, fuit, cum importunus et vniuerso populo Romano grauissimus rumor percrebuit, Leonem X. Pontificem Optimum Maximum, bonorum omnium votis ac publicae incolumitati repente immatureque fuisse praereptum. O diem bonis omnibus funestissimum! (is, puto, vnus omnium erat gemitus ac comploratio) O acerbissimam et vix plane ferendam calamitatem! O nos miserrimos, qui pastorem vigilantissimum, qui liberalissimum Prin-

cipem, qui parentem optimum amissimus, qualem neque nostra, aut parentum aetas tulit, neque literarum monumentis vlla vnquam effinxit antiquitas! Quid enim excogitari poterat in terris tanti Principis maiestate augustius, quid magnificentius, quid ad gloriam laudemque optabilius? Quamquam non aetas, non sexus, non ordo vilius est, qui lacrymas possit ac doloris impetum coercere, frustra tamen immensum publici parentis desiderium atque enormis iacturae casum, doloris magnitudine exaequari posse speramus, cum hoc vno in funere non modo Europae lumen ingens, sed vniuersae Christianae Reipublicae splendor quam maximus fuerit extinctus. At vero, in tanto privato, tum publico populi

puli Romani lectu qualis, aut quanta esset lamentatio fletusque bonarum artium, cogitatione potius percipi potest, quam satis verbis et oratione comprehendi. Quemadmodum enim liberalissimi Pontificis beneficentia, etsi erga omnes maxima, in optimas tamen disciplinas singularis prope fuerat atque incredibilis; ita nihil illis contingere potuisset acerbius, ac maiori lacrymarum contentione deffendum, quam inopinato importuneque eodem ipso orbari, quem vnum sibi met ab interitu vindicandis reuocandisque ad pristinum gloriae fastigium quasi caelitus demissum acceperant ac venerabantur. Quamobrem singulae, mutata veste, squalore sordibusque moerentes, communis Parentis exequias prosequuntur, diu multumque fleuere. Quid, inquam, fleuere? Imo adhuc hodierno die solenni funeris huius instauratione deffent iacturam Principis immortalitate dignissimi; institutaque quotannis funebri laudatione amplissimas eius laudes beneficiorumque magnitudinem ad gratiam posterorum memoriam traducere summo studio ac voluntate contendunt. Cui quidem grauissimo muni cum saepe alias robustioris eloquentiae viri sese impares experti fuerint; quid ego consilii capiam, qui nuno potissimum de ipsis Leonis X. laudibus ad dicendum surrexerim, cum neque aetate, neque ingenio, neque auctoritate sim cum his, qui sedeant, villo pacto comparandus? Verum cum in hac semper opinione fuissim, inter tot tantasque ipsius Leonis virtutes nullam omnino reperiri, quae sublimi eloquentiae apparatu indigeret ornari, sed satis superque esse, vt earum magnitudo in sui admirationem omnium exigeret animos, illas quasi nudas in medio proponere; hinc est, vt minus necessariam, aut idoneam hac in re eloquentiam futuram esse putauerim, cum Geometria potius ad ipsarum

magnitudinem rerum dimetiendam accommodatior esse videretur. Veniam itaque dabitur, Auditores, si cum ea ipsa, quae necessario mihi sustinenda est oratoris persona, geometrae quoque partes suscepero. Ad hoc enim me, non tam ea, quam mihi ab ineunte aetate Geometriae ipsius studium attulit, delectatio impellit, quam noua quaedam et inusitata magnitudo virtutum, quae specie plane insolita vim omnem superant eloquentiae. Hae vero tametsi in Leone plurimae sint, et omnes de principatu inter se certare videantur, illud tamen, de quo nos praecipue huius amplitudo loci et communis officii ratio opportune admonent, et quod, nobis tacentibus, haec ipsa saxa ac parietes quodammodo praedicant, illud, inquam, est Romani huiusce Archigymnasii egregium ac prope diuinum opus. Quo quidem sapientissimus Pontifex non modo apud populum Romanum, sed apud exteras quoque nationes sibi nominis immortalitatem comparauit. Ad hoc igitur vnum tam praeclarum ac maximum Leonis X. beneficium, quantum et angustia temporis et ingenii mediocritas patitur, accurate designandum et quasi per partes explicandum aggrediar. Cuius, vt tota quanta est, luculentius magnitudo dignoscatur, longitudinem in eo, latitudinem ac profundum perscrutari et quodammodo dimetiri conabor. Vt nimirum celeberrima hac triplici Geometriae dimentione, ex qua rei cuiuslibet magnitudo desumitur, tum vos, Patres amplissimi, tum populus Romanus, tum exterarum gentes intelligant, quam magnum ex omni parte illud sit, quod a Leone X. in hoc vno beneficio acceperint, et quantum pro hoc ipso ab omnibus ei potissimum debeatur.

Nemo tamen sit, qui in praecceptis institutisque Philosophiae adeo me nouum putet ac rudem,

dem, ut nondum satis perceperim, quid intercedat discriminis inter magnitudinem molis atque virtutis. Quamobrem temere et inani quodam conatu ad Geometriae normam et regulam ea dirigere velim, quae cum partibus dimetiendis reuera careant, in longum, latum, aut profundum magna esse, aut dici minime possint. Noui profecto, noui aliam esse virtutis mensuram; neque vnquam ex circini ratione clarissimorum hominum magnitudinem desumendam esse putavi. Quia vero habet quoque sua spatia virtus; et nonnunquam rerum gestarum magnitudine ita excrescit, atque in amplitudinem extenditur, ut longitudinis, latitudinis ac profundi aliquod prae se ferat argumentum; cui alienum et virtutis ipsius naturae parum consentaneum esse videatur; ad geometricam normam eam, quam nobis exhibet virtus, magnitudinem quodammodo reuocare? Magnum itaque siue in longum, siue in latum, siue in profundum illud contemplari libeat, fuisse, dico Leonis X. beneficium, Romano hoc Archigymnasio tam sapienter splendideque restituto. Ab eo tamen, quod geometrico more postremo loco deberet inquiri, exordium video necessario mihi esse ducendum. Non enim tam facile de reliqua tanti operis magnitudine diiudicari posset, nisi primo, quod quantumque in eo sit profundum, liquido appareat. Profecto nonnullis, qui per hos dies hoc ipsum Archigymnasium extrinsecus longeque circumspiciunt, illud euenire solet, quod pueris, tum etiam imperitis hominibus, dnm oculos in solem, aut sidera coniciunt, quotidie euenit. Cum enim neque sensu, neque scientia percipiant, quam vastum ac profundum illud sit spatium, quo clarissima eadem caeli lumina a nobis longissime distant, inepte prorsus stulteque de eorum magnitudine ac mole ca-

tiocinantur. Neque enim in animum sibi inducere villo pacto possunt, compluribus stellarum globis terrae magnitudinem vinci; aut plusquam millies et septingenties, imo plusquam viginti septies millies solem esse terra maiorem. Quod tamen ex accuratiori recentissimorum astronomorum industria ac calculo satis liquido constat. Hand dissimili fere ratione non desunt, qui tam praeclari operis magnitudinem capere, aut complecti animo nequeunt: imo vero de illo impudenter ac temere differunt, quod quam profundum fuerit huiusce rei institutum, minime intelligant. Quod certe intelligerent, si eorum temporum, non tam annalibus, quam luctuosa malorum, quae tunc nobis imminebant, illiade sibi proposita, animaduernerent, in qua rerum fortuna clarissimi huius imperii dignitas, Romanae Ecclesiae iura ac Christianae totius Reipublicae salus versaretur. Viderent scilicet tristissimam Italiae faciem, vndeque fulgore armorum ac strepitu perturbatam. Viderent disseminatas multis in locis perditissimorum hominum opiniones, prouincias ab auctoritate Romani Pontificis improbe discedentes, surgentes vndique ac per omnia propemodum Christiani nominis regna peruadentes impiorum dogmatum pestes; vnoque verbo, res nostras iam illud adductas fuisse discrimen, ut non iam de proferendis imperii finibus, sed de Italiae ipsius possessione, de nostris hisce aris focusque certaretur. Quid igitur consilii Leo X. capiendum sibi esse duceret, qui in maximis eiusmodi turbinibus ac periculosis fluctibus Ecclesiae nauim gubernaret? Quam salubriorem, aut probatam magis tam multis grauissimisque vulneribus medicinam afferret? Nulla profecto visa fuit opportunior, quam bonas artes ubique tunc fere iacentes erigere. Hanc vnam proximam et quasi compen-

compendiariam censuit fore viam ad tuendam templorum religionem et Ecclesiae dignitatem vindicandam: his telis atque armis improborum hominum conatus ac vim nefariam infringi posse ac repelli.

Et quidem non modo vetus est et sapientum omnium firmata iudicio, sed cum ipsis paene literis nata opinio, maximam esse in Republica vim literarum; neque aliud quicquam praeter literas ad tuendam populorum felicitatem plus habere momenti. Quod praeclare olim cum Mitylenaei intelligerent, eas, quas semel armis subegissent gentes, nulla alia, ut auctor est Aelianus, multabant poena, nisi ut liberos suos omnino arcerent a literis: omne illis praefidium se sustulisse rati, ubi tantum literas sustulissent. Quorum consilio certe haud minus improbe ac malitiose fecit nefarius ille Christiani nominis proditor atque desertor infestissimus Iulianus Imperator, qui quo certiores sibi ad Christianam religionem funditus enerendam muniret viam, iis, qui Christianae eidem religioni sacramentum dixissent, literarum studia grauissimorum suppliciorum metu interdixit. Nouerat quippe homo, apprime callidus ac vaser, in optimis disciplinis situm esse firmamentum religionis ac Christianae rei propugnaculum: quamdiu vero ea studia florerent, religionem ipsam oppugnari minime posse, aut labefactari. Ex quo iam probe intelligitis, Auditores, quid sibi proposuerit sapientissimeque cogitauerit Leo X. cum in maxima eiusmodi perturbatione summoque Christianae Reipublicae tempore bonarum artium studia iam tum profligata ac prope deposita ab interitu vindicare, atque illis sedem et domicilium in hac Vrbe potissimum restituere aggressus fuit. Non inane aut vulgare aliquod, sed grauissimum suscepit negotium, cum de inferendo nefa-

riis hominibus acri ac perpetuo bello, cum de tuenda Romanae Sedis auctoritate, de propugnanda sacrorum religione negotium suscepit. Quae quidem omnia cum bonarum artium studio ac dignitate cum maxime coniuncta esse intelligeret, ea se satis feliciter consequenturum sperauit, ubi ipsamet studia in hanc amplissimam imperii sedem atque Urbem omnium principem reuocasset. Ne cui vero haec ad augendam bonarum artium estimationem de industria a me dicta esse videantur; cogitate mecum, Auditores, qui tum Romanae Sedis hostes, et quibus praecipue armis nefarium Ecclesiae bellum intulissent: homines scilicet, qui in Graecis, Hebraicis Latinisque literis maxime versati, atque omni eruditionis genere summopere instructi, non minus ipsis bonis artibus, quam audacia ac furore armati, ad omnia tum humana, tum diuina sursum deorsum pro libidine pertrahenda, impudentia plane singulari abutebantur. Quorum partim cum peruersis distortisque sententiis sacrarum literarum sensum auctoritatemque perturbarent; partim pestilentissimis editis commentariis populorum animis perniciosas infererent opiniones; partim denique concionum impudentissimarum vi et frequentia vrbes ac prouincias ab ipsis Romanae Ecclesiae sinu complexuque diuellere conarentur: vnus tamen omnium erat furor, eoque communis spectabat improbitas, ut subdole exteris gentibus persuaderent, Urbem Romam, Catholicae olim veritatis magistram, in summa nunc literarum ignorance versari, atque ibi omnia iam pro auaritia ac libidine, non aequo iure ac doctrina, ut olim, consueuisse tractari. Ac proinde, Vrbe ipsa iam omnino relicta, ad externas nationes germanam ac veram commigrasse pietatem et religionem; seque vnos tum diuinitus



nitus fuisse oblatos sacrarum literarum magistros ac duces, qui in literarum ipsarum studio fere omnem traduxissent aetatem, qui sapientia ac multiplici eruditione florerent, qui denique omnium prope linguarum notitia maxime excellerent.

Vt igitur impudentissima istiusmodi ora occluderet Leo, atque iisdem armis, quibus in Apostolicae Sedis existimationem ac dignitatem nequissimi hostes impetum fecerant, in certamen descenderet, eosque quasi proprio ipsorum ense iugularet; non modo suum esse duxit, tales sibi deligere viros, qui doctrinae et eloquentiae partes pro eiusdem Sedis Apostolicae maiestate gravissime sustinerent, sed clarissimis quoque vndique accitis bonarum artium professoribus, arcem hanc disciplinarum munatissimam excitauit. In his itaque castris stipendia mereri voluit gubernatricem vitae ac ducem Philosophiam, qua, vt praeclare Tullius, vir bonus et fortis efficitur, quaque Plato nihil praestantius hominum generi a Diis immortalibus dari potuisse censebat. Hic firmissimum illud Catholicae religionis propugnaculum posuit Theologiam, qua nihil praeclarius, nihil diuinius. Hic sacrarum literarum historiam, vtriusque iuris doctrinam, linguarum fere omnium studium. Quonam vero euentu, quo auditorum numero, aut quantae bonarum artium gloria, illud satis sit dicere, optimas disciplinas tantum hic breui assuetas fuisse celebritatem, vt, teste Paulo Iouio, Romanum hoc ipsum Gymnasium, neque Bononiensi, neque Patauino, vel doctorum praestantia, vel auditorum concursu, concederet.

Quantum vero laudis Leoni X. apud omnes hinc accessisse putamus, quod scilicet tam sapienti consilio peruulgatos improbitissimorum hominum sermones abruptisset, constitutisque

in hac Vrbe optimis disciplinis, dignitatem Romanae Sedis, sacrarumque scripturarum auctoritatem non propugnasset modo, sed etiam quodammodo restituisset? Profecto propter vnam hanc ipsam studiorum instaurationem, communi omnium opinione, vsque adeo de hac Vrbe, de his templis atque aris fuit optime meritus, vt plurimi et grauissimi viri in ea sententia fuerint, illum iis omnibus praefarendum esse Romanis Pontificibus, qui multis ante annis tuendae amplificandaeque religionis gloria magnopere claruissent. Quod enim alii sanctissimas statuerint leges, ad improborum frenandam audaciam, siue ad populorum vtilitatem promouendam; alii vero, vt rem Catholicam, si qua in parte nutaret, tempestiue stabilirent, aut stantem erectamque opportune firmarent, vniuersorum Patrum concilium aduocauerint, in eoque multa sapienter ac diuinitus instituerint; quod denique alii propugnandae Christianae Reipublicae studio parauerint classes, copias instruxerint, ac sese in Principum Regumque foedera adiunxerint, magnam reuera et sapientiae et religionis famam sibi comparauerint: et nemo vsque eo perfrictae frontis erit, qui illos summa laude ac praedicatione dignos esse minime fateatur. Tamen si quis rem subtilius pergat inspicere, neminem istorum cum Leone ob eiusmodi meritum famam villo pacto conferendum esse cognosceret. Nam praeterquam quod praeclara eiusmodi facta ad eos Romanos Pontifices non ita pertinent, vt cum Leone quoque communia non intercedant; cum ipse et plurimas et grauissimas sanciuerit leges, cum Lateranense Concilium a Iulio II. inditum atque inchoatum et sapienter prosequutus fuerit, et feliciter fausteque compleuerit; cum denique ad propugnandam tum Ecclesiae tum Italiae libertatem, non modo frequenter poten-

potentissimorum Regum amicitias sibi comparauerit, sed pertinacis quoque ingenii Principes, quique dicto minus audientes fuissent, omni prorsus imperii iure abdicauerit. Id tamen quo reliquis palmam eripuit, et quo ei prae ceteris haec Vrbs, haec moenia ac religio tribuere plurimum debent, sine controuersia fuit, optimarum artium studia in hac ipsa Vrbe amplissime restituisse. Nam quae tanta vis ad seruandam amplificandamque religionem siue in legibus, quas tempore saepe abrogari videmus, siue in armis, quae saepe irritae, saepe etiam poenitendo inferuntur euentu, continetur, quanta ea est, quae in bonarum artium institutione ac disciplina ponitur? Eae siquidem sunt, quae nos, de ipsa prope nutricis sinu acceptos, sapientiae lacte nutrint ac fouent. Eae sunt, quae puerilem aetatem ad humanitatem et honestatis regulam informant. Eae, quanta sit in virtute dignitas ac splendor, quanta in vitiis labes et turpitude, edocent. Eae denique veram erga Deum pietatem, rebus diuinis reuerentiam, religionem templis, principibus fidem atque observantiam constantissime habendam esse ostendunt. Quae sane si quis semel cum prima vitalis aerae particula ac paene cum lacte ipso penitus imbiberit; tam recte sapienterque reliquam vitae conficit spatium, ut ad virtutis naturam non tam factus, quam natus esse videatur. Haec itaque mens, hoc prope diuinum fuit maximi Pontificis consilium: honestissimas disciplinas in antiquum Urbis huius domicilium, vnde per acerbissimas rerum vires tanquam de sede sua deturbatae fuerant, reuocare, quo vna cum illis integritatem, insitiam, fidem, omnem denique virtutem postliminio reuocaret. Huius quidem sapientissimi instituti rationem postea Tridentini Patres non modo

communis omnium consensione probarunt, sed nihil eo visum fuit opportunius, quodque ad veterem instaurandam adeo tum collapsam Ecclesiasticam disciplinam magis esset accommodatum. Ac proinde, ut tam arduum ac periculosa plenam aleae negotium auspiciato susciperent, non aliunde omen, quam ab ipsa studiorum instauracione vbiq; gentium vtiliter instituenda, quaeri oportere dixerunt. Quamobrem hac de re primo et in ipso rerum agendarum limine, tanquam de causa omnium maxima, praecipue cogitandum esse putarunt, ac tempestive accurateque statuendum. Ex quo satis liquido constat, quam graue tum fuerit de huiusmodi studiis, iam pridem in hac Vrbe a Leone instauratis, hominum sapientissimorum iudicium, et quam profundum illud aestimari debeat opus, in quo religionis praesidium, innocentiam vitae et Ecclesiasticae disciplinae dignitatem Tridentini Senatus auctoritas vsque eo positam esse iudicant.

Iam vero ne longius, quam par est, protrahatur oratio, quanta sit praeclarissimi eiusdem beneficii latitudo, diligenter attendite. Equidem si reliqua Urbis gymnasia, quocunque illa sint, cum hoc omnium principe conferantur; quodnam quaesito est, quod scientiarum multitudinem, quod varietate linguarum, quod denique rerum omnium humanarum diuinarumque vniuersitate quadam ampliore praese ferat latitudinem? Multis quidem aliis in scholis tum Philosophiae, tum Theologiae studia docte ac perite pertractantur. Vbi vero plura Theologorum subsellia, plures Patrum sententiae atque auctoritas? Vbi in tot distributa classes Philosophiae vniuersa? Quid vero dicam de Mathematicis disciplinis? Quid de tanta linguarum multitudine, cum praeter duas illas ceterarum facile principes,

principes, Graecam scilicet ac Latinam, Hebraicis quoque, Arabicis ac Syriacis vocibus domicilii huius parietes quotidie personent? Illud vero, quod maiorem Academiae huius amplitudinem facit, quodque ei singulare omnino tribuitur ac proprium, procul dubio est tum iuris legumque disciplina, tum medendi facultas: quae quidem duo quantam, Deus immortalis! vniuersae Reipublicae vtilitatem afferunt, et quam amplissime per omnia humana ac diuina peruagantur? Ex tanto autem ac tam splendido disciplinarum omnium apparatu, ex tanta scientiarum turba tam multa sunt, quae et in publicum et in priuatum ciuitatis bonum deriuantur praestantissima commoda, vt in iis summatim et quasi compendio recensendis difficilius fortasse sit exitum, quam principium inuenire. Quocunque enim oculos cogitationemque conuerto, nullus mihi fere locus, nullum hominum genus occurrit, cui hoc studiorum emporium vtilitatem aliquam non afferat et emolumentum. Hic enim aetatis cuiuscunque atque ordinis adolescentes paratissimum habent peragium, in quo sine molestia, sine impensa, et quod certe pluris est, sine melioris aetatis impendio diuturnoque taedio, breui, et vt Quinctilianus admonet, methodo satis simplici, tam humanioribus literis et eloquentia, quam grauioribus disciplinis instituantur, studiorumque suorum cursum summa facilitate ac breuitate conficiant. Quamobrem superuacaneum et inanis prope laboris esset, hoc loco diligentius recensere, quot praeclari ingenii iuuenes in his scholis olim liberaliter educati latinis postea graecisque literis floruerint; quot Philosophiae studio, aut Mathematicis disciplinis, quot medendi facultate, aut iuris tum Ciuilis tum Canonici scientia praestantes nomen suum immortalitati donauerint. Innumeri siquidem nunc prae

oculis nobis sunt, qui amplissimo huic loco doctissimisque huius Academiae professoribus acceptum referunt, quidquid sibi honoris ac dignitatis contulit studium earum artium, quarum hic iam posuerant rudimenta.

Neque vero intra priuatas tantum aedes, aut intra Urbis muros beneficii huiusce ratio ita se continet, quin et foras erumpat, atque in alias quoque regiones, non modo per Italiam vniuersam, sed per omnes propemodum Christiani imperii fines longe lateque excurrat. Quantam enim in dies videmus esse auditorum frequentiam? Quantum ex omni fere Europa concursum? Quot iurisprudentiae, aut Medicinae, aut quibusuis aliis disciplinis operam daturi e transalpinis prouinciis huc summo studio ac voluntate confluunt? Vt iam haec disciplinarum officina non tam populo Romano, quam omnibus fere gentibus posita esse videatur. Ex qua quidem peritissimi illi Iuris dicundi magistri profecti sunt, in quorum auctoritate ac doctrina tam multis hodie in locis municipiorum leges, ciuitatum iura ac bona ciuium fortunaeque nituntur. Hinc Hippocratis accepere aphorismos tot clarissimi viri, qui iam summa laude medendi facultatem sustinent, quorum ore ac spiritu vita principum ac populorum salus animari quodammodo ac sustentari videtur.

At vero quam in omnes tum ciues Romanos tum exteras gentes haec late pateat studiorum beneficentia, haud satis intelligi posse arbitror, nisi a nobis, quae praecipua sit Romanae urbis dignitas atque auctoritas, diligentius examinetur. Duo sunt omnino, quibus omnis Reipublicae salus maxime innititur, iisque sublati, ipsa diu salua consistere nullo modo potest, religio scilicet et optimarum legum custodia. Quae quamuis optimae culusque ciuitatis statum constituere vide-

antur, ad urbem tamen Romanam, veluti ceterarum omnium caput, ea duo potissimum pertinere nemo vnquam sanae mentis dubitauit. Cum enim amplissimam hanc Urbem religionis Catholicae sedem esse ac domicilium voluerit Deus, vbi Romanus Pontifex tanquam in augustissimo Orbis theatro vicariam ipsius Dei personam apud homines gerens, Christiani totius imperii clauum teneret; illud necessario consequitur, vt ceterae gentes hinc leges ac iura petere debeant, et ad hanc ipsam Urbem iam de religione, iam de aliis grauissimis rebus consulendi causa ex omnibus fere terrarum partibus conuenire. Et quidem vbi plures simili splendore ac dignitate virorum sapientissimorum conuentus? Vbi maior iudiciorum frequentia atque amplitudo? Vbi tot curiis, tot iudicum collegiis hominum quasi exercitus distributus? Tanta vero iuris tum Civilis tum Pontificii scientia, tanta in legibus explicandis interpretandisque notitia ac facilitas, cui magis quam Leoni accepta referri debeat, non video. Nam si id, quod res est, fateri volumus, ipse fuit, qui in misera illa disciplinarum nocte atque caligine clarissima sapientiae lumina in hanc Urbem inuexit. Ipse fuit, qui magnis propositis praemiis sapientissimos vtriusque iuris magistros inuitauit; atque operam dedit, vt non modo Romanae urbis, sed Orbis prope modum vniuersi iuuentus Romanae duces haberet peritissimos, qui in legibus, in senatusconsultis, in edictis praetorum, in decretis principum ac gentium iure intelligendo explicandoque viam ac rationem ostenderent. Ex quorum labore quotidiano atque industria quantum postea splendoris existimationisque huic Vrbi accesserit, aut quam vberem in dies fructum in causis forensibus iudicisque populus Romanus atque exterarum nationes percipiant, cui

tanta suppetit dicendi facultas, vt satis ac pro dignitate dicere possit? Quod si custodia legum, vt praeclare et grauer inquit Enripides, ciuitates continet; ac iuris legumque neglectu florentissima et opulentissima orbis imperia funditus concidisse videmus: nonne populorum vindicem atque imperii statorem Leonem X. haberi ad dici oporteat, qui de legibus ac iure earum omnium gentium, quae a Romana Sede, religione, fide, et obseruantia pendent, tantopere laborauerit? Non est igitur, cur miremur, quod beneficentissimo principi statuam in Capitolio populus Romanus dedicaret, ab eoque restitutam instauratamque fuisse Urbem insigni monumento profiteretur: cum potius mirandum esse videatur, cur ceterae quoque urbes ac Christiani imperii provinciae singulas eius nominis immortalitati statuas haudquaquam posuerint. Quandoquidem non Urbem duntaxat, neque solam populi Romani utilitatem spectat tanta cum disciplinarum ceterarum dignitas, tum iuris legumque auctoritas atque maiestas, sed eas omnes latitudine sua complectitur gentes, quas vt religione, ita legum societate cum hac ipsa Ecclesiastici imperii sede coniunctissimas esse oporteat.

At superest iam, vt quam breuissime longitudinem eius beneficentiae conspectemus, cuius profundum hactenus aliquo pacto dimensi sumus ac latitudinem. Plurima quidem sunt, quae excurrunt in longitudinem, quaeque hoc vno longitudinis nomine, multiplici tamen ratione sub Geometriae regulam commodè cadunt. Illud vero, quod haud postremo loco venit, et nunc ex re nostra potissimum esse videtur, est temporis longitudo ac mensura. Haec plane in definienda rerum natura tanti semper fuit, vt perhaepe, quae minima esse videbantur, cum ad ea longitudo temporis accessisset, eadem et multa numero

mero et magnitudine maxima esse, sapientissimorum hominum iudicio, constitutum fuerit atque decretum. Quae sane iudicandi consuetudo apud iuris interpretes, tum apud prudentissimum quemque, cum iam sit veteri usu recepta, quodnam esse poterit de hac Leonis beneficentia hominum iudicium, si longitudinis eius ratio atque utilitas perpetuo mansura exploretur? Non iis tantum, qui tum erant, Pontifex sapientissimus, neque vnus aetatis commodo consultum esse voluit, sed posterorum tempora longissime prospiciens, de liberis vestris, de iis, qui adsunt, ingenuis adolescentibus anxius vehementer fuit ac sollicitus. Qua vero singulari industria, quo consilio atque incredibili sapientia? Natura quidem ita comparatum est, vt vnusquisque maxime immortalitatis studio ducatur. Quoniam vero, vt grauitur ait M. Tullius, exiguum nobis vitae curriculum natura circumscripsit; tam breues viuendi terminos in posteritatis memoriam rebus praeclare gestis beneficiorumque magnitudine prorogandi inrita nobis est ingens cupiditas, vt nimirum nisi spiritu vitae, nominis saltem immortalitate viuamus. At quotusquisque est, qui in posterum ita provideat, vt pulcherrima beneficiorum suorum monumenta immortaliter uiuant, neque vnquam situ iaceant, aut coeca obliuione inuoluantur? Haud raro res praeclare sapienterque a maioribus institutas fortunae casibus, aut posterorum languore et socordia perditum iri videmus, quod cae aduersus istiusmodi iniurias nullo satis praesidio firmatae fuerint aut communitae. Planius et apertius dicam: complures vetustiori aetate iam extiterant Romani Pontifices tam literarum, quam literatorum amatissimi, qui Romae etsi non omnium, aliquot tamen studiorum iecerant fundamenta. Instituerat Innocentius IV. Iuris Ciuilis et Canonici studium,

cuius ipsum fuisse scientissimum, satis ea perspicuum faciunt, quae in Decretales Pontificum luculentissima edidit commentaria. Plures alias addiderat disciplinas Bonifacius VIII. vniuersorumque studiorum formam quandam in Vrbe praescripserat. Neque multo post doctores et in literis Hebraicis, Arabicis Chaldaeisque eruditos professores Clemens V. inuexit. Aliaque deinde alii. Quonam vero euentu? Nemo eorum, quo destinauerat, rem auspiciato perduxit. Nemo literarum negotium ita firmavit, vt decursu temporis bonarum artium studia nullam vim pertimescerent, nullaue die ad interitum vergerent: cum ipsamet studia Leonis aetate iam adeo laborarent, adeoque profligata essent ac perita, vt quasi ab inferis ea reuocari oportuerit.

Quid igitur Leo, vt opportune huiusmodi malo omnino praecluderet aditum, atque optime non de sua tantum, sed de posterorum quoque omnium memoria perennis beneficii longitudine promereretur? Singularem hominis providentiam ac diuinum prope consilium quae-so cognoscite. In medio ac frequentissimo Urbis loco has, quas videmus, magnificentissimas ad caelum extollit aedes, quarum prospectus, impluuium, porticus, amplissimum peristylum ac cetera eiusmodi sunt, vt et laxitate et elegantia a bonarum artium dignitate minime abhorreant: digna profecto, quae aetate quoque nostra, tum illa immortalis memoriae foemina, Christina, Suecorum Regina, aspectu cohonestaret suo; tum etiam Alexander VII. Pontifex Maximus maiestate sua aliquando impletet. Quid postea? De Pontificio aerario Leo ipse haud exiguum vestigalium detrahit partem, vt bonarum artium magistri tam Romani Pontificis beneficentia, quam publica ciuitatis sumptibus alerentur. Quorum alios insuper ab ipso ingentibus donis, alios honori-

bus, alios etiam bene opulentis sacerdotiis auctos fuisse atque ornatos, Paulus Iouius commemorat. Tot praeterea leges sapientissimas addit, partim optima studiorum rationi administrandae accommodatas, partim ad professorum eruditionem et disciplinam, partim etiam ad eos, quorum in fide ac patrocinio hanc esse voluit Academiam, spectantes; ut neque praestantius, neque praeclarius ciuitatis alicuius vtilitati aeternitati-que cauere potuisset. Quod igitur, labente iam tertio ab hac studiorum instauratione saeculo, tanto semper floruerit concursu isthaec bonarum artium Respublica, tantaque professorum eius per omnem aetatem extiterit virtutis, integritatis ac sapientiae fama, ut ex his sublelliis non modo innumeri ad sacras insulas, verum etiam ad purpureae dignitatem complures euecti fuerint, quod denique maior in dies hinc profectura sit studiorum existimatio ac nomen; nonne acceptum potissimum profiteri debemus singulari providentiae ac consilio ipsius Leonis, qui in eo totus fuit, ut beneficentiam hanc suam ad omnem posteritatis memoriam commoditatemque traduceret? O beneficentiam eius non modo latitudine magnam, verum etiam longitudine maximam! Dum clarissima haec Vrbs, dum haec moenia, dum populi Romani nomen erunt, immortalis omnium memoria viuet laudatissimus Pontifex, non solum ob perennem contestatamque virtutum suarum famam, ob singularem in oranda amplificandaque Vrbe magnificentiam, ob inuictam animi constantiam, pietatem ac religionem; sed eo potissimum nomine aeternitatem consequetur, quod tam populi Romani, quam exterarum gentium animos sibi summo perpetuoque beneficio deuinxerit. Non vberimos tantum, sed iuges, sed sempiternos nobis disciplinarum reclusit fontes. Nouerat, quod con-

quisite scribit Seneca, illud maximum esse beneficium, quod semper ante oculos est, et obliuisci sui nunquam sinit, sed auctorem suum, ut ipse ait, ingerit semper et inculcat. Nouerat haud satis dari, et si necessaria, vtilia ac iucunda darentur, si ea, quae dantur, mansura omnino non essent. Ut igitur magnum vndeque in hac studiorum instauratione conferret nobis beneficium, non modo in eo profundum ac latitudinem, sed perennem etiam perpetuoque duraturam esse voluit longitudinem. Cuius quidem ingens et infinita propemodum mensura cum vix percipi cogitatione possit, nonne eam attentare, ut de caeli dimensione censuit Plinius, furor esse videretur? Nulla profecto vis hominum atque audacia, nullum tempus, nulla aetas, nulla poterit abolere vetustas tam praeclarum et immortale Leonis X. beneficium. Imo dum literae, dum Roma, dum Orbis erit, bonarum artium studia in amplissimo hoc Lyceo constanter perpetuoque floreant.

Vtinam igitur mihi nunc tanta vis ingenii tantumque esset ab eloquentia praefidii, ut et Academiae huius vniuersitatis nomine, et populi Romani et gentium omnium vocabus eas tibi, Leo Pontifex sapientissime, immortales gratias agerem, quas tibi met, Archigymnasii huius statore, bonarum artium vindici ac literarum parenti beneficentissimo, quam maximas deberi, summo omnium consensu ac solenni religione, profiteamur. Sed quoniam beneficiorum tuorum amplitudine non eloquentiam modo, sed Geometriae quoque mensuras superasse videris; hoc plane restat vnum, ut iam manus vltro demus; teque longius atque ulterius, quam quod dicendi facultas et inuitata quaelibet laudandi industria assequi valeat, beneficentiae magnitudine processisse, silentio fateamur.

DE  
INFELICITATE  
ILLITERATORVM  
ORATIO IV.

HABITA XV. KALEND. NOVEMBRIS  
AN. MDCCXIY.

*Eminentissimo ac Reuerendissimo*

I O. B A P T I S T A E  
S P I N V L A E

S. R. E. Presbytero Cardinali

C A M E R A R I O

PAVLINUS A S. IOSEPHO

SCHOLARVM PIARVM.

*Si* optimae artes, Romani huius Archigymnasii felices incolae, ipsae per se loqui possent, magnas profecto tibi gratias agerent, Cardinalis amplissime; ac nemini magis quam tibi acceptum profiterentur honorem, quem praeclaro tuo de se iudicio sibi maxime restitutum fuisse gratulantur. Cum enim, nescio quo malo literarum fato, contigisset, ut superiori aetate patrocinium Academiae huius fere apud eos esset Cardinales Camerarios, qui quemadmodum genere, ita sollicitudine et cura ad sustinendum Ecclesiae imperium cum Romano Pontifice coniungebantur: inde fieri solebat, ut in tot tantisque illi versarentur negotiis, ut de hac literarum provincia ne cogitare quidem possent; aut etiam si possent, in eo dignitatis fastigiis positi Deorum illorum instar esse viderentur, quos magna curare, parua negligere M. Tullius existimauit. Ex qua quidem inanis patrocinii forma, quae quantaque deinde rem hanc literariam inuasissent mala, eo libentius praetermitto, quo magis iam latent neminem. At tandem aliquando, singulari Dei immortalis beneficio, factum est, ut cum amplissimo Camerarii munere, quod fidei summaeque tuae integritati Romanus Pontifex demandauit, haec quoque studiorum cura obueniret tibi, qui et de literis optime sentires, et earum patrocinium a dignitate tua abhorreere nunquam iudicares. Qua de re praeclarum satis tunc maxime dedisti argumentum, cum ad vetera patrocinii eiusdem iura auctoritatemque vindicandam, publicas etiam inimicitias literarum causa suscipere minime dubitasti. In quo certe quanti amplitudinem huius loci faceres, tam aperte significasti, ut optimae artes ex hac tua erga se voluntate ac studio honorem sint incredibilem consequutae. Hinc enim peruersa illa, quae superiori memoria de cura Archigymnasii huius, tanquam de re minus graui, dissipata fuerat opinio; auctoritate tua atque iudicio refutata est omnino. Hinc labes illa ac macula, quae tot annos Academiae huius nomini insederat, per te deleta penitus fuit atque restincta. Hinc denique honestissimae disciplinae, quasi alumnae quaedam tuae ac familiares, animum erigere coeperunt pauloque liberius respirare. Quas igitur tibi, tanquam praeclarissimo dignitatis suae statore ac vindici, ingenuae artes immortales profertur gratias, eas profecto Romani huius Lycei professores earundem



earundem nomine debent tibi, perpetuoque debebunt maximas. Horum itaque in numerum ego quoque, beneficio praesertim tuo, nuper adscriptus, quanquam aetate, loco et eruditione omnium postremus, in dignoscendo tamen tuo erga nos meritu nemini inferior, eam Eloquentiae nomine gratias ago, quam maximas pro exiguis viribus meis possum. Pudet vero me haud posse aliquod tibi supra vulgarem consuetudinem ingenii munus offerre, quod singulare ac perenne esset memoris animi mei monumentum. Etenim quod hanc orationem ex aliqua saltem grati animi significatione nomini tuo inscriptam voluerim, id mihi intercedit commune cum multis, qui iam antea hoc ipsum splendidiori fortasse eloquentiae apparatu praefecerunt. Quid igitur? Ab omni profusus officii genere mihi diutius temperarem? Id neque observantiae mense rationes, neque tua cum publica, tum etiam privata in me beneficia patiebantur. Vnum itaque superest, ut nimirum non tam orationem hanc ipsam, quam oratoris studium ac voluntatem spectatam habere maxime velu. Hinc enim fiet, ut hoc idem munus, quod si ex sua, vel tua dignitate spectetur, perexiguum certe est ac prope nihil, ex magnitudine tamen animi multo maiora dare cupientis aestimatum, quid magnum, aut saltem aliquid esse videatur.

**M**IRATVS sum saepe ac vehementer, quid esset, quod maiores nostri, qui tam multa graviter sapienterque in eos statinissent, a quibus aliqua ex parte republicam perturbari posse suspicarentur, nulla tamen lege, nullo S. C. aut Praetoris edicto, singularem hominum illorum amentiam coercendam esse putauerint, qui cum acri ingenio ceterisque rebus, quibus literarum studia aluntur, maxime abundent, in supinam nihilominus oscitantemque socordiam aetatis florem perditissime abiciunt. Non enim illud facile intelligebam, qua de causa tot leges aliquin sapientissimas, Corneliam, Iuliam, Aciliam, Calpurniam, Maniliam, Aeliam, Fusiam aliasque complures constituissem, quibus saepenumero non tam malum, quam mali suspicionem a republica dimovere conati fuerunt; nullam deinde censuissent in eos esse rogandam, quos optimis disciplinis infensos desidiaequae deditos, republicae perniciosissimos esse summoque dedecori, nemo unquam dubitavit. Neque vero maiores homines plane incredibili iudicio ac sapientia ornatos, late-re poterat, inertia nihil esse foedius, nihil humanarum divi-

narumque rerum ignoracione periculosius: cum probe perciperent, otio ali solere vitia, et frequentissime otium ipsum non modo privatos homines; sed et Reges, et beatas olim vrbes in interitum excidiumque traxisse. Haec aliaque id genus dum maturius animo reputarem, illud tandem mihi compertum est, iure optimo nullam in eiusmodi homines a maioribus latam fuisse legem, quod in eos iampridem non vnum, sed multiplex supplicii genus a natura ipsa fuisset providentissime constitutum. Cum enim ex veteri quadam consuetudine institutoque naturae ita comparatum sit, ut iidem apud omnes fere nationes insigni turpitudine ac summa infamia laborent, cumque vitam omnino tristem, aerumnosam, curarum ac molestiae plenam et morti, ut ita dicam, propiorem, quam vitae ducere cogantur; bene ac sapienter maiores nulla alia severiori lege nulloque graviore indicio in ipsos animaduerti posse putarunt. Decreveram itaque hodierno die ad inflammandos sapientiae studio iuvenum hominum clarissimorum animos non alia ratione uti, quam luctuosum hoc ipsum, quod ignavi homines de se ubique terrarum praebent,

praebent, spectaculum exhibere. Hinc enim fore sperabam, ut honestissimi iuvenes infelicissimum illud viuendi genus quam maxime detestarentur, cui et nullam vnquam impunitatis spem esse, et summa gentium omnium inuidia conflagrare intelligerent. Nolui tamen per singulas orbis partes excurreret ac peregrinaretur oratio: nolui externa, aut longius petita conquireret, cum tam multa domi suppetant hominum inertissimorum supplicia. Sed vnum et quidem domesticum, quod multis fortasse leuissimum, mihi vero supplicium omnium maximum, quodque ceteris anteponeudum esse videtur, in medio proponam; ita tamen, ut neque ab hodiernae celebritatis instituto abhorreat, neque a studiis vestris, iuvenes, alienum esse censeatur. Quod tum plane me facturum esse confido, si ea, qua potero, breuitate ostendam: nihil durius atque acerbius illiteratis hominibus posse contingere, quam quod Romae viuant. Quo quidem argumenti genere illud, quemadmodum spero, efficiam, ut qui summa frequentia adsunt optimi iuvenes, alieno supplicio deterriti, aut tempestine totis viribus ad sapientiam incumbant, aut vltro sibi aliquando exulandum fugiendumque esse cognoscant ex hac pulcherrima Vrbe, in qua ignauis illiteratisque hominibus citra summam infamiam atque impune viuere minime liceat.

Atque vtinam mihi in hoc primo orationis aditu imitari fas esset factum Socrus sapientissimum, qui, quo suorum animos ab iracundia longius abduceret, non grauiorem illi, qui forte irasceretur, multam irrogabat, nisi ut in speculo oris habitum vulgumque ira furentem contempleretur. Existimabat siquidem vir prudentissimus ad iram maxime detestandam vnumquemque satis commoueri posse, si oculis, quo-

rum sensus esse solet acerrimus, turpitudinis eius speciem propositam habuisset. Vtinam igitur et nobis hodierno die haud dissimile speculum, in quo homines indocti sese intueri valerent, excogitandi elaborandique facultas tribueretur. In eo profecto illi quales se, Deus immortalis, conspicerent! Homines ne an pecudes dicam? Quandoquidem non Circaeus aliquo poculo, sed otio desidiaque imbuti tam longe ab omni humanitatis studio recesserunt, ut si id, quod reuera est, fateri volumus, non tam hominum, quam pecudum loco habendi esse videantur. Cum enim duo sint, per quae a ceteris animantibus vel maxime discernimur, ratio scilicet et oratio, quarum vtraque in eiusmodi hominibus rudis solet esse omnino atque inchoata; nondum plane inter sapientes constitutum est, plusne ad hominis, vel pecudis naturam accedant, licet inter ipsos ac pecudes haud multum interesse nemo vnquam sapiens dubitauerit. Quid vero pecudes eos mihi nominas? inquit Aristippus: lapides potiori fure censi debent. Etenim siue in foro, siue in circo, aut quouis allo in loco sedeant, semper lapis super lapidem sedet. Parcius tamen multoque moderatius in insectanda istorum ignauia se gessisse videtur Cicerone, qui inertissimum vnum ex hoc grege hominum Pisonem non lapidem, sed truncum aliquem ac stipitem pronunciauit. Quicquid vero sint istiusmodi homines, aut lapis, aut truncus, aequo animo esset ferendum, si ab omni hominum consortio remoti, in montibus inclusi, aut syluis additi delitescerent. Eorum quippe naturae consentaneum prorsus videretur, ut qui literarum et humanitatis omnis expertes sint, non inter homines, sed inter feras commoarentur. At vero quod Romae, id vrbe scilicet omnium principe, atque in tanta sapien-

tiae

dae luce, homines, alioquin honesto loco nati versentur, atque ita versentur, ut neminem tam apertae eorum ignaviae fugere possit suspicio, quis adeo mentis est impos, qui id, quam turpe sit, minime videat? Vtinam tamen ipsi quoque aliquando hoc viderent explorateque cognoscerent. Profecto in abditissimo aliquo orbis angulo fœcordiae suae latibulum quaerent. Neque enim perexiguam in hac urbe diem agere eos sineret pudor atque ignominia: sed quasi saxa haec ipsa ac rudera, quae certe plurimo eruditionis sensu informata sunt, in eorum pinguem reclamassent inertiam, hos penates, haec templa, atque haec moenia continuo fugerent, abirent, proficiscerentur. At quoniam usque eo se ignorant, atque urbis huius aspectu tantopere delectantur, maneant, si libet, Romae: imo etiam, si Diis placet, in literatorum hominum coetum sese haud raro immiscere andeant. Hoc enim nobis ad infamiam, qua ipsi in literatissima urbe maxime flagrant, dignoscendam luculentius, percommode cadit. Quid vero inter viros, summa sapientia ac doctrina ornatos, agent istiusmodi homines in literis peregrini omnino atque hospites? Qua ratione incitiam suam dissimulabunt tam callide, quin apud omnes ridicula capita censeantur? Tacebunt, credo. At praeterquam quod silentii huius importuni diuturnitas eos aperte nimis de ignavia sua coargueret, quid tandem est in honestissimo hominum conuentu, ubi de multiplici disciplinarum genere, de amoenioribus literis, de Historia, de Dialectica, de Geometria res sit, nihil respondere, nihil penitus dicere ac prorsus obmutescere, nisi reuera se truncum stipitemque inanimum venditare. At fortasse loquentur. Quid vero? Qua de re? De iis, opinor, optimis artibus, quarum non

modo dignitatem, naturam ac partitiones ignorant, sed ne nomen quidem satis perceperunt? Recentis memoria factum quaeso cognoscite, cui nisi pro testimonio accederent complures viri grauiissimi, de indultia a nobis excogitatum confictumque esse videretur. Hominem in primis nobilem, sed in literis plane nouum, cum aliis plurimis, qui dignitate perinde ac doctrina eminebant, conuocauerat ad conuiuium vir in hac ciuitate primarius. Cumque epulae variis honestisque protraherentur sermonibus, accidit id, quod fere inter literatos viros solet accidere, ut mentio fieret de iis optimis artibus, quas ut libero homine dignas, ita maiores nostri liberales ac peculiari nomine bonas artes appellarunt. Has itaque Romae hoc quidem in tempore florentissimas esse partim contendebant, partim e contrario iacere, et iam quasi ad interitum vergere. Cumque opinionem pro se quisque suam qua ratione, qua exemplis confirmaret; homo ille insullus, qui Philosophiam ne primoribus quidem labris attigerat, nec quantum discriminis inter liberales et mechanicas artes intercederet, vquam audierat; miror, inquit, mehercule a quopiam in dubium vocari, num bonae artes Romae hac tempestate vigeant, in qua aurigandi studium magnopere vigere nemo est, qui dubitet. O singularem animi stuporem! O amentiam incredibilem! Quos risus tam leuem importunamque sententiam consequutos fuisse putatis? Excusari quidem facile poterat homo imperitus, si inter ingenuas ac uobiles disciplinas maxime posuisset architecturam ac pingendi sculptendique facultates, quas in Urbe dudum, singulari Clementis XI beneficentia, restitutas ac praemiis auctas fuisse videmus. Enimuero inter liberales artes aurigandi peritiam extollere, cui risum non moueat?

ueat? In eo tamen, puto, deceptus fuit homo peracuti ingenii, quod complures in hac ciuitate vidisset principes viros aurigandi studio tantopere delectari; et quod dolendum magis est, perſaepe in liberorum inſtitutione ad id magis incumbere, vt pueri bene ac nauiter equis inſteſtendis, aut ſonantis ſtagelli crepitu concitandis aſſueſcant, quam literis honeſtiſque moribus inſormentur: Sed iam nimium multa de iis, quae fortaiſſe per iocum, cum etiam ex indultria ad conuiuii hilaritatem dicta fuiſſe videantur. Fac tamen de trita atque omnium ore peruulgata historia aliqua ſermo grauis omnino ac ſerius inciderit: quam inepta tibi ac miuime conſentanea eiſmodi homines reſpoudebunt? In eos tunc perbelle cadit Galeni illud: ſulti ad cribrum. Quandoquidem indiſtincte nulloque iudicio aetates hominum ac tempora pertraſtantes, confundent Perſas ab Alexandro victos cum ſiſdem ſub Cyro rege victoribus: Catooem Cenſorium indiſoriminatim pro Vticenſi uſurpabunt, aut vnum etiam ex duobus conſtabunt; vnoque verbo, quot dicta, totidem congerent anachroniſmos: niſi forte Alexandros, Cyros, Catones, aliaque huius generis celebratiſſima nomina audientes, tanquam ad ſibi ignotas prorfus ac barbaras voces, haereant. Quid vero ſi de vrbe aut prouincia aliqua, non ad Antipodas quidem poſita, ſed a nobis paulo remotiori inſtituatur oratio? In quot enormes impingent ſcopulos, quantisque locorum ſefe implicabunt erroribus? Nam cum omni Geographiae lumine careant, haud raro fit, vt tam longe ab eo, quod propoſitum eſt, aberrant, vt ſi de Asiae rebus agatur, iidem in America verſentur, ac de Mexico interrogati de Aethiopia reſpondeant. O miſeram plane atque infelicem illiteratorum hominum conditionem! Si taceant, vt elingues

reprehenduntur; ſi loquantur, citra riſum et infamiam loqui minime poſſunt.

At vero non Romae tantum, dicet aliquis, ſed in multis quoque aliis ciuitatibus eadem manet id genus hominum irriſio idemque ſupplicium. Non eſt igitur, cur in ipſos Romae ſingas ſiogulare paribulum. Apud omnes fere populos, de literis optime meritos, haud diſſimiles igna-lae ſuae poenas perpendant, neceſſe eſt. Fac omnino ita eſſe: et quacunque in ciuitate ſint iſti literarum oſores, dedecore ignominiaque notentur. Nuſquam tamen id magis aut frequentius, quam Romae contingere poſſe contendo. Quod quidem ne temere aut ex leui aliqua coniectura dictum eſſe videatur, urbem Romam eiſque conditionem ex vberriſimo, quo per omnem ferme aetatem ditata fuit, doctrinae cenſu mecum paulo accuratius penditote. Quanta hic ſemper hominum doctiſſimorum frequentia? Quanta poetarum, rhetorum, philoſophorum theologi-  
orumque primi ordinis multitudo? Quot clarifiſſima iuriſprudentiae lumina? Vt in qua diſci-plina alibi locorum vix vnus aut alter alicuius nominis reperitur, in ea Romae veluti multiplex ſeminarium exiſtat. Cum enim ad hanc Urbem, Chriſtiani imperii caput, ex omnibus prope orbis partibus in diem confluant viri, ingenio acerrimi atque in omni diſciplinarum genere perpolitati, tanta hic eſt, ſemperque fuit ingeniorum vbertas, tanta literarum gloria ac dignitas, vt vel Athenis Roma doctrinae pal-mam eripuiffe, vel Athenae Romam commigraſſe videantur. In hac igitur tanta ingeniorum luce tantoque concurſu ſapien-tum vbinam tarditate atque animi ſui ſtuporem illiterati homines occultabunt? Amicitiam-ne aliquam familiaritatemque inire poterunt, in qua apud viros et dignitate et eruditione grauiffimos minus offendant? Quod

Quod tandem vitae genus in Vrbe agent? In aula, opinor, Purpurati alicuius principis locum nobilitate aut gratia sibi comparabunt. Itane vero? Dicam plane, quod sentio. Reuicere ab se deberent omnino ignauos huiusmodi homines amplissimi Patres; et in hac re maxime, clarissima illa Romanae purpurae lumina, Bembo, Sadoletos, Contarenos, Campegios, Estenses, Borromaeos aliosque horum simillimos imitari, quorum sollicitudo in eo praecipue fuit, ut perhonorifica mercede proposita, nisi viros literis ac doctrina praestantissimos in suorum familiarium ordinem neminem cooptarent. Hinc enim esset et literis patrocinium et amplissimae dignitati ornamentum. Hinc nominis sui memoriam non cum vitae tempore dimitterent, sed cum omni posteritate adaequarent, ex literis suorum ac monumētis immortalitate donati. Sed non id agimus; utque iam eo, vnde digressi sumus, redeamus: esto in aulam admittantur isti, non tam homines, quam hominum simulacra, ut saltem ipsimet aulae ornatum conferant statuarum more, aut earum arborum similes, quae multo foliorum tegmine ornatæ ad hortorum amoenitatem conferuntur, cum nullos praeter ramos frondesque afferant fructus. Neque enim longe dissimilem in aula speciem praese ferunt elegantes isti, bene capillati, vnguentis delibuti et ad omnes officiorum formulas prope facti. In hoc igitur officiorum regno beatam quidem pulchramque vitam sibi ducere videantur. An vero hic demum eorum stultitia immunitatem consequetur? Atqui non modo apud domesticos, sed apud externos quoque, quibus saepe colloquantur, saepe agant necesse est, eos crebrius irrideri iocisque notari continget. Nam fieri nullo modo potest, ut in maxima hominum celebritate

atque in oculis omnium viuunt, nec iu viros frequentissime incurrant, omni literarum studio ornatos, quos ne risum in se concitandi copiam faciant, nec libere alloqui poterunt, nec silentio dinittere. Quid igitur consilii capient infantissimi homines, ubi nomen atque existimationem suam in tam difficili loco versari videant? Quo ad euitandam huiusmodi infamiae labem se tandem vertent? An vltro sese ignaros, stupidos et humanitatis omnis expertes esse fateantur? Sed non erit plane, cur id de se fateantur? vel taciti nullo negotio agnoscentur. En quam scite eleganterque nobis ipsos describit et quali digito demonstrat M. Tullius: homines, inquit, sine sensu, sine sapore, tardi, rudes, elingues.

At vero illiteratum esse, nulla sit prorsus infamia, nullum probum, aut ignominia. Quin etiam literarum studia iis relinquuntur, quibus aut nullus nobilitatis sit splendor, aut saltem perexiguum patrimonium. Qui vero claritatem generis atque opes a maioribus suis acceperunt, habent iam vnde prospere beateque viuunt. Nullam igitur in hac splendidae vitae tranquillitate, etiam si in Vrbe viuunt, ignorantiae suae poenam duros esse putaris? Nequaquam profecto. Nisi forte nobis cum aliquo e Stoicorum secta res est, qui nihil eorum, quae prima mortales putant, curet, seque in eo diuitem satis beatumque praedicet, quod altra contempletur. Homines autem, apud quos et ratio et dignitas et existimatio, vel saltem humanitatis aliquis sensus valeat, quo ferent animo, iis Romae se videre posthabitos, quibus cum vel de generis antiquitate, vel de fumosis maiorum suorum imaginibus in contentionem venire pudori sibi maxime ducerent? Atqui ea semper fuit Romanorum Pontificum consuetudo, ut in largitione magistratuum, praeturarum, legationum

nam aliorumque munerum, non tam familiae, quam sapientiae rationem potissime haberent. Licet enim non semper in magistratu sit optimus, qui in academia fuerit princeps, raro tamen accidit, ut cum doctrinae praestantia minime coniungatur prudentia, gravitas, continentia, iustitia, fides aliaeque virtutes, quae quoddam habent cum ea commune vinculum et quasi cognitione quadam continentur. Praeterquam quod cuius optimarum artium cognitione careat animus, is qui poterit civibus iura describere, quid cuique tribuendum sit intelligere, dissidia civitatis componere, futura prospicere, et, quid in singulis rebus sit optimum factu, animadvertere? Excusavit valetudinem oculorum, cum designatus fuisset consul, T. Manlius Torquatus: neque, ut summum imperium susciperet, precibus aut vlla alia vi adigi potuit; quod rem indignam duceret, ei capita ac fortunas ceterorum committi, qui alienis oculis indigeret. Cui vero ad omnia aliena iudicio alienoque ore uti necesse sit, eum nos ad ceteros gubernandos idoneum esse iudicabimus? Quae quidem singula in Ecclesiasticis muneribus, aut magistratibus haud minus esse attendenda, tam perspicuum omnibus esse arbitror, ut hac in re supernacaneum sit immorari diutius. Cum itaque Romae non il digni honoribus esse iudicentur, qui genere, nobilitate opibusque maxime praestant, sed qui praeterea integritate vitae ac doctrina ad eos tanquam per gradus efferuntur; equis non videat, in hac civitate imperitis hominibus omnem ad dignitatem aditum esse interclusum? At enim huiusmodi homines forte sua contenti, nec de magistratu, nec de praetura solliciti, procul negotiis in otio placidissime acquiescunt. Sic opinor: isthaec nihil curant scilicet. Nae vehementer errant, qui de

cupiditate istorum hominum et ambitione tam religiose iudicant. Nemo ipsis in quaerendo honore ambitiosior, nemo in petitione audacior, nemo in contentione importunior. Nul- lum enim incitiae propius coniunctiusque solet esse malum, quam arrogantia. Quod reuera hinc proficisci crediderim, quod cum notae istius homines se prorsus ignorent, nec quantum inter viros optimis artibus ex-politos et aliorum vulgus intersit, comprehendant, secum iniquius agi putant, nisi a Principe ratio sui primum habeatur, ceterisque omnibus in partitione provinciarum praeferantur. Ac proinde ex alienae dignitatis splendore ad offensionem invidiamque commoti clamitant, conqueruntur; quodque suis nequeunt consequi in rempublicam meritis, id vi et clamoribus extorquere conantur. Hoc autem ipsis si bene faustaque eveniret, quae mala, per Deum immortalem, rebus cum humanis, tum diuinis metuenda non essent? Quandoquidem praereptis doctrinae praemiis,isque temere ab ignorantia occupatis, iam de doctrina ipsa, de virtute, tum etiam de religione actum esset omnino. At singulari Dei Opt. Max. beneficio nihil est in praesentia, quod suspicionem nobis hanc moveat. Imo vero certis iam rebus diuturnoque temporis experimento exploratissimum nobis est de voluntate Principis, qui meritorum ratione satis superque perspecta, neminem nisi merentem extollit. Videant itaque, nec sine ingenti dolore videant ignavi isti, Romae probis et eruditis hominibus aditum ad dignitatem patere amplissimum, seque vnos magno cum dedecore atque contemptu repelli. Videant inferioris ordinis homines non modo haud mediocres opes doctrina sibi comparasse, sed ad summos quoque apices ea duce sibi met iter feliciter complanasse: se vero in civitate primarios  
nulla

nulla dignitate ornatos nulloque imperio praeditos inter postremos ac despiciatissimos agere. Videant denique sapientes magnam ab omnibus inire gratiam, et auctoritate plurimum valere, indoctos vero ubique gentium explodi, apud omnes labe atque ignominia conflagrare. Haec aliaque plura cum videant, nisi spiritu vitae careant, omnique sensu destituti sint, tam incredibilem animi dolorem inde capiant necesse est, ut Romae esse supplicium sibi perpetuum sit multoque grauissimum. Exeant igitur hinc potius, abeant, proficiantur; seque non minus ab hac molestia, quam Urbem ab istiusmodi colluuię liberent. Neque enim secus ab aegritudine ista vacaturos puto, nisi se procul ab his rebus, foro, templis moenibusque proripiant; atque eo tandem se conferant, quo nec literarum nomen, nec praestantissimae huius ciuitatis fama peruasit.

Sed omittamus aliquando inertissimos homines, eosque ignauiae suae poenitere, ac magnitudine doloris opprimi relinquamus. Dicendi tamen finem non faciam, quin prius vobis, optimi iuvenes, conditionem vestram, qua maxima possum voce, summopere gratuler. Vos enim iam iter illud ingressi fuisse video, quod ad immortalitatem nominis laudisque sempiternam maxime periculum esse solet atque expeditum. Neque enim vereor, ne ex hac vestra discendi cupiditate studioque sapientiae singulari tan-

tum vobis accessurum sit dignitatis, quantum infamiae ac turpitudinis illiteratis hominibus ex eorum ignauia aspergi solere intellexistis. Pergite itaque, qua coepistis, animorum alacritate, diligentia atque industria; et frequenter vobiscum in ea Urbe vos esse perpendite, quam, quemadmodum virtutis sedem, bonarum artium officinam ac domicilium gloriae gentes omnes vno consensu confitentur, ita molestissimum in ea ipsa solent supplicium ignaui homines experiri. Ac proinde si vos id, quod maxime debet, pulcherrimae Urbis huius maiestas ac summa amplitudo delectat, in eam studiorum rationem diligeenter incumbite, quae a laude ac celebritate Romani nominis nihil vnquam abhorreat. Quamobrem primo sapientissimi Pontificis Clementis XI. summam eruditionem cum singulari virtute coniunctam, deinde ceterorum clarissimorum hominum, qui dignitatem Urbis magna sapientiae fama sustinent, exempla vobis proponite. Horum labores intueamini, horum de gloria dies noctesque cogitate, et ad eam exaequandam omnes ingenii neruos contendite. Hoc autem quo facilius consequamini, habetis in hoc Romano Archigymnasio publice constitutos eruditissimos homines, qui vobis in hoc itinere duces optimi esse possint: quorum labori quotidiano ac diligentiae ut pari respondeatis industria, certe vos non tam oratio mea, quam dignitas vestra, nomen atque existimatio cumulatius cohortantur.



DE  
FORENSI  
LATINITATE  
EXPURGANDA  
ORATIO V.

HABITA KALENDIS DECEMBRIS  
AN. MDCCXVI.

---

*Amplissimis XII. Viris*  
SACRAE CONSISTORIALIS AVLAЕ  
ADVOCATIS

ET

*Archigymnasii Romanae Sapientiae*  
RECTORIBVS,

IOANNI FRANCISCO FAGNANO DECANO.

ALEXANDRO CASALIO.

ANTONIO FELICIANO MONTECATINO.

DESIDERIO SPRETO.

IACOBO SARDINIO.

PROSPERO LAMBERTINO  
RECTORI DEPUT.

FERDINANDO DE VALENTIBVS.

PETRO POMPONIO DE VECCHIS.

CAROLO MARIAE SACRIPANTI.

ANTONIO SERLVPIO.

BONIFACIO SPRETO COADIUT.

PAVLINVS A S. IOSEPHO  
SCHOLARVM PIARVM.

Illo.



Illustrissimi et Reuerendissimi Domini.

**C**V M ego semper de amplissimo Collegio vestro tam praeclare senserim, quam qui maxime, haud certe mirari debetis, si oratio haec mea in lucem exeat, vestro potissimum nomine commendata. Vnde enim mihi praesidium magis firmum contra sermones et voculas maleuolorum, quaecunque futurae sint, quam a singulari vestra sapientia, gravitate, consilio atque auctoritate? Nemo sane quicumque poterit de instituto ipsius orationis detrabere, aut aliqua ex parte reprehendere, quin politam quoque ac latinam scribendi rationem, quam in vobis praeter ceteris suspicimus, reprehendat. Ego equidem non ignorabam, difficile omnino esse, ut vir sanctissimus Hieronymus ait, sensum mutare linguam. Sed argumenti hoc genus idcirco maxime scripsi, ut forensi iuuentuti consulerem, eique stimulos admouerem, ut vix et carceribus prope dicam emissis statim sermone assuesceret, et quantum fieri posset, ab intolerabili illa dicendi barbarie resisteret. Id quod etiam in causa fuit, cur mihi persuaderi potuerit, ut haec ipsa oratio typis edita peruulgaretur. Nam quod munus Reipublicae, inquit Cicero lib. 2. de Diuin. asserre maius meliusue possumus, quam si docemus atque erudimus iuuentutem? Dubitari autem vix potest, quin inde consequuturus sit fructus minime poenitendus, si adolescentes nostrae ciuitatis vestro perquam sapienti iudicio, tum etiam, quod magis est, exemplo, hoc ipsum orationis propositum probari intelligant. Vos ergo, qui in altiori isto dignitatis gradu collocati iuuentutem ipsam forensi disciplinae addictam studio laudu et virtutu inflammare debetis, libentibus gratique animis argumentum huiusmodi excipite. Quod quidem vim, quam ad suadendum ab ingenii mei temeritate habere non potuit, longe maiorem, ut spero, ab auctoritate vestra obtinebit.

**N**ON ignorabam profecto, si de latinae linguae barbarie, quae iampridem forum occupauit, ea libere dixissem, quae quidem dicenda esse videntur, permultos fore, qui me laboremque meum pro dignitate ipsius fori, tum etiam pro communi nostrae ciuitatis bono suoceptum reprehenderent. Satis enim intelligebam, quod etsi res tota, de qua agerem, a nemine vocari posset in dubium, eorum tamen, qui impolitam illam scribendi rationem publice defendunt, tantam fere vbiue esse frequentiam auctoritatemque, ut si ex aduerso steterim, quasi contra fluium ire voluisse viderer. Itaque non immerito suspicabar, propter dissipatam adeo in vulgus ea de re opinionem me vim nullam in dicendo esse habiturum; nec profuturum magis, quam si sur-

dis, ut aiunt, scopulis canerem. Illud quoque me vehementer urgebat, vix fieri posse, ut res tam caute moderateque pertraheretur, quin magnam fori subirem inuidiam; cum multi hoc ipso argumenti genere quasi actionem quandam in se constitutam fuisse putarent: proinde minime defuturos, qui me nisi temeritatis, at imprudentiae certe coarguerent, quod eiusmodi genus hominum maxime morosum et irritabile nulla neque priuatim, neque publice laesus iniuria lacerasset, quorum nec dignitatem ignorare, nec sapientiam aspernari debuerim. Quae quidem singula quam me commouerent plurimum, et ne impeditam adeo dicendi prouinciam susceperem, etiam atque etiam deterrerent; vicit tamen omnem siue metum, siue pudorem, mihi natura attributum,

tributum, incredibilis animi dolor, quo carere non poteram, cum viderem in hac tanta literarum luce tantaque disciplinarum omnium cultura fere neminem esse, qui de veteri splendore civili scientiae restituendo cogitaret. Dolebam igitur et acerbè serebam, venerandam legum maiestatem non modo ab antiqua illa dignitate descivisse, sed etiam partim hominum imperitorum ignorantia, partim maleuolorum pertinacia, partim quoque quorundam culpa, qui populares esse aut videri volunt, in diem ita deprimi, ut pristini vestigium vitoris in eam plane nullum recognoscas. Quamobrem contemptis, quicunque de me tandem futuri essent, hominum istiusmodi sermonibus, constitui eam hodie die de stylo forensi orationem habere, unde et lectionum meorum auspiciū esset, et honestissimi iuvenes, qui ad amplissimam Iuris facultatem in hoc Romanae Sapientiae Gymnasio daturi sunt operam, tempestive intelligerent, quantum de dignitate fori gloriaque Iurisprudentiae detrahant, qui in iudicialibus causis emendatam scribendi rationem minimi putant. Quocirca etsi non ignoro, me mihi plus oneris, quam reuera ferre possim, imposuisse, si non modo rem vniuersam ac penitus, sed ex parte completi voluero; illud tamen, quod animum releuat meum, est iucundissimus iste hominum sapientissimorum conspectus, ex quorum auctoritate praesidium satis firmum mihi fore confido. Multos enim adesse video, tum summo ingenio, ac doctrina, tum a forensi usu atque exercitatione maxime commendatos, quibus lulentam eiusmodi dictionem non solum non probari, sed ab eisdem vix magno cum stomacho eam tolerari, certo scio. Quorum quidem iudiciū, si qua in parte vel orationi meae robor, vel susceptae causae deerit patrocinium, instar teli

mihi erit, quo et aduersariorum audaciam exultantem reprimere, et ciuili scientiae dignitatem sustinere conabor.

Animaduerti autem, fore mihi in hac causa cum duplici hominum genere negotium. Quorum alii ea sunt auferitate ingenii, vel odio in optimas disciplinas, ut in foro non aliam omnino dictionem, nisi insuauem illam, rudem ac semilatinam vsurpari oportere contendunt. Alii vero etsi in ceteris rebus munditia sermonis delectantur plurimum, in causis tamen id aut minus necessarium putant, aut de industria negligunt, ne fortasse delictiores esse videantur. Quibus ut ordine utrisque respondeam; vos primum appello, seu legum interpretes, qui caput in foro neminem extollere posse censetis, qui literarum elegantia studioque bonarum artium teneatur. Quam tandem Iuris regulam, quaenam edita praetorum, aut de Caesarum scripto sanctionem in medium afferetis, qua quidem caueatur, ne quis in iure dicundo utatur verbis propriis, significantibus, et ab eorum, qui latine loquuntur, consuetudine non abhorrentibus? Contra ego nullo negotio vobis planum facere potero, castitatem sermonis dicendique proprietatem, non modo ab usu forensi alienam non esse, sed summis auctoritatibus diuturnaque temporis praescriptione eam ipsam quodammodo praecipi atque mandari? Nam quis ignorat, e quoniam fonte ad nos primum defluerit vniuersa Romani Iuris scientia? Nonne de summa virorum doctissimorum sapientia, qui XII. Tabularum interpretationi ea doctrinae laude praeerant, ut eorum domus, ut ait M. Cicero, haberetur veluti totius oraculum ciuitatis? Ime apud omnes in eam existimationem ac sapientiae famam venerant, ut, cum a Graecis primo, tum deinde a populo Romano

mano non alio quidem nomine, quam Sapientes appellarentur. Quis igitur sibi persuadeat, eius ordinis homines inde in vulgus tam praeclarum nomen fuisse assequutos, quod de iure rusticana ac plane inculta oratione populo responderent? Aliud profecto fuit hominum Graecorum ingenium. Nae amabant illi politam dicendi rationem: oblectabantur maxime suauitate sermonis. Proinde Homerus haud visum iri putauit Nestorem summae prudentiae virum, neque Ulyssē, maximum imperatorem, nisi singularem vtrique in dicendo laudem tribuisset. Quid vero de populo Romano? Cui sane emendatum scribendi genus ita placuisse acceperimus, ut quos complures ediderat de Iurisprudētia libros C. Trebatius, eques Romanus, homo tum M. Tullii familiaritate, tum etiam C. Caesaris consuetudine atque amicitia celebratissimus, minimi fecerit, quod non admodum eleganter conscripti fuissent. Neque probant magis, quae Q. Aelius Tubero de publico et priuato iure acute et subtiliter scripsit, quod nonnihil vetustiora et fere obsoleta verba affectauerat. Contra vero quanto honore sunt habiti Publ. Scaeuola, Q. Mutius, Gallus Aquilius, L. Crassus, Ser. Sulpicius, M. Cicero aliique plurimi, qui ad iuris ciuiliſ scientiam non modo summam eruditionem, sed etiam verborum delectum mirumque latinitatis candorem adiunxerant? An vero quod nobiliori stylo ac ratione minus vulgari scriberent, idcirco aliquid de dignitate iuris eos detraxisse, quisquam sanae mentis indicauit? Atqui illud de Ser. Sulpicio, ut ceteros missos faciam, proditum est memoriae, eum latinae linguae studium tantopere coluisse, ut quandoque M. Varonem de germana vocabulorum significatione non secus quam de summo negotio confuleret.

At enim aurea fuerunt ista latinitatis tempora, quibus Romanae non modo curia et forum, sed theatrum, sed balneae, sed popinae quoque ipsae multo sane felicius, quam nos, latine et intelligebant et loquebantur. Neque illos aetatem plurimam, ut nunc nobis vsu venit, ad vnius linguae notitiam traducere necesse erat, sed elegantiores dicendi modos de nutricum sinu cum lacte prope ipso accipiebant. Mirum itaque videri non debet, si id temporis, quando scilicet non tam praeclarum erat, ut ipse Cicero ait, scire latine, quam turpe nescire, homines summo loco ingenioque ad iuris, quod profitebantur, intelligentiam singularem pariter sermonis elegantiam adinngerent. Fac ita esse omnino. Neque enim me longius oratione abduci patiar, ut doceam, non eam omnem, qua illi tantopere praestabant, dicendi laudem ita fuisse natura partam, ut diligentiae ad labori locus haudquaquam fuerit. Satis sit, quod hac de re Quintilianus copiose ornateque disseruit. Sed antequam respondeam, illud monendos vos esse video, veteres illos, quos nominaui paulo ante, viros eloquentissimos iurisque peritissimos me non idcirco in medio proposuisse, ut ad eorum amplitudinem homines nostros effingerem proxime, aut vndique conformarem. Illos enim singulos, ut de vno M. Tullio Plinius pronunciauit, extra omnem ingenii aleam positos esse, perspicuum est. Sed ut petita a vetustissima iuris origine sapientissimorum eiusmodi virorum exempla os tandem occluderent iis, qui palam distant, forensē hominem a studio et elegantia literarum alienum esse oportere. Age vero, occasum interitumque suum Romanae linguae splendor obierit; et aureum illud latinitatis saeculum aetas deinde ferro deterior longeque corruptissima con-

D

sequuta

ſequuta fuerit. Verum in hac ipſa literarum caligine, quonam quaero ſcribendi genere in iudiciis homines vſos fuiſſe putatis? Dicendine rationem puram et emendatam uſurpaſſe, an vitioſam, an ſordidam, de tritiis hauſtam et plebeculae mores olentem? Equidem ſi maturius id, quod res eſt, perpendamus, facile quidem erit comprehendere, tunc ſumma dicendi proprietate maximoque verborum ornatu, de vniuerſo Romanorum iure conſcripſiſſe et Caios et Paulos et Ulpianos et Papinianos et Tribonianos alioſque complures, qui per eam aetatem, intermortua iam prope omni latini ſermonis luce, ſe forenſi operae addixerant; vt eos certe, non mediocris notae ſcriptores, ſed omni literarum praefidio bene munitos fuiſſe dubitari nullo modo poſſit. Quantam enim eſſe conſtat venuſtatem orationis atque elegantiam, quam ſane continent Pandectae, Codices, Inſtitutiones Nouellaeque Conſtitutiones, et ſi quae alia ſunt ab ipſis digeſta de vniuerſo civili iure volumina? Quamobrem Laurentius Valla, Romanorum omnium ſcriptorum cenſor acerrimus, non modo eos cenſoria illa virgula ſua multare auſus nou fuit, ſed etiam libere fatetur, ſe quidem perlegiſſe quinquaginta Digreſtorum libros, ex plerisque iure conſultorum voluminibus excerptos, et relegiſſe cum libenter, tum vero quadam cum admiratione. Primum quod neſcias, inquit, vtrum diligentiane an grauitas, prudentia an aequitas, ſcientia rerum an omnis dignitas praefſtet, et maiori laude digna eſſe videatur. Deinde quod haec ipſa ita in ynquoque illorum omnia egregia ſunt et perfecta, vt vehementer dubitari poſſit, cui quis fit praefſendus. His autem nihil eſt, ait, mea ſententia, quod addi adimiue poſſe videatur tam eloquentiae, quam latinitatis et elegantiae, ſine qua

caeca omnis doctrina eſt et liberalis praefſertim in iure civili. Quid planius, quid ſapientius, aut quid accommodatius dici poterat ad iugulandam omnino hominum noſtrorum audaciam? Quid? negabuntne, illos ſummam in foro laudem fuiſſe aſſequutos, vel eo dicendi genere forenſis officii muneri non vndique ſatiſfecisse? Hoc autem praeterquam quod dignitatem eorum ipſorum, quorum iſti ſeſe interpretes eſſe et dici volunt, et quorum auctoritatem in iudiciis non minus quam aras et focos tuentur, magnopere offenderet, longe alia certe fuit ſemper, quam ſapientiſſimus quisque habuit de talibus viris, opinio. Illos quippe clariffima inſipientiae lumina, ornamenta legum, iudiciorum propugnacula et humanae ſocietatis firmamentum appellant Antonius Faber, Balduinus, Cuiacius aliique plures. Imo Balduinus ipſe, homo perquam acri ingenio, nec poſtrema apud eos, qui in foro verſantur, auctoritate, in commentariis ſuis, quibus inſtitutiones iuris ornauit, illud primo loco admonet, vt ſingularum Dei Opt. Max. prouidentiam ſuſpiciamus, qui quemadmodum olim eos ſempiternae memoriae viros Iolephum in Aegypto, Daniele in Babyloonia, Athenis Periclem, Lacademone Lyncurgum alioſque alibi, ita poſtea Romae Papinianum ad conſeruandam humanam ſocietatem et iuſtitiae ſplendorem excitauerit.

At mutata eſt iam, inquiunt, omnis illa vetus iudiciorum ratio. Deſciuit ab elegantia orationis ad formularum quarundam anguſtias pompa illa forenſis; neque nunc vt olim in ſubſelliis eloquentia dominatur, ſed iura. Habeant igitur veluti fundum ſuum grammatici et verborum cenſum et opes elegantiarum. Nos quidem non de verbis, ſed de patrimoniis, non de nominibus, ſed de legatis,

de venditione bonorum, de successione iure nostro agemus. Illi se politos dicendi magistros de Ciceronis schola euasisse, et omnes lepores, Tulliana omnia myrothecia consumsisse gloriuntur. Praeclarum satis quid nobis esse videbimur, si multo labore multisque vigiliis contigerit nos haud longissime abesse ab Accursii, a Bartoli, aut Baldi gloria, qui tamen grammaticorum iudicio gothice magis quam latine scripserunt. Rerum sane, non verborum nos urgeat oportet sollicitudo. Neque decet caussidicorum sermonem rebus tam grauius occupatis iuncturis et quasi syllabarum numero insistere; vnoque verbo, sic a nobis de iure scribendum, ut nec diligentiori vocabulorum studio iudicum torqueantur ingenia; neque sit, qui sensum omnem orationis nostrae liberius et sine artificio excurrentis non probe omnino percipiat. O acutam excusationem! O defensionem singularem! Enimuero id primum libere dico, eos frustra conati praecleara illa Bartolorum ac Baldorum nomina quasi murum nobis opponere, ut ex tam magnis auctoritatibus habeant firmissimum inertiae suae propugnaculum. Excusant quippe illos tum etiam alios ipsamet tempora, quibus non modo omnis latina lingua intercederat, sed quod magis dolendum, quodque omnes deplorant eius aetatis historiae, talis peruaserat in omnium animos stupor, talis dementia obliuioque literarum, ut de iis temporibus nihil omnino extet hominum memoria dignum. Quapropter in summis de eo genere viris, qui certe in ciuili scientia sunt longe omnium principes, si sermo rudis et gothicus, si historiae literarumque ignorantia deprehendatur, condonanda profecto sunt illis, pro temporis ipsius ratione: cum praesertim istiusmodi errores purae exactaeque Romani iuris notitia, quam-

diu sepultam nobis immenso labore restituerunt, cumulatissime compensauerint. Quatenam itaque, malum, est ista amentia, in tanta nunc literarum luce, gothicam eius saeculi barbariem pugnacissime tueri velle, quam reuera Bartolus ipse si reuiuisceret, iam omnino detestaretur summoque studio expurgaret? Et sane quid est, quod teterimum illud loquendi genus minime sibi retinendum fore putauerint, quotquot proxime consequenti aetate, pari iudicio, acumine ingenii et singulari indulkria de ciuili iure scripsere? Imo vero quid purius, quid luculentius, quid suauius ea oratione, qua quidem vsi sunt viri illi ciuilis scientiae consultissimi, Alciatus, Pancirollus, Goueanus, Cuiacius, Budaeus, Duarenus, Tiraquelus, Contius, Hotomannus, Brissonius alique complures, qui ad ius Romanum exornandum tantam literarum vbertatem attulerunt, ut ex eorum vigiliis maximum eidem accesserit ornamentum? In hos profecto solertissimos et quasi maiorum gentium doctores intueri, hos sibi duces proponere homines nostri deberent; non autem ignauiae suae ab eo praesidium quaerere, quod temporum potius quam hominum culpa tribuendum esse videtur.

At multo vehementius commouet me, quod aiunt, in foro non verborum, sed rerum habendam esse solitudinem. Itane nos amentes, aut imperitos iudicant, ut minime intelligamus, qualis rerum, qualis verborum debeat apud ipsos esse sollicitudo? Non aequalem utramque contendo. At nego, alterutram posse negligi. Cum enim omne ius aut in verborum interpretatione, aut aequi prauique discrimine positum sit, quotus quisque non videt, quantum momenti habeat verborum sensus et optima vocum ipsarum intelligentia? Sunt tibi res pecuniaeque nostrae cu-

rae atque ſolicitudini. Eſto: at voces, quibus res ipſae continentur, earumque ſunt indices, minimi putas? Non illum ego mehercule optimum ſtatuerim imperatorem, cui ſane certamina, aut obſeſſio murorum maxime cordi eſſent, interea vero nulla de comiteatu, nulla de deſectu militum cura teneretur. Quoties autem praepoſtere concepta verba impedimento ſunt, quo minus diſſicillimae quaestionis nodus praecidatur, quae diu et altercantium fortunas et iudicium ingenia torſit? Dicit aliquis: huic etiam incommodo bene ac ſapienter maiores noſtri conſuluerunt. Complura per eorum manus volumina accepimus, in quibus ſingula, quae propria ſunt iuris, vocabula enucleate diſtincteque adnotarunt. Ex his ſtatim intelligas, quid peculium, quid tutela, quid familia, quid uſucapio et huius generis alia fere infinita. Habeant itaque ſibi ſuas grammatici voces, ſuas ad caelum efferrant etymologiae, non hercle inuidemus. Homines, ut video, acuti rem plane conſectam putant. Non ita tamen olim ſapientiores illi legum interpretere de hoc negotio iudicarunt. Praeſtantiorem longe aliam de minimo iſto grammaticorum regno opinionem habebant. Quandoquidem non ea diutaxat, quae ad ius civile pertinerent, vocabula explorari oportere cenſebant, ſed crebras quoque inter ſe quaestiones de proprietate latinarum vocum earumque primaeua ſignificatione agitabant. Hinc ab iisdem mira quadam ingenii ſubtilitate quaeritum, quid vitium differret et morbus, quid hoſtis apud veteres ſignificaret, quid manubiae, quid fundus, quid municipium aliaeque fere innumera, quae ab A. Gellio, cum ab Andrea Alciato et Gulielmo Budaeo elegantiffime recenſentur. Ex huiusmodi enim noticia futurum fuiſſe putabant, ut Romano iuri et

lumen et ornamentum accederet.

Atqui reſiſta vulgi barbarie, ſi politum dicendi genus proſequeremur, pauciſſimi iam noſtra intelligerent. Quid ſi ad forenſem vltum non contortam et acrem orationem poſtulo, quae Tullianam amplitudinem exprimat, aut neruoſam Salluſtii breuitatem, nec quae Taciti aculeos emittat; talem vero, ut accurata tamen et diſtincta, plana tamen, inaeſtata, aequalis et ſine faſtu ſinat? Eſtne quisquam tam plumbeus, aut ſic ab humano ſenſu alienus, qui lectionem huiusmodi non longe facilius perciperet, quam indigeſtam illam, conſuſam, deſultoriam aut etiam, ſi Diis placet, ſoloeციſmis compluribus aſperſam? Quae quidem quam abſurda plerumque ſit, vel illud argumento eſſe poterit, ingenuos quosdam, quos ego noui, optimo ingenio adoleſcentes, qui legum facultati ſumma ſpe ac voluntate nomen dederant, haud multo poſt perterreſtaſtos ab iſtis barbarorum caſtris auſugiſſe. Cum enim, ut mihi narrabant, Ciceronis, Caſaris, Terentii aliorumque his ſimilium libris ab ineunte fere aetate educati, latinitatis illius candore ac perſpicuitate mirum in modum tenerentur, tam inconditas deinde atque horridas canſidicorum ductorum ſuorum voces diutius ferre minime potuerant: ad quas ſane intelligendas nouam ſibi, ut dicebant, grammaticam, nouos commentarios conquirere neceſſe erat. At nemini ſeſe obſcuros in dicendo fieri velle diſtitant. Optime eſt. Cur tamen ea pariunt verborum monſtra, quae neceſſario rebus obſcuritatem, non lumen afferant? Illud potius nobis perſuadeant, ſe operam dare, ut extra forum a nemine queant intelligi, haud valde diſſentiam. Poſſem equidem hoc loco forenſem aliquam ex iſta ſcoria paginam in medium afferre, quae plus nimio fortasſis

sis orationi meae fidem faceret. Sed cum diebus singulis in omnium ferme oculis scriptiones de hoc genere versentur, non est, cur rem ipsam, quae non nihil inuidiae et offensionis habere videtur, verbis pluribus agam. Venio itaque ad argumentum officiorum et obseruantiae plenum. Verentur nimirum, ne elegantius scribendo iudices, homines quidem plurimum occupatos, molestia afficiant. Proh Deum immortalem! vbinam gentium sumus, vt indicem talis stultitiae vocem audiamus? Elegantiae sermonis satietatem affert, quisquiliae vero delicias et voluptatem? Delectat, credo, iudices ipsos siccitas illa et puerilis quaedam dicendi Insulfitas, in qua cum prope nihil exultat, quod non obscurum, aut alienissimo loco sit positum, necesse est plane de auctoris sententia diuinare. Delectat ipsos videlicet oratio non simplici puroque stylo composita, sed verbosa, sed tumultuaria, sed leuibus minimisque rebus redundans. En quam praeclare sentiant de ingenio studiisque ipsorum iudicum hominum sapientissimorum, quos quidem aut in literis hospites omnino iudicant, aut sic in illas infestos, vt teterrimum verborum paedorem sincera electaque dictione iucundiores ipsis fore arbitrentur. Percommode tamen in eos cadit iniqua eiusmodi opinio atque iniuria. Haud immerito luunt (dicam magis aperte id, quod sentio) indulgentiae suae poenas. Nam quoties sibi illepidi ista ac perturbata afferuntur, ad quorum ambages expediendas est non minus quam labyrinthum Cretensem ingressis laborandum, quid est per Deum immortalem! quod eadem omnino ab se non reilciant, et ad Orbiliu ferulam tam malos grammaticos non dimittant?

At quaerunt, quo pacto fieri possit, vt id temporis aliter in foro quis scribat; cum talis scri-

bendi ratio sit iam omnium vssatissima, cum vbique consuetudinis ius quoddam obtineat, cum postremo non secus hodie cum plerique omnes faciant. Mente iam recreor, quod aliquid tandem in medium attulerint, quod non leue omnino videatur. Excusandi sunt plane: communi quodam vsu et necessitate peccant, non animo ac voluntate. Inurbane scilicet Impoliteque scribunt, gula nesciunt elegantius. Parcus autem vellem nobis de consuetudine verba facerent. Quis enim est tam mediocriter in re forensi versatus, qui non intelligat, quam tenne sit et infirmum, quod ab ipsa consuetudine petitur, argumentum? Multa sane conueniant necesse est, vt aliquid illa valeat. Quod si forte, fuerit varietate temporum interrupta, neque apud omnes ita recepta, quin in contrariam quoque partem aduersentur multa, vim habet tum mehercule nullam. Cum itaque iuris scientia ab ipsa originis suae vetustate fuerit semper, vt satis iam vidimus, cum omni literarum genere coniunctissima: cumque extiterint viri grauissimi atque omni laude digni, qui, vix reuersis postliminio optimis disciplinis, in expurgando statim, ornandoque Romano iure magnopere defudarunt, cum denique per hanc aetatem videamus, quod in hac ipsa Vrbe homines summo ingenio et grauitate praediti humanitatis studia ad legum exercitationem adhibent; frustra nobis vsu gentium communem obliuiscunt, et consuetudinem istam antiquitate venerandam tantopere praedicant. Sed plerique non longe secus scribunt. O praeclaram defensionem! Quid? multitudinis exemplum, quod quidem Seneca omnium pessimum pronunciauit argumentum, praefidio sibi esse volunt? Enimvero indigna semper visa fuit optimo quoque viro vox istiusmodi atque consilium. Ponderanda sunt hominum iudicia,

non autem numeranda. Eſto, pauci ſint per hos dies, qui literarum latinarum ſtudio ad forenſem uſum traducant: nonne horum pauciſſimorum iudicium, virtus, grauitas et ſapientia pluris apud te eſſe debeant, quam ceterorum omnium plurimorum barbaries atque infamia? Neque enim negare quis poterit, quin hi pauci multorum ſint inſtar imperatorum, qui primos in foro ordines ducunt: cum ad ipſos grauiſſima quaeque cauſa deferatur, cumque hi ceteris non modo ſcientia praeſeant, ſed ingenii quoque fama omnium maxime floreat.

Quae cum ita ſe habeant, quis aequo animo ferre poſſit leguleios illos, homines infantiſſimos, qui cum omne literaturae genus nihili prorsus faciant, praeterquam quod poetas, oratores, philoſophos, mathematicos tanquam viles animas et inuile terrae pondus contemnunt, eos praeterea derident ſapientiſſimos viros, qui de iure venuſte latineque ſcribunt, quaſi in foro deliperent, quod non barbari, quod non illorum ſimiles eſſe ſtudeant? Hos itaque ſeſtini iſti et arguti appellare per riſum et iocum audent homines Ciceronianos, aut ſesquipedalium verborum conſectatores, aut etiam, quod multo indigniſſimum eſt, leuia ac ventofa capita, quae haud ſatis ratione conſent. Ita proſecto ipſe ego viro, in hac noſtra ciuitate tum iuris doctriſina et literarum humaniorum elegantia, tum etiam librorum editorum gloria clariſſimo, ab aliquo, nescio quo, e nugatoribus iſtiusmodi illudi atque obtreſtari, multis de foro, plauſu comprobantibus, vidi. Nequiorne impudentia excogitari poſſe, quam quod ab ipſiſmet literarum ornamentis, quae maxime commendare deberent, occaſionem arripiant homines grauiſſimos continendi atque irridendi? Sed in hac parte ali-

quo paſto fortasſe excuſari poſſunt. Naeſeant facile ſtulti id, quod ignorant; vtque putentur ſapere, caelum ipſum, vt Phaedrus ait, vituperant. Quod vero longe grauiſſimum, quodque nullo modo ſerendum eſſe videtur, illud ſane eſt, quod adoleſcentes optimo ingenio et a muſis minime alienos abducant ab amore ſtudioque literarum, et quantum fieri poſſe, diſtrahant. Qua quidem in re quis ſummam iſtorum fraudem malitiamque non videat? Conantur porro in ceteris ea ipſa virtutis ſemina elidere, quorum vberes fructus ſterilitati ſuae probro aliquando fore extimeſcunt. Omnes incultos, omnes balbos, omnes gregis ſui ſimillimos eſſe cupiunt. Quocirca vulpeculae illius calliditatem haud inſcite imitari videntur, quae, vt in fabulis eſt, quo caudae ſibi interceptae dedecus alieno cohueſtaret exemplo, ceteras quoque vulpes enixe cohortabatur, vt eam pariter ſibi abſcinderent; quippe quae uſui non eſſet, ſed oneri. Ita fere ſoleant homines iſti fallaci quadam beneuolentiae ſpecie adoleſcentium animos nondum ſatis conſilio et ratione firmatos aggredi, et ſaepe dignitatem fori, quod quidem minime reprehendo, ad caelum extollere, ſaepe de literarum ſtudiis declamare tanquam de re non modo nihili prorsus faciendae, ſed quae etiam fortunam hominum forenſium deprimat. Nugas ergo diſtintat literas eſſe et delectamenta puerorum: Philoſophiam vero, aſtrorum notitiam, Geographiam ceterasque eius ordinis diſciplinās otioſi hominis occupationem: omnia denique iſthaec ſuperuacanea ac leuiora ab eo repudiari oportere atque contemni, qui aliquando familiam in iure et legibus velit ducere, et foro ſupra ceteros dominari. Itane vero? Fieri non poſſe, vt quis euadat magni nominis iureconſultus, niſi muſis, niſi elegantioribus ſtudiis valere inſiſtens, incultam,



cultam, caecam ac rerum paene omnium ignoracione miseram vitam traduxerit? O nequitiam hominum plane veteratorem! Adeone sibi persuadent, posse per summam fraudem amoliri ea, quibus ipsi carent, bonarum artium ornamenta, vnde Italiae dignitas, vnde nostrae ciuitatis splendor, vnde Christianae religionis praesidium et firmamentum constituitur? Verum enimvero errant, vehementer errant, si in hac Vrbe, perantiquo optimarum artium domicilio, per hos cuniculos efficere aliquid posse putant. Habent enim adolescentes nostri plurimos, quos Romae intueantur, clarissimos viros, cum iuris, tum omni literarum genere ornatos, quorum iudicio atque auctoritate peruersas istiusmodi opiniones omnino refutari videant. Habent Pontificem Maximum ante oculos, virum sane literatissimum, cui difficillima Christianae reipublicae tempora impedimento non sunt, quo minus honestissimas disciplinas in diem amplifcet, et quam maxime potest, illustret. Habent denique saxa haec ipsa et parietes, qui veteris doctrinae gloriam adhuc spirantes, hominum tam desipientium vocibus prope reclamitant. Quibus sane lapidibus vtinam vis inesset, exulcerata istorum hominum capita ad sanitatem reuocandi, aut saltem sic deterendi, vt sese tandem silentio contineant: quemadmodum inepto illi apud Petronium versificatori Eumolpo contigisse dicitur.

Sed longius fortasse, quam par erat, dicendo prouecti sumus. Tempori iam consulendum, cuius finibus reliquam orationis partem ita circumscribi sentio, vt eam breuiter et quasi summam percurrere necesse sit. Quanquam et hoc satis commode cadit: neque enim cum tardis et conclamatis ingeniis erit nobis deinceps laborandum, aut cum iis, qui

literas e ciuitate exturbare conentur atque in exillum eiicere; sed cum honestissimis viris, in quibus cum dignitate forensi coniunctum est maxime omne liberalium artium decus et ornamentum. Delectantur hi plurimum, vt antea dixi, candore latinitatis, amant purum scribendi genus; quod tamen in iudiciali sermone, nescio qua consuetudine, aut opinione ducti, negligunt. Quocirca hi, mea quidem sententia, longe grauius peccant, quo maior est in foro eorum ipsorum auctoritas: cum aliis dare videantur ansas ad forensis munditiam orationis iure aliquo reprehendendam. Sed hoc omitto. Quid autem est, quod ipsi tam humiliter demissae sentiant de dignitate Iurisprudentiae, vt deteriori eam loco ac ceteras facultates esse velint? Quis enim populus, quae gens, quae hominum natio memoria nostra est adeo inculta atque omnis humanitatis tam expertus, vt non exhorrescat ac magnopere detestetur foeditatem illam dictionis, quae ab aetate ac moribus barbarorum veluti tabes quaedam mortifera defluens, in singulas quidem scientias inuaserat? Hinc proinde fit, vt iam transalpinae gentes, tum etiam Italia fere vniuersa de Dialectica, de Philosophia, de Geometria, de Medicina ceterisque iis bonis artibus libros scribat luculenter et singulari quadam proprietate sermonis. Quod igitur communiter in omnibus aliis facultatibus turpe ac vituperatione dignum esse censeretur, id in iure civili non inhonestum esse videatur? At peculiare sunt aliquae iuris formulae, quae et si cum castitate latinitatis maxime pugnant, nullo tamen modo dimitti possunt, aut inmutari. Quasi vero id non sit facultatis cuiusque proprium, vt quibusdam certis vnaquaeque utatur vocabulis, et suis quodammodo loquatur vocibus. Sunt enim non solum cuiuslibet lin-

guae, verum etiam artium ſingularum propria quaedam, vt ita loquar, idiomata. Habet ſuas Dialectica voces, habet Geometria, habet quidem Medicina. Cum itaque abunde ſatis fuerit iam vſu atque experientia comprobatum, liberaliſſimas eiſmodi diſciplinās ab elegantia latini ſermonis non abhorrere; dubitabitne, quin pari ſplendore nātūque verborum de Romano iure valeat diſputari? Quanquam ego nunquam in eorum ſententia fui, qui, ſi quod verbum ab antiquis minime vſurpatum offenderint, aut quod a Cicerone ipſo, aut a Caefare, ſeu primo quouis alio eius aetatis ſcriptore non fuerit Romana ciuitate donatum, ſtomachantur ſtatim, ſatiſdiſſeque librum deponentes, clamitant, auctori diem violatae latinitatis eſſe dicendam. In hoc autem iſti, meo quidem iudicio, faciunt et arroganter et imperite. Quis enim non videat, quod rebus nonis inuentis, plura quoque noua vocabula inducere neceſſe fuerit? Quae tamenſi olim minime recepta ac prorsus inuſitata, tamen haud idcirco nunc minus latina, aut barbara cenſeri debent: cum iam pridem ab ipſo hominum doctiſſimorum conſenſu auctoritatem et ius quodammodo antiquitatis obtinuiſſe videantur. Quamobrem elocutionem forenſem non puris putis aurei ſaeculi reliquiis vſque adeo conſtatam volo, vt quamlibet vocem, non ea aetate natam proſcribendam fore iudicem: ſed mihi ſatis erit, quod ipſa verbis propriis conſtet iis que dicendi modis, quos vſus literatorum probat: quod perturbata conſtructione non obſcuretur, quod temperata ſit numeris, quod denique ſuauiſ et quadam cum lenitate profluat. Etiamne hic homines iſti delicatiores cunſtantur? Adhucne animis et cogitatione haefitant? Quid vero ſi ſtylum grauiſus verbis ac ſapientiſſimis ſententiis ornatum poſtulaviſſem, quali vſum fuiſſe

videmus Franciſcum Hotomanum, aut immortalis memoriae virum, Iacobum Cuiacium, aut Annaeum Robertum, alioſque clariſſimos ſuperiorum temporum iureconſultos? Inſigniter iam ſplendideque hoc tempore quaefſiones ſuas expediunt plerique medici atque philoſophi, de iure autem ac legibus niſi inornate, niſi incondite duriterque diſceptari non poteris?

At nobis ob maxima negotia tantum otii non ſuppedit. Nemini ſane dubium eſſe poteſt, quin forenſis vitae genus plenum ſit curarum, plenum laboris. Tot enim ſunt iuris anfractus, tot latebrae, tot veritatis oppugnandae cuniculi, vt quemadmodum bella gerentibus et adeundi ſunt aſperi colles et munitiſſimae ciuitates expugnandae, apertoque ſaepeius campo totis viribus decertandum; ſic etiam, qui in iudiciorum caſtris verſantur, non certaminis vnus incommoda, ſed multa et grauiſſima et quotidiana ſubſeant oportet. Quamobrem magnus ille fori ductor et quaſi ſignifer M. Tullius, qui per ſummos labores in acie illa forenſi plures vnus victorias, quam ceteri pugnas, numerauerat, illud toties monet, praefertim vero in Orat. pro M. Coelio, in iſto ſcilicet vitae genere omnes omittendas eſſe voluptates, relinquenda ſtudia delectationis, ludum, iocum, conuiuium ac ſermonem paene familiarium deſerendum. Itaque ſi homines noſtri tam magna ingenii contentione tantoque animi impetu ad fori negotia incumbant, vt omnibus ſibi voluptatibus, omnibus ludis interdiciſ, vix ſpiritus et vitam ducant: concedenda quidem eſt iſtis aliqua ſermonis incuria: neque valde curandum, ſi non accurate eleganterque ſcribant. Sin autem tam multis negotiis occupati, torque cauſis ſuſceptis: quanquam nolo hac de re curioſius inquirere. Eſto per nullam paruam moram eiſdem liceat

licent esse otiosis, imo vero semper occupatissimi viuant; an condonanda erit idcirco ipsi leuitas illa, ne dicam infania orationis? Quae tanta eosdem quaeso necessitas impulit, vt plures reciperent causas, quam dicere accurate possint et cum dignitate sustinere? An lucri cupiditas? At si maiorem vim apud eos pecunia habeat, quam nominis fama, aut existimatio fori, quid est medijsfidius, quod a talibus hominibus metuere non debeamus? Quod facinus, quod scelus ab eorum manibus abesse poterit? Certe si extra contentionem ratio mihi habenda esset cum iis, qui hoc pacto utilitatem honestati anteponendam esse arbitrantur, illud primum ab ipsis quaerem, vtrumne per eam scribendi socordiam e re sua sese facere putent? At enim diligentius scribendo multo pauciores causas expediremus. Sit sane ita. Num quis ignorat, adamantem quamvis vnum et perexiguam, saxi tamen multis et ingentibus longe pretio atque aestimatione antecellere? Haud valde sapit, qui vel vnam auri massam compluribus feramentis pretiosiores esse non indicet. Rem planius agam. Longissime quidem a proposito aberrant, dum sibi persuadent, ab iis quaestus non vberimos fieri, qui pure emendateque causas dicunt. Hi profecto clarissimi solis instar vsque adeo foro praelucunt, vt omnium oculos ad se conuertant; aut imperatorum fortissimorum similes esse videntur, quorum consilium in consultationibus, quorum sapientia in iudiciis, auditoris in subsellis maxime dominetur. Equidem incredibile dictu est, quam magnum nomen afferat vel vnus causae patrocinium ex ipsis studiis humanitatis splendide et luculenter pertractatum; vt proinde mirum non esse debeat, si haud raro videamus in foro homines adolescentes iis palmam prae-

uisse, qui in iudiciis diu versari prope inter subsellia consueuerant. Nam oratio est quoddam animi nostri speculum, in quo non adumbratam modo, sed etiam veluti expressam humanae sapientiae imaginem intuemur. Hinc accepimus Socratem, hominem sane sapientem, ad explorandum suorum ingenium penitusque inspiciendum, aliud nihil ab illis postulare consueuisse, quam quod loquerentur. Vix enim fieri potest, vt certum quoddam sapientiae, aut stultitiae intus latentis vestigium non ex ipsamet oratione foras erumpat atque appareat. Ieiunitas enim illa elocutionis misera atque insulsa indicio haud obscuro esse solet leuioris animi, siue hominis si non aetate, at certe iudicio adolescentis. Quapropter Horatius in praeclara illa ad Pisones epistola statuit, ibi duntaxat reperiendum iri recte scribendi et principium et fontem, vbi existeret mens et sapientia. Cum igitur proprietas integritasque sermonis tam vberem existimationis fructum pariant; cumque ex earum neglectu facile soleant in summum discrimen adduci ingenii fama, iudicium, grauitas atque consilium; tantum abest, vt nitide politeque scribentes aliquid de iudiciario quaestu deperdant, vt ad ipsam dicendi elegantiam spe lucri amplissimaque pecunia vel maxime incitari videantur. At fortasse plus aequo de re minime dubia diximus.

Quod, vero magis animum angit meum, multoque vehementius perturbat, est sane publica ciuitatis nostrae macula atque infamia, quam quotidie suscipit de teterrima istius scriptlonis colluue. Cum enim ea sit dignitas Urbis atque maiestas, vt, quemadmodum olim imperio, ita nunc religione ac legibus in omnibus fere gentibus dominetur; illud necessario consequitur, vt hic maxima et frequentissima fieri debeant iudicia,

c'ia, vbi est fons et sanctitas legum, vbi sanioris iurisprudentiae responsa, vbi denique populi ac Reges sacrorum canones, decreta et constitutiones Pontificum Romanorum saepissime consulunt. In hac igitur tanta iudiciorum celebritate tantaque iuris tum humani tum divini disceptatione cum Romae multi de foro sint, qui gravissimas de his rebus quaestiones, nulla adhibita scribendi cura, solute oscitanterque pertractant; ecquis non videat, quantum de existimatione forum ipsum ac populi Romani nomen amittat? Etenim plurima istius generis scripta non modo Romae in dies singulos exeunt et in vulgus emanant, sed quod longe deterius est, apud exterarum quoque gentes haud raro peragantur, quae ab inusitata ista scribendi negligentia de omni pariter studiorum nostrorum ratione pessime iudicant. Cum enim plerumque sibi per locorum intervalla non liceat ad Urbem accedere, neque videre, aut alloqui homines nostrae civitatis sapientissimos, neque etiam congressus celebratissimos frequentare, vbi de studiis humanitatis et eloquentiae, vbi de re poetica, de notitia veterum numismatum, de novis philosophorum inuentis aliisque pulcherrimis rebus summo ingenio ac puris lectisque verbis dicitur; in hanc facile suspicionem veniunt, ut singularis illa latinarum literarum elegantia, quae olim Romae tantopere colebatur, in eam ipsam iam commigrarit barbariem, quam hodie permulta olent caustidicorum Romanorum volumina. Neque id sane immerito. Nam si homines, qui diu in foro versati sunt, habiti fuerint semper omnium opinione perquam docti insigniterque sapientes; isti autem sic latine scribant, ut id nescire prorsus videantur, quid demum de ceteris nefas erit in eo genere suspicari? Huc quoque error alter accedit,

quod saepe in Vrbe magna hominum istorum ratio habeatur, eorumque consilium atque opera non secus plerumque exquirantur, quam si in tota civitate nemo sapientior existeret, aut gravissimum quodque negotium eorum ipsorum iudicio, veluti Atlante caelum, niteretur; proinde fit, ut exteri homines existimationis eiusmodi specie industi soleant de ceterorum ingenio ac virtute coniecturam longe omnium pessimam facere. Ex ipsa autem tam perversa de rebus nostris opinione natam potissimum fuisse, arbitrator, earundem exterarum gentium arrogantiam prorsus intolerabilem, unde nostra despiciere consueverunt, et prae nobis vnae omnino sapere sibi videntur. Quandoquidem se suaeque tam magnifice circumspiciunt, ut iam non modo poetas et oratores, vetustissimum luculentissimumque Italiae nostrae patrimonium, fundum suum factos fuisse dicant, sed etiam nos de omni latinitatis statu atque elegantiae dignitate deiecisse gloriantur. En quem in locum deducta est vetus Italiae gloria: en quo nominis nostri fama decessit ob peruagatam istam ineptissime scribendi licentiam! Huic autem malo nisi aliquando tandem occurratur, nemo non intelligit, in diem magis ludibrio laesum iri Italiae ipsius nomen, et quod dolendum est maxime, immortalem quoque amplissimae huius Urbis existimationem. Quae quidem Vrbs clarissima ac sapientissima, Christiani imperii caput, si loqueretur, nonne vos, amplissimi PP. vestramque fidem, quantum posset, hac vna voce obtestaretur? Quod olim rapuit Gothus, quod incendit Hunnus, quod late Vandalus vastavit, nae mihi multo minoris stetit, quam si nunc meo nomini haereat ignaviae macula aut ignorantiae suspicio. Vos igitur, qui sacramento legum idcirco obstricti estis,

estis, ut iniurias ab unoquoque propulsaretis, quousque demum illatum mihi a barbaris hominibus tam acerbum, tam graue vulnus inultum esse patiemini? Illa ego, quae olim non modo domicilium, sed magistra, sed parens literarum, ceteras omnes gentes instituebam, haud minus certe sapientia, quam imperio ipsis praecluceus, nunc me videam dignam, cuius fortunam ipsaemet exterae nationes illudant, et propter imperitorum nonnullorum socordiam veteris omne dignitatis nomen amittam? Per illa vos ego grauissima senatusconsulta, per ea sapientum responsa, quae summa religione colitis, per ingenium, per fortunas vestras vos oro atque obtestor, ne pulcherrimam legum facultatem tam illotis manibus contrectari sinatis. In vestra quidem potestate positum esse scitote, irruenti barbariae frenos iniicere. Praecludite in hoc Romano gymnasio ad iuris dignitatem aditum iis, qui plane latine nesciunt. Prohibete domo vestra iuuenes, qui non apposite scienterque scribunt. Loquimur saepe de laude, saepe de gloria iureconsultorum vestrorum, qui optimis temporibus floruerunt. Hos vestris adolescentibus imitandos proponite: horum vestigiis ut diligenter insistant, etiam atque etiam cohortamini. Profligatam ita fori barbariem, videbitis ac breui pristinum splendorem legibus restitutum.

Haec, vel horum similia essent, P. C. verba, quibus amplissima haec Urbs, modo vocem posset emittere, opem vestram non postulare tantum, verum etiam flagitaret. Quibus cum mihi grauiora non inpeccant, aut quae sperem maiorem vim esse habitura, ut tandem faciam dicendi finem, ad hos optimos adolescentes humanitatis et eloquentiae studiosos, quorum potissimum causa, ut initio iam dixi, haec omnis oratio mea instituta fuit, me con-

uertam, eosque sane, nulla induta persona, sic alloquar. Per magna quidem sunt praemia, iuuenes, quae vobis olim in hac ciuitate et ingenium vestrum et fori dignitas pollicentur. Nolite tamen per Deum immortalem! pati, ut hominum barbarorum exempla ab hoc suscepto gloriae cursu vos deturbent longissimeque deducant. Contemnite istorum sermones et voculas, quibus temere audent bonis artibus obrectare. Imo ad honestissimam legum facultatem viam vobis muniendam esse statuite, non hercle barbarie ac desidia, sed sincera latinitate, sed eloquentia, sed studiis honestissimis literarum. Haec vna vobis tam arduum iter molientibus sint perarptum splendendumque viaticum. Haec sint lauta et luculenta inpellex, quae ad usum tam ciuilem, quam Pontificii iuris promatur. Itaque ex optimis quibusque scriptoribus vim dicendi et proprietatem arripite, quae lucem rebus incredibilem afferat: praefertim autem ex Tullio, qui propter ingenium et eloquentiam in iudiciis regnare dictus est. Ab ipso vires et impetum orationis, ab ipso elocutionis ordinem et ornatum addiscite eamque dicendi facilitatem, qua nihil iucundius, nihil dulcius inueniri potest. His autem ornamentis instructi, ad eorum quidem iureconsultorum gloriam proprius accedetis, qui non minus liberalissimis studiis, quam legum doctrina floruerunt, digni propterea omni laude ac memoria hominum sempiterna. Sed quid ego vobis antiqua repeto? Quasi vero hic magno numero adesse non videam iuris perinde scientissimos ac literatissimos viros, quos vobismet imitandos proponere possim. Adest scilicet hic leuissimus iuris peritorum senatus, sacrae Consistorialis aulae Aduocati ac fori Romani lumina: adsunt hi Principes Eminentissimi, qui praesentiae suae splendore ac maiestate clariorem hunc diem

Illustrioremque nobis efficere per summam humanitatem voluerit. Hi sane omnes ad hanc ipsam, quam videtis amplitudinem dignitatis, ad hoc tantum gloriae fastigium, non per inertiam, aut per literarum odium et contemtionem, sed per summum laborem, per studia optimarum artium forensi exercitatione coniuncta magna cum

laude perueniunt. Hos igitur perpetuo constanterque vobis, clarissimi adolescentes, ante oculos ponite. Horum fructuosos labores, horum praeclara studia dies noctesque cogitate. Sic enim aliquando fiet, ut vos quoque ad hanc ipsorum laudem et dignitatem, quod vobis felix fortunatumque sit, iure aliquo aspirare possitis.

DE  
VSU ET NECESSITATE  
E L O Q V E N T I A E  
IN  
FORO ET HODIERNIS  
I V D I C I I S  
O R A T I O VI.

HABITA VI. IDVS NOVEMBRIS  
AN. MDCCXVII.

**M**IRANTUR nonnulli, quid causae sit, quod pro tanta eloquentiae dignitate tantisque professorum laboribus, nequaquam satis multi adolescentes forti et magno animo inueniantur, qui, ad pulcherrimam dicendi facultatem, omnem vim ingenii omnemque industriam conferant. Verum meo iudicio mirentur potius, si quem hoc tempore ad subsellia haec nostra accedentem, quam si aut a nobis abhorrentem, aut ipsius eloquentiae studium tantumquam leve ac minime fructuosum contemnentem videant.

Nam ut omittam de ceteris causis dicere, nemo vestrum ignorat, quatenam opinio his temporibus non apud barbaras gentes, sed in hac ipsa ciuitate, in vrbe Roma de eloquentiae statu inueterauerit. Percreuit enim ore atque sermone omnium, eloquentiae usum prope omnem iam de medio esse sublatum; eiusque fines adeo anguste iam circumscribi, ut si sacras conciones, quae ad populum habentur, aut laudationes quasdam, quae ad Principes fiunt gratulandi causa, vel in eorum funeribus exornandis excipias, nullus

nullus amplior pateat locus, ubi ea satis valeat exspatiari. Dominabatur illa quidem olim in rostris, latissime regnabat in foro, eaque fere causis in disceptatione vincebat, quae patronum inuenerat eloquentiorum. Nunc autem immutata subfelliiorum forma, iudicia hac nostra aetate ita exercentur, ut in eis nihil oratorum facultati tribuatur. Cum itaque ad forensam gloriam alius iam tendendus sit cursus, alia via; frustra adolescentes nostri, qui in hac ciuitate ad hanc tantam spem aluntur, frustra, inquam, diutius in hac palaestra versantur. Non est sane, cur hi summo studio tantisque vigiliis in eloquentissimorum oratorum lectione occupentur: nec laude digni, qui multum aetatis atque industriae in ea facultate sibi comparanda ponunt, cum qua nulla iam intercedit cum iure ciuili affinitas nullumque vinculum societatis. Haec fere sunt P. C. ea, quae plerique de foro homines crebris solent usurpare sermonibus. Haec prope omnium adolescentium nostrorum de eloquentiae statu vna vox atque sententia. Ego vero aut rudis omnino sum rerumque humanarum vndique ignarus, aut istiusmodi opinionem inanem prorsus stultitiaeque esse et haberi oportere, contendo. Nam esto, immutata sit vetus illa iudiciorum ratio, esto, nunc causarum actiones contineantur domesticos intra parietes; neque eam populi frequentiam plausumque adfiscant, in quo oratorum studia maxime niti solebant: adhuc tamen in hoc ipso, quo nunc utimur, iudicandi genere, dico, interdictam hodie foro non esse eloquentiam, sed in iudiciis quoque nostrorum temporum suum esse eloquentiae usum, suam vim suamque, ut paucis dicam, necessitatem. Quod quidem totumetsi primo multis incredibile esse videatur, spero tamen fore, ut hac ipsa re nihil verius, nihil rationi

magis consentaneum esse intelligant. Cum autem in eo orationis genere versemur, in quo de dignitate Romani fori, de liberorum vestrorum gloria maximisque utilitatibus agitur, profecto dubitare non possum, quin me hodierno die attente libentissimeque audiat.

Quoties autem mecum ipse cogito, quam libere nonnulli confideenterque dicant, nostris hisce temporibus ad forum accommodari nequaquam posse eloquentiam, toties sic mecum statuo: aut hos temere damnare, quod minus intelligunt, quare nihil turpius, nihil impudentius; aut eos prorsus, in quo sita sit eloquentia, non inter noscere. Putant fortasse, cum eloquentiam audiunt, facultatem dici, quae quamlibet in partem arbitrato suo ac libidine audientium animos flectat et circumducatur; quaeque ita sit acris, ita vehemens in dicendo, ut non tam verba et sententias fundere, quam tela et fulmina vndequeque vibrare videatur, quemadmodum de periculis illis Atheniensis veteres Comici tradiderunt. Cogitant, puto, oratores homines turbulentos et quasi lymphatos, qui in id maxime incumbant, ut precibus, clamoribus atque eiulatibus turbas excitent ac tragoedias. Id denique opinantur, omnem dicendi vim usque adeo in concitandis affectibus esse repositam, ut iis sublati, eloquentia statim concidat atque intereat prorsus. Enimvero errant, et vehementer quidem errant eiusmodi homines; nec quicquam recte iudicant de eloquentia. Tantum enim abest, ut in excitandis animorum motibus maxime, vel solum comparari debeat orator, ut contrarium potius, si praesertim de eloquentia, quae ad forum pertinet, res agatur, et senserint et palam docuerint homines sapientissimi, iidemque in arte dicendi peritissimi. Nam ut omittatis recordari, quid olim

olim hac de grauissimus Areopagitarum senatus decreuerit, qui semper ab huiusmodi lenociniis sic abhorruit, ut ne iudices aut dicentis aspectu, aut actione mouerentur, sed vnas rationes et vnum ius aequitatis attenderent, eum in tenebris audire voluerint; difficile sane non erit assequi, in hac ipsa opinione fuisse Socratem, Platonem, Aristotelem aliosque plurimos. Et quidem Socrates ipse cum summo capitis discrimine reus ageretur, suamque causam sic iam egisset, ut aliud nihil expectasset, quam quod iudices ad misericordiam dicendo commoneret; noluit tamen eorum clementiam implorare, noluit lacrymas adhibere, noluit vxorem, liberos, amicos sordidatos producere: sed maluit honeste mori, quam gemitu eiulatuque muliebri vitam turpiter deprecari. Plato autem, Socraticae doctrinae cultor optimus et propugnator acerrimus, quam seuerè, quam grauiter eos saepe reprehendit oratores, qui parum de veritate solliciti iudicum animos, admotis veluti machinis, blanditiis emollirent, et a iudicii seueritate, cui sese iureiurando obstrinxerant, ad lenitatem et misericordiam impellerent? Quid demum Aristoteles, qui cum tam multa eleganter ornatèque de oratoria facultate conscripserit, eiusmodi animorum motus non modo non probauit, sed eos quoque grauissime maledictis infectatus est quasi labem et nefariam iudiciorum pestem? Et quidem si iudicem pecunia corrumpi, nemo vquam, nisi forte improbus, praeclarum duxerit; quis laudauerit artificio quodam iudicem ipsum deprauari longèque a recta ratione deduci? Videant ergo, quam facile decipiuntur, qui putant, animorum concitandorum vi sublata, eloquentiam nullo modo posse consistere. Quod igitur isthaec iudiciorum consuetudo neque populi

studia, neque iudicum iram, aut misericordiam admittat, sed summam animi aequitatem summamque placabilitatem et quasi veterem illam Stoicorum *ἀράθυαν* postulare videatur, non continuo eloquentiam foro exulare optimo iure quis dixerit. Aliud est profecto pugnacem illam et contentiosam dicendi rationem, quae ad permouendos animos maxime valet, inueterasse; aliud vero e iudiciis, quae modo fiunt, omnem eloquentiae usum fuisse sublatum. Quis enim nobis nunc recte pronunciauerit fuisse vestibus interdictum, quod nemo praetexta, aut toga, vel fago prisco more induatur? Praeterquam quod hac ipsa aetate *ἀράθυαν* istam in foro regnare minime video. Imo a plerisque summis causarum patronis animaduerti calliditatis plurimum et industriae ad commouendas iudicum mentes haud raro vsurpari. Quorsum enim spectant illae de aduersariorum fraudibus querimoniae? Quorsum tam multi de mala ipsorum fide clamores? Cur iudices tam enixe orant atque obtestantur, ut honestissimae familiae, de qua res est, rationem habeant, ut domus paupertatem, ut rei familiaris angustiam, ut liberorum multitudinem, ut duriorem fortunam et iniquissimam conditionem mature cogitent atque perpendant? Non haec praecipua animorum concitandorum ratio? Non hinc locus patet, ubi magna vis eloquentiae versetur? Age porro, contigit Romanum forum, multaque ex parte florentissima oratorum gloria obsoleuit vetustate ac vicissitudine temporum: non ita tamen obsoleuit, ut maximam adhuc partem sibi in iure dicundo non vindicet.

Sed antequam rem propius attingamus, alteram mihi video conuellendam esse opinionem, falsam quidem non minus et absurdam, quae tamen multo-

rum



rum studia longe a nobis abducit. Putant nonnulli, hominem eloquentem eum tandem esse ac dici debere, qui plena ac perenni quasi flumen oratione redundat; eumque ad Demosthenem, aut M. Tullium proxime accedere, qui ceteris hominibus verborum pompa et sermonis granditate antecellit. Ac vero quis tam rudis ingenio, aut in literis tam novus, qui non intelligat, plura quidem esse dicendi genera, et ad Rhetoricae facultatem orationem amplam et copiosam non magis quam pressam et modice temperatam pertinere? Alioquin neque Isocrates, neque Plato in amplissimum oratorum ordinem cooptarentur, quod eorum oratio, ut Cicero animaduertit, mollis erat ac temperata, nihil iratum habens, nihil inuidum, nihil atrox, nihil inflatum et grandiloquum, sed casta et verecunda quasi virgo. Illud itaque dicendi arte praestantem voco, qui bene, id est qui luculenter ornateque orationem tum ad res, tum ad personas, tum etiam ad tempora satis accommodatam adhibeat. Sit robustum dicendi genus: sit gracile, si mauis, atque exile, non impedio. Mirum profecto, quam varia et multiplex sit eloquentia. Quemadmodum in infinita hominum multitudine vnum alteri ore ac vultu, ceterisque lineamentis persimilem omnino non videas; ita ne duo quidem oratores, eodem prorsus inter se stylo eademque dicendi forma, conueniunt. Alter quidem acuto ac subtili magis quam amplo ac vehementi delectatur: alter grauis incedit et maiestate verborum et dignitate sententiarum: alii vero ita medium tenuere, ut voluerint illis quidem ornatiores, his autem submissiores videri; ut propterea, si vera fateri volumus, quot fuerunt olim viri eloquentiae splendore clarissimi, totidem plane dicendi formas expresserint. Quid quod alias at-

que alias scribendi rationes et multiplices prope dicam ipsius eloquentiae facies in vno eodemque homine intueri fas est? Quanta enim mehercule in vno M. Tullio dicendi varietas? Quam amplum et multiplex scribendi genus? Modo humile ac mediocre, modo angustum atque excelsum videas; iam asperum atque acerbum, iam suauae ac lenae finens, ut nimirum et locus et tempus, aut res postulare videbantur. Cum enim sapientissimus atque immortalis vir nunc in foro, nunc in curia diceret, et iam oratorem iam philosophum, iam vero consulem, aut imperatorem tutoremque reipublicae ageret, ita opportune loco ac tempori orationem accommodabat, seque ad rerum dicendarum formas ita traducere solebat, ut grandia elate ac magnifice, media temperate ac mediocriter, parua tenuiter pertractaret.

Quae cum ita sint, quid est, quod rabulae quidam de fori cinile cum eloquentia iam pridem diuortium fecisse contendunt? An quod praefens indiciorum status vbertatem illam orationis et dicendi ornamenta non recipit, sed sincerum potius lenae ac temperatum loquendi genus, proscribenda erit continuo atque e foro exterminanda dicendi facultas? Quasi vero sublata veteri forensium actionum forma, omnis pariter suadendi ratio e iudiciis sublata esse videatur. Quo pacto autem sperant homines peracuti, se quicquam de lure recte statuere ac iudicibus persuadere posse, si eius facultatis praesidio careant, quae vna suadendi vim praecipue neruosque ministrat? Ego sane nihil video a recta ratione magis alienum, quodque magis consilio repugnet.

Ut causae fidem, inquit, dicendo facias, et non opinione solum, sed etiam ad veritatem iudicibus persuadeas, non praecepta rhetorum, aut eloquentiae myrothecia, sed iuris adi-

eundi

eundi sunt fontes et peritissimi legum interpretes consulendi. Ita profecto. Ecce tibi ante oculos immensa rerum ac verborum copia ex iis, quae causae maxime fauere videntur. Sexcenta habes tum ex Romano, tum ex Pontificio, tum etiam ex statutorio iure argumenta, quae in medium afferas. Quin etiam innumeri doctores et legum interpretes, tot controuersiarum et consiliorum scriptores praebent tibi ad scribendum segerem vberissimam atque amplissimam. Quis vero Oedipus, aut quod tibi de caelo iumen affulgebit, ne tanta ac tam varia rerum multitudine obrutus de charta in papyrum scribas (verba sunt eruditissimi Polyhistoris Germani) inepta, futilia, superuacanea, chesin ipsam vel parum, vel nihil attingentia? Ita enim moris est vulgo, inquit, apud iuriconsultos. Quis, inquam, te doceat singula loco suo scite disponere, et communes argumentorum locos industria quadam rectoque ordine pertrahere, ut perspicue et ornate, tum etiam breuiter, quae ad causam pertinentia sunt, explices atque expedias? Quotidianus, opinor, vsus exercitatioque forensis. Itane vero? Sed vnde fieri dicendum est, quod homines aetate iam matura et in foro exercitati quam qui maxime, praepostere tamen ac peruerse sine ordine ac sine delectu de iure scribant? Quid causae tandem est, quod in tanta exercitatione vsuque forensi, nihil aliud praeter putidos et male sutos centones farciant, qui viris doctis et eruditis stomachum mouent? Nonne quia illotis, ut aiunt, manibus ad sacrosanctas, quas ipsi vocant leges, pertrahendas ausi sint accedere? Nonne quia bonarum artium et eloquentiae adiumenta non habent, vnde orationis filum apte pertexere valeant? Equidem negari non potest, elegantiorum literarum studia opi-

um esse fundum, cui inaedificari debet omnis ciuilis prudentiae doctrina: quo qui careant, nunquam veram forensium laborum gloriam assequuntur. Accipite quaeso testimonium non caussidici alicuius de triulo, sed viri doctissimi et de omni iuris scientia optime meriti, Hugonis Grotii, qui Gallos, ad quos disertissimam scribit epistolam, ita grauitur admonet. Iureconsulti munus, inquit, virum magnam uon faciet, nisi eloquentia accedat. Equidem magno sui experimento didicerat homo in iurisprudentia maxime exercitatus, quantum ab eloquentia ceterisque bonis artibus praesidii habeant, qui in foro aliqua cum laude versari cupiunt, cum ipse non alia ratione in iis, quae de iure belli et pacis elegantissime tradidit, veteram iureconsultorum in dicendo gloriam aequauerit.

Age vero homines plerique de foro ita ingenio ac iudicio polleant, ut inutilibus amputatis, non modo quae solida sunt atque optima conseruentur, sed singula quoque in ordinem digerant ac satis bene disponant. Video, me plus nimio de meo iure concedere. Fac tamen ita esse omnino. An propterea ob eiusmodi ingenii vim eloquentiae studia ad forum minus pertinere censenda erunt? Quid enim ista non inelegans dispositio atque ordo, si praeterea nullus adit verborum delectus, nulla elegantia vocum, nulla denique germanae latinitatis imago? Poteritne mehercule eiusmodi lectio mulcere legentium animos et suauitate aliqua allicere, ut attente libentique animo, tota quanta est, perlegatur? Lectio enim, ut optime ait Cicero, sine delectatione negligitur. Quid si lectio bene longa, aut de rebus per se iniucundis, vel etiam subtilibus et obscuris? Tunc sane dilucidam puramque dictionem, quae rebus istiusmodi lucem afferat, nemo

nemo non videt maxime fore necessariam. Cum igitur deletus ille et cura verborum, unde recte Caesar eloquentiam originem suam ducere affirmabat, ad eloquentiam ipsam iure suo pertineat; nemo profecto studiorum huius generis expers eas feligere poterit, quae obscuriora illustrent, et inluauia ac molesta iucunditate quadam ac sapore perfundant. Non est itaque, cur miremur, si homines forenses, qui haec nostra studia auersantur, aliquando tam obscure scribant, ut Chrysippum illum aemulari videantur, cuius integrum volumen ambiguis oraculis ac flexilquis ambagibus sic refertum dicitur, ut ad illud enodandum nouo semper opus esset interprete. Nam quod Cicero olim semel ingenii solertia, vel malicia potius in Cluentiana causa se fecisse gloriatus est, obscurasse videlicet dicendo iudicum mentes: illi quotidie ignorantia faciunt, quod se nempe dictio nitida ac sincera deficiat, qua animi sensus et cogitationes suas explicare commode valeant. Cum enim ex Aristotele prima eloquentiae virtus sit elocutio pura ac venusta, quae facit, ut oratio nihil barbarum, nihil insolens, aut peregrinum habeat, sed omnia singularum vocum elegantia earumque structura et collocatione optime inter se cohaereant; non video, quo pacto queant luculente scribere, qui elocutionis ipsius vim et praecepta prorsus ignorant. Hinc barbarae illae et nunquam apud latinos auditaee locutiones, quibus quasi quodam humanitatis sale homines plane insulsi scriptiones suas condire sibi videntur. Quae ut percipiantur, non satis est habere prae oculis glossaria vniuersa, quae de barbaris vocibus magno studio

collegerunt Fridericus Lindenbrogius, Henricus Spelmanus, Gothofredus Wendelinus, (\*) Gerh. Io. Vossius, Carolus de Fresne alique plures. Vnde vero istiusmodi coenum ac sordes homines festiui colligere poterunt? An ex purissimis veterum iureconsultorum monumentis? An ex ipsis Iustiniani institutis? An ex codice Theodosiano? Credo fortasse ex Nouellis, ex Authenticis, aut Pandectis. Quam vellem clarissima eiusmodi exempla sibi ob oculos ponerent! Id quod superiori aetate summa laude fecerunt Guilielmus Budaeus, Antonius Faber, Iacobus Cuiacius, Franciscus Balduinus, Iacobus Gothofredus, Franciscus Duarenus alique sapientissimi viri, qui cum ciuili scientia elegantiores literas et eloquentiam optime coniunxerunt. Quorum profecto volumina eam redolent sribendi castitatem atque elegantiam, ut si forte quae de rhetorica facultate Aristoteles, aut quos de Oratore libros Cicero memoriae prodidit, nobis fato aliquo interisissent, ex ipsis mehercule eloquentissimis viris haberemus, unde suppleri possent eloquentiae praecepta et omnis dicendi venustas. Cur ergo quos habent duces et optimos sribendi magistros pressio pede non insequuntur? Cur singularis eorum sapientiae vestigiis non insistant? Pudetne sequi Fabros et Cuiacios, barbaros vero et imperitos, qui eruditorum omnium conuicio vapulant, sequi non pudet?

At enim iureconsulti, quos mihi praedicas, sapientes quidem ac disertis, non e foro, sed ex Academiae spatiis extiterunt. Versabantur illi in eruditorum vmbraculis ac Lycei otio, ubi satis commode potuerunt ius, de quo quasi dome-

E

stica

(\*) Huius Glossarium Salicum Legibus Salicis illustratis additum est, et habetur inter Opera Io. Jac. Chiffletii Antverp. 1649. ut de aliis hic adductis Glossariis taceamus.

stica exercitatione in gymnasiis disceptabant, aspergere doctrinae floribus et eloquentiae pigmentis colorare. Nobis autem quotidie descendendum in medium agmen, in puluerem, in clamorem atque aciem forensis, ubi sane non pulchre cultis et affabre elaboratis sed bene solidis armis pugnandum est. O praeclaram pugnam! O certamen cruentum! in quo, ut video, aduersarii suis se miserime telis confodiunt. Etenim satis intelligo, magnum interesse discrimen inter sapientissimos viros, quos causa honoris paulo ante nominaui et homines nostros, qui hodie in foro cum aliqua nominis fama versantur. Enimvero duo sunt omnino, in quibus eorum eloquentiam imitari et ad illam proxime accedere, e praesentimore vsuque fori tenentur: in scribendo scilicet et causam ad iudices referendo. Ad utrumque hoc munus certe ingenium, humanitatis studiis perpolitum et dicendi exercitatione bene subactum depositi, quis non intelligit? Ut proinde ex immutato pristino iudiciorum statu, unde eloquentiam foro eiectionem plerique argumentari solent, ego contra pro hac ipsa, qua nunc utimur, forensi consuetudine, maximam ipsius eloquentiae necessitatem statui debere contendo. Nam agebantur olim causae summo apparatu maximoque splendore. Victoriam sibi magna ex parte vindicabant tum patroni eloquentia, tum populi Romani studium, qui iudicis maxima frequentia adesse et aequitatis patrocinium quodammodo arripere solebat. Huc accedebat eius, de quo erat iure decernendum, praesentia atque aspectus; vxoris lacrymae, gemitus filiorum, amicorum officia et preces, spectata erga Rempublici merita, postremo iudicum pietas et commiseratio: Quid vero perorantis vox atque actio? Quae profecto sic valet ad mentes hominum permouendas, ut

fama sit Demosthenem ei primas, eidem secundas ac tertias tribuisse. Certe Cicero hanc ipsam vnam in dicendo maxime dominari affirmabat. Cum igitur haec omnia iam e foro descuerint, quid aliud misero clienti ad salutem remanet praeter vnam scriptionem, iuris quasi naufragii tabulam? Quae quidem si obscura, ut difficilis sit explicatu; si ieiuna atque agrestis, ut legenti nausea fiat, nonne de omni causa actum esse dicemus? Continetur nunc tota quanta est causarum actio vnius hominis diligentia atque industria: qui nisi in scribendo singula ad rem pertinentia in bono lumine collocauerit; nisi facti et iuris nervos artusque optime disposuerit, verendum est sane, ne eiusmodi causa non praeclaros exitus habeat. Et negare quis poterit non maiorem nunc, quam olim in foro oratoriae facultatis usum esse ac plane necessitatem?

Alterum vero, in quo eloquentiae studium, ut dixi, nostris hisce temporibus homini forensi maiorem in modum necessarium esse iudico, est nimirum causam ad iudices referendi consuetudo. Qua quidem in re mirum quantum valeat dicendi venustas et eloquentiae praesidium. Etenim siue latino sermone siue domestica atque vernacula lingua (eodem quippe res recidit) id fiat, talis quidem esse debet doctoris industria, ut verbis quam paucissimis rem doceat, persuadeat, flectat et tam quodammodo vincat. Quod negotium permagnum sane atque arduum qui suscipit, non temere et casu, sed meditando et ex arte dicat necesse est; ea videlicet perspicuitate, ut rem omnem aperiat atque illustret; iis verbis puris atque electis, ut si dicendo non delectet, at certe animos non offendant; ea denique breuitate orationis, ut iudices, homines vel maxime occupati, longo dicendi ambitu minus defatigentur, argumenti tamen vis tota eorum

eorum mentibus haereat penitus atque infideat. Has autem singulas oratoris partes qui non satis apte accurateque expleuerit, hunc profecto muneri suo deesse iudico; et nihil dubito, quin is caussa, etsi optima illa sit, turpiter cadat. Quod si nonnulli naturali quadam dicendi copia, nullo adhibito studio, id satis praestant; hoc praeterquam quod non est multis natura datum, sed quasi privilegium et singulare paucorum donum; id praeterea eloquentiam fori non amittit, sed eius necessitatem luculento admodum hoc ipso exemplo confirmat. Huc quoque accedit, orationis vim eiusmodi insitam et a natura profectam tantologis plerumque aliisque sermonis scaterere vitiis, quae nisi ars dicendi opportune amputauerit, ea offendit plurimum ac molestissima esse solet.

Supereft iam, ut quam breuissime eorum refutemus errorem, qui etsi studia hanc nostra vituperare non audent, imo ea palam laudant atque extollunt, negant tamen posse fieri, ut vnus idemque homo simul praestet et dicendi genere et ciuili scientiae doctrina; cum res vtrique magnam vim ingenii, multas vigilas maximosque procul dubio labores requirat: nisi forte velit vel paucissimas causas suscipere et per raro ad forum accedere, vel quod longe deterius est, in iure discutiendo segnior ac remissior videri. Profecto homines isti, si haec de se sui que ingenii imbecillitate loquantur, bene habet; non repugno. Norunt ipsi, ut poeta inquit, quam sibi curta supellex. At vero si ex suis viribus alios aestimare, atque omnes ex ingenii sui modulo metiri velint, ferendi nullo modo sunt, imo grauiter reprehendendi. Nam quae, malum, amentia est ista, quod se praestare posse diffidunt, id vniuersum ab nemine alio fieri posse contendere? Quis aequo animo

ferat homines imperitos, qui eloquentiam ne de facie quidem nouerint, quique, ut lepide Budaeus ait, albane, an atra sit, diiudicare nequeant, negare tamen pugnacissime, ipsam cum iure ciuili posse coniungi, quocum coniunctissima semper fuit? At magno opus est ad eloquentiam ingenio, magno conatu, summis viribus. Esto: concedatur quidem difficillima esse, quae pulchra et admodum ardua, quae optima. Verum si id, quod est, fateri volumus, eiusmodi labor iis plane summus ac prope intolerabilis, qui cruda adhuc studia ad forum attulerint, et humanioribus litteris vix leuiter informati ad iuris lauream aspirauerint. Qui vero ex humanitatis studiis solidam sibi eruditionem praecocupauerint, et apparatus elocutionis vberem satis et luculentum tempestiue collegerint, nae ego amens, si in causis defendendis herculeo isto sudore manauerint. Imo nullus dubito, quin ipsi prompte atque expedite de iure scribant, quemadmodum in ceteris argumentis, hominibus in iis studiis exercitatis, vsu venit.

Sed plura iam fortasse, quam volebam, de re minime obscura. Quis enim non videt, istorum opinionem satis superque refutari exemplo domestico complurium clarissimorum virorum, qui in hac ipsa ciuitate a pueritia hoc consilium sequuti disputationes forenses cum expedite, tum ornate ac docte pertrahant, ut non minus eloquentiae vi, quam iuris telo pugnare ac vincere videantur. Horum sane auctoritas in hac Vrbe quam maxime inualuit, non quod iuris scientia ceteris longe praestet, ut sibi falso persuadent plurimi, sed quod dicendi copia et facultate ceteros antecellant. Quo fit, ut ipsos magna clientum caterna stipatos huc illuc quotidie volitare videamus, et pecunias et opes et amicitias sibi praecla-

ras comparare. Possem hic multos nominatim proferre ex iis, qui hodie in foro familiam ducunt, quique hoc industriae genere ceteros sui aequales longo post se intervallo reliquerunt. At nolo aliquem nominare, ne aut cuiquam adulari, aut si non omnes, ut par est, laudauero, debita laudatione quemquam fraudasse videar. Sed praestet id tacitis vestris cogitationibus existimandum relinquere, de quibus hanc tantam laudem intelligi cupiam. Neque enim facile latere possunt, si velint; cum sint in oculis totius civitatis, atque eorum fama omnium sermone celebretur. Horum dignitate atque opibus mirum profecto, alios ad haec ipsa studia non incitari atque accendi: quemadmodum fama est, Miltiadis tropaea Themistoclis animum ita inflammasse, ut vel quiescentem e somno excitare solerent. Atqui isti duro ore possunt quotidie non vnus, sed multorum praeclaras in foro victorias et tropaea oscitantes intueri. O singularem stuporem! O stultitiam incredibilem!

At magnam quidem vim esse in fortuna aliqui putant, et inanis eiusdem numinis arbitrio illud fieri, ut aliquando etiam in foro primos ordines ducant, qui eorum opinione inter gregarios milites deberent incedere. Alii vero ingenio, ut sibi persuadent, altiores caelum ipsum, ut poeta inquit, stultitia petunt, et arcanas nescio quas siderum coitiones ariolantes, clarissimorum virorum praestantiam non labore atque industria, sed stellarum benignitate derivari et quodammodo donari volunt. At mehercule illi non minus quam fortuna ipsa caeci esse videntur, quod non videant, sapientia et consilio fieri, quod ipsi casu contingere putant: hi vero malitiosi atque

improbi, quod ad ignaviam suam excusandam de summorum virorum gloria plurimum detrahant, aliorum virtuti et efficacitati tribuentes, quod illi reuera sibi met bonarum artium studio, multis vigiliis maximisque laboribus compararunt.

Quae cum ita se habeant, equis est, qui non intelligat, quam utile, quam fructuosum, vnoque verbo quam necessarium sit eloquentiae studium iis, qui id temporis in foro aliqua cum laude versari volunt? Non eia est, non exulavit foro, ut barbari homines obloquuntur, amplissima dicendi facultas. At quamdiu Romae tribunalia patere, et tunc publica tum privata iudicia fieri contigerit, quamdiu causas de criminibus agitari, et homines in ius vocari atque defendi, tamdiu illa pristino suo iure uti, atque in sublelliis ut olim regnare videbitur. Desinant ergo, desinant optimarum artium contemptores eloquentiae gloriam insolenter traducere: comprimant aliquando voces obtrectationis et invidentiae plenas. Plus satis iam palam est, eloquentiam ad forensem dignitatem hac nostra aetate esse vel maxime necessariam. Et si, age, pergant, dum volent, de foro rabulae honestissimas disciplinas maledictis incessere. Clamitent boni viri inter eloquentiam ipsam et iuris scientiam nullum interesse commercium, nullum vinculum societatis. Suadeant, quantum valent, ab eiusmodi studiis nullum esse expectandum emolumentum, nullas opes, nullum decus: omnem ipsis obtrectandi licentiam damus. Neque enim veremur, ut quisquam tam hebes ingenio, aut natura tam amens existat, qui ab istorum dicacitate ieiunisque argumentis sese vnquam ab eloquentiae studio dimoveri patiatur.



IN  
OPTIMIS STUDIIS  
LENTE FESTINANDVM  
ORATIO VII.

HABITA XV. KALEND. NOVEMBRIS  
AN. MDCCXVIII.

**G**LORIAN TUR plerique nostrae aetatis homines, optimarum artium studia hoc tempore ad eam esse deducta facilitatem, ut paucis annis et perexiguo labore cuique facile sit magnam sibi doctrinae laudem comparare. Quinetiam nonnulli libere affirmant, hominis vitam non breuem admodum esse, ut putant Hippocrates, ad vnam vel alteram disciplinam assequendam; sed diurnam quoque satis et bene longam ad amplissimum illum scientiarum orbem obtinendum, quem Graeci Encyclopaediam dixerunt: tot videlicet esse hodie discendi subsidia prompta atque parata, tam amplam librorum supellestem, tot publica ubique gymnasia et nobilissima literarum emporia patere, ut nisi quis ingenio sit omnino destitutus, aut summam ad ignaviam proiectus, breui possit praeclaros in omni liberalium artium genere progressus facere. Quae quidem si vera sunt, ab istis quaero, qui tandem fiat, ut in tam obuia atque expedita discendi ratione, tam pauci nihilominus reperiuntur, qui non dico vniuersum illum scientiarum circulum ingenio complectantur, sed in vna vel altera disciplina inter ceteros praestent, et quasi primos ordines ducant? Vbi memoria nostra Platones, vbi Demosthenes, vbi Cicerones, aut Plinii atque alia eiusmodi clarissima doctrinae lumina? Nemo profecto non videt, communi experimento reffelli inanem istorum hominum credulitatem, aut nimium, ne durius agere videar, blandiendi cupidae iuuentuti desiderium. Multo labore multisque vigiliis, si vera fateri velint, opus est ad solidam doctrinae laudem consequendam. Nec quicquam est, mea sententia, quod studiosis adolescentibus officiat magis quam immatura et praeceps studiorum ratio. Quandoquidem

si vlla alia in re, certe in optimarum artium studio, ut veteri proverbio dicitur, est lente festinandum. Quare adelite vos animo, Adolescentes optimi, quotquot hodie ad intermissa literarum studia instauranda frequentes in hunc amplissimum locum alacri laetique animo conuenisse video. Nam vestram causam et quidem grauissimam hodierno die me potissimum suscepisse profiteor, dum praeproperam quorundam in studiis festinationem oppugnare aggredior. Hanc enim vos veluti ingeniorum pestem ac perniciem fugiendam esse, quemadmodum spero, facile intelligetis.

At vero, dum in ipso orationis aditu immaturam et plus aequo festinam studiorum rationem reprehendere instituo, nemo vestrum sibi persuadeat, eorum mihi probari consilium, qui in leuioribus studiis adolescentis diutissime detinent, ut ad vnam latinam linguae institutionem complures anni, imo integra hominis aetas vix satis esse videatur. Tantum adest, ut istorum sententiam laudem, quin illam potius nullo modo ferendam esse iudico. Nam ut de ipsius latinae Grammaticae rudimentis exemplum sit, quid est per vestram fidem! immensa illa regularum, appendicum, scholiorum monitorumque farrago, quam ad torquenda puerorum ingenia vsque adeo exagerauit cerebrosa ista grammaticorum natio? Quid tot ambages ac subtiliores observationes, quae non latinae linguae castitatem, sed tricas et apinas bene longas continent, in quibus miseri adolescentes potissimam aetatis partem traducere coguntur? Amputer aliquando tot luxuriantibus ramis abundans ipsamet latine loquendi ars; puerisque tradatur angustis ut olim finibus circumscripta Grammaticae facultatis institutio: nae ego amens sin, nisi mino-



ri cura et perbreui tempore pueri ipsi latinum sermonem integrum ac purum expedite loquantur; quos hodie post tot labores atque aetate grandiori adhuc balbutientes audimus. Quod quidem de longioribus grammaticorum commentationibus sic dictum volo, ut de Dialecticis pariter, de Physicis, de Theologicis aliisque grauissimis facultatibus non minus intelligatur. Quandoquidem ingeniorum luxuries tantam in singulas disciplinas propaginem subtilitatum inuexit, ut sapientissimi cuiusque iudicio nihil iam utilius magisque necessarium esse videatur, quam eas circumcidere et quasi ad viuum rescicare. Quamobrem ego nunquam eos bonarum artium professores laudauerim, qui nimia quadam docendi intemperantia ducti singula quaeque student subtilius copioseque enucleare, ut nihil praeterea superstit dicendum, vel cogitandum; quique non id quaerunt, ut ad doctrinam veram et solidam iuuentuti faciem praeferant, sed illud potius, ut rerum vbertate et dicendi copia magnam sui moueant audientibus admirationem. Qui si gloriolam istam pluris quam iuuentutis ab se recte in studiis instituendae laudem faciunt, certe sunt reprehendendi.

Verum ut aliquando, vnde digressa est, reuocetur oratio mea, si quis forte putet, cum vnam vel alteram disciplinam a me nominari audiat, leue aliquid, aut parul negotii provinciam dici, is vehementer errat. Quemadmodum enim maximorum montium altitudo procul Intuentibus minus conspicua esse solet, vbi vero ab ea propius absumus, tum apparet, quanta demum illa sit, et quam in sublimi assurgat: ita fere nemo profpicit, quam excelsum atque arduum sit cuiusque doctrinae fastigium, nisi illud cominus contempletur, et quam proxime ad ipsum accedat. Praestat itaque liberalium artium

naturam earumque altitudinem, atque profundum paulisper inspicere. Nihil autem hoc loco de studiis eloquentiae dicam, ne nostra magnificentius extollere, aut quae in me multa desunt, ab aliis exquirere velle videar. Norunt multi, qui me audiunt, quam late pateant huius generis studia. Norunt, cuiusmodi laboris sit, oratoris personam, pro virili parte ac dignitate, sustinere. Praeterea in oculis omnium extant, quae multa M. Tullius, Fabius Quintilianus et Dionysius Longinus ad perfectam absolutamque dicendi rationem esse maxime necessaria doctissimis monumentis tradiderunt. At vero Philosophia, quae primo nobis occurrat, in quantam, Deus immortalis, latitudinem se se explicat? in quot partes ac membra veluti magnum doctrinae corpus distributam videmus, quae singula multiplicem eruditionem comprehendunt? Nam ut Dialecticae artem, quae sane suas habet subtilitates et anfractus bene multos, praeteream; quanti ingenii ac laboris est, rerum omnium, quas oculis intuemur, quaeque in terris vel in aqua gignuntur, siue in aere ex elementorum conflictu procreantur, causas penitus abditas retrusasque perquirere? Quot profecto in hac vna naturae contemplatione arcanâ latent, de quibus et veterum philosophorum placita consulenda, et experimenta recentiorum ad examen saepius sunt reuocanda? Equidem nemo hactenus fuit, qui certo definire, aut satis explicare potuerit, et magnetici lapidis ad caelestem polum conuersiones, et originem fontium et admirandam fluminum celeritatem, et vim ac sexcenta eius generis alia. Tu vero, vix auditis aliquot de materia et forma opinionibus, vix nonnullis de causarum numero atque ordine quaestiunculis delibatis, te continuo physicum praedicas et vniuersae naturae interpretem

pretem sapientissimum? O stultos Democritos, stultos Platonem atque Aristoteles, qui tot annos pertinaci industria assiduisque vigiliis in philosophiae studio defudastis. Ecce adolescentes nostri paucis mensibus et quasi per ludum omne id assequuntur, ad quod integram diuturnamque aetatem vos nequaquam sufficere posse putabatis. Certe Themistocles, ille philosophus, cum centum et septem annos, quibus vixit, in Philosophiae contemplatione fere omnes consumpsisset, mortis proximus dixisse fertur: se dolere, quod tum de vita egrederetur, quando in Philosophiae studiis progressum aliquem erat facturus.

At vero profundiores, inquit, naturae notitiam iis vitro relinquimus, quibus per omnem vitam in eiusmodi studiis otari vacat. Nobis autem, qui ad gravissimas facultates, ad Iurisprudentiam, ad Medicinam, vel ad Theologiam properamus, abunde est, primoribus labris isthaec degustasse, et extremis, ut dicitur, digitis attingisse. Praeclare quidem. At Metaphysicae studium, quod viri sapientes tanti fecerunt, atque Ethica, quae disciplina morum vitaeque civilis magistra habita semper fuit, omnino superfluum? Quid multa? Honestissimas siquidem eius generis disciplinas quasi otiosas occupationes aestimant, et tanquam figmenta a male feriatis hominibus excogitata negligunt atque praetereunt. Non erat ergo, cur tam multa sapientissimus Socrates de virtutibus ac vitis disputaret. Non erat, cur Plato atque Aristoteles tam ampla de singulis Philosophiae partibus scripta posteritati relinquerent, si in illis nihil excellens, nihil egregium, nihil denique bonae frugis inueniretur. Age vero ad medicorum scholas aduolent cursores isti studiorum. Graecas, credo, litteras, quibus ipsa mediendi ars

principium sane debet et incrementum, intime norunt. At vereor, ne latinas quidem factis intelligant. Caelestium corporum motus, opinor, et quae in haec nostra inferiora vim habent, probe tenent. Quid ad medicum, inquit, fidera? Nos morborum originem eosque depellendi rationem, non stellarum ortus et occasus inquiremus. Atqui Hippocrates et Galenus, medicorum principes, hanc ipsam astrorum scientiam ad morborum curationes suscipiendas, aut etiam praetermittendas, ad crises internoscendas, ad exitus bonos vel malos praenunciandos esse maxime necessariam affirmant. Et vero paucis explicari non potest, quam multiplicem rerum notitiam postulet ars ceterarum omnium periculosissima. Quis enim ignorat, quam intimam arctamque habeat medendi facultas cum Anatomia, cum Botanica, cum Optica, cum Mechanica aliisque bonis artibus societatem? Quae si forte negligantur, nullum minus reipublicae malum, aut luctuosius communi saluti periculum accilere potest. Hinc enim fit, ut homines nullis eiusmodi studiis informati ad usum atque exercitationem eius artis temere irrumpant, quae, cum per se sit maxime periculosa, nisi recte adhibeatur, euadit longe omnium perniciosissima. Et mirabitur quisquam, si id temporis, in tanta quidem medicorum turba, vnum plerique omnes medicum quaerant? Verum plura dixi, quam volueram, de isto hominum genere, quo cum dimicationem suscipere est valde periculosum. Illud mihi satis est, cuique ob oculos ponere, Medicinam arduam et negotii plenam esse prouinciam: nec quemquam fore, etsi ingenio praestantem, qui exiguo tempore, aut modico labore assequi possit id, ad quod obtinendum superiori memoria viri ab ingenio prope facti et optimis

optimis artibus instructissimi Helmontius, Willisius, Thake-nius, Fallopius, Malpighius, Bellinus aliique plurimi spatium aetatis omne consumpserunt.

At vos iam compellat oratio mea, iuvenes naui et industrii, quos ad scientiam iuris in hoc Romano gymnasio, summo studio summaque frequentia, convenire video. Equidem si vos aut veterem iureconsultorum sapientiam et singularem eruditionem mature spectetis, aut in eorum clarissimorum virorum, qui literis vix relictis, ad ius civile exornandum omnem industriam suam contulerunt, doctrinam et multiugem totius antiquitatis cognitionem intueamini; facile vobis erit intelligere, quarum rerum quandam veluti praecursionem a vobis postulet absolutissima iuris prudentia. Sciunt enim omnes, quanto et Graecarum et Latinarum literarum apparatu, quanto eloquentiae studio muniti ad iuris facultatem accesserint in Italia princeps et dux ceterorum, Andreas Alciatus, Tiberius Decianus, Iacobus Menochius, Guido Pancirollus; in Hispania Antonius Augustinus, Didacus Couarrunias, Antonius Goueanus, Arius Pinellus; in Gallia Guilielmus Budaeus, Iacobus Cuiacius, Franciscus et Duarenus et Balduinus, Antonius et Petrus Faber: in Germania Zasius, Siccardus, Viglius aliique plurimi. E quorum vnanimi consensu tantaque diuersarum gentium conspiratione nemo non videt, vnam omnium fuisse sententiam, ad ius civile amplectendum non leuem et perfunctoriam latini sermonis cognitionem et adumbratam Dialecticae tincturam, ut hodie plerique existimant, sufficere; sed cum eloquentiae et literarum studio totius anteaetae notitiae memoriam atque ex omni gente collectam eruditionem requiri. Quandoquidem, ut a Dionysio Gothofredo, viro

sapientissimo et de civili scientia optime merito, admonemur, ius civile Romanum, quod sanctitate legum et disciplina omnium exterarum gentium legibus et institutis praeponderat, omnia populorum iura et mores in se comprehendit. Siquis ergo ex hac tanta iuuenum frequentia existeret, qui civilis scientiae elegantiam et ornamenta despiceret, et apud illum clarissimorum virorum, quos paulo ante honoris causa nominavi, auctoritates nihil valerent; imo vero satis sibi esse duceret ex Institutis, vel etiam ex Pandectis delibare nonnulla, quae ad forensium usum maxime pertinent: hunc ego sane non legum iurisque peritum futurum esse dicerem, sed leguleium et vnum de foro rabulum. Noui equidem in hac Urbe hominem, inter causarum patronos minime postremum, qui ab studioso iuris adolescente contubernali suo de trita illa iuris civilis partitione, qua scilicet Iustinianus Caesar vniuersum ius Romanorum in quatuor libros, Pandectas, Codicem, Institutiones et Nouellas constitutiones distribuit, cum esset requisitus, obmutuit; atque ita mente turbatus haesit, ut si de aliqua Sinarum provincia, aut vnde Nilus originem ducat, fuisset interrogatus. Quid si homo eruditus de XII. Tabulis, vnde omnis publici et privati iuris fons promanavit, de Prudentum responsis et iure non scripto, de Senatusconsultis, de Praetorum edictis, de decretis aut de epistolis Principum simili ratione fuisset consultus? Enimuero istiusmodi homines, si id quod est, fateri volumus, indigni sunt prorsus, qui sibi iureconsulti nomen et dignitatem usurpent, cum ipsa fundamenta legum ignorent, et vberimos iuris fontes et capita ne viderint quidem. Age vero haec omnia si mauis negligantur: in ea namque tempora delapsi sumus, in quibus eruditionis no-

men forensium hominum auri-  
bus barbarum sonat: sed iuris-  
prudential potius vim solidam  
et succum ipsum inquiramus.  
Enimuero quam amplum, quam  
immane doctrinae corpus effi-  
ciunt, quae vnus civilis scien-  
tiae ambitu continentur? Vt  
nihil dicam de amplitudine iu-  
ris Canonici, cuius quidem fi-  
nes longe lateque proferuntur;  
nihil de innumeris Conciliorum  
decretis, nihil de tam multis Ro-  
manorum Pontificum constitu-  
tionibus: quae singula immensi  
laboris assiduitatem et non im-  
par diuturnae vitae studium po-  
stulare nemo est, qui non vi-  
deat. Huc accedit, tot iam  
propagatas esse in vtramque iu-  
dicii partem opiniones Docto-  
rum, vt his vnis capiendis vix  
ampla bibliotheca sufficiat.  
Quorum sententias cum ad exa-  
men reuocari, et si quae falso  
obtruduntur interpretationes,  
expungi oporteat, facile omnes  
intelligunt, totos ingenii ner-  
uos et laboris vim maximam  
esse adhibendam. Quae cum ita  
sint, prodeat nunc in forum pe-  
xo capillo nitidus et barbatulus  
nescio quis inuenis, qui vix leni  
quadam legum et iudiciorum no-  
ticia respersus, audeat tamen  
sefe Vrbs profiteri iureconsultum:  
qui videlicet triduo totam,  
quantacunque illa est, iuris scien-  
tiam deuorauerit. Ego quidem  
audaciam eiusmodi propter ae-  
tatem excusari posse non dubito.  
Mirari tamen satis non possum,  
quenquam tam amentem repe-  
riri, qui noui et inexperti ho-  
minis fidei causam committat.  
Hunc quippe et rebus suis et  
fortunis et liberis pessime con-  
suluisset, quis non videt? Cla-  
dem quippe subeat necesse est,  
qui caeco et imperito duce cum  
hoste configit. Iuvenes autem,  
qui sic imparati ad forum acce-  
dunt, id quaeso caueant, dum  
iter nimium properant, ne idem,

vt in veteri prouerbio est, fe-  
rius absoluant. In ipsos enim  
optime quadrat scitum illud Di-  
ui Augustini aduersus Petilianum,  
iis scilicet, qui plus ni-  
mio festinant, nonnunquam vsu  
venire, vt vestem, aut calceos  
peruerse induant, quae res postea  
currentibus moram et tarditatem  
affert.

Iam vero de Theologia pau-  
ca dicam, vt inde de ceteris  
disciplinis coniectura amplissime  
fiat et iudicium. Equidem, si  
e tanta Theologorum paucitate,  
quantam esse videmus, diuinae  
huius scientiae difficultatem et  
salebras deducere fas est, nemini  
obscurum esse poterit, quantum  
amplitudine et dignitate ceteras  
disciplinas Theologia antecellit,  
tantum illam et ingenii et labo-  
ris prae aliis exquirere. Nam  
si rationem recte subducere ve-  
limus, pro innumeris prope re-  
ligiosis familiis, quae hodie in  
eiusmodi studio vnice versan-  
tur, paucissimi quidem sunt,  
qui tam amplae facultatis non  
dicam membra omnia et partes,  
sed partium articulos absolutis-  
sime comprehendant. Nisi for-  
te Theologos mihi nominas, di-  
sputatores nescio quos acres et  
subtiles, qui nihil de additio-  
ribus sacrarum literarum oracu-  
lis, nihil de Ecclesiasticae histo-  
riae notitia, nihil de monu-  
mentis tum Graecis tum Latinis  
sanctorum Patrum attigerint;  
sed Dialecticorum instar rem  
omnem agunt disputationibus  
et clamoribus. Hos enim cen-  
soria virgula notatos e Theo-  
logorum collegio dispungit Mel-  
chior Canus, vir dignitate et  
doctrina clarissimus. Audite  
quaeso doctissimi antistitis testi-  
monium. Intellego, inquit, (\*)  
fuisse in schola quosdam Theo-  
logos adscriptitios, qui vniuer-  
sas quaestiones Theologicas fri-  
uolis argumentis absoluerint, et  
vanis inualidisque ratiunculis  
magnum

(\*) in *Loci Theologici* L. VIII. c. 1. p. m. 379. ubi tamen verba  
ultima paulo aliter se habent.

magnum pondus rebus grauissimis detrahentes, ediderint in Theologiam commentaria, vix digna lucubratione anicularum; et cum in his sacrorum Bibliorum testimonia rarissima sint, Conciliorum mentio nulla, nihil ex antiquis Patribus oleat, nihil ex graui Philosophia, sed puerilibus fere disciplinis; Theologi tamen, si superis placet, vocantur. Ex qua grauissima auctoritate cui perspicuum non est, quot doctrinae praesidiis debeat esse instructus, qui praestantissimae facultati nomen dedit? Dubitari plane non potest, quin praeter magnam ingenii vim diuturno quoque labore multisque vigiliis ad tam amplam eruditionem comparandam opus sit, sine qua nemo potest iure dici Theologus. Equidem, si paulo maturius cogitemus, quae superiori aetate plena fucci et sanguinis monumenta literis elegantissimis tradiderunt et Bellarminus et Sirmondus, et Petauus et Alphonsus a Castro, et Melchior Canus et Thomassinus, et Natalis Alexander alique permulti, qui de rebus Theologicis acute simul et neruose scripserunt, compertissimum nobis erit, eiusmodi studia complurium annorum industriam, imo vero diuturnae aetatis maturitatem redolere.

Verum, quid diutius grauissimis disciplinis immoramur, cum haec nostra mitiora literarum studia, quae Humanitatem appellant, tantum sibi cum ingenii tum temporis postulare videamus? Nam praeter vniuersam illam ceterarum fere omnium artium, quam necessario exigunt, notitiam, praeter historiarum, quam Graeci et Latini scriptores memoriae tradiderunt, cognitionem, et amplissimam illam vbertatem rerum, quae eruditio dicitur; quanti mehercule laboris est dictionem sibi puram et elegantem conflare, varias dicendi notas internoscere ac multipli-


ces sermonis formas exprimere? Quam paucorum semper fuit, orationem sic verbis et sententiis instruere, vt ad veteris eloquentiae decus et maiestatem proxime accederet? Quid vero de poetica facultate dicam, cuius dignitas plusne naturae, an arti, plus ingenio, an industriae esset tribuenda, merito viri sapientissimi dubitarunt? Atqui Virgilium, cui ingenium benelimum et omnibus fere disciplinis excultum, septem perpetuos annos in Georgicorum libris defudasse accepimus. Neque ipse annorum duodecim, quos in diuino Aeneidum carmine insumplerat, moram satis esse putauit ad sempiterni eius operis commendationem, quo minus illud vt rem informem impolitamque testamento comburi iuberet. Quid quod Iacobus Sannazarius, poeta sane elegantissimus, tres illos aureos de partu Virginis libros viginti annorum lima perpoliuit? Nam quemadmodum Zeuxis, ille celeberrimus in tabulis pingendis morosus et difficilis, dicere solebat, se diu pingere, quod aeternitati pingeret; ita plane, quae immortalitati parantur, diu multumque cogitanda sunt, neque ante de tabula ponenda est manus, quam singula dilucida sint admodum atque expolita. Quamobrem Horatius in praeclara illa et immortalis ad Pisones epistola saepissime inculcat, multa die multisque lituris esse castigandum, quod propediem in lucem est exiturum: nec quicquam fore elaboratum satis atque perfectum, quod longa mora non concoqueret, nonumque in annum non premeretur. Quae sic dicta volo, vt omnes intelligant, citra sudorem studiumque plurimum, neminem in re literaria fieri summum, nec posse paucis annis, vt stulte sibi plerique arrogant, ad veram doctrinae laudem peruenire.

At vero dicit aliquis, Picus ille Mirandulanus, cuius gloria

ria in omnium ore et admiratione semper viuet, uonne tam breui, quo vixit, trium circiter et triginta annorum tempore id est assequutus, vt et orator et philolophus et mathematicus et theologus magni nominis esset, cum tam multa de omni fere doctrina et publice disputauerit et literis tradiderit? Quid quod praeterita aetate, vt ne longius abeam, Hugo Grotius, Daniel Heinsius, Blasius Pascalius in ipso adolescentiae flore complura in lucem ediderint, quae eruditionem minime vulgarem redolent? Profecto non negauerim, Picum aliosque permultos extitisse, qui singularis ingenii felicitate paucissimis annis eo peruenerint, quo plerique homines longo studio multaque aetate peruenire nequaquam potuerint. At vero praeterquam quod, quae paucorum felicitas est, ad commune ceterorum exemplum trahi nullo modo potest, quis ignorat, non defuisse doctos et emunctae naris viros, qui in Pico ipso Mirandulano aliquanto amplius desiderauerint, et in eo nescio quam praecocis ingenii acerbilitatem culpauerint? Illud certe negari non potest, multos naeuos et maculas illius scriptis esse asperfas, quae in eloquentia et elegantioribus literis hominem imniaturum fuisse ostendunt. De ceteris autem dico, homines quidem multos praeceleri feruidoque fuisse ingenio, qui scriptis editis adolescentiam suam illustrauerint: nego nihilominus, omnem in praematuris eiusmodi fructibus degustari tum ingenii tum iudicii maturitatem. Quod ne cui obrectandi causa, aut de gloria summorum virorum quicquam detrahendi studio dictum esse videatur, literariae Reipublicae aunales quaeſo percurrite. Non

pauci sane vobis occurrent viri literatissimi, qui deinde confirmata iam aetate, ad incudem ea ipsa reuocauerint, vel etiam cum pudore damnauerint, quae pridem iuuenilibus annis uim festinanter effuderant. Hoc enim, vt antiquiores praeteream, et Laurentium Gambaram, et Petrum Bembum, et Franciscum Petrarcham, et Torquatium Tassum aliosque magni ingenii homines fecisse legimus. Nec sane mirandum; cum oculis nostris quotidie videamus, succum non habere diuturnum, quae nimis celeriter matureſcunt, neque diu vigere, quae praepropere et quasi ex tempore gignuntur: contra vero arbores, quae in multas aetates mansurae sunt, altioribus humo desigi radicibus, sero crescere ac paulatim robur et firmitatem tenere.

Quae cum ita se habeant, iam intelligitis, Adolescentes optimi, quorum causa potissimum haec omnis oratio instituta est, nihil esse solidiori doctrinae noxium magis aut inimicum, quam nimiam studiorum festinationem. Non cursorum more, sed lente, sed maturo consilio in optimis studiis est properandum. Sat cito, dicere solebat sapientissimus Cato, res fiunt, si sat bene. Quid autem vobis ad scientiae exitum celeriter peruenisse proderit, nisi illius membra omnia et partes plene cumulatęque teneatis, ut in ea quid primo, quid postremo loco sit, itauid satis percipiat? Agite itaque rem vestram nauiter, et ad quam semel animum appulistis disciplinam, ad eam diligenter constanterque incumbite, quousque illam a vobis reuera possideri et vtilitatis et gloriae vestrae fundum fieri contingat.



DE  
EXPEDITA DISCENDI  
RATIONE  
ORATIO VIII.

HABITA XV. KALEND. NOVEMBRIS  
AN. MDCCXIX.

Cum anno superiore ex hoc ipso loco eam, more maiorum, orationem habere, in qua quotannis quispian de dignitate ac praestantia bonarum artium praefari solet; illud, si meministis, contendebar, in optimis studiis lente quidem esse festinandum; nec studiosae iuventuti quicquam esse perniciosum magis, aut inimicum, quam paucissimis annis grauissimarum disciplinarum studiis immorari, quae multum et temporis et laboris omnino requirunt. Quod argumenti genus his plane temporibus necessarium etsi sapientissimis, qui aderant, viris probatum fuisse, certe scio; non defuerunt tamen aliqui, qui inde occasionem obtrahendi arripuerint: quasi vero, propostica hac tanta studiorum difficultate, iuvenes ab suscepto eorundem cursu retardari et magnos illos, quos ad Academiam attulerant, animos despondere contingat. Quorum opinio tametsi et ratione et communi experimento refutari facile possit; cum compertissimum sit, quae obuia et unicuique exposita maxime sunt, homines ea negligere atque contemnere; ad illa vero, quae ardua et multo difficillima, eos fortiter aggredi et maiori studio et voluntate duci: malo tamen mitiori eiusmodi hominum ingenio indulgere, quam erga ipsos durior, aut parum officiosus videri. Temperabo itaque hoc anno austeram illam dicendi rationem, et molliori suscepto argumento, tyrones milites, si qui forte se-

ueritatis metu a nobis olim dilapli sunt et in fugam coniecti, ad musarum castra hodierno die reuocare conabor. Quare aditus quosdam breues admodum et expeditos cupidae literarum inuentuti indicare statui, per quos, si velit, propere possit ad veram doctrinae laudem peruenire. Haec autem ne quis forte dici putet adulandi studio, aut ostentandi ingenti causa, quod a natura mea semper abhorruit, nihil de meo proponam: sed presso pede summorum virorum vestigia persequens, quem ipsi tenuerint brevissimum discendi cursum, ostendam. Sic enim omnes intelligent, non me meo consilio, sed ipsos veteres sapientiae magistros, hoc vnum expeditissimum munivisse ad doctrinam iter, quo nullum possit aut magis certum, aut compendiosius excogitari.

Duo sunt omnino, quantum ego intelligo, quae cum in omni vita, tum praesertim in bonarum artium studio plurimum valere, maiores nostri semper existimarunt, amor nimirum et diligentia. Quorum alter animum excitat, et subiectis veluti facibus ad agendum inflammat: altera vero facit, ut id, quod eximium et laude dignum, homines magno conatu summoque labore assequantur. His quidem ducibus ad optimas disciplinas iter facile et expeditum maioribus nostris semper patuit. Hanc vnam illi breuem et rectissimam ad literarum studia viam nobis tritam reliquerunt. Amor scilicet, amor

mor doctrinae fuit, qui Platonēs, qui Aristoteles, qui Archimedes, Hippocrates, Papinianus aliaque clarissima scientiarum lumina olim peperit, et ad gloriam extulit sempiternam. Putant nonnulli; et falso quidem, aetatis nostrae ingenia tardiora esse atque hebetiora, quam antiquorum fuerint. Putant, effoetam iam esse naturam, et magnorum ingeniorum semina penitus interivisse. Cum enim videant nostris hisce temporibus tantam adolescentium frequentiam in literario pulvere defudam: nihilominus paucos admodum singularis doctrinae palmam referre: nullumque memoria nostra existere, qui scientiae gloria cum antiquis decertare audeat: nullum, qui in poetica facultate cum Homero, aut Virgilio, nullum, qui in eloquentiae castris cum Demosthene aut M. Tullio sit confereendus; in eam facile suspicionem veniunt, idcirco veteres tantopere excelluisse, tantoque nos ab illis doctrinae intervallo distare, quod aureo saeculo nati sint primo naturae partu, cum vis seminis esset acerrima et terrae benignitas tanta, ut centesimis semper et cum anatocismo responderet. Nos autem deteriori aetate, cum iam solum lassum et emaciatum est, exortos non aequalem mentis aciem, neque eandem ingenii vim, aut perspicaciam habere. Quae si vera essent, liceret utique nobis de natura gravissime conqueri, quod erga nos non parentem egisset, sed nouercam; quodque illorum mentibus ingenii florem instillasset et iuocum, nobis autem quisquillas et porriginem reservasset. At vero cum ex multis, quae hoc nostro tempore longe subtilius inuenta sunt, aut quae ingeniosius quam antiquis temporibus pertractantur, facile sit intelligere, non tardiora nunc esse, quam olim fuerunt ingenia; cum insuper et plura et vberiora nobis quam illis praesto sint ad discendum

subsidia; quid aliud tandem in causa esse dicemus, nisi quod nos non eodem amore, neque eodem, quo veteres, studio honestissimas disciplinas prosequamur? Et quidem incredibile ac prope immensum erat illorum in percrutanda veritate desiderium; atque adeo inexplebili sciendi cupiditate conflagrabant, ut nihil tam arduum, nihil tam alte positum, ad quod eorum diligentia et industria non pervaderet. Non inauditum aliquid, aut in hoc genere novum dico. Plena sunt historiarum monumenta, plena vetustatis exempla, plenae omnium gentium literae. Quis enim ignorat, Aristotelem hoc ipso discendi studio inflammatum annos viginti perpetuos divinum Platonem sic audiuisse, ut ne unam quidem interim eius lectionem praetermisisse dicatur? Quis ignorat, Platonem ipsum, Pythagoram, Democritum, Anaxagoram aliosque bene multos, summo vitae incommodo, maxime diuersas ac remotas regiones peragrassē, ut ampliorem sibi doctrinae censum compararent? Quid quod Euclides, ille Megarensis auditor Socratis, tanta sciendi cupiditate incenderetur, ut eius rei causa capitis etiam periculum adire saepissime non dubitaret? Nota res est, et apud omnes gentes satis superque peruulgata; digna tamen, quae saepius repetatur, et ad omnem posteritatis memoriam summis laudibus efferratur. Cauerant Athenienses edicto, ut si Megarensium quispiam pedem Athenas inferret, ei capitale fieret. Euclides autem, qui Megaris natus, qui quae antea et esse frequenter Athenis et Socratem audire consueverat, tantum hinc accepit dolorem tantanique animi aegritudinem, ut mori satius quam ab ipso Socrate diutius abesse duceret. Quid ergo consilii cepit, quaeſo animaduertite. Sub noctem homo sagax et acutus muliebri stola et pallio ornatur,



natur, ac feminarum more capillis reticulo collectis, Athenas per summum vitae discrimen ad Socratem adit; quodque mirandum magis est, rursus sub lucem millia passuum prope viginti eadem illa veste testus domum commigrabat. Quis summam hominis constantiam non admiratur? Quis discendi ardorem incredibilem non videt? Quantum autem fuisse putabimus sciendi desiderium, quod hominem domi suae nobilem a quiete nocturna, a Diis penatibus tectisque patriis, ab omnibus vitae commodis distraheret, et tam apertum capitis periculum subire saepius impelleret? Si reuera idem nobis esset erga literas amor, si eadem discendi cupiditas, dubitandum non est, quin magni nunc quoque in omni disciplinarum genere progressus fierent. Non esset profecto, cur aetas nostra heroicis illis temporibus tantopere inuideret, in quibus praestantissima ac prope diuina ingenia floruisse miramur. Non deessent Demosthenes et Tullii, si eorum studium ac diligentia minime deessent. Et quidem altero abhinc saeculo tot in omni facultate extiterunt viri clarissimi, qui ut veteres illos sapientiae antistites ingenio superare haud potuerint, ad eorum tamen gloriam quam proxime quidem accessisse videntur. Necesse non est hic vobis ad memoriam reuocare Scaligeros, Sigonios, Liptios, Grotios, Galilaeos, Cuiacios aliosque complures, qui magna cum ingenii laude et singularis doctrinae fama floruerunt. Quot praeterea snere praeclara eruditione adolescentes, qui in ipso aetatis flore quasi canescere, et doctrinae maturitatem quandam ac senectutem habere visi sunt? Nolo in illis nominatim recensendis immorari, cum praefertim in oculis omnium sint euulgata ab Adriano Bailletto, viro

clarissimo, monumenta, quae ex omni fere literarum memoria collegit de vnis adolescentibus, qui studiis scriptisue editis inclaruerunt. Quid autem illis tantum animi tantumque virium dedit. ut imbecilla aetate grauissimas disciplinas profiterentur, et puerilem praetextam cum philosophorum pallio commutarent? Doctrinae profecto amor fuit, qui eosdem impulit, incitauit, et, quem admodum poeta ait, alas addidit, ut festinato cursu et incredibili velocitate ad amplissimae gloriae fastigium properarent. Equidem nihil est, ut M. Tullius affirmat, quod studio et amore effici non possit, nihil tam arduum, tam eminens, quo amor eniti non valeat.

Quanta vero fuerit eiusmodi vis amoris, quantaque cupiditate homines sapientissimi ad optimarum artium possessionem aspirauerint, nullo sane luculentiori argumento dignosci posse crediderim, quam ut videamus diligentiam prope incredibilem, qua eosdem doctrinae assequendae causa vfos fuisse ex annalium testimonio accepimus. Cum enim probe perciperent, inane esse ac peridiculum illud sciendi desiderium, quod cum summa industria ac diligentia minime coniungeretur; nulla erat difficultas, nulla vis, nullum incommodum, quo ipsi ab instituto studiorum cursu retardarentur; et quo minus perpetuos dies noctesque scriberent, aut sese immensis lectionibus occuparent. Quamobrem Cicero ad Atticum scribens de se ipso testatus est, incredibile esse omnino quantum scripserit die, quin etiam noctibus. Nihil enim, inquit, est somni. De Aristotele autem Laertius memoriae prodidit, eius libros ad quadringentorum paene numerum peruenisse, de quibus nemini sit ambigendum, praeter complura alia volumina, quae iplimet tribui soleant. Quid vero de Galeno, medicorum principe, dicam,

dicam, quem libros de re medica quadringentos, de aliis autem disciplinis ducentos quadraginta conscripisse, auctor est Ioannes Fernelius? Quid de Ser. Sulpicio, viro summo atque doctissimo, quem iuris civilis scientiam centum et octoginta voluminibus illustrasse accepimus? Quid demum de Aristarcho Granmatico, qui de multiplici reconditaque eruditione commentarios supra mille literis consignavit? Ut nihil de Theophrasto, nihil de Didymio Alexandrino loquar, quorum ille trecenta volumina, hic vero quatuor millia posteritatis memoriae mandasse dicitur. Quae quidem, utcumque vera sint, certe sanctissimus Ecclesiae Doctor Hieronymus se librorum Originis sex millia non vidisse modo, verum etiam perlegisse affirmat. Quocirca in altero scribendi labor, in altero autem legendi studium admirationis habet plurimum. Quamobrem omnes iam, puto, satis intelligunt, quo maiores nostri cursu ad solidam doctrinae laudem venerint: quo animi ardore, vigilantia, assiduitate, utque omnia vno verbo complectar, qua diligentia in optimis studiis se gesserint; omne sibi tempus perisse rati, in quo aliquid non didicissent: adeo ut fama sit, Catonem Uticensem, virum celeberrimum, in ipsa quoque Romana curia, dum Senatus cogeretur, Graecos libros lecitare consuevisse. At nostra aetate iuvenes, qui non labori, sed otio, non vigiliis, sed somno, non libris, sed ludis libentissime vacant, literas tamen se amare et in deliciis habere profitentur. Imo, quae incredibilis amentia est, cum laborem et industriam fugiant ut nihil supra, ita tamen sibi de suo ingenio blandiuntur, ut viros perquam doctos et literatos se posse fieri sibi met stultissime persuadeant. Enimuero nobis etiam si suadeant, ut ait Comicus, non persuadebunt.

Nam quae maior excogitari potest temeritas, quam oscitanter et quasi per otium id velle assequi, ad quod obtinendum maiores nostros tot labores suscepisse videmus? At dicet aliquis: non pauci iuvenes praeceleri praediti sunt ingenio, et memoriae vi multa pollent. Quasi vero maiores homines natura tardi atque ingenio hebetes fuerint. Quem autem vquam post homines natos invenias, qui cum Pythagora, cum Platone, cum Aristotele, cum M. Tullio ceterisque eius disciplinae viris sit ingenii praestantia et amplitudine conferendus? Quam ergo illi sibi sapientiae laudem diu multumque laborando compararunt, hanc tu homo ingeniosior minimo negotio, vel etiam, si Diis placet, paucissimis diebus referes? O ridicula capita! O stultitiam singularem! At longius iam, quam par erat, progressi sumus. Ut finem dicendi faciam, ad vos, quotquot adestis, ingenui Adolescentes, se convertit oratio mea: vos magnopere hortatur atque obsecrat. Si maiorum gloriam aemulamini, si dignitatem literatorum hominum, quod sane praecleara vestra indole dignissimum est, praeoptatis; eorum pariter in discendo ardorem, eorum labores et studium, eorum diligentiam atque industriam imitari velis remisque contendite. Breve profecto vobis atque expeditum patebit ad doctrinam iter, si eorundem vestigiis insistere vos minime pigeat. Magnum quidem et arduum negotium suscipitis: non inficior. Sed illud primo cogitate: nihil esse amanti difficile, nihil arduum, nihil imperium. Volat, ut aiunt, amor, si quo aliter pervenire non possit. Deinde tantam esse sciendi voluptatem, ut omnis studiorum labor suavissimus fiat; atque etiam saepe, licet sit reuera durus et diuturnus, minime tamen sentitur.

DE  
LAUDIBVS  
LEONIS X.

IN  
ANNIVERSARIIS EIVS  
PARENTALIBVS

ORATIO IX.

HABITA III. IDVS FEBRVARII  
AN. MDCCXXII.

\*\*\*\*\*

Sanctissimo Domino Nostro

INNOCENTIO XIII.

PONT. OPT. MAX.

PAVLINVS A S. IOSEPHO

SCHOLARVM PIARVM.

**O**RATIONEM hanc, quae de argumenti magnitudine dignitatem sibi aliquam comparauit et ornamentum, supplex, et quae maxime decet veneratione, tibi offero, Innocenti, Pontifex Maxime. Quod plane volens lubensque facio, cum ea, quae in Leone X. suspeximus et admirati sumus, in te quoque et virtutum similitudine et supremas, quam sustines dignitatu maiestate, mirifice conspirare videamus. Etenim quis non intelligit, constituta esse auspiciatissimi tui initia principatus ea ipsa duo, quae Leonis nomen immortalitati maxime commendarunt, amorem scilicet et maiestatem? Humanitas quippe illa singularis et amor eximius, qui in te tuaque clarissima familia non tam innutritus esse videtur, quam innatus penitus atque insitus, nihil de Pontificia Maiestate tua detrahit, imo vero ornat gloriosius. Proinde in Apostolicae dignitatu auctoritatem et decus dum omni cogitatione curaque incumbu, urget interea animum tuum populorum amor et Patriae caritas: cuius inopiae subleuandae et publica vestigia imminuta et alia plura commode opportuneque prouisa vidimus. Ex quibus sane faustissimi regni auspiciu cur eam nobis reducem felicissimam aetatem non ominemur, quam plane beatam atque auream sui temporibus Leo X. condidisse dicitur? Quod enim ille in omni vita sua, ut Paulus Iouinus scribit, id praecipue spectauerit, ut benefaciendo et promerendo ab omnibus hominum ordinibus amaretur, nemo est, qui te in eiusmodi beneficentiae studio Leonis simillimum esse non videat: cum erga omnes, qui de rebus tuis vel minimum meriti sunt, gratissimum animum beneficentissimumque probaueris. In hoc tamen vno te Leonis omnino dissimilem fore optamus, ut videlicet quam ille felicitatem e viuis immature praereptus breuem admodum et caducam fecit, eam Sanctitas tua, ad populi Romani votum et ad commune Ecclesiae bonum, diu incolumis nisi immortalem, at diutissime duraturam exhibeat.

**C**UM de Leone X. Pont. Max. praeclarisque eius laudibus, in hac tanta litterarum hominum frequentia, verba de more facere meditarer, et dubius animo haererem, quid eligi potissimum ad dicendum posset, quod et immortalis Viro dignum, et a maiesta-

te huius loci non alienum esse videretur; nouae quaedam admirabilesque virtutum species cogitanti mihi occurrebant. Obverlabatur quippe ante oculos regia illa atque excelsa animi magnitudo, qua Leo X. in omni vitae statu tanto se ceteris mortalibus superiorem exhibuit,

hibuit, quanto et nobilitate generis et dignitate fortunae ceteros anteibat. Occurrebat quoque beneficentia illius et liberalitas paene incredibilis; qua factum est, ut ea tempestate auream aetatem postliminio ab ipso renocatum homines sibi gratularentur. Rapiebat animum summa eius et quasi diuina in aduersis fortiter ferendis constantia; prudentia et sagacitas in agendis singularis, sapientia denique ab ineunte aetate tam eximia atque admiranda, ut in ipsa adolescentia ea virtutis et dignitatis praemia praecoccupauerit, quae alii vix extrema consequuntur senectute. Ex quibus sane tot tantisque virtutibus etsi nullum esse intelligebam, quae argumenti magnitudinem quandam et noniatem non prae se ferret; nihil tamen mihi tam nouum inusitatumque visum fuit in omni Leonis X. vita, quam videre maiestatem in eo vna cum amore fuisse coniunctam. Hoc mihi profecto perquam rarum apparuit maximeque admirandum. Quandoquidem veterum poetarum iudicio, tum etiam communi hominum sermone percipitur: non bene conuenire, neque in vna sede morari posse amorem et maiestatem. Sed ex hac ipsa rei nouitate, unde breuissimae orationis meae argumentum erit, vos PP. amplissimi facile intelletis, quid de virtute ac sapientia Leonis X. iudicandum, cum ea, quae quasi opposita difficillime coniunguntur, in se vno ipse feliciter perpetuoque copulauerit, amorem scilicet et maiestatem.

Nescio quo fato fieri dicam, ut plerique mortalium, quos auitae nobilitatis splendor, aut honoris dignitas et amplitudo supra ceteros extulit, adeo statim supercilium attollant ceterosque fastidiant, ut ipsi non ex hominum numerum, sed quasi e Deorum concilio delapsi esse videantur. Putant nimirum cum imperii maiestate eas lo-

cum obtinere non posse virtutes, quae quasi communes et populares habentur, humanitas scilicet, benignitas, sermonis facilitas atque mansuetudo. Putant de dignitate sibi detrahi plurimum, nisi superbia et fastu a ceteris internoiscantur. Ex qua profecto falsa hominum opinione natum fuisse arbitror per uulgatum illud prouerbum, honores nempe in mores mutationem inducere. Longe tamen aliter Leo X. in omni vitae suae fortuna statuit. In tanta enim domesticae gloriae amplitudine, in tot summis maximisque honoribus constitutus nunquam se hominem esse oblitus, et nihil humani a se alienum esse putauit. Proinde quemadmodum natura in eius ore atque oculis grauitatem quandam cum incredibili benignitate coniunxerat; ita virtus et praeclara maiorum exempla illius animum ad humanitatem sic informarunt, ut auctoritas cum gratia, amor cum maiestate veluti inito foedere consociarentur. Nam praeterquam quod in ea fuerat amplissima domo educatus, unde superbia et audacia, ut Paulus Iouius scribit, penitus exclusis, verae munificentiae iucunditatis, elegantiae virtutumque omnium cunctis officina patebat; duo praeterea sibi prae oculis erant domesticae gloriae lumina, magnus videlicet Cosmus et Laurentius pater, quorum alter, ob praeclara erga rempublicam merita, Pater patriae, publici amoris decreto, appellatus fuerat, alter ob singularem beneuolentiam et caritatem non modo suorum cliuium, verum etiam totius Italiae deliciae atque amor aestimabatur. His ergo praelucens sibi maiorum exemplis, non obscure intellexit Ioannes Medices, principibus viris nihil esse gloriosius, quam dignitatis maiestatem humanitate ac beneuolentia temperare. Cum itaque in ipso aetatis flore ab Innocentio VIII.

Cardinalis, deinde etiam paulo post Legatus totius Etruriae renunciatus fuisset, in ea amplitudine dignitatis ita se gessit, ut incertum fecerit, plusne admirationis haberet adolescentem videre tanta prudentiae laude ornatum tantaeque morum gravitate compositum, an vero cum ea, quam sultinebat, Ecclesiasticae personae auctoritate tantam ingenii suavitatem humanitatemque coniunctam. Permirum sane videbatur, homini adolescenti ad maximas imperii difficultates expediendas, et ad consilia cum de rebus privatis tum publicis capienda, parem inesse animi maturitatem atque prudentiam. Sed admirationem huiusmodi superabat, quod non tam Legati auctoritatem, quam optimi civis amorem erga omnes studiumque patefaceret. Quo plane miraculo factum est, ut per Etruriam universam eius sapientiae fama nomenque celebraretur; et non modo singulae illius provinciae, civitates, honores ei publice statuerent, sed ii quoque omnes, qui ex tanta Medicorum gloria invidia dudum disrumpebantur, eximiam eius virtutem admirari coeperint atque amare. Usque adeo singularem sibi conciliat gratiam virtus cum dignitate coniuncta.

At fortasse mirandum non est, quod ciues innidos et inimicos humanitate ac benevolentia deliniret, cum efferatos quoque militum animos in sui amorem pertraxerit ac venerationem. Ardebat iam multos annos Aemilia prope universa bello teterrimo ac periculoso. Vastati ubique agri, succensae domus, direptae bonorum fortunae; atque Urbes civilibus odiis magis quam bello conflantes partim a Romani Pontificis imperio defecerant, partim in exterarum gentium potestatem aut ultro se dederant, aut vi armisque redactae fuerant; omnia postremo armorum terror ac belli furor innaferat. Ut igitur tot tantisque malis, quibus iam

pridem diuina atque humana omnia permiscebantur, Julius II. Romanus Pontifex tempestive occurreret, ad arma veniendum esse putavit, agendumque vi et gladio, ubi religione contempta, neque paternae reuerentiae dignitas, neque Romanae Sedis auctoritas valuissent. Comparato itaque instructissimo longe omnium exercitu, Ioannem Medicen Cardinalem ad eam provinciam Legatum Apostolicum renunciauit. Qua quidem ardua ac periculorum plena legatione suscepta, Ioannes ita non modo fidem suam, operam diligentiamque eidem Iulio, acris sane ingenii ac iudicii viro, probavit, sed tantam etiam apud omnes existimationem obtinuit, ut milites ipsi Ioannem Medicen non legatum ex hac urbe missum, sed hominem quasi de caelo delapsum intuerentur. Quoties enim prodiret in publicum, quoties in conspectu exercitus staret, tantus fieri solebat centurionum ac militum concursus sacram purpuram manu tangere atque osculari cupientium, ut nimia pietate signa deferri, et quasi dissolui militares ordines viderentur. Vnde autem tam praecleara atque insignis hominum opinio? Vnde tam illustria religiosae venerationis officia? Opinentur sane alii, tantam fuisse in ea legatione Ioannis sapientiam, tantum consilium, pietatem ac religionem, ut non immerito omnium erga se studium excitaverit atque amorem. Ego profecto non repugnabo, cum proditum sit memoriae, pecuniam saepe ad licentiam militum coercendam eorumque explendam cupiditatem, illum summa liberalitate impertivisse; imo etiam aliquando sese vulneribus obiectare non dubitasse, ut matronarum dignitati, aut virginum pudori consulere. Verum sic existimo, etsi nihil ceteris virtutibus detrahendum esse videtur, negari tamen non posse, quin beneficentia atque amore

amore omnium sibi studia ac venerationem promeruerit. Auctoritas enim cum gratia, ut Stoicus inquit, homines non solum amabiles, sed venerabiles efficit. Quamobrem etsi imperatoria dignitas milites continet; ita tamen continet, ut imperatorem aut metuant, aut oderint. Imperii autem maiestas cum beneficentia ad obsequium pariter atque amorem impellit.

Quid vero diutius obsequia militum demiramur, cum et hostis, qui natura tum etiam victoria insolens ac superbus erat, Ioannem Medicen imperio exercituque spoliatum summa religione colat ac mirandum in modum veneretur? Nam ingenti a nostris calamitate ad Rauennam accepta, caesque ex maiori parte exercitu, cum Legatus ipse, qui in hostium potestatem venerat, Mediolanum captiuus et quasi per triumphum ductus fuisset, nequaquam tamen animo concidit, nec dignitatis, qua praeditus erat, maiestatem abiecit. At sereno placidoque vultu milites alloquutus, tam graniter sapienterque Romani Pontificis causam egit, ut Pisani Concilii improbitate damnata, totus ille in Iulii Pontificis odium concitatus exercitus errorem agnosceret suum, ac supplex veniam deprecaretur. O singularem hominis virtutem! O sapientiam admirabilem atque omni laude, praedicatione, literis monumentisque decorandam! Desinant veterum annalium historiae summis laudibus ad caelum extollere Scipiones Africanos, Iulios Caesares, Cn. Pompeios aliosque clarissimos Imperatores, quod clementia et inusitata quadam imperii dignitate, non suis tantum, sed hostibus etiam diuini quodammodo ac venerabiles essent. Illi siquidem victores gentium, expugnatis vrbibus ac prouinciis igne ferroque subactis, vi et armis suam et Pop. Rom. maiestatem vindicabant. Quod vero Ioannes non imperio mu-

nitus, non exercitu instructus, non victor, sed victus sed captiuus Apostolicae dignitatis auctoritatem propugnauerit, quod armatae multitudinis animos non armorum terrore ac minis, sed benignitate atque humanitate deuicerit, et ad Romani Pontificis voluntatem deduxerit, quis pari eloquentia explicare poterit? quis vnquam satis pro dignitate laudare?

At maiora nobis occurrent amoris et maiestatis argumenta, si Ioannem ipsum ad Vaticanum fastigium iam euectum et magnanimo Leonis nomine decoratum contemplemur. Quid enim magnificentissimus ille apparatus atque ea solennis pompa, qua Pontifex salutatus ad Basilicam Lateranensem primo perrexit; tanto videlicet Purpuratorum Patrum splendore, tot clarissimorum Principum comitatu ac tam incredibili hominum concursu, ut a Gothicis temporibus Romae nec illustrius, nec magnificentius spectaculum visum fuisse Paulus Iouius testetur? Hoc autem totum etsi ad illius maiestatem referri debet, amoris tamen singularis argumentum certe fuit sparsa a Quaestoribus per omnes Vrbs regiones aurea et argentea pecunia tam liberaliter effusaeque, ut centum millibus aureis eam liberalitatem Pontifici stetit, Quaeitores ipsi faterentur. Quid praeterea veteres paternae, domus inimici, omnes statim in gratiam perhumaniter recepti, quorum alii e longinquis regionibus, ubi misere degabant, benigne euocati sunt et re familiari atque honoribus aucti; alii e vinculis, quibus detinebantur, soluti ac libertati patriaeque cumulatissime restituti? Intelligebat enim Pontifex sapientissimus, nihil esse tam regium, ut M. Tullius inquit, tam liberale tamque munificum, quam opem ferre supplicibus, excitare afflictos, dare salutem, liberare periculis homines. Intelligebat, nihil esse

se laudabilius, nihil magno et praeclaro viro dignius placabilitate et clementia.

Dum autem mente mecum ipse reputo, quae Leo X. in absolviendo Lateranensi Concilio, quod iampridem Iulius Pontifex inchoauerat, opportune sapientissimeque constituit; dubius plane haereo; maioremne in eo sibi partem vindicauerit amor, an vero maiestas: imo ut verum fatear, magnum et acre video diffidium inter amorem et maiestatem, vtri videlicet gloriaetribuendus sit principatus. Nam etsi fraenata sanctissimis legibus nefariorum hominum audacia, spoliati iure imperii principes perduelles, sancta plurima cum potentissimis regibus foedera, instructae ingentes classes, repressi conatus atque arma Selymi, crudelissimi Tatarum Imperatoris, et sexcenta alia graniter providentissimeque constituta incredibilem Leonis X. conciliauerint maiestatem: cum tamen nemini dubium sit, quin ille haec omnia cogitauerit atque perfecit, ob summum Christianae religionis propugnandae amplificandaeque studium, quo nimirum vehementissime incensus nuncios et epistolas misit tum ad Abyssinorum regem, tum ad magnum Moschorum ducem, tum etiam ad alias plurimas remotissimas Asiae gentes, ut deterfa, si fieri posset, errorum labe, in Ecclesiae Romanae sinum reciperet vniversas; quis facile diiudicare possit amorine, an maiestati magis sit tribuendum? Quod autem ad tollendas e Christiana republica turbas, iis omnibus veniam indulgeat, qui turbulentissimis factionibus Iulium II. diu obstinateque vexauerant; quod Carualem et Sanseuerinum, perduellionis reos, ab ipso Iulio Pontifice Purpureae dignitate et sacerdotiis omnibus expoliatos summa clementia paternoque amore complectatur et ad omnem pristinae dignitatis splendorem restituat:

in hoc sane dedit praeclarum amoris sui testimonium. At enim, ex amplissimo senatu, nescio quem maiestatis reum, plane conuictum, more maiorum a Leone X. fuisse multatum, testantur historiae. Ita profecto: at vero, vindicis maiestatis poenas amor quidem excepit. Quandoquidem in ipso capitalis sententiae die vnum atque triginta Cardinales, viros ex omni prope natione virtute, doctrina nobilitateque clarissimos summa et inusitata liberalitate cooptauit. Quo quidem tam amplo atque illustri senatorum delectu non modo populo Romano, sed omnibus fere gentibus singularem suum probauit amorem ac voluntatem beneficentissimam.

Verum populo Romano beneficentia huiusmodi communis quidem cum ceteris gentibus intercesserit. Quis autem dicendo complecti valeat, quibus maximis eundem beneficiis cumulauerit eiusque nomen ad sempiternam posterorum memoriam illustrauerit? Mitto publica vectigalia imminuta, praetereo Triumviralem Conseruatorum Urbis potestatem amplificatam, nihil loquor Romanos ciues cum praemiis tum immunitatibus priuatis publiceque donatos et alia plurima, in quibus plane amor cum maiestate triumphare visus est. Quantum vero splendoris atque amplitudinis hanc Urbem consequutam fuisse putabimus, tot viris ingenio, doctrina sapientiaque clarissimis ab eo Romam, magnis propositis praemiis, euocatis; ex quorum domicilio Roma ipsa, ut olim de Athenis fama est, disiplinaryum omnium alitrix et mater facta esse videbatur? Negari profecto non potest, quin ex florentissimis huiusce ingenii aurea illa literarum aetas, quae Augusti aeuo floruisse dicitur, Leonis beneficentia in hac ipsa Vrbe restituta populum Romanum ad veteris gloriae possessionem, vnde  
a Go-



a Gothicis vsque temporibus turpiter deiectus fuerat, amplissime renouauerit. Quamobrem mirandum non est, quod idem Romanus populus solenni ordinum omnium decreto statuam marmoream optimo liberalissimoque Pontifici in Capitolio dedicauerit, ut gratissimi animi sui studium et immortales gratias publici amoris monumento profiteretur.

Iam vero temporis angustia eo me doctum video, ut vela colligere necesse sit, et quasi in medio orationem abrumpere. Vnum tamen, de quo et parentalia haec sacra et amplissimi huius loci parietes me quodammodo admonere videntur, praeteriri nullo modo potest; hoc ipsum scilicet Romanum Archigymnasium a sapientissimo Pontifice tam splendide, tam magnifice restitutum. Qua quidem in re quantum magnanimi Principis regia beneficentia effulgeat, cui tam rude, aut tam plumbeum ingenium, ut non agnoscat? Restitutis enim optimis disciplinis, nonne uberrimos in hac Vrbe reclusit fontes, unde tum populus Ro-

manus, tum ceterae gentes et ornamenta pacis et belli praefidia perpetuo sibi compararent? Quod autem illustrius paterni amoris indicium, quam singulari eiusmodi beneficio non praesentibus tantum prodesse, sed posteris, non vni ciuitati, sed terrarum Orbi prope vniuerso? quanta vero Pontificiae maiestati dignitas, quantus Romanae Vrbi splendor ex hac doctissimorum virorum palaestra accefferit, quis dicendo paucis complecti valeat? quot enim in omni aetate ex grauissimo isto magistratu, ex his subfelliis, homines eximia virtute ac doctrina ornati ad sacras insulas, tum etiam ad Romanae purpurae dignitatem fuerunt euecti? Quamobrem etsi cetera omnia argumenta desint, hoc vnum tam regium, tam munificum sapientissimi Pontificis opus longe quidem melius quam mea dicendi imbecillitas ad omnem posteritatis memoriam praedicabit Leonem X. virum beneficentissimum, parentem Orbis amantissimum vnoque verbo, Principem amoris plenum et maiestatis.

DE  
INGENIORVM  
DELECTV  
AD  
STVDIA LITERARVM  
HABENDO.  
ORATIO X.

HABITA IV. IDVS NOVEMBRIS  
AN. MDCCXXIV.

**N**EMO vestrum ignorat, quid valeat, quantamque vim habeat cum in homine, cum in ceteris animantibus

disciplinae ratio atque industria. Nam ut de equorum ingenio, qui in oculis nostris assidue versantur, nihil dicam, qui etiam primo

primo furentes et effrenes nullius imperio regi posse videntur, ita tamen paulatim domitoris industria atque arte flectuntur, ut omni ferocitate posita admirandam plane docilitatem induant; quid est, quod pſittacos picasque docuit humanas voces expedite reddere, et quasi hominum more, ut Plinius inquit, fermocinari? Mens autem hominis per se rudis, et, quemadmodum Aristoteles ait, quasi nuda pictorum tabula, si studium acceſſerit et disciplina, nonne ad id sapientiae perſuadet, ut nihil tam arduum sit, quo non pertingat, nihil tam sublime, quod assequi minime valeat? Quo quidem in genere ut cetera, quae ad literarum studia nequaquam pertinent, recordari omitatis; quid Platonem et Archimedes, ingenii principes ac doctrinae, quid Homeros et Virgilios, clarissima poetarum lumina, quid demum Hippocrates et Galenos, medicorum signiferos, eo dignitatis et gloriae prouexit, ut de illis sine laude dicere nemo possit, eosque homines quasi diuinos et ad nos erudiendos e caelo missos omnis posteritas veneretur? Industria nempe fuit et diligentia, qua animi et ingenia mortalium mirum in modum excoluntur, et quae a studio bonarum artium honestissimo seiungi ac dimoueri nullo modo potest. Hinc enim accepimus immensos eorum labores, diuturnas vigilias, permolestas peregrinationes, creberrima itinera et sexcenta alia doctrinae causa incommoda vitae suscepta: ut facile diiudicari non possit, vtrum plus industriae, an ingenio accepta referri debeat eorum tota quanta est sapientiae ratio et amplitudo. Quanquam autem in labore et industria sita tanta vis est, ut nihil supra; vndenam sit, ut in optimis artibus addiscendis haud raro summae contentioni et complurium annorum industriae nullus, aut certe exiguus

doctrinae fructus respondeat? Sentiant alii, quod volunt. Ego quidem semper in ea sententia fui, nec ad literarum studia omnia ingenia apta esse, nec ad singulas disciplinas singula ingenia. Atque hinc fieri non dubito, perplures adolescentes in literarum cursu labore quidem maximo ac diuturno defatigari, at vix mediocrem aliquem, pro eiusmodi conatu ac diligentia, progressum facere. Qua quidem in re quia multos esse intelligo, qui cum magno liberorum suorum incommodo, tum etiam summo rei literariae damno misere hallucinantur, me operae pretium facturum existimaui, si in hoc primo studiorum aditu ea in medium afferem, quae et falsam eorum opinionem conuellerent, et ingeniorum delectum ad literarum studia maxime necessarium esse demonstrarent.

Quod autem sint semperque fuerint homines sic mente et ingenio destituti, ut ad optimarum artium studia inepti prorsus existant, nemini obscurum esse arbitror. Quemadmodum enim natura non omnibus agris fertilitatem est impertita, sed infocundos sterilesque nonnullos deseruit, qui, quocunque labore aut industria excolantur, frugem nullam afferunt: ita iuuenum ingenia aliquando videas sic effoeta atque arida, ut ab iis nullus doctrinae fructus sit expectandus. Eiusmodi olim fuisse siue caeli atque aeris crassitie, siue alio quouis eius regionis vitio, Boeotii atque Thebani dicuntur, quos multum virium, ingenii minimum habuisse legimus. De Thracibus autem Aristoteles tradidit, eos ingenio tam pingui fuisse ac memoria propemodum nulla, ut ne quaternarium quidem numerando transcendere valerent. Ex hoc nimirum genere procreatos crediderim esse non paucos adolescentes, quorum cum ingeniis qui conficitatur, litus quidem arare, quod

quod aiunt, aut Isthmum fodere suscepit. Haec tamen calamitas non tam saepe accideret, si bonarum artium profectus aut misericordia erga miseros istiusmodi iuvenes commoti, aut conscientiae stimulis acti, Alabadenſis Apollonii rhetoris praeclaro ſatis exemplo ineptos hosce diſcipulos operam apud ſe perdere nequaquam paterentur, et ad quam vnumqueneque artem idoneum iudicant, ad eam ſerio cohortarentur atque dimitterent. Sed valeant iam, valeant quotquot inulta Miuerua nati muſas et Apollinem auerſantur. Vos enim compellat oratio mea, Adoleſcentes optimi, praeſtantiori indole ac felici ingenio ornati, quos Iſocrates Deorum inuortalium filios appellare ſolebat, quippe qui intelligendi facilitate ac diuino ingenio parentes Deos referre viderini. Vos, inquam, ſpectat quicquid de ingeniorum delectu inſtituendo dicam. Inter vns enim alios in mathematicis diſciplinis, alios in phyſicis, alios in arte medica, alios in iure ciuili, partim in re poetica, partim in dicendi facultate praeſtantiffimos fore non dubito; ſi vnusquisque veſtrum in id ſtudento ſedulo incumbat, ad quod natura duce propendet, et ad quod prope factus eſſe videtur. Quemadmodum enim, vt poeta inquit, non omnis fert omnia tellus; ita ſane non omnes, qui noſtra vel malorum aetate claruerunt homines ſapientiffimi, omnem artem aſſequutos fuiſſe videmus, ſed ſingulos in ſingulis praeſtiſſe.

Verum vt inde orationi aditus pateat, vnde potiffimum omnis ratio ducenda eſſe videtur; primo quidem nobis diligenter eſt attendenda mira illa ingeniorum varietas, qua homo alter alteri non minus eſt, quam vultu atque ore diſſimilis. In aliis enim intelligendi acumen et ſagacitatem incredibilem admiramur, qua facile omnium oculos ad ſe conuer-

tunt oratione venuſta atque expedita, tum etiam ſalibus et iocis, quos ſemper in promptu habent, quibus ipſi ſaepe maiorem ſibi opinionem, quam alii multo ſtudio ac diligentia creant. In aliis vero tarditatem et quaſi ſtuporem quandam mentis videmus: qui ſermone parci ſunt ac ſtatarii, vt proinde illis oratio non tam fluere, quam ſtillare videatur. Alii autem intelligendo minus acuti, nihilominus memoria pollent firma et praeſtantiffima: alii contra ingenioſiores, ſed omnium maxime obliuioſi: alii denique tum memoriae vi, tum intelligentiae acumine inſtructi, vtraque facultate mirum in modum excellunt. Nolo hac in re Astrologorum deliramenta conſectari, et varietatem eiſusmodi ad neſcio quas Planetarum coitiones referre: nolo Philoſophorum ſeſtas et opinionis excutere. Illud mihi nec abſurdum, nec a veritate alienum eſſe videtur, varias huiusmodi ingeniorum formas e multiplici diuerſoque, quod vniciuique ineſt, temperamento proficiſci: cum ſatis exploratum ſit, non aequalem ſemper in nobis percipiendi facultatem, quae a ſenſibus nrtum habet, vigere; ſed pro diuerſa corporis temperie illam modo acrem et robustam, modo fraſtam et imbecillem exiſtere. Cum itaque tanta ſit ingeniorum diſſimilitudo, quanta vix corporum eſſe ſolet; quis non videt diſſimilem iade ſingulorum virtutem fore, nec eundem vnquam ab vniuerſis progreſſum eſſe ſperandum? Platonem legimus ingenia hominum cum metallis comparare fuiſſe ſolitum: quorum alia quidem aurea, alia ferrea, aut plumbea, partim ſtannea, partim argentea, partim denique e variis conſtata metallis eſſe dicebat. Quod plane in rem noſtram quadrare ſatis apte videtur. Quandoquidem ad diuinas et ſubliliores ſcientias, quae aurea nimirum ingenia exigunt,

is frustra incumbit, cui ferreum, vel plumbeum, ut Platonis more dicam, ingenium habere contigit. Frustra subtiliora Geometriae problemata, frustra reconditos naturae aditus rimari tentant ii, quibus hebetior mens et tardi ad percipiendum motus. Reptare humi contenti sint, quibus natura volucre negavit ingenium, quo ad alta ferantur, ne leari audaciam imitari velle videantur. Quemadmodum autem non eadem est, ut paulo ante dixi, in omnibus intelligendi facultas, sed varia admodum et multiformis; ita quoque multiplex et diuersa est natura scientiarum, quae non omnes idem ingenii acumen, sed diuersos intelligendi gradus virtutesque deposcunt. Quaedam enim, ut Algebra, ut Metaphysica, ut Theologia aliaeque plures, ad contemplandum natae, singularem percipiendi celeritatem et igneam vim mentis postulant. Quaedam vero tarditatem magis quamdam amant cum ingenii maturitate coniunctam, ut Medicina et Iuris scientia. Aliae peramplum volunt, ubi spatientur memoriae campum, quemadmodum Historia, Geographia et omnia fere linguarum studia. Alia denique cum tenaci memoria ingenium vinidum et bene subactum, quales sunt dicendi facultas, ars Critica, et quae de Theologicis dogmatibus agit, diuina scientia. Quocirca et si per se difficile est, rem amplissimam definire, et certam unicuique disciplinae mensuram ingenii tribuere; hoc tamen ex eo difficilior esse video, quod praecoccupatam quique habeat de ea, quam profitetur, scientia opinionem; ad quam ingenium longe omnium optimum deposci omnino sibi perlaudeat, et alter alteri concedere haud quaquam velit. At vero negari non potest, id, quod experientia fere quotidiana exploratum est atque perspectum, duos sci-

licet homines, et ingenio et pari industria praestantes, perlaepe in vna eademque facultate, atque eodem magistro, non aequaliter proficere: immo aliquando fieri, ut alter incredibilis in eo studii genere progressus faciat, in quo alter sic haeret atque implicatur, ut ab eiusmodi vadis emergere nullo modo possit. Quid ita? Nonne quod alter, quanquam intelligendi vi multa praestet; eo tamen ingenii temperamento caret, quod ad eius generis disciplinam est apprime necessarium? Multos ego noui adolescententes, qui in elegantioribus literis et eloquentiae studiis nullum egregiae indolis specimen dederant, magno deinde ingenio, in Dialectica, in Geometria, tum etiam in Iure civili instructos apparuisse.

Vsurpari solet communi sermone, et quasi prouerbi locum obtinuit: poetas, quidem nasci, eosque non tam arte ac studio, quam natura et diuino quodam instinctu valere. Homines enim cum viderent aliquos ad pandendum carmen mira ingenii facilitate duci, aliis vero per diuturnos labores ac vigilias id minus licere; poetas caelesti quadam vi ac diuino spiritu afflari putarunt. Quocirca si quid fingere ac poetice ludere velint, non intercedo. Si vero quae causa sit, serio requirant; hoc pro certo habeant, ad poeticam facultatem, ebullientem ingenii feruorem et ingentem mentis impetum postulari, quo homines quodammodo furere, et aestro quodam perciti esse videntur. Hoc autem qui carent, frustra musis et Apollini litare contendunt. Quamobrem, ut Quintilianus animaduertit, optimus quisque poeta esse debet *ὁ παρὰ φύσιν*, is scilicet, qui sibi et res et actus simillimos veri sive ac venuste confingere valeat. Quod quidem de poetis argumentum nemo non videt in ceteras quoque disciplinas

sciplinas satis commode cadere. Atque hinc M. Tullius ad informandum eum, quem ipse in libris de Oratore instituit, optimum dicendi magistrum, id maximae curae esse debere ac prae ceteris attendendum monet, vt primo ingeniorum delectus diligenter accurateque habeatur. Praecipuum est, inquit, vt doctor animaduertat ingenium et naturam discipulorum. Quinctilianus autem, de quo paulo ante, aestimandorum et ipse ingeniorum peritissimus, examen huiusmodi tanti quidem fecit, vt illud iam inde a pueritia omnino fieri iubeat. Tradito sibi puero, ait, docendi peritus ingenium eius in primis naturamque perspiciat. Intelligebant quippe homines sapientissimi, naturae non debere vim fieri, sed ad quod vnumquodque natum est, eo esse adhibendum. Siquis enim a teneris, vt Graeci dicunt, vngulis pingendi artem non alio, nisi natura duce imitetur; non est, cur iu confectandis latinae linguae elegantis, aut in Dialecticorum subtilitatibus extricandis aetatem atque operam frustra consumat. Ea ipse feruet phantasiae vi, vt, quotquot sibi ob oculos rerum imagines veniunt, totidem adumbrare coloribus et non inscite exprimere valeat. Erit profecto, erit in pingendi facultate dux et imperator: at vero in humanioribus literis, in Philosophiae castris vix erit inter calones, aut gregarios milites recensendus. Neminem vestrum latet, quod de Andrea Vesalio, viro cum Medicinae, tum Anatomiae peritia clarissimo, memoriae traditum legimus: qui adhuc puer, quotquot mures, talpae, glires, vel etiam canes atque feles sibi in manus venissent, totidem dissectare et in singulorum membranas, omenta ac intestina penitus introspicere solebat: eo videlicet illum natura ducente, vt aetate maturus Anatomiae scientiam iam pene intermor-

tuam iu lucem restitueret. Exploranda est itaque, et quidem sedulo, antequam disciplinis instituenda tradatur iuuentus; vt in re tam ardua vniuscuiusque quid ferant humeri, vt aiunt, quid ferre recusent, probe internoscatur. Iure quidem merito permirum Diogeni videbatur, homines, qui neque ollam, neque operculum emerent, nisi primo idem pulsu et tintitu satis exploratum habuissent, at vero in homine emendo vno aspectu esse contentos. Quid vero de adolescente summae spei atque egregiae indolis, vnde familiae splendor omnis ac dignitas, in vna vel altera disciplina collocando? Nullumne fieri debet experimentum, nulla habenda naturae ratio, nulla de eius ingenio sollicitudo, perinde quasi mancipii alicuius emtio ageretur? Quid ergo miramur, iuvenes nauos et industrios in Academia tempus non minus quam aetatem terere; cum non sua, sed parentum voluntate iis studiis animum appulerint, a quibus maxime abhorrent? Istis nimirum culpa parentum eorundem accidit, quod de Periandro quodam medico Plutarchus memorat. Is enim cum medendi arte satis abunde praestaret, in eam dementiaem venit, vt poeta fieri vehementer cuperet, et se se totum pangendis carminibus daret. Sed cum id inuis aduersus faceret, pro laude cachinnos et ludibria referebat. Quare Archidamus, eius necessarius, ad sanandum tam mali poetae furorem, eundem grauitur obiurgans, quid, inquit, tibi accidit Periander, quod pro eleganti medico malus poeta vocari appetas? Non dissimili plane ratione plerique homines, qui oratores, aut philosophi, aut geometrae praestantissimi euaderent, quod ad eiusmodi disciplinas ingenium longe omnium aptissimum a natura acceperint; ab aliis, in quibus inuita Minerua occupan-

tur studiis, summam referunt pro dignitate ac laude vituperationem. Hoc autem quanto et professorum incommode et optimarum artium damno fiat, paucis quidem explicari non potest.

At enim a Quintiliano, cuius doctrinam et auctoritatem praedicamus, illud accepimus, neminem reperiri, qui nihil studio sit consequutus. Praeterea quot extiterunt hebeti tarδοque ingenio viri, qui ad dicendi facultatem, vel ad Philosophiae studia ineptissimi esse videbantur: qui nihilominus eam naturae tarditatem sic pertinaci labore, vicerunt ut oratores elegantissimi, et non barba ac pallio tantum, sed moribus quoque et doctrina philosophi illustres enaserint, quemadmodum de Heraclide, de Cleante, de Xenocrate aliisque pluribus historiae loquuntur? Itane vero? Si liberorum vestrorum voluntatem erga literarum studia ita cognitam habetis eamque non minus quam in Cleante et Xenocrate perpetuam atque constantem; non repugno. Quamcunque ipsi fortuna dederit studiorum rationem, eam statim complectantur: utique laudem plurimam ex assiduo huiusmodi labore consequentur. Quod si in illis neque ingenii, neque industriae par ratio fuerit; non est, cur aliquis sibi stulte blandiatur: nullum omnino fructum decerpent ex eo studiorum genere, in quo inuito reluctanti-que animo detinentur. Quid si nec valetudine satis firma, nec ad diurnas vigilias grauissimosque labores perferendos satis apti? Huc accedit, austeram illam veterum disciplinam, qua ipsi ob incredibilem doctrinae amorem ab omni prorsus voluptate, a ludis iocisque interdictum sibi esse volebant, ita iam in desertudinem abiisse, ut quod aurei illius saeculi virtus extitit, nunc fere vitium et rusticanae vitae genus esse videretur. Ego vero cum plerosque aetatis nostrae adolescentes intueor, cum eorum comas molliter fluentes et ipsos sibi vno digito scalpentes

caput contemplor; vix animum inducere possum, ut eosdem tam grani labori ferendo pares esse concipiam. Minnatur igitur, quantum fieri potest, studiorum labor. Mollis et deliculae nostrorum temporum iuuentutis ratio habeatur, ut nimirum in literis minimo sudore proficiat. Hoc autem tum commode fiet, cum exploratis ingeniorum viribus, ad eam vnusquisque liberalem artem aptabitur, ad quam voluntate et suapte natura ducitur. Non erunt tunc sane iuvenes ad scholas tanquam ad pistrinum metu poenisque cogendi. Amabunt ipsi quoque literas, et expedito satis cursu doctrinae metam attingent.

Arithmeticae pueris, ut Laetius refert, obieciēbat Pythagoras, nihil opportunius esse ratus ad aciem mentis examinandam exacta computandi ratione: quod videlicet ingenii difficultas ab ipsa numerandi tarditate non aegre dignoscatur. At Graeci omnes, homines sapientes et peracuti, ingeniorum naturam et amplitudinem non alio sane modulo nisi Geometriae studio metiendam esse existimabant: neque ad Philosophiae arcana quenquam recipiebant, cui non fuisset ingenium geometricis rationibus bene ex cultum atque limatum. Utinam eiusmodi consuetudinem a Graecis traditam maiores nostri tenuissent eamque ad nos factam testam deduxissent. Profecto aut ego fallor, aut incredibile iam nunc habuisset rerum naturalium scientia, tum etiam ceterae disciplinae incrementum. Verum aliae quoque sunt ab aliis sapienter excogitatae explorandorum ingeniorum rationes, quas ego minime reprehendo: quippe quae si prudenter adhibeantur, suum robur suamque vim sint habiturae. At ne longius rem prosequendo patientia vestra abuti velle videar, orationis filum abrupto; eaque plura, quae de ipso ingeniorum delectu recte instituendo dici possent, sapientiae iudicio vestro discernenda relinquo.

DE  
LAUDIBVS  
LEONIS X.  
IN  
ANNIVERSARIIS EIVS  
PARENTALIBVS  
ORATIO XI.

HABITA III. KALEND. MARTII  
AN. MDCCXXVL

**S**i quis est, qui forte putet, haec parentalium solennia, quae Leoni X. Pont. Max. quotannis in hoc amplissimo loco et hac tanta celebritate fieri consueverunt, ad hanc vnam Romanae Sapientiae sedem et ad vos tantummodo P. C. gratique animi vestri significationem pertinere, is certe fallitur atque in summa rerum ignoratione versatur. Illustris enim ac sempiterna tanti Pontificis recordatio non his solis parietum angustiis, non vno huius loci ambitu continetur; sed ad totam, quantacunque est, Urbem Romanam, ad Italiam vniuersam, ad Germaniam et Galliam, imo ad omne genus hominum latissime peruagatur. Quis enim est hodie tam inaccessus, aut tam remotus in terris locus, quo sapientissimi huius Principis fama, aut eius regiae beneficentiae fructus aliquis non peruaserit? Quae, quae hominum nationi, cui vel minima bonarum artium disciplina accesserit, quam celebratissimum Leonis X. nomen diuinaque virtus admiratione non complenerit? Omnes profecto literae, omnes Academiae, quotquot sunt, celebratae Leonem X. ad caelum summis laudibus efferunt; eumque optimarum artium felicitati natum et communem literarum parentem omnes vna mente atque vno ore conclamant. Quid igitur ego in hac mea mediocritate ingenii dicendique tenuitate potissimum afferre potero, quod neque a summa laudatissimorum viri amplitudine alienum esse, neque a dignitate ornatissimi huius loci, cuius ipse instaurator fuit beneficentissimus, abhorreere videatur? Satis mihi erit verbis paucissimis indicare, quibus tandem solidis fundamentis hae tantae Leonis X. laudes vbique excitatae fuerint, ad omnem posteritatis memoriam stabiles firmaeque permanens. Quod quidem me satis commode

spero consequuturum, si ceteris quam plurimis et clarissimis eius virtutibus hodierno die praetermissis, vno mihi argumento sumam amorem illum ingentem ac prorsus incredibilem, quo Leo X. literas literatosque omnes audissimè prosequabatur. Nani hinc facile erit intelligere, hoc vno nomine sapientissimum virum omnium gentium sibi studia promeruisse et omnium aetatum praedicationem. Atque hoc ipso iure Romana haec nostra Academia quotannis eum publice laudare ac solenni ritu gratias agere consuevit.

Fuerant sane superiori aetate complures Romani Pontifices, homines sapientissimi, qui optimarum artium studia promouere, tum etiam praeiniis exornare operae pretium duxerunt. Eiusmodi laudem affectuosos fuisse Innocentium et Eugenium IV. Clementem et Nicolaum V. Pium II. aliosque plures ex annalium memoria accepimus. At vero, qui ardentiori studio, aut propensiori voluntate erga ingenuas disciplinas cum Leone X. comparari possit, neminem fuisse contendendo. Quod enim in summa reipublicae tranquillitate atque otio, cum opes integrae atque aerarium opulentum literarum studia tutelam ac patrocinium inueniant, non est valde mirandum, neque a veteri consuetudine alienum. Tunc equidem Romana respublica rhetores ac poetas aliosque liberalium artium professores ad hanc Urbem inuitauit benigneque complexa est, cum iam Punico secundo bello confecto, et Carthagine, illa Romani imperii aemula, funditus euerfa, in otio paululum respirauit. Vbi enim tubarum lituorumque clangor insonat, atque omnia late armorum streptu perturbantur, quis est, qui milarum cantu delectetur, ac de eruditione



tione magis quam de capite ac de salute ciuium sollicitus esse possit? Jacet tunc omne studium, vt inquit Tullius, et in pretio est horridus miles, non valde bonus ac disertus orator. Quae cum ita se habeant, quis mirari satis possit, Leonem X. vix Pontificio diademate coronatum statim de optimis studiis in hac Vrbe restituendis potissimum cogitasse, et nihil antiquius habuisse, quam hanc Romanam Academiam in summum splendorem atque amplitudinem excitare? Nemo vestrum ignorat, quibus ille temporibus turbulentissimis Vaticanam sedem conscenderit. Longum esset ac permolestum hoc loco singulas et miserrimas eius temporis calamitates recordari. Praetereo itaque Italiam, tunc fere omnem diuturni ac periculosi belli incendio confligantem. Non loquor vrbes atque oppida hostium caede, aut ciuium sanguine redundantia. Taceo vauitatem in agris, in templis solitudinem; ac florentissimas ciuitates ex assiduis Germanorum, Hispanorum Gallorumque incurfionibus diutissime vexatas atque direptas. Satis sit ad memoriam vobis id vnum reuocare, Pontificum exercitum superiore anno ad Rauennam caesum fuisse atque deletum. Licet enim Iulius II. Romanus Pontifex nihil impensius quam publicae totius Italiae tranquillitati studeret, non tamen illi defuit ad suscipienda plurima ac periculosa bella militaris animi virtus et nimia quaedam gloriae cupiditas. Hinc aerarium inops atque exhaustum: hinc vestigialis pecunia ad stipendia militum aliosque belli vsus impensa atque distracta. Quamquam igitur Leo X. tam alieno reipublicae tempore Romanus Pontifex renunciaretur, illico tamen bonarum artium studiis, quae vbique foeda situ ac squalore iacebant, erigendis animam manumque praeiuit; neque Pontifici aeraui calamita-

tas atque inopia, neque bellorum per Italiam nondum sedati tumultus, neque grauissima alia, quibus initia principatus vrgeri maxime solent, negotia, retardarunt. Sed accersitis Romanam profundioris literaturae viris, amplissimum hoc Gymnasium, hoc musarum domicilium, hanc sempiternam bonarum artium sedem instaurauit; atque ita instaurauit, vt, quemadmodum eorum temporum annales loquuntur, Romanum Gymnasium neque Bononiensi, neque Patauino vel doctorum praestantia, vel auditorum concursu concederet.

Ex quibus sane faustissimis regni auspiciis quis non videt sapientissimi Principis voluntatem erga optimas disciplinas et contestatam iam praeclare satis erga literarum studia ingentis amoris sui significationem? Instabat Lateranense concilium, quod Iulius II. iam inchoauerat, mature prosequendum perficiendumque. Vrgebant Pontificis animum Carnialis et Saeuierini cum Romana Ecclesia similitates inneteratae atque odium, quod illos tanquam publicos hostes ipsemet Iulius purpurae dignitate ac bonis omnibus expoliauerat. Imminebat Italiae cernicibus cum ingenti exercitu rex Gallorum Ludouicus XII. Neapolim ac Mediolanum, vnde turpissime pulsus fuerat, repetendi desiderio ac furore inflammatus. At Leo, quamquam nihil eorum, quae ad Ecclesiae dignitatem, vel ad Italiae salutem pertinere videbantur, negligeret; vt proinde et Lateranense concilium summa animorum consensione plausuque confecerit, et foedus a Iulio II. sancitum pro Italiae libertate prouidentissime instaurauerit, et Sfortianis militibus opem suam implorantibus viginti quinque millia aureorum per Hieronymum Moronum, legatum, statim persoluerit; nihilo tamen vnquam remissius egit in optimis studiis promouendis amplissimeque

plissimeque exornandis. Nam praeter ea clarissima ingenii lumina, Augustinum Suesanum, Christophorum Aretinum, Hieronymum Buttigellam, Parrhasium Consentinum, Basilium Calchondylum aliosque doctissimos viros, quos ad huius Academiae famam longius proferendam, magnis propolitis praemiis, ad Urbem inuitauerat; praeter duos illos summae eruditionis ac doctrinae principes, Bembum et Sadoletum, quos ab epistolis sibi esse voluit, nemo vnus fuit alicuius ingenii colore tinctus, quem ipse quasi publicus literarum parens peramanter non exciperet, et ad meliora de se sperandum non inflammaret. Audite quaeso luculentissimum Pauli Iunii testimonium ad sempiternam tanti Pontificis laudationem memoriae posterorum demandatum. Singulos, inquit, exquisitis nobilioribus artibus instructos, vel mediocris etiam nominis poetas, tanta benignitate suscipiebat, vt omnes iam excitatis animis ad excolenda literarum studia vehementer accenderentur: cum a tanto armorum strepitu, quo neglectis literis, Iulii Pontificis aures magnopere gaudebant, tandem virtuti locus patefactus esse videretur. O laudem singularem! O praedicationem, principibus viris et regibus plane inuidendam! Intelligebat equidem vir, summa sapientia praeditus, Christianae reipublicae maxime interesse egregios et exquisito ingenio viros vbique locorum haberi, qui tam Latinorum quam Graecorum Patrum monumenta probe perciperent, et venerabilem diuinarum literarum auctoritatem qua scriptis, qua voce defenderent. Quamobrem, etsi regiae liberalitatis ac munificentiae splendore ceteros eius aetatis principes vnus longe omnes multumque superabat, vtpote qui in ea domo fuerat splendide ac liberaliter educatus, cuius amplissimum patrimonium be-

neficientia semper fuit et gloria: vbi tamen de optimis studiis augendis consilium erat, non modo ceteros, at seipsum quoque liberalitate vincere videbatur. Nullus enim erat magistratus, nulla dignitas, nullum sacerdotium tam opulentum, quod literarum cultoribus libentissime non indulgeret. Vt proinde, quemadmodum de Artaxerxe, illo Persarum rege clarissimo, cui ob manum dexteram sinistra longiorem Longimani cognomen fuit, Plutarchus refert, eum gloriari solere, sibi tanquam optimo Principi naturam tribuisse, vt alteram manum haberet ad largiendum amplissimam atque longissimam, alteram vero ad accipiendum breuiorem et contractam; ita quoque Leo X. merito gloriari posset, se ampliore, quam ceteri principes, animum diuinitus accepisse, vt erga homines literatos incredibilem suam beneficentiam expleret. Quam vero diligens, quam sedula, imo quam ingeniosa fuerit eiusmodi liberalitas, quis oratione complecti valeat? Non intra Urbis muros, vel intra angustos Italiae fines sese continuit, sed remotissimas quoque Europae regiones praeteruecta est ad nouas et inusitatas exquirendas rationes, quibus tam literae quam literati omnes promouerentur. Nihil artificiose, nihil amplificandi studio dicimus, cum singula per se satis admiranda esse videantur. Quis enim non stupeat, a Leone X. missum fuisse ad inclytas nationes Germaniae, Daniae, Sueciae, Noruegiae et Gothiae Ioannem Heytmers de Zonuelben, Apostolicae Sedis nuncium, vt veteres libros, qui temporum iniuria perierant, diligenter accurateque perquireret? Eo vero praecipue consilio, vt literato cuique latissimus excolendi ingenii campus pateret. Extat Leonis ipsius epistola ad Albertum, Archiepiscopum Moguntinum, Principem Electorem

rem et Germaniae Primatem, in qua de comparandis eiusmodi voluminibus rationem causamque satis luculenter exponit. In hac re, inquit, nec sumptui, nec impensae alicui parcimus solum ut, sicut vsque a nostri Pontificatus initio proposuimus, quod Altissimo tantum sit honor et gloria, viros, quouis virtutum genere insignitos, praefertim literatos, quantum cum Deo possumus, foneamus, extollamus ac iuueamus. Quid est, Auditores, quod studiosissimus ingeniorum fautor ad laudem illustrius excogitare possit? Haud satis illi fuit, in doctis hominibus exornandis maiorum vestigiis insistere. Voluit quoque inusitata quadam ratione de illis longe omnium optime mereri; atque ipsis cum ad ingenii famam extendendam, tum ad opes sibi comparandas munire iter nouum et expeditum. Ob quam sane praeclaram liberalitatem Petrus Baelius, Romanorum Pontificum censor iniquus et obtestator maledicentissimus, sibi tamen temperare non potuit, quin posterorum memoriae scriptum relinqueret, neminem esse literatorum ex quocunque genere, aut religione ille sit, qui Leonis X. nomen colere et ad caelum extollere non debeat, quod obsoleta, aut perditae veterum scriptorum monumenta studiose conquiri, ac typis elegantissimis eunlgari curauerit. Et vero neminem vestrum latet, Leonis munificentiae deberi Cornelii Taciti Annalium libros quinque primos deperditos iam et omnium opinione desperatos, at reuera in obscuro Germaniae angulo latentes, quos ipse Leo e barbarorum manibus, ut Andreas Alciatus inquit, quingentorum aureorum summa redemit, ac Romae primo typis edi iussit: vnde immortalem sibi laudem peperit, quod historicum praestantissimum, quasi ab inferis excitatum, nona luce ac vita in hac Vrbe donasset.

Ex hac autem tanta Leonis X. erga literas beneficentia factum est, ut per eadem fere tempora non modo in Italia viri principes, Sabaudi, Estenses, Cararientes et Vicecomites de eruditis hominibus complectendis mutuo inter se studio decertarent; verum etiam in Germania Maximilianus Caesar, in Gallia rex Franciscus s. ad honestissima studia postliminio reuocanda, ac melioris fortunae spe erigenda, quasi vno eodemque tempore excitarentur. Ille enim Viennensem Academiam, nunc quoque florentissimam, erexit: hic Parisiensem, a Carolo Magno praeclarissime fundatam, sed iam vetustate collapsam, regia liberalitate restituit. Vterque vero literas plurimi deinde facere ac literarum studiosos, Leone ipso hortatore et duce, praemiis amplissimis cumulare sibi gloriae duxit. Ut propterea, si verum fateri velimus, incrementa illa scientiarum, quae consequutis inde vsque ad haec nostra tempora aetatibus in Italia, in Galliis, in Germania aliisque nobilissimis regnis habita sunt maxima et admiranda, vni Leoni X. accepta referri potissimum debeant, qui barbarorum castra perfregit, et scientiarum asseclis signum sustulit libertatis et gloriae. Ipse enim fuit, qui clarissimis regibus documenta illustria dedit, quo tandem loco habenda sint doctrinae studia, quae id temporis vbique neglecta erant ac prope deposita. Ipse fuit, qui bibliothecam Vaticanam conquisitis per omnem Europam et ab Oriente vsque exportatis voluminibus amplificauit, quam etiam publicae vtilitati patere voluit. Ipse Graecorum literis et disciplinis e patria sede miserrime deturbatis in hac Vrbe, omnium princeps, domicilium praebuit honestissimum: cum propterea Ioannem Lascarem, Bizantinum, hominem in primis nobilem et eruditum cum aliis multis Graecorum doctissi-

mis Romam ab omni Graecia summa liberalitate aduocasset. Dies me profecto deficeret, si dicendo numerare singula vellem, quae Leo X. ad rem literariam augendam atque omni dignitate honestandam vsque ad extremum spiritum constantissime gessit. At vero quicquid hactenus dixi, vt ad vnam summam referam, illud meo iudicio est omnium admiratione dignissimum, quod homo, valetudine non satis prospera, frequentissimis suorum calamitatibus, tum etiam saepe acerbiorum eorundem funere exulceratus, iniquissimis amicorum coniurationibus in vitae pericula non semel adductus, ad multa et grauissima bella, tum ad tuendam Italiae libertatem, tum ad extultantem Selymi, Turcarum Imperatoris, furorem reprimendum compulsus; acerbissimis praeterea curis affectus ex perniciosis opinionibus, a Luthero in Apostolicae Sedis maiestatem ac veterem religionem in Germania late disseminatis, homo denique in ea rerum amplitudine atque imperio collocatus, vt maximis semper occupationibus eum detineri necesse esset; nunquam tamen literarum patrocinia intermiserit, nunquam vel minimum in iis ornandis industria aut voluntate defuerit perinde ac semper in summo otio ac

vitae tranquillitate vixisset. O incredibilem et inauditum literarum amorem! O virum sapientissimum, omnium gentium vocibus, literis et praedicatione celebrandum! Quinam progressus scientiarum, aut quantus gloriae cumulus liberalibus artibus accessisset, si eum diutius viuere, aut tranquilliori caelo imperii clauum tenere contigisset? At vero exiguum illud viuendi spatium, a natura Leoni datum, et difficillima Christianae reipublicae, quibus ipse regnauit, tempora nonne luculentiora sunt argumenta eius summi studii erga optimas disciplinas et beneficentissimae indicia voluntatis? Vtinam Deus BENEDICTUM XII. Pont. Max. diu nobis incolumem fernet; vt, quemadmodum sanctissimus senex regia liberalitate ceterisque virtutibus Romanorum Pontificum nemini concedit, ita quoque ad literarum studia promouenda atque ornanda animum referat, ingenitamque sibi beneficentiam erga doctos et eruditos largiori manu conuertat. Sic enim fiet, vt triste illud et acerbissimum desiderium sui, quod Leo X. moriens apud omnem literatorum memoriam reliquit, nunc tandem, BENEDICTO XIII. Pontifice, lenitum quodammodo esse laetemur.



PAVLINI A. S. IOSEPHO

LVCENSIS

ORATIONVM

*TOMVS II.*





SANCTISSIMO DOMINO NOSTRO  
BENEDICTO XIV.

PONT. OPT. MAX.

PAVLINVS A S. IOSEPHO  
SCHOL. PIAR.

**E**CCE ad pedes tuos, BEATISSIME PATER, alter orationum mearum libellus, qui ut publici iuris fieret, tuoque nomini inscriberetur, non meum certe de eius praestantia iudicium, sed mirifica animi tui facilitas et humanitas fecit. Quoties enim illas, quae altero tomo continentur, laudare, quae incredibilis benignitas tua fuit, quoties de alteris his in lucem edendis mecum loqui, et quasi stimulos addere dignatus es? Neque id mirum, quod non eas modo disciplinas, quae dignitatis tuae maiestatem decent, excolendas et amplificandas curas, sed etiam ad ceterarum artium literarumque studia prouehenda cunctos omnium ordinum homines incitas atque inflammas; quemadmodum qui de variis studiis in omni hebdomada coram te sunt Academici coetus, rem satis indicant. Itaque pudebat me iam differre tempus, atque has ultra ea gloria fraudare, quam ab inscriptione nominis tui acciperent. Verum alia quoque me ad id permouebant. Silentio mittam perpetua singularis tuae erga me beneuolentiae signa: ob quam tibi plurimum me debere fateor; eoque magis, quod nulli meis in te meritis, sed innata quadam penitusque tibi insita benefaciendi vi ac propensione id facit. Neque vero mihi mens est hoc loco maximas et amplissimas tuas commemorare virtutes, quae passim omnium praedicatione celebrantur; non modo Romae, sed apud

exterar quoque nationes, atque eas gentes etiam, quae praeclara Romanorum Pontificum gesta limis oculis aspiciunt. Quis enim tam rudis, aut a nobis tam remotus est, ut non audierit, aut legerit, quae de reconditis et sanctioribus Catholicae Ecclesiae doctrinis abs te iam multa prodierunt, et adhuc prodeunt, volumina, quae quidem te sanctissimum perinde ac doctissimum Pontificem ubique gentium praedicant? Quis ignorat, quae ad Pontificium aerarium restituendum providentissime mandasti; quod ut magno et graui aere alieno subleuares, quicquid in tuis conferre honestissimae poterat, in illud comportari, ingentesque Vacabulum summas ad ipsius aerarii rationes pertinere voluisti? Quocirca te non minus in re Oeconomica, quam in diuinis et Ecclesiasticis disciplinis (quod valde rarum est) scientissimum esse vidimus. Nihil dicam de singulari illa animi constantia, qua iam tot annos te geru erga tuos tibi sanguine coniunctissimos, quos exemplo a multis aetatibus non audito, neque ad Urbem accedere passus es. Verum hu omnibus, quae olim posteri magnopere suspicient, ac te vera cum gloria praedicabunt, praetermissis; ad illud venio, quod ad me propius pertinere videtur, quodque tibi sempiternae laudi fore minime dubitò: ad haec scilicet nostra Romanae Sapientiae studia, quibus instaurandis, et saniore consilio atque ordine dirigendis, nuper animum mentemque adiecasti. Hoc ego unum, ut vere dicam, triginta et amplius annos optaueram maxime: hoc erat mihi unice in votis, quo de persaepe fueram cum viris grauib; et doctis collocutus; hoc denique illud ipsum, quod ego quasi diuinans, te aliquando facturum esse praenunciaui \*). Videbatur enim mihi prorsus a dignitate Urbis alienum, Romanam Sapientiam neglectam iacere: et quae tantopere praeteritis temporibus ceteras Orbis academias studiorum celebritate ac doctorum fama superauerat, id temporis prope dicam deseri, atque omnibus esse despectui. Quid tum? singulari Dei Opt. Max. consilio factum est, ut ad hanc bonarum artium sedem aliquando oculos tu conuerteres; et quanquam infinitis paene negotiis impeditus, maxima tamen sollicitudine paternaque cura studiorum nostrorum patrocinium ac tutelam suscipleres. Intelligebas enim probe, satis non esse; si Princeps per se doctus sit maximeque literatus, nisi is faciat, ut ipsa quoque literarum studia, bonae artes et disciplinae apud suos vigeant. Idcirco

tu

\*) V. pag. 2161.



tu et accitus, aliquot nouis politioris doctrinae viris, et necessariis ad naturalem Philosophiam comparatis instrumentis, et lectionibus praeterea numero auctis, aliuque recte ac sapienter prouisis, illud iam effecisti, ut tum nouitate studiorum, tum discipulorum frequentia, Romana Sapiencia dudum in veterem splendorem restituta esse videatur. Cum igitur academiae ipsius, quotquot sunt, professores gratias tibi inde habeant maximas et immortales; quod nimirum satis intelligunt, ex re literaria tam prouide sapienterque instituta, longe maius sibi decus amplioremq; bonis artibus dignitatem esse accessuram; ego sane, qui si non doctrina et bene dicendi arte, at certe diuturnitate docendi, atque erga optimas disciplinas studio nemini concedo, meum esse duxi, **BEATISSIME PATER**, communi omnium nomine testatum id facere, publiceque profiteri, singulas tibi esse, perpetuoque fore hoc maximo et singulari beneficio obstrictos: cum omnes praesertim sperent, se grauioribus auctis laboribus, auctum quoque a te iri uberius beneficentiae tuae fructibus; unde sibi maior copia sit et honeste viuendi, et lucubrationes eruditae, ingeniiq; sui monumenta typis euulgandi ratio, quemadmodum maiores nostri saepe et magna cum laude fecerunt; atque inde uniuerso pateat Orbi, **BENEDICTO XIV.** Pontifice, Romanam Sapienciam, neque Bononienſi, neque Patavino Gymnasio, vel doctorum praestantia, vel auditorum concursu concedere, id quod *Leo X.* tempore contigit, ut *Paulus Iouius* testatur.





IOANNES DIDACVS

A MATRE DEI

*Cler. Regul. Pauperum Matris Dei  
Scholarum Piarum*

VICARIVS GENERALIS.

**C**VM Tomum alterum Orationum, quas in Archigymnasio Romanae Sapientiae habuit P. Paulinus a S. Iosepho, Cler. Reg. Scholarum Piarum, Assistens noster Generalis, et in eodem Archigymnasio Eloquentiae professor, duo ex Nostis, quibus commissum fuit, recognouerint, atque approbauerint: vt typis mandetur, si iis, ad quos spectat, ita videbitur, facultatem in Domino concedimus. In quorum fidem etc. Datum Romae in Aedibus nostris Scholarum Piarum S. Piantaleonis die 30. Septembr. 1737.

IOANNES DIDACVS

A MATRE DEI VIC. GEN.

Loco ✠ Sigilli.

IOANNES VINCENTIVS

A S. IACOBO SECRET.

*Reg. fol. 252.*

IMPRIMATUR,

Si videbitur Reuerendissimo Patri Mag. Sac. Pal.  
Apost.

F. M. DE RVBEIS

ARCHIEP. TARSIS VICESG.

APPRO.



## A P P R O B A T I O.

**P**AVLINI a S. Iosepho Clerici Regularis Scholarum Piarum, viri eloquentissimi, Orationes duodecim, quae Tomo altero continentur, iussu Reuerendissimi P. Aloysii Nicolai Rodulphi, S. Palatii Apostolici Magistri, legi summa animi voluptate. Sunt enim scriptae tam eleganter, tam distincte, tam ornate, tam copiose, tam grauitur, ut nihil supra desiderari posse videatur. Quare dignas esse censeo, quae publicentur, cum nihil, quod bonis moribus, decretisque Religionis Catholicae aduersetur, contineant. Dabam in Aedibus Miner. 8. Idus Nouembres an. 1747.

F. THOMAS MARIA MAMACHIVS

ORD. PRAED. S. THEOL. MAGISTER  
ET CASANAT. BIBLIOTH. PRAEF.

---

## A P P R O B A T I O.

**I**VSSV Reuerendissimi P. Aloysii Nicolai Ridolfi, Sac. Pal. Apost. Magistri attente legi Orationes duodecim varii argumenti, quas in Lyceo Romanae Sapientiae vir clarissimus habuit P. Paulinus a S. Ioseph e Clericis Regularibus Scholarum Piarum. *Sum ex iis, qui miror antiquos: non tamen, ut quidam, temporum nostrorum ingenia despicio. Neque enim quasi lassae est, et effecta natura, ut nihil iam laudabile pariat. Atque adeo legi*

Paulinianas Orationes *ad exemplar veterum scriptas tam bene, ut esse quandoque possint exemplar* (Plin. lib. 6. epist. 21. -). Ita quibus olim verbis Plinius Virginiæ Romani poësin, huius ego eloquentiam prosequi mihi posse videor, sapientiam scilicet copiose et ornate loquentem, quæ non modo ad ingenia adolescentium excolenda doctrinis et multiugii rerum pulcherrimarum cognitione, sed etiam ad mores conformandos aptissima sit, hominesque potissimum literatos ad bene beateque viuendum optime instituat. Ex Aracæli VIII. Kal. Ian. 1747.

FR. IOANNES DE LVCA VENETVS.  
EXAMINATOR EPISCOPORVM.

IMPRIMATUR.

FR. NICOLAUS RIDOLFI  
MAG. SAC. PALATII APOST.  
ORD. PRAED.



DE  
L I T E R I S  
ET  
E L O Q V E N T I A  
CVM CETERIS DISCIPLINIS  
CONIVNGENDIS.

O R A T I O I.

HABITA VII IDVS NOVEMBRIS  
AN. MDCCXXX.

\*\*\*\*\*

**L**AETANDUM mihi magnopere, Adolescentes optimi, maximeque vobis gratulandum intelligo, quod multa frequentia tantoque concursu et alacritate ad literarum et eloquentiae studia in hoc Romanum Gymnasium vos hodierno die conuenisse video. Quid enim mihi optabilius, quid iucundius contingere potest, quam praecelera hac indole praestantique ingenio iuuenum corona me septum intueri, quorum ad optima studia complectenda magna sit voluntas animorumque consensus? Quid autem vobis vtilius, ac vestrae dignitati magis accommodatum, quam cum grauioribus disciplinis, in quas plerique in hoc ipso Gymnasio incumbitis, elegantiores quoque literas et eloquentiam coniungere, quae quidem illis vitam et spiritum conferunt? Fortunati plane, quod vobis minus arriserit perniciosissima eorum sententia, qui putant, nostra haec studia miuime necessaria esse, ut quis in Philosophia, in Iure civili, in Medicina, ceterisque grauiissimis disciplinis excellat. Quam quidem stultissimam opinionem, etsi satis exemplo vestro confutari video; tamen quo studiorum vestrorum rationem reddere, et imperitis eiusmodi hominibus, si quando opus sit, os obstruere, eorumque audaciam reprimere valeatis, ita prorsus inanem ac repudiandam a vobis esse ostendam, ut quam isti turpiter decipiantur, clare penitusque percipiatis. Atque hinc profecto fiet, ut vobis currentibus calcaria, ut aiunt, addantur. Qui vero de huiusmodi studiorum necessitate dubitant, quanquam vtilia ac iucunda illa esse intelligant, ii perpensis rationum momentis, animo confirmentur, sibi tandem persuadeant, liberalium omnium disciplinarum splendorem et decus, si linguae

ornamenta negligantur, euanescere. Ad hanc autem ipsam literarum et doctrinae societatem, quam viro docto summe necessariam esse contendimus, non id laboris et vigiliarum, quod imbecillo quidam animo sibi fingunt, requiri intelligetis. At siquidem viam facilem et expeditam, quam in suprema orationis parte indicabo, persequi volueritis, studia haec vobis plana et iucunda fore spoliabor.

Et quidem primum Deo Optimo Maximo gratias immortales ago, semperque agam, quod Romae, in Vrbe scilicet omnium nobilissima, splendoris et elegantiae domicilio, non in oppido, aut in rusticano aliquo pago, hodie verba facturus sim, ubi homines agrestes, et incul-ti me necessario aliqua de decore ac dignitate, quae rei maxime conuenit, dicentem haud facile cogitatione comprehenderent. Sed mente recreor, quod mihi res est cum adolescentibus ornatissimis, splendide ac liberaliter educatis, qui paene cum ipso nutricis lacte munditiam fluxerunt ac decus, quique non minus ore ac vultu, quam veste, capillis, ceteroque corporis habitu, ornatum et elegantiam prae se ferunt. Vos itaque, Adolescentes optimi, non tantum testes in hac causa, sed iudices quoque, et causae patronos adesse volo. Etenim rogo vos per vestram fidem, ingeniumque aetatis vestrae pudorem, quid est, quod singulari studio tantoque opere ceteris in rebus munditia, nitor, et elegantia requirantur, in oratione autem ornatus tanquam minime necessarius reiciatur? Si testa construantur, sedulo curant artifices, ut prospectus aedium, vestibulum, porticus, peristylum, impluium, ac cetera sint huiusmodi, ut ab elegantia et dignitate minime

minime abhorreant. Si nauis aedificetur, quanta cura adhiberi solet, ut latera, carina, puppis, antennae, ac reliqua ita fabricentur, ut non solum possint ventis ac procellis resistere, sed etiam decus habeant ac nitorem? Si denique vestis, si arma, si tela comparanda sint, satis non est, ut ea valeant omnem a corporibus nostris propulsare vim, nisi quoque nitida ac decora appareant. In ceteris igitur rebus non utilitas sola, sed etiam dignitas et elegantia vobis cordi est, in oratione autem id, quod proprium et decorum est, contemnendum negligendumque esse putabitis? Non ita sane. Quemadmodum enim rusticanus infimae plebis sermo nobiles viros summo opere dedecet; ita sapientum dignitatem maxime deprimit atque deformat oratio rudis, vulgaris et impolita. Quae quanto clarissimis disciplinis dedecori sit, quantoque viros doctos incommodo afficiat, ex iis, quae dicturi sumus, satis aperte videbitis.

Complures quidem, non e grege imperitorum, sed sapientes mirantur, quamobrem per hos dies non eadem sint, quae quondam, proposita bonis artibus praemia, nec opibus, ut olim, augeantur praeclara ingenia, nec honoribus, nec dignitate, nec gloria viri docti, ut superiore memoria, cohonestentur. Dolent, abiisse faustissima tempora, in quibus homines excellenti ingenio, ac singulari doctrina ornatos certatim principes viri apud se retinebant, quos plurimi facere, et tanquam oracula consulere solerent. Dolent, memoria nostra doctrinae studia plerisque viliora esse, ac despecta iacere. Utinam haec ita falsa essent. Auditores, ut a nobis omnino, aut aliqua ex parte negari possent. Sed unde eiusmodi doctrinae contemptus? Unde tantum erga honestissimas disciplinas fastidium? Equidem video, pluris hodie

fieri a nobilibus viris peregrinum aliquem augendi luxus artificem, nonarumque deliciarum inuentorem, quam hominem doctrina et eruditione praestantem. Non sum nescius, potentissimos reges hoc tempore bellorum magis, quam literarum studio teneri, et omnem fere literariae reipublicae curam abiicisse. Verum aut ego fallor, aut non hinc potissimum petenda est doctrinae despectio. Ex iis nimirum, qui in studiis modo versantur, in doctrinas hoc malum maxime inuasit. Negligunt hodie plerique omne sermonis decus, dicendique nitorem, quo optimae disciplinae olim tantopere exornari solebant; unde fit, ut illae sordidae ac squalidae appareant, neque venustate et gratia in sui amorem et existimationem alliciant. Est suus scilicet non modo matronis, sed etiam ingenuis disciplinis cultus et decor, quem si illis detrahas, si illuie ac situ deformentur, tantum abest, ut quemquam ad se illiciant, sui que amore capiant, ut potius nauseam ingentem ac stomachum moueant. Fuit, fuit olim alia, cum barbaries et inscitia dominarentur, bonarum artium aestimandarum ratio ac pretium. Suspexit magnus ille rex Macedonum, Alexander, Choerili poetae versus, magnoque auri pondere locupletandum putauit hominem, quem Horatius Flaccus risu magis, quam praemiis dignum fuisse arbitratu est. Longe alia nunc est temporum nostrorum ratio. Excellat oportet vsquequaque, et sit numeris omnibus absolutum id, quod delicato huius saeculi iudicio comprobetur. Profecto satis non est, per hos dies solidum aliquod, et succi plenum cibi genus mensis apponere, nisi illud et exquisitae conditum, et splendidis anro argentoque patinis inferatur. Ita sane aetati huic nostrae minime sapiunt volumina, quae plurima quidem doctrina referta sint,

sint, sed impolito incultoque stylo confecta, patinis veluti ligneis, aut stictilibus afferuntur. Hoc autem tam limatum et politum iudicandi genus si vnamquam memoria nostra in hac Vrbe vixit, in posterum certe vigebit quam maxime: cum nuper singulari Dei prouidentia ad summum Pontificatum fuerit euectus Clemens XII. patria Florentinus, e nobilissima Corsinorum gente, vir cum omnis doctrinae, tum literarum elegantiorum amantissimus, qui in omni fortunae gradu viris doctrina praestantibus domum suam, tanquam publicum bonarum literarum et eloquentiae domicilium, patere voluit; vt proinde non immerito speremus erga homines doctos, et hoc praecipue Romanum Gynnasium eum talem fore, quales eius ciues Leo X., Clemens VIII., et Urbanus VIII. fuere Pontifices beneficentissimi ac sempiterna memoria digni. Verum vt eo redeam, vnde paululum discessit oratio, non est igitur, cur miremur, quod bonis literis a doctrina seiunctis, humiliori loco disciplinae omnes positae sint, et ab antiquo gloriae splendore vsque adeo descuerint.

Veteres quidem, siue Graeci, siue Latini, non rerum tantum, sed rerum simul et verborum rationem habuerunt. Non Philosophiam, non Ius civile, non Medicinam duntaxat didicerunt, sed verborum etiam, quo de illis loquerentur, quoque illas grauitate et ornate explicarent, splendori summi opere studuerunt: quorum scripta cum admirabilem habent dignitatem, tum vero oratio ea est sententiarum grauitate ornata, atque iis verborum luminibus illustrata, vt nihil possit ab homine vel dici sublimius, vel diuinius excogitari. Nam vt a Graecis, primis illis locupletissimis doctrinarum parentibus, exordiar, quid causae fuit, quod sapientissimus ille Plato,

qui a Panaetio philosophorum Homerus appellari solebat, quocum Cicero se malle errare, quam cum ceteris vera sentire professus est, ille, inquam, literatorum omnium princeps, ad maximum ingenium, quo a natura fuerat abunde donatus, sic quoque eloquentiae studium adiunxerit, vt omnes tum rerum scriptores, tum oratores, et copia, et grauitate verborum superauerit, ac minime contentus ea gloria, quam sibi et intelligendi vi, et dicendi praestantia comparauerat, commentariis etiam elegantissimis editis dicendi doctrinam pertractauerit? Quid Aristoteles, alterum sapientiae lumen, cuius tanta fuit eloquentia, vt a M. Tullio aureum flumen fundere dictus sit, nonne dicendi artem summo studio auditores suos docuit, eisque magis Rhetorum copiam, quam Philophorum tenuitatem in differendo proposuit, quod intelligeret, doctrinam quidem per se ipsam prodesset, sed si ad doctrinam eloquentia accedat, praeclarum quiddam ac singulare existere? Nihil de Theophrasto, nihil de Xenophonte, nihil de Lyfia, nihil de innumeris aliis praestantissimis Graeciae viris dicam, quos ob incredibilem eloquentiam dicendique leporem non minus, quam ob sublimium ac diuinarum rerum praestantiam tantopere suspicimus et admiramur. Quid vero de Latinis loquar? Profecto satis est nobis vnum pro cunctis summum doctrinae et eloquentiae exemplum, M. Tullius; qui primus e Graecia in Latium cum Philosophiam aduocasset, quam polite, quam diserte, quam eleganter eam explicauit, viamque ceteris aperuit, scientiam illam scite ornateque illustrandi? Sunt vobis ante oculos eius libri de finibus bonorum et malorum, sunt volumina Tusculanarum quaestionum, sunt de diuinatione, de fato, de legibus, tum etiam de amicitia, de



de fenestrate, ac de omni officiorum genere, tribus libris mirifice comprehensa, quae singula satis per se loquuntur. Neque vero vnus fuit ex omni memoria inter Latinos M. Cicero, qui Philosophiam, Ius ciuile, et omnem rerum scientiam dicendi elegantia exornauerit. Quid enim L. Crassus, Q. Scaeuola, Ser. Sulpicius, L. Lucilius Balbus, C. Aquilius, aliique complures, qui cum summa iuris notitia bonas literas et eloquentiam copulantes, non solum iurisperiti, verum etiam disertis esse et haberi voluerunt? Cuius rei fidem faciunt paucissima illa aurea, quae nobis de eorum scriptis supersunt fragmenta. Certe si vera sunt, quae historiarum monumenta referunt, M. Porcius Cato Censorius, qui non solum optimus ciuis, optimus senator, optimusque imperator, sed etiam magnus iuriconsultus et orator fuit, eloquentiam sic adamasse dicitur, vt mira fuerit eius in dicendo grauitas atque maiestas; et praeter complures, quos de Iure ciuili libros conscripsit, orationes etiam amplius centum quinquaginta elucubratus est. O singularem maiorum nostrorum diligentiam! O admirandum literarum et eloquentiae studium! Quod si ad medicos me conuertam, statim occurrunt doctissimi medicorum principes, Hippocrates et Galenus, qui medendi artem eloquentia praecipue propugnasse videntur. Nam praeter purissimum elegantissimisque dicendi genus, quo vtuntur in iis, quae ad rem medicam explicandam pertinent, in aliis quoque disciplinis exornandis, quae ad optimi cuiusque medici praestantiam requiruntur, talem adhibent splendorem verborum ac sententiarum grauitatem, vt eloquentissimorum nemini cedere videantur. Et quidem Galenus non solum de animorum nostrorum motibus, in quibus concitandis maxima oratoris posita vis est,

praecepta pulcherrima docuit, verum etiam integrum de arte Rhetorica opus conscripsit: vsque adeo vir sapientissimus eloquentiam ad artem medicam necessariam esse putabat. Misum facio e nostris, ne dicendo longior sim, Cor Celsum, cuius de medendi facultate commentaria tam nitide venustaeque scripta sunt, vt nihil pulchrius. Quis autem sibi persuadeat, viros tales ac summopere occupatos ita ingenio ac tempore fuisse abusu-ros, si purum eiusmodi et ornatum dicendi genus ad grauiores, quas ipsi profitebantur disciplinas, otiosum prorsus atque inutile iudicassent? Non ita sanae mentis, aut consilii inopes fuerunt, vt quid in vnaquaque disciplina vtile foret, aut inutile, satis superque non intelligerent.

Sed mutata est, inquit, iampridem studiorum ratio. Fuit quidem apud veteres non minor verborum, quam rerum cura. Nos autem scientia rerum contenti sumus, cum nemo in vtroque et doctrinae et scribendi studio excellere vnquam possit. Haec est, Auditores, imperitorum hominum vetus et inanis cantilena: quae fortasse nobis aliquantum negotii faceret, nisi praesto essent tot clarissimorum virorum volumina, qui superiore aetate cum rerum scientia, tum dicendi facultate praestiterunt: quorum sane et numerus et auctoritas tanta est, vt ignauorum istorum perfugia obstruere facile possit. Nam renascentibus in Italia duo fere ab hinc saecula literarum studiis, prima sapientum cura fuit, orationem barbarorum maculis expurgare, eamque veteri splendori restituere. Intelligebant enim viri prudentes, fieri non posse, vt liberales disciplinae squalidam, diutinaeque macie decoloratam faciem, in vinidam splendidioremque commutarent, nisi sacco et sanguine bonarum literarum alerentur. Euolnite quidem temporum eorundem aethales, perlegite

perlegite eius aetatis monumenta: nullo negotio percipietis, quo eorum industria et conatus evaserit. Nam tot statim magni nominis philosophi, tot praeclari iuris consulti, tot celeberrimi theologi existerunt, ut brevis temporis intervallo omne doctrinae genus et castitate sermonis, et eloquentiae luminibus illustratum pristinas opes recuperarit. Quid ergo sibi blandiuntur isti ignaviae patroni, qui doctrinae studia cum bonis literis et eloquentia coniungere, rem perarduam et herculeo fere labore dignam clament? Maiores nostri potuerunt latinitatis et eloquentiae studia tot annos iam intermorta, ingenti labore summoque conatu quasi ab inferis renovare, potuerunt emendate politaeque scribere: haud poterunt homines nostri delicatuli ea vunc assequi, ubi iam in tot gymnasiis et academiis exposita publice patent? At rerum scientia contenti sunt, verba negligunt. O excusationem ignorantiae minime ferendam. Fateantur potius sese rerum scientiam perinde ac verba negligere. Nam ponamus, quempiam doctrina multiplici instructum, sed naturali sermonis copia carere, vocabula inter loquendum quaerere, et quasi verba enumeret, in singulis periodis haesitare; vel certe, si quam habuit a natura loquendi facultatem, nullum tamen habere usum recte et accurate dicendi, nullam troporum, nullam figurarum, nullam boni ordinis notitiam illi praesto esse, adeo ut si non aetate, at in dicendo infans esse videatur: peto nunc a vobis, Auditores, quid agat, quo se vertet cum isto suo doctrinae thesauro homo miserrimus? An poterit scientiam, quam sibi tanto labore tantisque impensis comparavit, communicare cum aliis, si deest verborum proprietates, et explicandi facultas? Audebitne cogitata sua coram viris doctis et eruditis palam facere,

si sine magna sui difficultate, vel eorum, qui audiunt, molestia, loqui nesciat? O frustra susceptos labores! O inanes tot vigiliarum, quos expectabat, amplissimos fructus! Delitescat nimirum necesse est ob sermonis inopiam tacitus et obscurus, qui intelligendi acuminis et eruditionis praestantia inter viros doctissimos eminere potuisset. Fruetur quidem, non inficior, sua secum doctrina, fuoco suae contemplationis sibi vivens, sed praecoccupata ab aliis doctrinae praemia non sine aucti dolore conspiciet. Quod si homines inter cetera ob eam causam gravissimis studiis vacant, ut reipublicae bono consulant, aut saltem patriae utilitati prospicere valeant, quid tandem ab iis sperandum, qui aut barbare loqui, aut elingues ac muti omnino esse debent? Habeat quis sane optimas et sapientissimas de re publica cogitationes; comprehendat probe ea, quae Plato et Aristoteles, cum de domestica, tum de publica felicitate, praecepta tradiderunt; cognitum illi sit, quicquid de iure belli et pacis Hugo Grotius conscripsit; egregie demum noverit vel sacros annales, vel decreta Conciliorum, Pontificumque responsa: quid tandem illi proderunt tot tantaeque doctrinae opes, si de illis ipsis haud sciat graviter ornatique dicere? Scire tamen nihil est, aliter ille, nisi te scire, sciat alter. Profecto nisi ad doctrinam accesserit sermo, quem bonum mentis interpretem Philo ille Platoniscus appellabat, quid te praeter truncum, aut stipitem, aut hominis umbram homines iudicabunt? Proinde Lucretius paucissimis illis verbis, hoc est, sapere et dictis rationem reddere, sapientis viri summam comprehendebat.

At vero, dicit quispiam, quid tu nobis fugis eiusmodi homines elingues et mutos, quos loquacissimos omnium esse constat? Ita sane. Quanquam enim

enim multi sunt, quos antea dicebam, qui ob ingenuum pudorem tacere, quam publice balbutire malunt: plures tamen profecto inuenias, qui plus loquacitatis et audaciae, quam pudoris habent, qui nec impure scribere, nec latine nescire turpe putant, se vero doctos et sapientiae promos condos venditant. Age vero, scribant aliquid, aut loquantur docti isti blaterones, ut eos nimirum sollemni more Socratis intus et in cute videamus. O quot quantasque mihi videor videre doctrinarum copias! O quam magna et ampla eruditionis supellex comparatur! Res sacra agitur, proinde quicquid habent Biblia, Concilia, Interpretes, quicquid Graeci ac Latini Patres conscripserunt, in vnum congeritur, ut non tam oratio, quam Polyanthes componi videatur. Quid tum? praeter innumera fere argumenta, quae singulae disciplinae, suam veluti symbolam, conferunt, opus adhuc macrum et exile videtur, nisi addantur et historiarum flosculi, et apologi et poetarum carmina. Satis iam satis, imo plus quam opus sit ad satietatem. Sed quod dolendum magis est, omnia sic confusa, sic perturbata nulloque ordine digesta inferuntur, ut, quale sibi poetae fluxerunt chaos, tale opus istiusmodi esse videatur. Nihil loquor dictionem barbaram et lutulentam, nihil noua et inaudita verborum portenta, nihil infelicem sermonis ficitatem et inconcinnam elocutionem, quam sine fastidio audire nemo possit. Hinc tantum abest, ut, qui adsunt, aut qui eorum scripta legunt, doctrinam in ipsis suspiciant et magni putent, ut potius de eorum ingenio pessime iudicent, et homines eiusmodi memoria quidem multa, iudicio autem minimo pollentes existiment! En fructus studiorum vberissimi! En fructuosa magnarum rerum scientia! En viri docti nomen, tot stu-

diis tantisque impensis quaesitum! Temeritatis suae poenas iure ac merito luunt homines imperiti, quod nobilissimas disciplinas impuro sermone foedarint. Poeniteat illos aliquando elegantiores literas contempsisse, quae magnum eorum doctrinae splendorem contulissent et ornamentum. Fateantur sese tot annos in grauioribus studiis frustra contriuisse, humanioribus literis et eloquentia, unde illa nervos et vires accipiunt, temere atque imprudenter neglectis.

Sed barbaris istis literarum oppugnationibus summo cum probro et dedecore reiectis, vos iam, Adolescentes optimi, compellat oratio mea. Iam vos probe intelligitis, quam necessaria sint, ad tuendam liberalium artium dignitatem, literarum et eloquentiae studia: quae quidem maiores nostri in omni fere aetate ita cum doctrinae studiis coniuncta esse voluerunt, ut, nisi qui eloquens idemque dicendi peritus esset, nemo sapiens putaretur. Nam rudis et inculta, imo sine voce ac spiritu sapientia est, si quidem sapientia dici possit, cui deest sermonis gratia, dicendique venustas. Proinde mente ac iudicio destitutus omnino sit oportet, qui sine adiumento literarum et eloquentiae praesidio sperat aliquem granissimarum disciplinarum se fructum capere, aut hominem sapientem videri. Haec autem omnia summatim a me dicta fuerunt, non tam ornandae amplificandaeque eloquentiae causa, cuius dignitatem sustinere debeo, quam quo maxime vtilitati vestrae seruirem, animosque vestros contra literarum et eloquentiae vituperatores confirmarem. Restat igitur illud vnum, quod mihi ad extremam referuau orationem, ut scilicet vobis, quod facile sit, maximeque expeditum ad eloquentiam iter, quam breuissime ostendam.

H

Nolite

Nolite putare, me proponere vobis velle Hermiogenis, aut Demetrii, aut Longini praecepta, vel Oratorias Quintilianii, aut iunioris cuiuspiam Rhetoricas institutiones, quas hoc tempore vñs et consuetudo in scholas inuexit. Nolo vos praeceptis eiusmodi obruere, quae, quanquam minime reprehendo, tamen ea per se ad hominem eloquentem efformandum haud multum valere arbitror. Vtar sane viae breuioris compendio. Quemadmodum enim, qui pingendi artem tradunt, tabulam aliquam affabre pictam ante oculos ponunt, vt frontem, supercilia, os et ceterorum membrorum conformationem tyrones coloribus exprimere, et, quoad fieri potest, singula lineamenta corporis imitari studeant; ita quoque vobis ego hodierno die clarissimum, et ex omni parte absolutum eloquentiae proponam exemplum, in quo, quicquid splendoris, quicquid dignitatis et gloriae dicendi arte continetur, vno veluti aspectu intueri, et contemplari possitis. Is est M. Tullius Cicero, Iuuenes ornatissimi, qui naturae prouidentia natus esse dicitur, vt in illo omnes vires suas eloquentia experiretur, qui magisne eloquentiae, an illi ipsi eloquentia debeat, haud quisquam facile indicauerit: de quo hoc vnum affirmari potest, cum in hoc genere sic eminare, vt ipsius nomen pro oratore, et eiusdem in dicendo facultas pro eloquentia apud posteros recepta sit. Nam cum se totum, vt Quintilianus ait, ad imitationem Graecorum con-

tulisset, effinxit in se vno vim Demosthenis, copiam Platonis, et Isocratis suauitatem. Quibus non contentus, Latinos quoque omnes accurate perlegit, tropos notauit, figuras obseruauit, et in vnoquoque oratore, si quod esset artificium, deprehendit, vt nimirum in se vno posteri haberent, quicquid vsquam in dicendi facultate existeret pulcherrimum et admirandum. Hunc ego, Adolescentes optimi, eloquentiae ducem, huuc egregium et immortalem dicendi magistrum hodie vobis imitandum propono, in quem omnia vestra studia, curas, cogitationesque conferatis. Quemadmodum autem non vnus oculorum coniectus in imaginem ab Appelle, aut a Parrhasio depictam, non vnus penicilli ductus in tabula, neque adumbrata vnus oris lineamenta, pictorem repente faciunt: ita quoque nec vnus Tullianae orationis lectio, neque vna data eloquentissimo viro exprimendo semihora eloquentiae cupidum statim efficiunt eloquentem: sed meditatio sedula, exercitatio frequens, et vsus quotidianus ad eloquentiae fastidium Ciceronis imitatore extollunt. Hunc igitur oratorum eloquentissimum, quem nonnulli eloquentiae Deum appellare minime dubitarunt, si me amatis, nunquam ex oculis, nunquam ex manibus, aut sinu deponite. Hunc spectemus, Quintilianii voce et cohortatione vtar, hoc propositum sit nobis exemplum, atque ille se profecisse sciat, cui Cicero valde placebit.



DE  
M. TVLLIO CICERONE  
IMITANDO  
ORATIO II.

HABITA VI IDVS NOVEMBRIS  
AN. MDCCXXI.

CVM superiore anno ex hoc amplissimo loco studiosis eloquentiae Adolescentibus, qui ad hoc Romanum Gymnasium multa frequentia conue- rant, facile et expeditum ad bonas literas et eloquentiam iter fore praenunciassem, si M. Tullium Ciceronem diligenti ratione studioque sibi imitandum proponerent: fuerunt quidam, quantum ego intellexi, quibus oratio mea probari omnino non potuit; quod cum semper ardua et grauis, magnisque iu- geniorum disceptationibus digna quaestio visa fuerit, an videlicet vnus Cicero, an alii quoque boni et praeclari auctores imitandi essent, ego statim quasi e tripode rem definire, nec partibus auditis sententiam ferre ausus sim, vno duntaxat ad imitandum Cicerone propo- sito; quo circa me temere et arroganter fecisse arguebant, quod tam multos Latinos scri- ptores, et quidem omnium iudicio elegantissimos, parui fecerim, et M. Tullium, cuius elocutio multorum opinione ver- bosa, et stylus Asiaticus, ce- teris ad imitationem praetule- rim. Equidem poteram, causae bonitate confusus, obrecta- tiones huiusmodi negligere, cum praesertim nemo eorum, quo- rum dignitatem reuereri, aucto- ritatique parere debeo, oratio- nem meam interpellauerit. Ve- rum cum animaduertterem, prae- claram illam controuersiam de vno, aut de pluribus imitan- dis, inter doctissimos viros fuisse saepe in iudicium magna ani- morum contentione vocatam, nunquam tamen satis explica- tam, nunquam definitam: sub- iit animum, causam ipsam quasi comperendinatum recognoscere, non tam vt iudicium meum in- terponam, quam vt cupidi elo- quentiae adolescentes, quos in hac studiorum instauratione fre- quentes adesse video, cognitum

habeant, quid de illa viri gra- ues et docti senserint, quibus- que de causis nos proximo an- no vnum Ciceronem prae cete- ris imitandum esse statuerimus. Adeste igitur animis, Adolescentes optimi, quos si vnquam alias, attentos vos hodierno die ma- xime cupio. Agitur enim modo non de oratore, aut de histo- rico, aut de poeta aliquo, vt fieri solet, interpretando: sed de M. Tullio, oratore omnium eloquentissimo, vobis in elo- quentiae imperatorem et ducem constituendo. Agitur de prae- stantissimo dicendi magistro, in cuius imitatione castissimae la- tinitatis, et germanae eloquen- tiae fundamenta nituntur. Agi- tur demum de expedita ac per- facili via, qua optatos et vber- rimos ipsius eloquentiae fructus percipere possitis.

Non defuerunt quidem supe- riore memoria magni nominis viri, qui, siue veterum gloriam se consequi possent diffiderent, siue ingenio suo plus nimio tri- buerent, omnem in literis imi- tandi rationem de medio sustu- lerunt. Sed hos strenue refellit apud Ciceronem clarissimus orator M. Antonius, qui de Oratore recte instituendo disputaturus, totius veluti aedificii basim imitationem posuit, et tanquam id, quod esset primo cogitandum, praecepit. Er- go hoc sit primum, inquit, in prae- ceptis meis, vt demonstramus, quem imitemur. Haec eadem Quintilianus vestigia perfe- quens, ad oratoris stylum ef- formandum et elocutionem com- parandam, multa satis accurate de imitatione conscripsit. Vbi plurimis et eloquentissimis enu- meratis auctoribus, ex quorum lectione tum verborum copia, tum varietas figurarum et com- ponendi ratio ab oratore peti debent, illud clare deducit, e- loquentiam magna ex parte imitatione contineri. In eadem quoque sententia fuisse postea Paulus

Paulus Cortesius, Petrus Bem-  
bus, Pius Mirandulanus, Bar-  
tholomaeus Riccius, alique vi-  
ri plurimi ingenio et eloquen-  
tia clarissimi, quorum extant  
docti et eruditi de imitatione  
libelli. Et sane cum omnia,  
quae ad rationem artis perti-  
nent, imitatione cum fieri, tum  
perfici videamus, anne vna ars  
bene dicendi, quae omnium dif-  
ficillima atque pulcherrima, i-  
mitationem repudiabit? Cum  
igitur nullus sit dubitandi lo-  
cus, quin in eloquentiae stu-  
diis nos ad aliorum exemplum  
conformari oporteat: illud quae-  
rendum superest, multine sint,  
an vnus M. Tullius ad imitan-  
dum, neglectis ceteris omnibus,  
selegendus.

Atque hic statim mihi videor  
audire non tam voces, quam  
clamores et vociferationem eo-  
rum, qui rem indignam et in-  
iuriae plenam esse clamitant,  
in literarum studiis vnum o-  
mnibus praeferrī Ciceronem,  
et tot alios graues et magnos  
literarum parentes, Plautum,  
Terentium, Caesarem, Sallu-  
stium, Liuium, aliosque inge-  
nio praestantes et immortalī  
gloria dignos, tanquam abor-  
tus, aut nothos reiici atque con-  
temni. Hoc autem Ciceronis  
ipsius exemplo confutari quis  
non videt? Cum ille non vnum,  
sed eloquentissimum quemque  
tum Graecorum, tum Latino-  
rum imitandum insceperit, et  
hoc pacto in se vno effingere  
potuerit vim Demosthenis, Pla-  
tonis copiam, et Isocratis in-  
cunditatem: anne in vnum M.  
Tullium ingenii opes natura ef-  
fudit vniuersas, adeo vt nihil  
pulchre, nihil venuste cogita-  
tum, aut ingeniose dictum, in  
tot aliis praeclaris scriptoribus  
inueniatur, quod dignum sit,  
vt nos imitemur? Atqui illud,  
Cicerone ipso fatente, certum  
est, in natura nihil ex omni  
parte perfectum atque beatum  
existere: perinde ac illa ceteris,  
quod largiatur, non sit habitu-  
ra, si vni omnia largiretur. Ex

quo fortasse contigit, vt neque  
Demosthenes ipse Ciceroni per  
omnia satisfaceret, sed aliquan-  
do sibi ille dormire videretur,  
quod nimirum, cum ad eum  
exprimendum se penitus tota  
mente et cogitatione contulisset,  
non omnia tamen loquendi or-  
namenta dicendique lepores in  
eo reperiebat. Et tu nobis in  
vno Cicerone cuncta existere,  
ac nihil omnino deesse persua-  
debis? Imo tantum abest, vt  
omnis in eo efflorescat dicendi  
virtus, vt potius multa prae-  
clari eius aetatis oratores in eo-  
dem deprehenderint vitia. Nam  
dialogi auctor affirmat, Cice-  
ronem, dum adhuc viueret, a  
Licinio Caluo reprehensum fuisse,  
tanquam solutum et ener-  
uem; a M. Bruto vt fractum  
et elumbem, ab aliis vt tumi-  
dum, inflatum, redundantem,  
atque Asianum. Praeterea A.  
Gellius testatur, Gallum Asinium  
scribere non dubitasse, Cice-  
ronem parum integre, improprie,  
atque inconsiderate esse locu-  
tum; et Largium Licinium de  
illo tam male sensisse, vt in i-  
psum quoque ediderit librum  
conuicii plenum, cui titulus Ci-  
ceromastix.

Audistis, Adolescentes opti-  
mi, quae improbo ore in M.  
Tullium enomunt maledicta,  
qui vos ab eius imitatione co-  
nantur abducere? At vero nisi  
haec falsa, et contra eloquen-  
tissimum virum ab eius inimi-  
cis temere efficta deprehenderi-  
tis, me hominem impudentem  
et mendacem arguitote. Nam  
qui tandem sunt tam acerbae  
criminationis auctores? ii scilicet,  
qui partim Ciceronem  
oderant, partim eius gloriae  
inuidebant, partim denique ob-  
trectandi studio ad eum vitupe-  
randum incitabantur. Nam cum  
eo tempore nonnulli Romae  
oratores essent, qui sicco, ari-  
do et exsanguī dicendi genere  
utebantur, quod se Atticorum  
more dicere videri vellent;  
quorum oratio pressa erat, ac  
subtilis: copiosam et profuen-  
tem

tem M. Tullii eloquentiam a quo animo ferre non poterant, atque ipsum tanquam fractum et elumbem, otiosum et inanem, vnoque verbo Asianum appellabant. Ex hac schola prodiit Licinius Calvus, qui, ut M. Seneca testatur, iniquissimam diu litem cum Cicerone de principatu eloquentiae habuit, cuius tamen dicendi rationem non modo Cicero ipse ut ieiunam et attritam saepe reprehendit, sed ne Seneca quidem, aut quisquam alius probavit unquam. Quid ergo mirum, si Calvus idem Ciceroni, quoquomodo potuit, par pari referre, atque ipsum tanquam dissolutum et enernem criminari voluerit? Quae iudicii aequitas expectari ab eo poterat, cuius animus odio atque invidia flagrabat? De Bruto autem, qui et vir probus, et Ciceronis amicissimus semper fuit, cuius nomine librum de claris oratoribus Cicero ipse inscripsit, certe quidem aliter indicare debemus. Etenim non odio, sed amoris potius, et singulari erga eundem benevolentiae tribuni debet, quod ipsum de stylo quasi fracto et elumbi, ut sibi videbatur, non invidiose, sed amicoe moneret. Erat enim magna inter utrumque diuersitas styli ac dissimilitudo. Erat M. Brutus, ut a Caesare vocabatur, disertus potius, quam eloquens: contra vero Cicero fluminis instar profluens, fusus et copiosus, ita ut ab eodem Caesare tanquam princeps et inuentor copiae laudaretur. Itaque Bruto, qui sicus erat, et plus in dicendo habebat diligentiae, quam naturae, vbertas et copia Tullianae dictionis omnino probari non poterat. Verum et Calui et Bruti, et omnem illam Atticorum Romanorum nationem ieiunitatis et inopiae peramantem quis acriore iudicio ac vi, praeter Ciceronem ipsum, confutare possit? Ille profecto ad eloquentiam non tam factus, quam natus, in aureo

libello de optimo oratorum genere satis luculenter ostendit, quantum intersit, vtrum quis Attice, an optime dicat. Neque enim satis est, inquit, oratori perfectio vitare, si quid in sententia vitiosum, si quid absurdum, aut alienum: in verbis si quid non aptum, si durum, si longe petitum. Haec vitauerunt fere omnes, qui aut Attici numerantur, aut dicuntur Attice. At magni oratores, cum careant omni vitio, non sunt contenti quasi bona valitudine: sed vires, lacertos, sanguinem quaerunt, quandam etiam suauitatem coloris. Id vero desinant dicere, qui subtiliter dicunt, eos solos Attice dicere, id est, quasi sicce et integre; at ample et ornate et copiose cum eadem integritate, Atticorum est. Ex his satis intelligitur, Auditores, quam temere et impudenter in M. Tullio reprehendebant maximam illam ingenii vbertatem dicendi, quae copiam, qui se Atticos, aut Atticorum imitatores profitebantur. Damnabant illi in eloquentissimo viro, quod multorum vitium esse solet, ea, quorum ipsi compotes esse non poterant. Non dicendi facultas, non ingenium, non industria illis tanta fuit, ut admirabilem M. Tullii eloquentiam exaequarent: et cum ipsi imbecilli, sicci, ac ieiuni dicendo essent, praestantissimi oratoris amplitudinem et copiam vituperare maluerunt, quam tenuitatem et inopiam suam confiteri. Quod autem Ciceroni de elocutione a Gallo Asinio, et Largio Licinio obiectum est, id stomachum A. Gellio illud referenti sic mouit, ut illos tanquam sacrilegos de Diis immortalibus male opinantes, et immania quasi monstra appellare non dubitauerit. At vero non tam stomachum, quam risum mouere videntur homines isti amentes et stolidi, qui de integritate ac proprietate latini sermonis cum M. Tullio contendere ausi sint, quem Latinae linguae



linguae auctorem et quasi parentem fuisse, communi sapientum iudicio constat. Sed praestat viri doctissimi verba in medium afferre. Vt quidam fuerunt, inquit, monstra hominum, qui de Diis immortalibus impias falsasque opiniones prodiderunt: ita nonnulli tam prodigiosi tamque vecordes exiterunt, in quibus sunt Gallus Aulinus, et Largius Licinius (cuius liber etiam fertur infando titulo Ciceromastix) ut scribere ausi sint, M. Ciceronem parum integre atque improprie atque inconsiderate locutum. Haec A. Gellius. Quae vero imprudenter Ciceroni nugatores isti opponunt de verbo *poenitet*, ab eo perperam usurpato, aliisque istiusmodi, cum perridicula ac prorsus falsa ab ipso A. Gellio iudicentur acriterque reprehendantur, apud nos tanti non sunt, ut in iis confutandis morari debeamus. Potest is, cui vacat, apud ipsum ea legere atque perpendere: non modo non ineptum esse id, quod M. Cicero dixit, intelliget, sed eleganter, facete, ac festiue dictum.

Iam vero iis, quae Ciceronis splendorem maculis aspergere videbantur, satis superque deletis, ad cetera, quae de illo duntaxat imitando obiecta sunt, faciliorem fore video reliquum orationis meae cursum. Nam quod primo reprehendebant, quod nos, vno Cicerone ad exemplum proposito, ceteros auctores, qui pulchre nitideque locuti sunt, iniuriose repudiaremus, quis non videt, quam sit absurdum, et a veritate alienum? Non equidem repudiandos, et per summam iniuriam abiiciendos eos esse dicemus, quorum perfecta diuino ingenio monumenta suspicimus, ac tantopere veneramus. Imo et plurimum illis nos debere fatemur, et propter ingentem optimarum rerum cognitionem, et propter reconditas doctrinae opes, quas summo labore et in-

dustria partas nobis ipsi reliquerunt. Sed in efformando stylo parandaque locutione magistrum omnium optimum M. Tullium illis praefendum esse putamus. Et sane primo quaeram ab iis, qui omnes bonos auctores a nobis imitandos esse contendunt, an omnes illi inter se styli nobilitate, omnes elegantia et artificio pares existant, an vero alius alio melior, alius alio praestantior existimetur. Si primum affirmant, concedi illis profecto potest, quod petunt: non vni eorum opera detur, sed aequae omnibus studium et imitatio impendatur. Quod si, ut res est, negent illos pares esse ingenio, scribendique ratione similes, cur non melioribus operam dederimus, iis, qui minus boni sunt, neglectis? Iam vero non omnes bonos imitandos esse fateantur, necesse est. At si inter illos, qui boni esse dicuntur, vnus longe omnium optimus longeque praestantissimus existeret, in quo quae singula ceteri habent bona, in eo vno vniuersa ampliora ac splendidiora conspicerentur; nonne hunc vnum omnium maximum atque perfectum imitari praestaret, quam ceteros omnes, qui mediocriter boni esse censentur? Atqui hunc omnium principem clarissimum, atque summum, me quoque tacente, M. Tullium esse intelligitis: qui a Caesare, acerrimo ingeniorum censore, tanquam dux et inuentor copiae, ut antea diximus, laudabatur, a Velleio Paterculo vir ingenio maximus, a M. Seueca ingenium, quod solum par imperio suo Pop. Romanus habuit, ab Aquilio Gallo Rhetoricae omnium peritissimus, a Quintiliano in omnibus, quae in quoque oratore laudantur, eminentissimus, a Lactantio perfectus orator et summus philosophus, a D. Hieronymo eloquii flumen appellatur. Hic profecto talis tantusque vir mira ingenti felicitate omnem dicendi laudem consecutus

cutus est, et quae ceteris insunt pulcherrima, in se vno splendide amplissimeque complexus est. Quod quidem ipse in oratore de se modeste fatetur. Nulla est, *inquit*, vlllo in genere laus oratoris, cuius nostris in orationibus non sit aliqua, si non perfectio, at conatus tamen atque adumbratio. Non assequimur, at quid deceat, videmus. Et reuera, si de Graecis loquamur, non est, quod in eo desideretur Demosthenis summa vis, Platonis copia, et singularis Isocratis suauitas, vt Quintilianus affirmat. Quid vero de Latinis oratoribus, cum in se granditatem Sulpitii, vsm Antonii, Crassi leporem, suauitatem Catuli, proprietatem Cottae, splendorem Caesaris, Hortensii flores effluxisse dicatur? Cum igitur in vno Cicerone pulcherrimum et perfectissimum eloquentiae genus habeamus, vnde quicquid egregium, quicquid splendidum et magnificum in Graecis, tum in Latinis scriptoribus eminet, in nos deriuare possimus, ad eorumne etiam, quae non ita pulchra sunt, exprimendas imagines curam animique traducemus? Atqui stultitiae genus est, optimum imitari cum possis, ad id quod mediocre, aut deterius est, cogitationem adiicere. Neque quisquam erit tam amens pingendi artifex, qui si imaginem ab Apelle depictam ante oculos habeat, Polignoti, aut Thymanis curet inspicere tabulas. Cum itaque communi sapientum iudicio, nulla omnino virtus, nullum scribendi lumen, nulla laus in vlllo sit, quae M. Tullio non inesse longe praestantior atque absolutior inueniatur, quotus quisque superuacuam rem esse non videt, multos quantumvis bonos imitandos suscipere, cum magis expediat, ad vnum omnium optimum ac praestantissimum, quem imitemur, industriae nervos intendere? Frustra per lon-

gas ambages quaerimus, quod recta via maturissime consequi possimus.

At enim Quintilianus asseuerat, M. Tullium non solum oratorem Graecorum omnium optimum Demosthenem esse imitatum, sed Platonem, sed Gorgiam, sed Isocratem, sed Hyperidem, sed Lysiam; inter Latinos item non vnum, sed multos, quos paulo ante numeramus, Sulpitios, Antonios, Crassos, Catulos, aliosque sibi ad exemplum proposuisse. Libuit illi quidem apes imitari, quae huc et illuc volantes, flores delibant, et fingendis fauis conficiendoque melle succos ita permiscant, vt eos nemo inde discernat. Quod ergo Ciceroni licuit, erit ceteris interdictum? Minime gentium. Liceat per me tibi quoque omnes bonos imitari, quod Ciceroni licuit, si par ingenium; si par industria, si par scribendi labor et exercitatio tibi cum eo sit. At vero quis ignorat, Ciceronem ingenio plane diuino fuisse, et a primis annis, vt Plutarchus refert, tantum in literis profecisse, vt eius aequalium parentes ad eum videndum commoti fama conuenirent? Quantus autem fuerit in eo fere semper negotiis grauissimis occupato scribendi labor atque exercitatio, cum neque in feriis, neque in ludis, neque in communi otio vnquam esset otiosus; quis dicendo paucis complecti possit? Hinc ille primo de legibus, subcisiua, *inquit*, quaedam tempora incurrunt, quae ego perire non patior, vt, si qui dies ad rusticandum dati sint, ad eorum numerum accommodentur, quae scribimus. Et in orat. pro Plancio; orationes ego scripti ludis et feriis, ne omnino vnquam essem otiosus. In Philippicis autem: dico, *inquit*, me nec reipublicae, nec amicis vnquam defuisse; et tamen omni genere monumentorum meorum perfecisse operis subcisiuis, vt meae vigiliae meaeque

que literae et iuventuti utilitatis, et nomini Romano laudis aliquid afferrent. Verum quid plura? Nonne innumera prope modum et immortalia eius opera, quorum partem iniuria temporum interiisse dolemus, pars in manibus omnium extat, id per se satis superque loquuntur? Cum hoc igitur tali tantoque viro ingenii vim et industriam suam homines isti conferant, qui ad eius exemplum provocare audent, et omnes honos scriptores se imitari posse confidunt. Legant diu nosque, quemadmodum ille se fecisse fatetur, oratores tum Graecos, tum Latinos, qui in laude aliqua fuerunt; expriment in se omnem omnium eloquentissimorum hominum in dicendo vim: experiantur sese pro virili, aemulari conantes et ubertatem Livi, et brevitatem Sallustii, et proprietatem Caesaris, et candorem Celsi, et Tullii denique ipsius ornatum et amplitudinem. Nam si id assequantur, tunc non inuiti illis concedemus, ut non vnum Ciceronem, sed omnes quotquot extant auctores, quam volent libere imitentur. At vero quis animo non comprehendit, quam difficilis et ardua res sit, multos et varios, atque inter se omnino dissimiles scriptores legere, meditari atque concoquere, ut inde vna et simplex, sibi que perpetuo constans digeratur, et coalescat oratio, non autem monstrum aliquod exoritur, cui cum ceruice equina, ex Horatii sententia, lunatum sit caput humanum? Non mihi, sed summo ingenio viro, et in literis et eloquentia maxime exercitato, Petro Bembo Cardinali credite; qui de hac ipsa controuersia ad Picum Mirandulanum, hominem literatissimum, scribens, multorum recte imitandorum difficultate perpensa: fieri non potest, ait, ut, qui multos assequi vna scribendi ratione vult, eius oratio non dissimilis, non impar, non

sibi diuersa, inconstansque sit, non inconcinna, non parum cohaerens, dum huius lenitatem, illius vero ardorem, alterius ornatum, alterius negligentiam, quae quidem interdum, ut in muliere non fucata facies, sic in scribente gratior est, sexcenta praeterea alia, multumque differentia scribendi genera qualitatesque complectitur. Et sane quemadmodum stultitiae genus esset, ad vnius hominis os vultumque effigendum, dissimiles multorum hominum vultus assumere, quorum vnus hilaritatem, alter tristitiam, hic benignitatem, ille severitatem prae se ferat; ita ex multis scriptoribus, quorum lineamenta et color varia ac dissimilia sunt, vnam et eandem velle scriptionem conficere, absurdum est prorsus ac perridiculum. Quis enim facile possit Livium cum Sallustio, Caesarem cum M. Tullio, Virgilium cum Plauto, aut Terentio vna similique scribendi ratione coniungere, qui dicendi genere inter se differunt quam maxime? Praeterea si viros singulari ingenio praeditos nonnisi multorum annorum studio, multisque vigiliis assequi potuisse legimus, ut ad propriam vnius scriptoris dictionem proxime accederent; quae per Deum immortalem tanta ingenii vis, tantus labor atque conatus, si omnes legendi, omnes imitandi sint? Franguntur vires, contentio animi debilitatur, atque ardor elanguescit, dum in singulis vnius scriptoris lineamentis exprimendis occupamur, et vnius styli faciem pari verborum ornatu et elegantia repraesentare conamur: et tantum nobis ingenii acumen, tantum animi robur, tantam industriam inesse putabimus, ut non vnum, sed omnes auctores recte imitari possimus? O nimiam de se hominum opinionem! O vanam ingeniorum fiduciam! Vtinam homines isti audaces sedulo ad vnum Ciceronem imitandum curas animumque adhiberent.

In hoc vno recte imitando atque exprimendo, omnes profecto alios imitarentur, cum vnus Cicero, raro naturae miraculo, et inaudita ingenii felicitate, consecutus sit omne id, cuius ceteri omnes vix partem aliquam consecuti esse videntur.

Sed ecce alia in M. Tullium aduersariorum tela. Verbosior est, inquiunt, Cicero, quam quod praecens scribendi ratio, consuetudo atque vsus postulent. Amant magis haec nostra tempora pressum, sententiosum et acutum dicendi genus, quam Ciceronianae eloquentiae copiam et lacinias. Satis quidem belle. Sed ab acutis eiusmodi scriptoribus primum peto, an de latinitate et stylo forensi, quo nunc utimur; an de quocunque alio scribendi genere isthaec dicant. Nam si primum, satis iam alias, cum de latinitate forensi expurganda, tum etiam cum de necessitate eloquentiae in iudiciis hodiernis orationem habuimus, ex hoc ipso loco grauius diximus, eorumque opinionem, qui nunc Ciceronis eloquentiam e foro esse omnino proscripsum putant, pro virili parte conuellere conati sumus. Quod si de alia quauis scribendi ratione intelligi volunt, excusandi sunt quidem, si praeter paucas illas Ciceronis orationes, quarum notitiam in scholis a pueris habuerunt, nullum aliud tanti viri opus vnquam aut viderint, aut legerint. Nam ut mitius cum iis, qui Ciceronem tanquam verbosum reprehendunt, agamus, quam aliam quaeso erroris excusationem asserere possunt, quam vnam, in qua versantur, Ciceronis ignorantiam? Etenim cui verbosior Cicero ipse videatur, si tres eius de oratore libros, tum etiam alios de claris oratoribus, de oratore perfecto, ac de optimo oratorum genere perlegerit, quos omnes presse, subtiliter et acute scriptos esse constat? Euoluant libros tum de Academicis, tum de Tuscu-


lanis quaestionibus, de natura Deorum, de diuinatione, de fato, de legibus, aliisque permultis, in quibus praeter infinitam rerum cognitionem eximiamque doctrinam, qua illi abundant, omnia tam sapienter, quam concinne ac sententiose conscripta inuenient. Quid de officiorum libris ad Marcum filium loquar, in quibus cum tam pulchra de civili sapientia et virtutum omnium disciplina disputaret, aequabili et temperato orationis genere vsus est? Huc accedunt tot epistolarum libri ad Atticum, ad Quintum fratrem, ad M. Brutum, ad Pansam, ad Hircium, aliosque familiares, qui omnes doctorum virorum iudicio octoginta fere numerantur, in quibus sane nulla potest verborum copia reprehendi: sed sic omnia venuste, eleganter sciteque scripta sunt, ut mea quidem sententia, si nulla alia M. Tullii monumenta existerent, sola epistolarum volumina ingenium eius admirabile et quasi diuinum comprobarent. Haec igitur legant, haec serio euoluant, et acti iudicio perscrutentur scituli isti ac peracuti Ciceronianae locutionis censores; et si quid verbosum, si quid inane, aut redundans in eis tandem offenderint, tunc sane Ciceronem nimiae loquacitatis reum faciant. At vero quae summa impudentia est, cum tot praeclara Ciceronis ipsius opera ne de nomine quidem audiuerint, ei de verbosiore stylo diem dicere, eumque indicta causa damnare? Si in tanta iacent literarum ignorantia, ut quae pressum et subtile dicendi genus, quae autem amplum, copiosum et magnificum postulant, minime vident, cur ea damnant, quae minus intelligunt? Cur virum, quem D. Augustinus modo maximum oratorem, modo Romani auctorem eloqui, modo magnum eloquentiae principem vocat, ipsi tanquam loquacem, et plus nimio verbosum accusant? Sapienter

pienter quidem Cicero, quod obtrahatores isti minime capiunt, varia dicendi genera cogitabat: et cum domi epistolas, sermones familiares, aut dialogos scriberet, concisus, tenuis et quasi humi serpere visus est: cum autem siue in senatu, siue in foro, siue in oblatione diceret, tanta eloquentiae copia tantaque ingenii vbertate dicere solitus est, ut dicenti maximae Pop. Romani acclamationes maximique doctorum virorum plausus fierent, quasi aliquod eloquentiae numen loqueretur. Atque hinc in foro et iudiciis regnare dictus est, eoque amplitudinis et gloriae peruenit, ut T. Liuius Romanae historiae princeps, tam lepide, quam vere dixerit, ad Ciceronis laudes opus esse Cicerone laudatore.

Habetis igitur, Adolefcentes optimi, in vno Cicerone omnem scribendi rationem perfectam et absolutam. Multiplex et varium, quo ille ceteris longe praestitit, dicendi genus, omnem vobis suppeditat singularem styli varietatem, vberissimamque exemplorum copiam. Si dictione simplici, aut temperata vobis opus est, habetis, praeter quaestiones Tusculanas, epistolas familiares, dialogos de amicitia, de senectute, de somnio Scipionis, atque alia sexcenta, quorum lectione stylus

eiusmodi formari, maximeque limari possit. Si grandi et sublimi dicendi genere, quod splendidis verbis grauibisque sententiis sese attollat, uti debeatis; vnde vberiora et illustriora peti possunt, quam a Cicerone ipso, huiusmodi exempla? Perlegite praestantissimas eius orationes, praesertim ex Catilinariis secundam, ex Verrinis septimam, tum pro M. Caelio, pro Corn. Balbo, tum etiam pulcherrimas duas pro domo sua et pro Milone, Philippicas de mam, quarum secunda supra ceteras eminet, seuili maturitate ac sapientia caescentes: quis inter Graecorum, aut Latinorum eloquentissimos oratores sublimiore stylo vnquam scripsit? Quis maiore sententiarum granitate, aut splendidiore maiestate verborum usus est? Et erit quisquam tam amens, qui castitatem et elegantiam sermonis dicendique ornamenta in aliis auctoribus inquirere velit, quae omnia in vno Cicerone tam ample, tam plene cumulateque splendescunt? Itaque vos, Auditores ornatissimi, mihi, homini in literarum studiis quantum satis exercitato, vestrique amantissimo credite: plus vobis ad latinitatem et germanam eloquentiam comparandam proderit assiduum ac diligens vnus Ciceronis studium, quam lectio multiplex et diuturna ceterorum omnium scriptorum.





DE  
STUDIO POETARVM

AD  
LITERAS ET ELOQVENTIAM  
NECESSARIO

ORATIO III.

HABITA IDIBVS NOVEMBRIS  
AN. MDCCXXXIIL

**S**i qua fuit vnquam opinio optimis artibus pernicioſa, quae adoleſcentium noſtrorum in ſuſcepto literarum curricula iter retardaret, aut impediret; ea certe eſt, quam hoc tempore multi habent de Poeticae facultatis doctrina. Putant enim, ſe nullum, aut perexiguum ex eiusmodi ſtudio fructum eſſe percepturos: proinde non modo praecipua carminum genera, leges ac metra diſcere dedignantur, ſed ne ipſam quidem poetarum lectionem, qua certe nihil ſuauius, audire operae pretium ducunt. Hinc fit, vt ſtatis diebus, qui ſiue Horatio, ſiue Plauto, ſiue Terentio, aliisque poetis a nobis de more interpretandis dedican- tur, complures eorum has ſcholas minime frequentent, qui alioquin oratoribus, aut hiftoricis explicandis haud indiligenter adefſe conſueverunt. Quafi vero ex illa poetarum lectione nihil ſolidi, aut bonae frugis domum referre poſſint, aut nos homines otioſi alternis diebus poeticis nugis et anilibus fabellis delectemur. Itaque vt ali-

quando tandem, quam ſulte hac in re decipiantur, agnoſcant, conſtitui in hac ſtudio- rum ineuntium celebritate poeticae artis vtilitatem ante oculos iſtorum ponere. vt, qui ad latinитatis elegantiam et eloquentiae dignitatem aspirare volunt, demum intelligant, neglecto poetarum ſtudio, ſe oleum atque operam perdere; adeoque ſi quis in illis latinarum literarum eſt amor, ſi quod eloquentiae comparandae ſtudium, certo ſciant, intereſſe ſua plurimum, iratis muſis et Apollini tempeſtiue reconciliari, vt ipſis fauentibus ad nobiliſſima eiusmodi ſtudia viam ſibi muniant expeditam.

Nolo autem in hoc ipſo di- cendi aditu diu morari in poeticae laudibus praedicandis, quod nimirum longum eſſet ac perdifficile. Hoc ſane mul- ti ante me oratores, praefertim vero Hermogenes et Aphthonius, clariffimi rhetores, et copioſe, et graviter, et orna- te fecerunt. Multa ſunt volumina, quae poeticae artis dignitatem, tum etiam vetuſtiſſimam, imo diuinam eius origi- nem,

nem, quam illa a Diis ipsis ducere creditur, satis superque commendant. Neque aliquis vestrum ignorat honores amplissimos, quibus tum Graecia, tum Romana respublica poetas, quasi homines caelestis spiritu afflatos, atque ad nos de caelo delapsos, coluit, quos proinde Deorum filios Plato nuncupavit. Et sane quis ab orbe condito fuit unquam Homero fama illustrior, et omnium ore magis celebratus? Cuius ingenium sine exemplo maximum Velleius affirmavit, eumque solum magnitudine operis et fulgore carminum appellari poetam meruisse. Cuiam Roma ampliores honores, quam latinorum poetarum principi, Publ. Virgilio detulit? Testes sunt Caesaris Angusti literae; testis ipse Pop. Rom. qui in theatrum advenienti assurrexit universus, atque illum praesentem spectantemque non minus, ac Augustum ipsum, venerari solitus est. Quid dicam plurimos clarissimos reges et imperatores, qui poetica facultate pollere, pulcherrimum sibi duxerunt, neque ex illa minorem sibi gloriam, quam ex re militari, atque orbis imperio comparari posse putaverunt. Influxit sunt equidem nobilissimae facultatis decora, et summa ac prope singularis apud omnes fere gentes poetarum gloria. Sed cum de iis dubitare non possint, nisi qui, rudes prorsus ac barbari, omni literarum notitia carent, ne actum agere videar, ad illa protinus me convertam, quae ex poeticis studiis maxima consequuntur emolumenta.

Igitur adolescentes nostri in humanioribus literis et eloquentia proficere, quod felix faustumque sit, percipiunt; at musas, et carmina et poetarum libros cane peius et angue oderunt, atque averfantur. Verum usque adeone boni adolescentes poeticæ naturam, ne nomen dicam, ignorant, ut, quanta sit inter bonas literas et

eloquentiæ studium cum poetica disciplina coniunctio, minime videant? Ignorantne eloquentiam, a poetica tanquam a parente filiam ortam atque progenitam? Audiant gravissimae auctoritatis viros, Strabonem et Isidorum, qui tam apud Graecos, quam apud Latinos longe antiquiorem carminum, quam prosae, curam fuisse testantur. Audiant Plutarchum, qui in suis opusculis, tum in libro de musica, tum in eo, in quo docet, quomodo a iuvenibus poetae audiendi sint, inter cetera luculenter ostendit, poeticam omnis disciplinae fuisse initium. Et sane, si poetae iam tum dispersos homines in unum locum congregasse, et mira dulcedine carminum ex agresti illo ac ferino vivendi genere ad mitiorem et humaniorem vitam traduxisse perhibentur, quis dubitet, poeticæ inter reliquas disciplinas principem locum essetribuendum? Ipsa quidem multo prius, quam eloquentia, potuit agrestes et immites hominum animos mulcere cantu, et ad pulchritudinem virtutis allicere. Ipsa prior apud illos de immortalis Deorum natura disserere, eorum laudes canere, et sacra facere instituit, unde poetae primi et Theologi, et Sacerdotes vocati sunt.

At dicit quispiam: non de dignitate, aut origine disciplinarum lis est: sed cui bono adolescentibus ad eloquentiam properantibus poetica sit, abs te quaerimus? Ita sane. Ego equidem a poetis omnem latinarum literarum elegantiam et eloquentiæ laudem in nos derivari contendo. Quis enim hac nostra aetate latine scire aut latine scribere cupiat, qui longe melius ex ipsa poetarum lectione, quam ex Grammaticorum schola voti compos non fiat? Aetatem quis terat in Grammaticorum subfelliis; audiat complures annos Priscianum, audiat Sernium et Donatum, percurrat Alnarum, perlegat Scioppium, aut quoscunque

cunq̃ue alios, qui de Grammatica diligenter accurateque scripserunt: quid illi diuturnus adeo, atque improbus labor tandem proderit ad latinae locutionis castitatem et elegantiam comparandam? Nihil profecto. Nam, ut Quintilianus affirmat, quid aliud est Grammaticae loqui, quam omnino latine non loqui? Erit quidem tibi sine barbarismis, aut solecismis oratio, erit immunis a censoria Grammaticorum virgula sermo: sed macer, et exsanguis, et veluti corpus, in quo nihil praeter ossa, aridum ac sine spiritu. Contra vero, si Plauto ac Terentio te dederis, si Virgilium atque Horatium, si Catullum ceterosque elegantiores poetas in manus perlaepe fumpseris, haud multum ab erit, quin, in Latium quasi translatus, latinam linguam arripas, et non minus latine loquendo, quam latine scribendo valeas. Et sane, ex quonam fonte summus ille latinis magister ac parens, Cicero, proprietatem sermonis nitoremque verborum hausit, vtrum ex Varronis Grammatica, an ex perpetua Plauti, Terentii aliorumque poetarum lectione, quos, quamdiu vixit, in oculis habuit atque deliciis? Si quis vel paululum ad singulos eius libros animum adiciat; facile intelliget, quot passim occurrant, veluti in prato, flores, scite et eleganter dicta, quae ille a poetarum lectione collegit. Quot enim apophthegmata, quot adagia in eius libris de officiis, de diuinatione, in quaestionibus Tusculanis, tum etiam in admirandis ac prope diuinis illius orationibus, in quibus omnis eloquentiae amplitudo, veluti in theatro, expansari visa est? Vnde breues illae et illustres sententiae: *homo sum, et nihil humani a me alienum puto; obsequium amicos, veritas odium parat; neque dedi, neque do fidem infideli cuiquam, atque alia sexcenta, nisi ex*

poetis, ut singula verba testantur? Neque vero id tantum M. Tullio, sed ceteris quoque oratoribus familiare fuisse Quintilianus affirmat. Credamus, inquit, summis oratoribus, qui veterum poemata, vel ad fidem caussarum, vel ad ornamenta eloquentiae assumunt. Nam praecipue quidem apud Cicero-nem, frequentius tamen apud Aeginum etiam et ceteros, qui sunt proximi, vidimus Eunii, Accii, Pacuuii, Lucilii, Terentii, Caecilii, et aliorum inferi versus, summa non eruditionis modo gratia, sed etiam iucunditatis, cum poeticis voluptatibus aures a forensi asperitate respirent. Ex iis iam plane constat, quam turpiter halucinentur, qui poetarum lectionem tanquam inutilem damnant, et adolescentium e manibus poetas stultissime excutunt. Sunt profecto poetae genus hominum, inter scriptores omnes eloquendi studiosissimorum. Hanc ipsis laudem tribuit acerrimus omnium vnus latinis censor, Laurentius Valla, qui in aspera illa contra Bartholomaeum Facium de quibusdam latinis vocibus pugna, M. Tullii auctoritate minime contentus, ad poetas ipsos, quos omnium in dicendo castigatissimos vocat, prouocare non dubitauit. Et sane quis Publ. Terentio purior et elegantior, cuius mira est amoenitas, iudicium ac venustas; cuius incredibiles lepores, ut Iosephus Scaliger ait, vix centesimus eruditorum quisque videt? Quis Plauto magis excultus, magis venustus, vnoque verbo, magis latinus, quem latinae linguae et elegantiae principem A. Gellius appellat, cuius ore musas locuturas fuisse, si latine loqui vellent, Aelius Stolo dixisse fertur? Quis denique Catullo, quis Publ. Virgilio, quis Horatio Flacco proprietate dicendi et nitore praestantior? Non immerito hos atque alios elegantissimos eiusmodi poetas, tanquam



tanquam optimos latinae linguae auctores, una cum Caesare, cum Corn. Nepote, cum M. Tullio aliisque praecipuis latinae linguae parentibus recensere non dubitarunt Hadrianus Cardinalis, Borrichius, Cellarius, Funccius, Facciolatus alique emunctae naribus censores ac viri doctissimi. Et reuera, si poetarum fontes arescerent, non tam florentem, foecundam atque uberem latinam linguam haberemus.

At enim diligens et accuratum unius Ciceronis studium ad omnem latinitatis nitorem et copiam comparandam satis esse videtur. Quid? Nonne duos ab hinc annos tute ex hoc ipso loco M. Ciceronem unum omnium maxime castitate sermonis dicendique venustate ceteris auctoribus praefarendum esse affirmabas? Illum scilicet latinitatis parentem, illum elegantiae magistrum, illum denique eloquentiae ducem et imperatorem esse praedicabas, proinde illum ipsum nos unice debere complecti, et pro viribus imitari. Cur ergo nunc poetas tantis in caelum laudibus tollere, eosque nobis tanquam latinitatis elegantioris magistros obicere? Video, Auditores, poetarum causam summum in periculum ac discrimen esse adductam. Aut enim M. Tullium poëtis, aut poetas M. Tullio de suo iure cedere necesse erit. Itane vero? Quid, si M. Tullio ipso auctore, vos ad poetarum studia incitari, urgeri ac propemodum compelli ostendam? Nemo fere est in Ciceronis libris vel mediocriter versatus, qui non intelligat, quantam Ciceroniae imitationi vim et dignitatem conferat diligens et assidua lectio poetarum. Nam unde tot sales, unde tot festiuitates, unde tot lepores Cicero ipse in sua scripta derivauit, nisi a poetis? Proinde ille saepius oratori, quem suscepit instituendum, et praeclaro suimet exemplo, et grauissimis verbis inculcat, non minus quidem poetas, quam

oratores esse legendos. Itaque in lib. 3. de oratore: omnis, inquit, loquendi elegantia, quanquam expolitur scientia literarum, tamen augetur legendis oratoribus et poetis. Nec multo post eandem incudem tundens, de subtiliore literarum ratione loquens, hanc, inquit, alit consuetudo sermonis quotidiani ac domestici, confirmant libri, et lectio veterum oratorum et poetarum. Audistis? ad elegantiam latine loquendi, ad interiorem literarum cognitionem non sola oratorum lectione, sed poetarum quoque intelligentia atque usu vobis opus est. Hac autem de re vos non Homerus, non Euripides, non Horatius monet, aut alius quispiam e genere poetarum: sed oratorum dux et antesignanus, M. Tullius, cuius auctoritas apud vos si tanta est, quanta profecto esse debet, iam plane videtis, quo loco et existimatione poetas habere debeatis.

Sed iam tempus est, ut, quantum ad eloquentiae dignitatem poësis ipsa conferat, clariore argumento percipiat. Nemo vestrum ignorat, eloquentiae splendorem et decus ab elocutione potissimum proficisci. Haec nimirum orationem veluti lux illuminat et colorat; haec res variis tropis et figuris exornat; haec denum facit, ut sermo eloquens ab omni alio dignitate et naturali pulchritudine distinguatur. Omnes autem intelligunt, elocutionem ad oratores a poetis, ut Aristoteles ait, esse perfectam. Quanquam enim non sit apud oratores et poetas eadem loquendi ratio, imo poetae alia quadam lingua, ut Cicero affirmat, loqui soleant: splendidam tamen vberissimamque et verborum et sententiarum suppellectilem oratori poeta suppeditat, unde oratio fiat di-cior, et figuris veluti luminibus illustretur. Atque hinc est, quod Cicero in libris de oratore eloquentiae candidatos tam saepe serioque monet, ut me-minerint.

minerint, se non oratorum tantum, sed et poetarum studio deditos esse debere. Et sane quis non videt, omnem granditatem orationis, omnem peregrinam et a vulgari abhorrentem conformationem verborum, omnes figuras insigniores non ab alio scriptorum genere peti, quam a poetis? Non est, quod longius, confirmandae rei causa, argumenta conquiramus. Satis est, ut vnam, vel alteram M. Tullii orationem ad memoriam vobis reuocetis, in qua non adumbrata, sed expressa poetarum vestigia conspicietis. Recordamini, si placet, grauissimam illam non minus ac festiuam pro M. Caelio, quam anno superiore explanauimus. Agebatur causa summis inuoluta difficultatibus, ac multis tricis implicata. Quaestio erat de veneno, primariae foeminae a M. Caelio comparato. Tres vrgebant Caelium accusatores acerrimi, Herennius, Rabus, et Publ. Clodius, homo furiosus, et Clodiae sororis vltor infestissimus. Haud deerant graues de iuvene M. Caelio suspensiones: aurum a Clodia commodatum, quod illi reddere tenebatur, immodici sumptus, aes alienum, ac praeterea Catilinae familiaritas, quae eius pudorem et famam attriuerat. Oppugnabat denique Caelium foemina nobilis ac furens, quae, quantum adolescentis ipsius amore antea deperierat, tantum postea odio ac furore inflammata in illum ferebatur. At Cicero, Caelii defensione suscepta, conuulsisque firmiteribus obiecti criminis fundamentis, vt hinc mulieris audaciam procaciamque comprimeret, illinc iuuenis leuitatem excusaret, et innocentiam teget, quot et quanta a poetis eloquentiae subsidia collegit? Quid enim Appius ille caecus ab inferis excitatus, quem ad Clodiam, tanquam Clodiae gentis dedecus ac probrum, lepide simul et acriter insectandam coram iudicibus loquentem

littit? Quid subtristis illa ac seueru Caeciliani senis persona inducta, vt M. Caelium obiurget, quod in nimiam Clodiae familiaritatem se dederit, quod se in eius viciniam contulerit, quod, cognitis illius illecebris, ab ea domo pedem non continuo retraxerit? Quid postremo verba illa partim a Comicis, partim a Tragicis scriptoribus accepta, quibus ad eiusmodi personas viuus eloquentiae coloribus exprimendas vtitur: *Nunc enim demum mihi animus ardet; nunc meum cor cumulat irae. O infelix, o scelestus! Egone quid dicam? Egone quid velim? Quae tu omnia tuis foedis factis facis, ut nequicquam velim*; atque alia multa ex Caecilio poeta vsurpata, quae, quantum ornamentum et leporis orationi Caecilianae conferant, paucis explicari non potest. Et quod magis est, poeticis huiusmodi figuris et salibus respersa oratio tantum apud iudices valet, vt, impudentissimae foeminae moribus ad vnguem expressis, omnem veneni suspicionem a M. Caelio amoliretur, atque illum iudicio periculoque liberaret. Neque mirum, si ea facilius persuadere solent, quae magis delectant ac mouent; quae in re nemo magis quam poeta valet. Quis enim melius tot tamque dissimiles animorum nostrorum motus effingit? Vbi profecto clarius, quam in scena, videas alios iracundia furentes, alios amore insanos, alios contabescientes auaritia, aut luxu perditos, hos laetitia exulantes, illos metu pallentes atque suspensos; adeo vt nulla sit in communi vita perturbatio, cuius exemplum ab ipsa scena peti minime possit. Cum itaque opes et copias suas eloquentia in hoc maxime ostendet, vt mentes hominum, quo velit, facile, impellat: quis non videt, quantum oratori ad causam obtinendam profuit, poetarum ipsorum virtutes persequi, eandemque concitandorum animorum

animorum rationem sibi comparare? Finitimus est, inquit Cicerone, oratori poeta, cuius virtutes omnes persequitur, cum numeris sit adstrictior, ornandique generibus socius ac paene par.

Atque hinc est, quod prisci rhetores et eloquentiae magistri Menandrum praecipue pueris laetandum et ediscendum dabant, quo facilius poeticae virtutis praestantiam et dotes eisdem instillarent, et expeditam ad eloquentiam viam sternerent. Quamobrem Dio Chrysostomus in oratione, quae de exercitatione dicendi inscribitur, inter cetera suadet in primis, ut Euripidem Tragicum et Menandrum Comicum assidue in manibus habeamus, atque eos non legamus tantum, aut recitemus ipsi, sed ut coram nobis suaviter et canora voce eorum versus pronuntiari iubeamus, cum certum sit altius a nobis penetrari solere sensus verborum, cum a legendi molestia liberi sumus. Quo facto quis non intelligit, veteres dicendi magistros et styli magnificentiam, et eloquentiae splendorem, et actionis ipsius dignitatem, ipsa poetarum recitatione nobis sedulo insinuare voluisse? Tanta nimirum est eloquentiae cum poeticae studio coniunctio, tanta oratorum cum poetis affinitas, ut sine his, illi nullo modo consistere posse videantur. A poetis enim orator habet plene ac numerose dicendi rationem, quod quidem non obtinet, nisi qui aures habeat in poeticis numeris diu tritas multumque exercitatas: a poetis sententiarum gravitatem ac splendorem verborum, quibus ita rem exornat atque illustrat, ut non tam illam audire, quam oculis intueri videamur: a poetis denique sublimioris styli maiestatem quae audientium animos extra se quodammodo rapiat, et admirationem quoque ab inuitis extorqueat; ut proinde,

qui de arctissimo cum eloquentiae poeticae vinculo dubitant, quasi de clarissima solis luce dubitare videantur. Quamobrem singulari Dei Opt. Max. providentia, renascentibus post diuturnum et luctuosum naufragium in Italia bonis literis, quid aliud operae primum sibi sumpserunt, Valla, Philadelphus, Bembus, alique plures immortalis memoriae viri, ad eloquentiam veteri splendori restituendam, nisi oblitae squalore ac rubigine musas abstergere, atque Apollini irato litare? Ex quo factum est, ut sub idem fere tempus tot repente prodierint veluti ex equo Troiano viri, non minus in poetica, quam in arte dicendi praestantissimi, ut, quis vera magis excelleret, haud facile diiudicari possit. Vix enim fuit quisquam per ea tempora alicuius nominis doctrina et eloquentia clarus, qui simul poeta egregius non esset, cuius non exirent in lucem una cum soluta oratione varii generis carmina, hymni, elegiae, poemata, quorum bona pars ad nostram usque aetatem pervenit, adeo, ut Lilius Gyraldus, inito aetatis suae poetarum calculo, duos libros impleverit. Intelligebant quippe viri sapientes, neglecto poetarum studio, nulum neque ad eloquentiam, neque ad omnem suae Gratae, siue Romanam eruditionem, aditum sibi patere, cum infinita fere sint antiquitatis mysteria, quae tum Graecorum, tum Romanorum in carminibus latent poetarum. Sed paulatim eo me dicendo abreptum video, unde nec facile, nec brevi emergere possit oratio; si nimirum dicere aggrediar, quanta sit non modo cum omni antiquitatis eruditione, sed cum ceteris quoque clarissimis disciplinis poeticae facultatis societas atque coniunctio. At nolo extra ostium limenque pedem efferre. Satis mihi erit, si humaniorum literarum et eloquentiae

tiae studiis poesi maxime necessariam comprobauero.

Vos itaque, Adolescentes optimi, iam intelligitis, quanti aestimare debeatis poeticae disciplinae studium, poetarumque lectionem. Continet illa purioris latinitatis succum et sanguinem; continet elegantiores dicendi vices; continet masculae eloquentiae robur et dignitatem. Non desunt in poetis verborum splendor et sententiarum grauitas, quibus oratio sublimior incedat; non desunt iocandi lepos, sales ac facetiae, quibus sermo quandoque conditur. Inest illis antiqui incorruptique sermonis venustas et gratia, quibus dotibus dialogi, epistolae, aliaque scribendi genera magno-

pere commendantur. Postremo ad omnem antiquitatis intelligentiam faciem vobis poetae praeferunt. Sublatis enim de medio poetis, quam pauca vobis essent explorata atque comperta de moribus, de ritibus, de religione veterum Romanorum? Quanta nos lateret rerum innumerabilium scientia; quam posteritatis memoriae poetarum carmina tradiderunt? Proinde si vobis cum in his, tum in aliis optimis studiis excellere cordi est, si prae ceteris eloquentiae dignitas vobis ardet: nolite de sinu poetas vquam abiicere, nolite poetarum studia diu noctuque intermittere: breui multos ingentesque fructus inde vos percepisse cognoscetis.

DE

# P R A E M A T V R A INGENII SVI OPINIONE O R A T I O IV.

HABITA IDIBVS NOVEMBRIS  
AN. MDCCXXXIV.

**A**NIMADVERTI saepe, PP. amplissimi, optimis disciplinis magis conducere hodierno die praefari quidpiam, quod ad earum progressum et incrementum referatur, quam ad ipsarum laudes nouo aliquo et singulari argumenti genere celebrandas orationem adornare. Quis enim hoc tempore adeo rudis et imperitus existit, qui non intelligat, quantus sit literarum splendor, quanta dignitas et amplitudo? Quis animo non comprehendit, et maximas vi-

litates ex literis in hominem deriuari, et voluptatem incredibilem ex earum studio percipi, et immortalem nominis gloriam ex illarum usu comparari? Haec profecto omnes intelligunt, sciunt omnes. Ignorant tamen non pauci homines, adolescentes praesertim, impedimenta plurima literarum studiis aduersari, quae cupientibus progressu iter retardant, ac remorantur, vel etiam omnino intercludunt. Proinde fyrtes huiusmodi et scopulos iuuentuti studium dedicatae

deditas praemonstrare valde expedit, ne illis incauta adhaerescat, ac naufragium miserrimum faciat. Neque vero hodie mihi rursus est, omnia dicendo persequi, quae literarum cupidis magno studio declinanda esse intelligo: infinita enim susciperetur oratio, quae et vilitatis benevilitatis modum excederet, et nimis patientia vestra abuti videretur. Sed vnum ex multis seligam, quod, tanquam studiorum omnium pestem et labem, velis remisque fugiendum esse puto: opinionem dico illam, quam quis habet de suo ingenio, literis et doctrina praeparaturam. Hanc sane studiosae iuventuti inimicam, haec ingenijs infestam esse maxime iudico. Proinde vos, Adolescentes optimi, quorum causa potissimum agitur, adeste animis, dum ego pro virili parte adnitar vobis ostendere, nihil esse discentibus immatura hac doctrinae opinione perniciosius, nihil idcirco vobis maiore cura studioque cavendum.

Et quidem cogitate mecum, Auditores, quanta sit cuiuscunque disciplinae amplitudo; in quem late patentem campum excurrere debeat is, qui vel in vna scientia sibi primos ordines ducere proposuerit. Multa reuera sunt, quae in tanta librorum vbertate exquirenda occurrunt; multa, quae ad criticae normam expendere, multa, quae recto iudicio acutoque examine diiudicare necesse est. Tot vero tantisque tenebris veritas innoluta delitescit, tam abdita, tam recoudita, et ab oculis nostris tam longe recedit, ut, qui illam in profundum demersam puteum sinxerunt, nil veritilimius fingere potuisse videantur. Verum quo clarius id, quod dicimus, in vna aliqua facultate, quasi coloribus, expressum videatis: ponite vobis ante oculos praestantissimam medicinae scientiam, cuius siue dignitatem, siue usum, siue necessitatem spectemus, ea cer-

te est apud omnes gentes disciplinarum omnium maxime exulta. At vero quae et quanta, Deus immortalis, bonarum artium, rerumque varietas praecognita esse debet homini, medicam artem profitenti? Si quis secum reputet, quam diuersa sit constitutio corporum, quanta hominum ex aetate, sexu, loco, coelo, educatione, consuetudine, studiis dissimilitudo, quot et quam contraria ex contrariis et pugnantibus causis morborum genera, quot febrium classes, quot denique mortis casus: facile intelliget, medendi artem opus esse difficillimum, ingenio hominum maius, et quasi diuinum. Proinde nisi ad illam quis Graecarum literarum scientia instructus accedat, nisi physica bene didicerit, nisi humani corporis fabricationem, singularum partium texturam usumque noverit, nisi sanguinis humorumque naturam, vim motumque perceperit, nisi demum morborum causas, et medicamentorum vires satis explorauerit, is maturandae potius necis, quam salutis repandae auctor existet. Quo factum est, ut homines ingenio ac doctrina praeclari tot aetates in corpore humano eiusque partibus perscrutandis desudauerint, ac de mirabili earum structura, de morbis, eorumque curatione infinita prope volumina posterorum memoriae reliquerint. Etenim negari non potest, praeter Hippocratis et Galeni labores prope immensos, praeter Auicennae aliorumque Arabum vigilias, ad artem medicam plurimum lucis ex assiduo recentiorum medicorum studio atque indulgentia accessisse. Nam et laetear venas Acellius, et originem nervorum Varolius, et Eustachius renem, et Vesalius oesophagi glandulas inuenerunt. Inuestigauit Versungius ductum pancreaticum, thoracicum vero Pequetius. Praeterea Harueio, seu potius Andreae Celsalpino, debemus sanguinis per-

riodum, Borellio motum musculorum, Malpighio pulmonis, Bellino renum structuram et vsum, atque aliis alia sexcenta. Verum quid postea? Si verum fieri volumus, haec omnia certe paucissimis morbis curandis sufficiunt; et in tanta adhuc medicae artis obscuritate versamur, ut per hos dies ille vnus medicorum praestantissimus habeatur, qui medica facultate minus vitur, quique minima, aut fere nulla aegris medicamenta praescribit.

Haec autem, quae aliquanto fufius de Medicina dixi, non modo de Philosophia vniuersa, de Iuris scientia, de Theologia, aliisque clarissimis facultatibus, pari ratione dicta esse volo: sed de iis, quoque inferioris subfelliis artibus, quae, si non dignitate, ac certe amplitudine rerum, et discendi difficultate possunt cum ceteris disciplinis optime comparari. Nam si licet quoque nobis in hoc quodammodo gloriari, quot vigilias, quot labores, quot annos demum postulat latinae linguae subtilior intelligentia ac stylus? Quam multa ac sedula historicorum, oratorum ac poetarum praefertim lectioe nobis opus est, ut omnem verborum latinorum vim, proprietatem et elegantiam comprehendamus? Quantum eniti, et toto, vt aiunt, pectore incumbere debemus, ut ad illam veram germanamque veterum latinitatem, *vnde longissime recessimus*, propius accedamus? Dicam libere, Auditores, id, quod sentio, quamquam fortasse multis hoc, quod dicam, paradoxo genus videri possit: ad intimam plenamque notitiam atque vsum latinae linguae Integra vnius hominis aetas vix satis est. Anne dubitatis? Legite, si vultis, ea, quae de latino sermone diligentius annotarunt Laurentius Valla, Hadrianus Cardinalis, Ant. Sclor, Obertus Gifanius, Franciscus Syluius, Aufonius Popma, Godeschalcus Stewechius, Fran-

ciscus Vanaffor, Caspar Sciopius, Io. Vorstius, alique viri literis et doctrinis elegantioribus clari: tum vero me, si potestis, de mendacio, aut de inani iactatione arguitote. Et tamen tam multi sunt hoc tempore, qui tantum sibi de perfecta latinitate tribuunt, vt a M. Cicerone sese haud longe abesse sibi ipsi persuadeant: quos nihilominus, nisi ego desipio, vix inter imi subfelliis discipulos grammaticus ille Priscianus admitteret. Ego equidem de me illud ingenue fateor, etsi viginti fere annos in hoc Romano Gymnasio in poetis, historicis et oratoribus interpretandis operam meam, qualiscunque illa sit, collocauerim et quotidiano prope vsu latinam linguam recoluerim: adhuc tamen affirmare non ausim, me satis latine scire; cum singulis fere annis aliquid mihi nouum de proprietate et elegantia latini sermonis, aut de germano sensu et intelligentia latinorum scriptorum occurrat, quod praefertim quidem annorum studium et industriam fugerat. Hoc autem non tantum mihi, ingenii mediocris homini, vsu venit: sed Camerario quoque, sed Lambino, sed Lipsio, sed Manutio, aliisque summis viris, contigisse videmus, qui ad locupletissimos, quos iampridem de Cicerone, de Horatio, de Cor. Tacito aliisque latinis scriptoribus ediderant commentarios, curas deinde secundas et tertias addere minime dubitauerint. Multa enim in illis euoluendis occurrunt rara, recondita, et paucitate scriptorum eius aevi obscura; multa quoque ex non vulgatis ritibus, et vetustissimo iure repetenda, quae diligentissimi cuiusque viri acumen effugiant. Quod si minora haec studia sunt eiusmodi, vt plurimis annis, ac repetitis laboribus omnia vix intelligi atque explorari possint: quid demum erit de sublimioribus disciplinis cogitandum?

Cui

Cui tanta vis ingenii, cui tam acre iudicium, ut vnico quasi haustu eas vorare, seque illis ingurgitare queat, cum praeter immensam latitudinem, tantam quoque pleraeque inter se habeant societatem, ut vna ab altera diuelli nullo modo possit? Quis enim bonus iureconsultus, qui in Graeca et Romana antiquitate sit hospes? Quis in ecclesiastica, vel in profana historia satis eruditus, qui Chronologiam et Geographiam bene cognitas et perspectas non habuerit? Quis demum in sacra Theologia satis versatus est, cui et diuinarum literarum volumina, et sacrorum Canonum leges, et Ecclesiasticae memoriae annales familiares non sint? Profecto nemo negauerit id, quod et Plato et M. Tullius vno ore affirmant: disciplinas nimirum omnes miro consensu concentuque conuenire, et quodam societatis vinculo colligari. Vnde illud etiam consequitur, ut nemo vnam perfectam et omnibus suis numeris expletam obtinere possit, qui ad alias quoque haud minore studio industriae non aspirauerit.

At, dicet aliquis, complures sunt adolescentes peracuto ingenio, multaque intelligendi vi praediti, tum etiam diuina quadam memoria instructi, qui res tam mira facilitate percipiunt, ut, quicquid legerint, vel audierint, memoriter referant. Hi paucis quidem annis, nec multo labore ad summa peruenient. Ita sit sane. At poteruntne ingeniosi isti Mineruae filii ac salaputia diserta cum praeceptis illis sapientiae parentibus Platone, Aristotele, M. Tullio aliisque huius notae praestantissimis viris, solertia mentis et ingenii praestantia conferri? Fac ita esse. Videte quantum ipsis tribuo, ac plus nimio liberaliter concedo. Sint itaque cum antiquis illis memoria, ingenio, tum etiam iudicio pares. Verum minorene, quam illi studio, minore industria, minore labore doctrinam sese consequi pos-

se confidunt? O arrogantiam singularem! Quod illi sibi pertinaci tot annorum cura ac diligentia compararunt, tu adolescens mollis et delicatus, tu ludis et voluptatibus, vel etiam, si superis placet, ventri somnoque deditus, vno vel altero biennio obtinebis? Alio sane calculo maiores nostri doctrinarum studia, cum propter earum praestantiam, tum propter acquirendi difficultatem aestimarunt. Septemdecim quidem annos Platoni magistro Aristoteles operam dedit. Vnum et octoginta, quotquot vixit, annos Plato ipse in studiis elaborauit. Hippocrates vero hominum vitam breuiorem esse pronuntiavit, quam ut omnibus iis, quae ad artem medendi pertinent, comparandis sufficeret. Nihil dico de M. Varrone, nihil de M. Tullio, nihil de vtroque Plinio, nihil de Plutarcho aliisque innumeris, quos ad extremum vsque vitae spiritum in literis vixisse memoriae proditum est. Et iunenes nostri tantum sibi ipsi tribunt, ut perexiguo studio paruoque tempore in aliqua facultate excellere, et in ea familiam ducere sibi stultissime persuadeant? In magno sane errore versantur. Ego quidem sic existimo, homines istiusmodi opinione sui plenos nunquam veram solidamque doctrinam esse assecuturos. Cum enim opinio illa, quam de ingenio suo habent, ingentem sui fiduciam pariat, fiducia vero ista negligentiam studiorum, negligentia autem studiorum infortitiam et ignorantiam: quid tandem bonae frugis erit ex illis expectandum? Actum est profecto de studiis hominum istorum. Actum est de egregia eorum indole ac fama. Perniciosa quidem atque exitialis ingenii sui opinio omnes industriae nervus infringit, et praeciaros ad laudem cursus intercipit. Proinde Bias ille vnus ex Graeciae sapientibus ventosam istam sui opinionem vocabat maximum

num literarii profectus impedimentum. Cui recte illud Senecae consonat: multi, inquit, ad doctrinam venissent, nisi ad eam se peruenisse putassent.

Quod si homines isti iudicant, omnem hodie doctrinae laudem librorum titulis et indicibus contineri; si virum apprime doctum putant eum, qui in eruditorum Lipsiensibus actis perlegendis curiosus, in amicorum coetu permulta recitat auctorum nomina, quae quotidie ex diariis exterarum gentium ad nos deferuntur; quis non videt, quam in hoc turpiter hallucinentur? Librorum titulos et indices texere, non viri docti, sed eruditi bibliopolae laus est. Profecto est aliquid altius supra scriptorum indices, quo contendere debeat is, qui inter doctos iure et merito sit recensendus. Nam aut ego fallor, aut is vere doctus dici potest, qui et perfecte loqui, et, si quando opus sit, graviter et ornatè sententiam suam dicere possit; qui veri et falsi cognitionem habeat; qui mente coelum, maria, terras permeare, qui naturae vim et rerum causas cognoscere; qui abs se propulsare vitia, ac mores emendare; qui priuatam domum regere, et rempublicam administrare optime nouerit. Hunc ego literis bene instructum, hunc bonis artibus eruditum, vnoque verbo, hunc hominem doctum esse iudico. Quis autem non intelligit, eiusmodi doctrinae laudem non ex librorum indicibus, neque ex Gallicis Batauisque diariis esse petendam, sed improbo labore diuturnoque studio, quemadmodum maiores nostri fecerunt, comparandam? Sunt illa quidem, si vultis, relaxandis animis delectamenta studiorum, vel ad aestuorum dierum tædia minuenda, vel etiam ad somnum conciliandum soporifera, ut poeta inquit, papauera: non autem firma doctrinae praesidia, neque nerui

artusque sapientiae; qui philosophum, aut theologum, aut iuris scientem hominem faciant. Et quidem aliud fuit consilium, alia meus Romanorum Pontificum, hominum sapientissimorum, in hoc Romano Gymnasio aedificando, et in tot bonarum artium magistris in eo liberaliter constituendis. Voluerunt scilicet in his amplissimis sapientiae sedibus gradatim solideque iuuentutem erudiri, ut eloquentiae et Philosophiae studiis satis instructa, vel ad medicinam, vel ad iuris scientiam, vel ad sacras literas iter sibi praemuniret: quas deinde grauissimas disciplinas sapienter docta, ciuium saluti consulere, fori dignitatem sustineret, aut Ecclesiae magistratus cum laude suscipere. Et nos patiemur, memoria nostra iuuenes literis leuiter tinctos, non medicos, sed humani generis carnifices, non iuris peritos, sed fori rabulas, non Ecclesiae lumina, se ignorantiae maculas in publicum exire, et iuanem Vrbi, omnium sapientissimae, doctrinae speciem obtrudere? O impudentiam minime ferendam! O vanissimam ingenii iactantiam! Videre iam mihi videor audaciae eiusmodi exitum perdidicimus. Componant se perquam eleganter, seque transforment, quantum volunt: illud agent nimirum, quod Aesopus fecisse Cumanum asinum narrat, qui, cum leoninam pellem induisset, quod se leonem videri cupiebat, rudere tamè aspere incepit, vnde et adstantium risus, et domini baculum haud potuit effugere. Non aliter huiusmodi iuuenes, qui propter immaturam scientiae opinionem hoc sibi arrogant, ut pares doctis incedant, dum literati viri personam gerere volunt, se publico risu ac ludibrio hominum exponunt, cum non veram solidamque doctrinam, sed laruas et simulacra sibi inesse, asinina voce satis ostendant. Sunt enim Theritis illius



illius Homerici similes, qui cum mortalium omnium stultissimus quidem esset, multa tamen eloqui propter vanam sapientiae opinionem solitus erat, unde magis eius stulticia stolidumque ingenium apparet. Pudeat itaque, pudeat barbatulos istos adeo se proferre, et ignorantiam suam tam insigniter prodere. Pudeat inter philosophos, inter iurisperitos, inter medicos intempestive enumerari velle, cum earum artium primordia vix summis labris gustauerint. Pudeat denique cum sapientissimis viris de doctrina et ingenio decertare, quorum diligentiam

singularem, et omnem prope aetatem in studiis exactam non aemulantur. Multis annis multisque vigiliis nobis opus est, vel ad vnam optimarum artium ex omni parte assequendam, et propter immensam earum amplitudinem, et propter summam earum necessitudinem mutuaque coniunctionem. Ex quibus omnibus id colligo: qui paucis annis, paucisque laboribus sese ad doctrinae laudem peruenisse putant: hi, aut quae sit doctrinae ratio, prorsus ignorant, aut nos amentes et nullius iudicii homines esse iudicant.

IN

S C I O L O S I.

O R A T I O V.

HABITA XV. KAL. NOVEMBRIS

AN. M D C C X X X V.

**N**VLLVM bellum fuit vquam tam atrox, tam diuturnum, aut periculosum, in quo duo hostes maiore vi, aut acriore contentione decertauerint, quam illud, ubi cum optimis disciplinis ignorantia pugnavit. Etenim vix literae exortae sunt, cum statim invidia, liuor, maledicentia, improbitas, aliaeque nefariae pestes, foedere cum ignorantia firmato, in illas castra mouere, aciem dirigere, cum illis in certamen praeliumque descendere non dubitarunt. Neque ex eo tempore foederis vllius feriundi, nec pacis constituendae spes vlla affulsit. Nam qua ratione fieri possit, ut consilium

cum temeritate, fortitudo cum furore, virtus cum audacia conueniat, pacatoque animo concilietur? Profecto quamdiu erunt literae, tamdiu erit literis indictum paratumque ab ignorantia bellum. Ex quo tamen tantum abest, ut quicquam mali sit ipsis literis metnendum, ut potius gloriae cumulus illis quotidie maior accedat. Quot enim cum ignorantia dimicationes, tot victorias; quot praelia, tot triumphos optimae disciplinae consequuntur. At vero aliud belli genus bonarum artium studiis pertimescendum esse video: quod quidem etsi primo aspectu minus periculosum esse videtur, reuera tamen grauissimum est, maximeque

maximeque perniciosum: illud scilicet, quod scioli quidam, homines doctrina leniter aspersi, literis inferunt, dum literas in deliciis sese habere profitentur. Ex istorum enim imperitia fit, ut de dignitate literarum plurimum detrahatur, et ab eorum amentia magis, quam ab ignorantia telis liberales disciplinae metuere debeant. Haec autem calamitas cum maior in dies fiat, literarum reipublicae maxime interesse video, ut hominum istiusmodi temeritas reprimatur, quo minus in posterum literas ipsas oppugnent. Quare veniam dabit, PP. amplissimi, si praetermissis hodierno die bonarum artium laudibus, quae quotannis ex hoc ipso loco decantari consueverunt, illud agam potius, ut huiusmodi homines fidoctos coram vobis sistam, acriter de eorum inscitia et singulari amentia coarguendos. Intelligetis profecto id, quod res est, ex sciorum istorum vitio plus detrimenti literas capere, quam ex summa imperitissimorum hominum ignavia. Atque una mecum statuetis, sedulo Romanam iuventutem esse admonendam, ut ab eiusmodi perniciie sibi caueat, hominum istorum mores et disciplinam fugiat, eorumque scientiam inanem et umbratilem, ignorantia ipsa longe deteriorem, quantum potest, auersetur. Quo consilio nihil optimis studiis conducibilius, nihil sapientissimis viris, qui me audiunt, iucundius accidere posse confido.

At in ipso dicendi limine quid ignorantiae tela ad optimas artes euertendas valuerint, animaduertere operae pretium est. Non priuatos, non exiguae auctoritatis homines in medium afferam: sed viros principes, summa imperii potestate, auctoritate maxima, furore atque armis metuendos, qui honestissimas disciplinas radicibus extirpare, earumque memoriam sempiterna obliuione de-

lere summa vi contenderunt. Ecce vobis C. Caesar Caligula, homo vecors et stolidus, qui diuina Homeri et Virgilii carmina comburere, aurea T. A. Liuii scripta funditus perdere, eorumque imagines ex bibliothecis omnibus, ubi asseruabantur, euellere conatus est. En Domitianus Caesar, celeberrimus ille muscarum anceps, qui sapientiae odio, philosophos omnes ex Vrbe eiecit, totaque iussit Italia exulare. En Licinius imperator, literarum sic rudis et imperitus, ut ne decretis quidem manu sua subscribere posset; literis omnibus adeo infestus, ut eas reipublicae pestem et venenum appellaret. Quid tandem isti literarum osiores atque hostes insensibilissimi profecerunt? An de veteri illarum estimatione et gloria putatis quicquam eos unquam detrudere potuisse? Profecto illud vnum sunt assequuti, ut acerbissimum sibi mortalium odium conflaguerint, ac sese omnium aetatum exprobratione, omnium annalium vituperatione dignissimos effecerint. At enim negari non potest, aduersante fortuna, eruditos plurimos inimicorum telis misere occubuisse, diisque fati acerbitate fuisse sublato. Quot enim exilio et inopia oppressi? Quot ferro miserrime trucidati? Quot denique ad illud calamitatis extremum adacti, ut ultro sibi mortem consciscerent? Extant quidem, extant Pierii Valeriani, Corneli Tollii et Iosephi Barberii de literarum infelicitate volumina, quae sexcenta testantur clarissimorum virorum funera, laetnosa quidem et acerbissima. Quid tum? Anne ex tot tantisque literarum aerninis imminuta est aliqua ex parte dignitas literarum? An exilium, carcer, secures, aut aliud crudelitatis genus extinguere potuit diuina eorum ingenii lumina, atque aeterna doctrinae monumenta? Vinit, semperque viuere immortalis ipsorum gloria, singularis sapientia et incredibilis virtus. Quare

Quare iam intelligitis, Auditores, quam parum sit optimis disciplinis ab ignorantia, ab invidia, ceterisque aduersae fortunae calamitatibus metuendum.

Contra vero quanta labe, quanta pestis literis ex sciolis et semidoctis hominibus enascatur, quis dicendo paucis explicare possit? Ego quidem illud persuasissimum habeo, quicquid invidiae, quicquid turpitudinis, aut maculae in literis ab earum hostibus confingitur, aut etiam in illis (dicam enim libere, quod sentio) iure reprehenditur, id totum ab sciolis istis proficisci. Sed placet ante definire, quid sint homines istiusmodi. Sunt profecto scioli genus hominum impudentissimorum, qui contracta fronte et ore duro se scire praedicant, quae reuera ignorant; aut in his, quae sciunt, paucis longe omnium scientissimi videri volunt: qui scilicet in bonis artibus et doctrinis se triarios, duces et imperatores venditant, cum nihilominus vix inter gregarios milites numerari queant: homines quidem audaces, garuli et gloriosi, qui scientiae, qua carent, ostentatione conantur inanem doctrinae famam aucupari; et, quod deterrimum est, viros sapientia et doctrina claros aut contemnunt, aut maledictis et obtestationibus infestantur. Fingamus ergo, ex istis aliquem in gravissimorum hominum coetum, vel academiam sese intulisse. Quanta, Deus immortalis, ingenii ostentandi cupiditas? Quantum omnigenae eruditionis affectandae studium? Quanta demum ceteris contradicendi arrogantia? Nullus est in Graecis, vel in Latinis scriptoribus, de quo iste iudicium ferre, ac veluti praetor de tribunali pronunciare non audeat. Ex quibus illum nullo fuisse ingenio, alium nulla eruditione, hunc Criticae artis expertem esse audacissime affirmat. Quid enim Aristoteles? Stulta eius methodus, in-

fulsa illius doctrina, homo denique rerum omnium imperitus praedicatur, quo recentes philosophi plura inter dormiendum intellexerunt. Quid Horatius, aut Virgilius? Nihil in his sublime, nihil excelsum, sed humi reptant puerorum similes, qui primo in scholis versus facere discunt. Putatisne, Auditores, me quoquam fingere, aut rem verbis exaggerare? Nequaquam. Exemplo vobis sit Ioannes ille Ciampolus, aetatis suae sciolorum facile princeps, qui, ut in Pinacotheca virorum illustrium Ianus Niclus Erythraeus memoriae prodidit, cum die quodam per urbem rheda veheretur cum Gaudenzio Paganino, viro docto et graui, qui tum in hoc ipso Romano Gymnasio literas Graecas docebat, vna cum aliis eruditis hominibus; cumque forte, ut fieri solet, sermo de Virgilio et Horatio incidisset, Ciampolus ita acriter coepit in praestantissimos illos auctores inuehi, ut eos nullo ingenio homines, nulla doctrina, nullis literis fuisse diceret; imo quod ad carminis attinet inuentionem, esse puerorum similes, qui primo in scholis versus componere incipiant. Quod Paganinus cum ferre non posset, tomachatus scioli audaciam inmanem atque intolerandam, de rheda statim desiluit, auresque suas diris illis, ut ipse aiebat, maledictis eripuit. Nec minore sane impudentia fuit sciolus alter, Belmontes Cagnolus, homo ventosissimus, qui cum Etrusco carmine cecinisset Aquileiae urbis excidium, clarissimis illis duobus Etruscae poesis luminibus, Francisco Petrarca et Torquato Tasso se longe superiorem praedicabat, nomenque suum inde per totum terrarum orbem sic celebratum esse sibi persuaserat, ut si literatus quispiam aduenienti sibi continuo non assurrexisset, iracundia elatus exclamare sole-  
ret: itane? Abbas Cagnolus,

eterfae Aquilefae et tantorum carminum auctor, tuam potuit noticiam effugere? Non est verifimile. Arrogantiam, aut ſtultitiam potius ſingularem ſciolorum eiſmodi ſi non ſuperauit, at certe aequauit Baſius, Iuris conſultus, qui, vt Saldenus auctor eſt, tantum ſibi tribuebat, vt Alciatos, Cuiacios, Hotomanos, aliosque huiusmodi prae ſe omnes contemneret, atque iactaret, a ſe vno eſſe animaduerſum, quod multis iam ſaeculis vniuerſos latuerat. Studioſus lector (en glorioſi militis oratio) hanc noſtram doctrinam diligenter animo inſigat, quia etſi trecentos in doctorum ſcriptis euoluendis palleret annos, nihil ſimile, ac tam ſolidum in hac materia eſt deprehenſurus. Audiſtis ſapientiam hominis diuinam et incredibilem? Cum Minerua ipſa, puto, de iuſtitia et iure ſermonem habuit; vnde omnem ceterorum anteaetate aetatis ſolentiam tam longo potuit interuallo ſuperare. Accipite nunc medicinae Deum, ſiue Aeſculapium alterum de caelo delapſum, Theophrastum ſcilicet Paracellum, qui ſe doctrina medicos omnes maximis ſpatiis anteire putabat, imo ſapientem medicum, praeter ſe vnum, in terris exiſtere neminem: proinde palam affirmare non dubitauit, ſtultiſſimum capitis ſui pilum plus ſcire, quam omnes Galeni ſectatores; imo barbam ſuam plus experientiorum habere, quam omnes quotquot eſſent academiae. O intolerandam hominis arrogantiam! O ſtultitiam incredibilem! Adeone circulatores iſti putant omnes homines uſquequaque deſipere, vt nugae ſuas illis ſe tanti vendere poſſe arbitrentur?

Age vero iam aliquem ingenuum ſui foris in lucem proferant. Miſſos faciam librorum titulos, iactantiae plenos et glorioſos, plerumque e Graecis fontibus exquisitos, qui magna et ampla pollicentur, quos o-

lim A. Gellius in quibusdam aetatis ſuae ſciolis riſit. Nihil loquar de praeclaris virorum illuſtrium testimoniis vndique conquiſitis, quae operi praefiguntur, quo maior illi dignitas et auctoritas concilietur; perinde ac ſi eiſmodi elogiis fidem vllam viri ſapientes et docti habeant. Verum ex tam magifico anguſtoque vestibulo quid tandem intus latere conſicietis? Scilicet ſtulti ad cribrum. Simia profeſſo, ſimia eſt, etiamſi phaleras, atque aurea inſignia gerat, quemadmodum veteri proverbio dicitur. Etenim quid literis excultum, quid doctrina perfectum ab iis expectes, quorum immatura ſtudia foetus non niſi informes atque monſtroſos parere poſſint? Recordamini, quaeſo, Auditores, delubra illa apud Aegyptios celeberrima, de quibus in dialogis Lucianus meminit. Erant illa quidem e maiore Paro ſtrata cum ampliſſima porticu, plurimis columnarum ordinibus diſtincta, aureo laqueari ornata, omnia denique auro gemmisque affabre contexta collucebant, et cum maiestatem, tum religionem habebant. Quid vero tandem in interiore eius templi adyto reconditum fuiſſe cenſetis? An Iouis, an Mercurii, an veneris, aut numinis cuiuſpiam alius ſignum? Minime vero. Sed erat canis, aut ſimiae caluaria, aut muris alicuius ex offibus compago. Nolo iſtos ſciolorum libros granditate titulorum, atque elogiolorum apparatu ſplendidos cum inaniffimis eiſmodi templis comparare. Vos ipſi, an recte conueniant, indicatote. Ceterum nemo veſtrum ignorat, quam lepide, et ad rem noſtram poſſite Horatius in ſermone ad Piſones illos irrideat. Parturiunt, inquit, montes, naſcetur ridiculus muſ. Et quidem ſolertiſſimas nugae, vt Seneca loquitur, quae vix ſomnianti in meutem venerint, commiſcuntur, vt aliquid nouum, et antea non auditum inueniſſe videantur.

videantur. Superuacaneum pu-  
to rem sole ipso clariorem ar-  
gumentis longe petitis illustra-  
re. Volumina sane plurima,  
quorum copia in dies obruimur,  
hanc ipsam rem satis aperte te-  
stari possunt. Quot enim in il-  
lis insulsa, quot negligentiae et  
erroris plena, quot etiam omni-  
no ridicula, quae viris doctis  
stomachum movent, continen-  
tur? At vero vnum ex hoc ge-  
nere tacere nullo modo possum.  
Gaspar Knittelius, literator in  
Germania festiuissimus, librum  
edidit, cui titulus, regia via  
ad omnes artes et scientias, in  
quo ex primo Aeneidos Virgi-  
lianae versu, ille ego qui quon-  
dam gracili modulatus auena,  
qui, ut videtis, septem dictio-  
nibus, seu vocibus constat, se-  
ptem sibi argumenta suppedita-  
ri affirmat ad virtutem humili-  
tatis celebrandam. Miramini di-  
uinum hominis ingenium? Quid,  
si Thraso iste literarius in eo-  
dem libro gloriatur, nullum  
sibi argumentum posse proponi,  
de quo ipse aptam dicendi ma-  
teriam capere non possit ex quo-  
cunque verbo, ex quacunque  
voce, aut etiam e qualibet re  
sibi casu oblata? En quo per-  
uenit sciorum audacia? Lite-  
ris tanquam praestigiis abutun-  
tur ad incantos adolescentes de-  
cipiendos, quibus nugae et ger-  
ras huiusmodi venditant. Et  
quisquam dubitabit, quin ex  
circumforanea librorum istorum  
vanitate infamia literis confle-  
tur, et nugatorum eius gene-  
ris vitio optimae disciplinae cor-  
rumpi atque contemui soleant?

Sed utinam praeter libros  
stultitiae plenos, saxis quoque  
ipsis et lapidibus ne haereret lite-  
rarum macula. Pudet me, pu-  
det nostrorum temporum, quo-  
ties ambulanti mihi per Urbem  
inscriptiones aliquae marmori-  
bus nostris ciuitatis insculptae  
in oculos incurrunt: quae si  
cum iis comparentur, quas  
olim Panuinius, Marlianus,  
Gruterus, Fabrettus, alijque  
plurimi Romarum antiquita-

tum studiosi viri, ex ruderibus  
antiquae Urbis in volumen con-  
gesserunt, leuitatem plane sa-  
piunt puerilem atque infantiam.  
Ea quippe est sciorum natura  
atque consuetudo, ut ad eas  
res conficiendas se ipsi inferant  
atque intrudent, suamque ope-  
ram vltro venditent, in qui-  
bus ipsi minus valent, magis-  
que caecutiunt. Quorum impu-  
dentia fit, ut posthabita doctis-  
simi cuiusque opera, homines  
lapicidina digni ea lapidibus in-  
scribant, quae nemo antiqua-  
rius intelligat. Ex quo illud  
sequitur, ut in summa, quae  
nostrae aetatis est, literarum  
dignitate et elegantia, in vrbe  
Roma barbaries Gothica adhuc  
dominari videatur.

Quod si de scientia aliqua,  
si de naturali Philosophia, de  
Medicina, de Geometria, aut  
de Iurisprudentia ad scribendum  
aggrediantur: quot, Deus im-  
mortalis, absurda, quot desidia,  
quot canoras nugae, ut ait Ho-  
ratus, confingunt, ut doctrinae  
nouitate, et singulari intelligen-  
di acumine veteres sapientiae  
magistros satis longo intervallo  
superasse videantur? Pernulga-  
tae quidem sunt nimis quaestio-  
nes illae de quarta parte nihili,  
et de plusquam nihilo, in qui-  
bus Demonius et Bouuellius  
tantopere defudarunt, et ampla  
volumina conscripserunt. Ex-  
tant libri de quadratura circuli,  
quam quidam aetate quo-  
que nostra somniarunt. Extant  
de philosophorum confando la-  
pide innumera paene volumina,  
quae nobis Croesi diuitias et  
montes aureos pollicentur,  
quanquam tot saeculorum expo-  
rimento constat, artem illam  
esse sciorum inuentum, me-  
ras fabulas, et inanem mendis  
delirationem. Extant denique  
commenta diuinationum, qui-  
bus circulatorum isti ex ascitis  
siderum et planetarum influxi-  
bus, euentus rerum futurarum  
se praefagire posse affirmant, et  
Arithmetice quibusdam figuris  
arte constructis, in errorem  
pertrahunt

pertrahunt homines imperitos et credulos. Quid plura? Typis excusa fuit iampridem Strozzi Cicconiae, Vicentini philosophi et theologi, disceptatio de similitudine et sympathia, quam habent caeli Potestates cum Sole, Principatus cum Venere, Archangeli cum Mercurio, Angeli cum Luna. Potestne stultius dici, aut excogitari quicquam? Quid, per vestram fidem, beatissimi illi spiritus, quales Archangeli sunt, cum Mercurio sydere, quid Angeli cum Lunari corpore commune habent? Possem profecto per singulas ire disciplinas, quibus isti ineptiarum venditores abutuntur, et iamdudum stultitiam suam mirum in modum celebrant. At praestitit id amplissime paucis ante annis in Germania Io. Burchardus Menkenius, homo eruditorum nemini ignotus, qui duabus declamationibus in Lipsiensi academia habitis, infinitam fere semidoctorum istorum multitudinem veluti in scenam quamdam produxit, eorumque de singulis deliramenta disciplinis, digna sane, quae in scena spectentur, luculenter exhibuit. Utinam aliquando aulaeo sublato, noui ne prodirent in scenam literarum circulatores, eodem theatro dignissimi! Utinam hanc tantam maculam, et sempiternae turpitudinis notam in Germania tantum, idque semel, praestantissimae artes suscepissent! Sed quantum iam Italiae decus, quanta clarissimae huic Vrbi ex sciolorum frequentia lades infertur, quorum vicio praestantissimae disciplinae veluti in theatrum et per ora vulgi turpissime traducuntur? Nolo rem innidiae plenam ulterius persequi: nolo quemquam nominare. Quare nemo mihi, ut de se olim M. Tullius affirmabat, irasci poterit, nisi qui ante de se voluerit confiteri.

Iam igitur plane perspicitis, Auditores, ab sciolis istis et semidoctis plus detrimenti literis importari, quam ab iis, qui in summa literarum ignorance versantur. Plus certe periculi metuendum ex hominibus semiebriis, quam si vino somnoque sepulti omnino sensibus destituti iaceant. Detrahat imperitus quispiam literis, quantum volet, easque conuiciis et maledictis petulanter proscindat: quotus quisque erit, qui stolidi hominis clamores non aspernetur, contemnat, negligat? Quis enim caecum audiat de coloribus iudicantem? Enimvero fucata illa semidoctorum literatura, audax et prompta garriendi licentia, honestis etiam viris bene multis imponit, atque id saepe efficit, ut optimae artes inuidiae maleuolorum, et obtreccionibus pessime subiiciantur. Maxime vero, si literarum praemia, si dignitates atque honores ab insulis eiusmodi nebulonibus, quod aliquando accidit, occupari videantur. Quae cum ita sint, cauete, Adollescentes optimi, (vos enim potissimum spectat haec omnis oratio mea) cauete, inquam, nefarios istos sapientiae proditores, cauete improbos literariae reipublicae hostes, doctrinae euersores, portenta bonarum artium, bulta omnium disciplinarum. Si vobis sapientia cordi est, si literas vere amatis, si literarum gloria studioque ducimini, perniciosam istam sciolorum sectam, quantum valeatis, pro viribus fugite, eorumque miserrimam et inanissimam literaturam contemnite: habetis in hoc Romano Gymnasio vltros sapientissimos, omni disciplinarum genere excultos: hos magistros, hos sapientiae parentes sequimur. His ducibus expeditum vobis patebit iter ad veram solidamque doctrinam.



IN  
S C I O L O S II.  
O R A T I O VI.

HABITA VII IDVS NOVEMBRIS  
AN. MDCCXXXVI

QVE.

\*\*\*\*\*

**Q**VERVNTVR multi, et nos quoque ex hoc amplissimo loco anno superiore conquesti sumus, vehementerque doluimus, cum in Italia, tum in hac ciuitate, ingenti literarum probro, sciorum sectam in diem magis magisque propagari. Exposuimus enim vobis, quam planissime potuimus, plus detrimenti per huiusmodi sciolos, quam per summam imperitorum hominum ignorantiam, bonis literis importari; neque vllam esse labem grauiorem, aut potius rei literariae, magis metuendam, quam fucaram illam et inanem semidoctorum literaturam, vnde optimaes artes inuidiam subeunt incredibilem, et ad ignominiam purpiter traducuntur. Quae omnia vos ore, vultu et admurmuratione ita comprobastis, vt nemo non intelligeret, sciolos eiusmodi nulla ratione comperendinari debere, sed statim a literaria republica procul esse amandandos. At vero cum temporis, quod dicendo praefinitum fuerat, angustiae non permiserint, vt ea in medium asferrem, quae ad infestum illud bonis artibus genus hominum prorsus exterminandum maxime faciunt: sapientes quidam viri auctores mihi fuerunt, vt hodieuo die alteram orationis partem, vel aliam potius ex integro de sciolis orationem contexerem, quo nimirum omnes intelligant, ex quonam fonte pestis illa manaverit, et quibus tandem vberibus nutriatur. Etenim ego sic existinio, nostro potissimum vitio in scholis sciolos eiusmodi pullulare, nostris manibus, nostroque sinu eosdem foueri. Quocirca si quid acrius, aut quid liberius dixerō de praua studiorum ratione, quae cum sciolis istis maxime coniuncta est, peto a vobis, PP. amplissimi, vt tantum orationi meae hodie

concedatis, quantum et veritatis amor, et literarum dignitas postulare videbuntur.

Duo sunt hominum genera, quorum vitio praesertim, quantum ego intelligo, peniciosa ista sciorum natio alitur, et magis in dies corroboratur. Vnum eorum, qui teneris adolescentium animis inmodica laude plausuque blandiuntur: alterum eorum, qui ceteras, praeter eam, quam ipsi profitentur, disciplinas nihili faciunt, ac veteres doctrinae magistros tanquam mediocria, aut nullius ingenii homines parui pendunt ac vituperant. Quocirca quantum illi inepte et imprudenter, tantum hi malitiose et improbe agere videntur, cum illi aetati magnam laudem sapientiae non sustinenti plus aequo tribuant; isti maiorem gloriae detrahant, et, quae ipsi ceterarum artium ornamenta non sunt assecuti, aliis inuidere non erubescant. At vero, vt de his primum loquar, qui plus laudis, quam par est, adolescentibus tribuunt; si id faciunt, vt plausu illo iuvenes excitati, tanquam generosi equi, studiorum cursum alacrius prosequantur: excusandi sunt quidem, imo et eorum industria valde commendanda: praesertim si cum imbecillis et exsuccis ingeniiis agere debeant, ad quorum tarditatem incitanda maxime valet praeceptoris humanitas et industria. Quod si acri mente et peracuta intelligendi vi praediti illi sint, adeo, vt nullo negotio omnia penetrent, minimoque ad discendum labore vtantur: errant profecto, errant, qui eosdem nimium laudando palpant, eorumque omnia sine vllō discrimine et inepte probant. Non opus est laudibus, sed nouis ad laborem calcaribus, et aliquando seueritate vultus et vocis grauitate sunt castigandi, ne molliore industria otioque deprauati torpescant.



torpescant. Saepe enim fit, ut iuvenes partim naturali leuitate ducti, partim praeceptorum plausu inflati, se plurimum scire putent, et, doctrinae mediocritate contenti, ultra progredi minime curent. Quamobrem Carneades, vlr sapientissimus, affirmare solebat, diuitum regumque liberos nihil magis, aut tam cito, quam equitandi artem addiscere, propterea quod literarum magistri illis adulari, et, quicquid fecerint, in caelum laudibus extollere soleant. Contra vero equus, qui nihil diuitem a paupere, nihil principem virum a priuato discernit, quemcunque ex illis aut oscitantem, aut equitandi imperitum sentiat, respectu nullo praecipitem agit, redditque in posterum sollertiozem. Et plane, si vera fateri volumus, ita natura comparati sumus, ut vnusquisque fere philautia, ut Graeci loquuntur, laborare videatur. Ex quo fit, ut plerique sibi multo maiora de suo ingenio tribuant, et gloriolae suauitate titillentur. Imo plures inuenias cum aetate, tum sapientia viros grauissimos, quos neque auri argentique cupiditas, neque aliqua dulcedo voluptatis, neque doloris vis, aut mortis ipsius terror de statu deicere, aut commouere possit, quam quos laudis amor et vana ingenii sui fiducia non seducat atque peruertat; adeo, ut quantum roboris et virtutis, ceteris animi motibus resistendo, sibi inesse palam fecerunt, tantum imbecillitatis paruique animi, inanis gloriae praestigiis cedendo, demonstrauerint. Atque hinc saepe inter literatos magni nominis de syllaba, aut de dictione vna ortae sunt contentiones acerbissimae ac tragoediae, quod alter ingenio cedere rem turpissimam iudicaret. Quae cum ita sint, cui mirum videatur, quod laudis plaususque amor adolentes improvidos decipiat, quibus tum

aetatis, tum consilii inest maxima imbecillitas, quique in ceteris quoque rebus facile halucinantur? Profecto laudum suarum dulcedine veluti hamo decepti, se ingenio valere plurimum putant, sibi que deesse parum ad doctrinae verticem assequendum: cum praesertim neque in literaria historia versati sint, neque animo completantur, quam longe lateque disciplinarum amplitudo pateat, quae singulae integram postulant et bene longam hominis aetatem. Proinde illi quasi portum iam teneant, pristinum laborem remittunt, ac de re nulla minus, quam de studiis se sollicitos esse ostendunt. Ea praeclaram gloriae messem, quam inanes acclamationes et plausus afferunt iuuentuti. Auctor est Plinius, in Africa familias hominum extitisse, qui voce et dictis fascinum circumferebant; qui nimirum, si forte pulchras arbores, si segetes laetiores, aut egregios equos, vel etiam infantes pulcherrimos impensus laudassent, ea statim exitiali fascinatione correpta misere interibant. Et vero hanc ipsam fascini vim laudibus quoque inesse Romani olim suspicabantur. Quod nemo sane ignorauerit, nisi qui nec Virgilium, nec Catullum, nec Ovidium, aliosque poetas vnquam viderit. Hinc enim mos ille inueterauit, ut quidpiam laudaturi, vocem *praesciscine*, vel *praesciscini* adderent: qua solenni formula se quidem non fascinandi, sed laudandi animo ea loqui testarentur. Verum de huiusmodi veterum superstitione iudicet, per me licet, vnusquisque quod volet. Ego vero illud consuetudine vsuque rerum comperit habeo, nobiliora adolescentium ingenia ab immodicis praeceptorum suorum laudibus incredibilem calamitatem tabemque contrahere, neque vllum deinde inueniri ad eam pestem amoliendam in omni eorum vita amulecum. Etenim quid tandem

dem est in omni disciplinarum genere subtilius, aut sublimius, quod illi vana sui opinione pleni, aut non statim, aut paucissimis horis sese addiscere posse arbitrentur? Ego quidem Romae ex sciolis istis vnum, multis praesentibus aetate ac doctrina grauissimis viris, gloriantem audiui: nihil esse magis planum ac pedestre, quam Geometriae studium; se paucis diebus, si vellet, magnum Geometram euasurum. Plaudebant adolescentis incauti dicto nonnulli, quibus Geometriae ne prima quidem elementa cognita; viri autem docti, qui aderant, puerilem eius stulticiam vultus grauitate ac silentio castigauerunt. Ex quibus nemo fuit, qui iuuenis impudentiam nimiae eius praeceptoris assentationi plaussibusque non tribueret. Quamobrem mirandum non est, quod veteres peritissimi instituendae iuuentutis magistri nihil diligentius curarent, quam ut insitam illi aetati garrulitatem comprimerent. Nemo vestrum ignorat, Pythagoram inter suos recepisse neminem, nisi diuturni silentii tirocinio probatum. Existimabat enim vir sapientissimus, nihil esse prius, quod discipuli docendi forent, quam tacere. Hoc autem non vno, vel altero mense fieri, sed plerumque ad quinque annos illud prorogari consueuisse A. Gellius affirmat. Ea vero seueritatis lege, ut, qui tacerent, audirent quidem interim, quae ab aliis dicebantur, sed nec illis fas esset percunctari, si quid minus intellexissent, neque scribendo excipere, aut differere quae audierant. Vbi vero iam duas res omnium difficillimas didicissent, audire ac tacere tum demum illis verba facere, quaeque audissent, conscribere, aut, quae ipsi opinarentur, in medium afferre licebat. In hac ipsa quoque taciturnitate Lycurgus iuuentutem erudiri mandauit: proinde inter saluberrimas, quibus Lacedaemoniorum rem-

publicam communiuit, leges, haud postrema fuit, ut ciues statim a pueris silentio coercerentur. Posteaquam vero adolescentes silentio satis instructi forent, tunc Arithmetica, Geometria, Musica edocebantur, ut, nobilissimis hisce disciplinis praemuniti, ad naturae pulchritudinem contemplandam paratiores accederent. Neque deinde minore studio scientiam morum, iusti et iniusti rationem, differendi artem et eloquentiam addiscebant. Agite nunc, conferte, si vultis nostram cum vetere disciplina institutionem. Illi quidem silentio, longaque meditatione iuuentutis animos in vberissimam doctrinae spem enutriebant: nos garrulitate argutandique exercitatione. Illi numerorum scientia ac Geometricis rationibus puerorum mentes acuere atque excitare solebant: nos et fabellis, et versiculis ad grauiore disciplinae praeparamus. Illi demum longo maturoque studio ingenia exercebant: nos praecipiti festinatione eorum studia intercipimus, et immaturis laudibus plausuque corrumimus. Et mirabimur, ex huiusmodi scholis tot quotidie sciolos exire, et a sciolis forum, curiam, rostra, subsellia per summum literarum dedecus occupari? Ex illa tam delicata palaestra, ex importunis illis plaussibus et acclamationibus quid aliud erat expectandum, nisi iuuentutis arrogantia, intolerabilis animi tumor, miserrumque naufragium?

Venio nunc ad illos, quod erat alterum, qui et veterum doctrinae parentum, et disciplinarum fere omnium, praeter eam, quam ipsi prohtentur, contemptu, in sciolos augendos non minus operae conferunt, quam qui eos festinatis plaussibus fouent. Cum superiore aetate sapientes quidam viri summa cum laude absterferint ea, quae in Aristotelis philosophiam, aut barbarorum vitio

vicio irrepserant, aut cum reoentibus naturae experimentis minime conuenire videbantur, factum est, vt quasi perfractis philosophiae repagulis, maxima sese effuderit philosophandi libertas; paucisque annis tot noua prodierint philosophorum cogitata, vt nouitio cuique professori turpe videatur vestigia antiquorum premere, explosisque aliorum sententiis, noua non meditari. Hoc autem tanto veterum philosophorum contemptu fit, vt ipsi Philosophiae parentes et quasi numina, Plato et Aristoteles, quos omnis antiquitas tantopere suspexit, et in caelum laudibus immortalibus extulit, iam tanquam homines natura stupidi, bardique per ora iuuenulorum impudentissime traducantur. Qua quidem contumelia quid grauius, aut quid iniquius dici, aut excogitari possit, non video. Nam quis aequo animo ferat, Philosophiam in Platonis schola natam atque educatam, quae tot aetates in vniuersis fere totius orbis academiiis vna regnauit, quam sapientissimi viri summo studio coluerunt, modo a barbarulis istis reprehendi, quasi nihil solidi, nihil bonae frugis continentem? Cui stomachum id non moueat, imperitos adulescentes audere homini tam petulantibus obstreperere, quo M. Tullius neminem doctiorem, et in rebus vel inueniendis, vel iudicandis neminem acriorem fuisse affirmauit? Nullus autem non videt, hunc sciorum fastum et supercilium a praeceptoribus istis originem ducere, qui venerabiles illos sapientiae procures parui faciunt, ac saepe etiam eosdem voce scriptoque vituperant. At dicet aliquis, tu ergo nobis id vicio vertis, quod et Galilaeum, et Cartesium, et Newtonum, aliosque summos philosophos, germanos naturae interpretes, Aristoteli praeferamus, cuius philosophia, propter nimiam profecto obscuritatem, et quaelio-

nes quasdam leues, ab omnibus iam fere deserta, scholis exulauit? Ego equidem in ea sententia nunquam fui, vt in optimis quibusque disciplinis assequendis aliquo partium studio teneamur. Placuit mihi semper illud Aristotelis ipsius dictum: amicus Plato, amicus Socrates, sed magis ipsa veritas. Etenim si in physicis, aut metaphysicis rebus illustrandis, si in caelestium motuum doctrina explicanda, Aristoteli ipsi, aliisque eius aetatis philosophis, Cartesius, Newtonus ceterique huius temporis sapientes viri perspicuitate et inuentis praestiterunt, auctor ego sum, vt hos sequamur, hos complectamur, hosque in sinu oculisque feramus. Quod autem reprehendendum et nullo modo ferendum esse puto, illud profecto est, quod antiquorum doctrina, qualiscunque demum ea sit, cuius quidem fundamentis exaedificatum est, quicquid boni ac praeclari recentiores philosophi nobis tradiderunt, leuitatis et infantiae temere condemnentur. Hoc mihi semper cum iniquum, tum indignum visum est de maioribus nostris iudicium: cum praefertim de illis per saepe ita iudicent, qui eorum volumina neque legerint vnquam, neque viderint. Ex huiusmodi autem de veterum sapientia contemptu oritur sane iuuenum nostrorum is tumor et arrogantia, vt prae illis se magis sapere arbitrentur, et ipsi quoque magistrorum more iam Cartesium, iam Newtonum, quorum doctrinam vix primoribus labris gustarunt, in centumvirale iudicium vocare non dubitent. O impudentiam singularem! Itane? Vix auditis Dialecticae elementis, vix Physicorum limine salutato, summis philosophis diem dicere, ac de rebus difficillimis, nec satis sibi cognitis iniquissimum iudicium pronunciare? Iudicent potius barbaruli iuuenes de vincinis, de choreis, de ludis,

de consulis, aliisque egregiis huius generis studiis: in his profecto cati isti et peracuti ingenium suum, et bonum, ut ipsi vocant, gustum satis probare poterunt.

At vero quid de illis dicam, qui praeter eam, quam ipsi profitentur, disciplinam, nullam aliam non inutilem et otiosam praedicant? Neminem isti virum doctum existimant, si ea doctrina careat, quam ipsi colunt, quamque veluti vnum corpus ex ceteris disciplinis tanquam membris compositum sic putant, ut ab iis, qui vnam illam affectui fuerint, nihil amplius sit ex omni doctrinae genere exoptandum. Non loquar de iis, qui omnes artes omnesque disciplinas ex vno sacrarum literarum codice proficisci voluerunt. Neminem vestrum latere arbitror, quot pugnas inter eruditos haud multos ab hinc annos excitauerit liber, cui titulus *Pansepbia Mosaisca*, cuius auctor in ipso diuino codice omnem scientiam, omnemque doctrinam amplissime contineri contendebat. Ego quidem haecenus vidi neminem, qui ex vno diuinorum librorum studio Arithmeticus, aut Geometra, aut Astronomus vel mediocriter euaserit. Nullus autem dubito, quin ad sacrarum literarum studium homines accedere debeant praeclaris huius generis disciplinis bene instructi, si, quae de Arca Noe, de Babelica turri, de Salomonis templo, de annis solaribus et lunaribus Hebraeorum, in sacro codice narrantur, ea penitus intelligere velint. Hinc praeter Origenem, qui, ut Eusebius memoriae prodidit, in Arithmeticis et Geometricis eos mature exercebat, quos sacris literis initiare cupiebat, sapientissimi quoque ac sanctissimi viri, Hieronymus et Augustinus numerorum ac siderum scientiam, ad sacra volumina intelligenda quam maxime necessariam esse, iudicarunt. Atque hinc nuper summo labore

et singulari doctrina doctissimorum virorum, du Hamel, Huetii, Lamy, du Pin aliorumque in lucem prodire praelusiones ac Biblici apparatus, vnde in ipso sacrorum librorum studio duces haberemus ac praecursores. Quare non video, quo pacto ceterae disciplinae ab ipso diuino codice peti possint, si ad absolutam eius intelligentiam accuratiores disciplinarum earundem scientia antea requiratur. Docent nos profecto sacrae literae ea omnia, quae ad religionem, ad pietatem moresque Christiano homine dignos pertinent: non philosophum, non mathematicum, non oratorem instituunt; quanquam in illis omnem scientiam et doctrinam inesse, nemo sapiens negauerit. Sed nimis multa de controuersia, quae ad nos minime pertinet. Illud iam quaero, an toto illo humanarum disciplinarum orbe, quem Graeci Encyclopaediam vocant, vlla sit, quae, aliarum omnium quasi domina, ceteras imperio suo ita subiiciat, ut, qui tandem eam possident, cunctarum doctrinarum opibus aucti esse videantur? Meminit quidem Cicero de L. Crasso, qui omne artium et disciplinarum genus vnius cognitione iuris contineri, et quidem vno duodecim Tabularum libello, existimabat. Neque id sane mirari possum, cum quidam ludi magister, aetatis nostrae sciolus, contenderet, scientiam omnem vna Aluari Grammatica comprehendi. At vero hac tempestate homines quidam forenses illud habent sibi persuasissimum, ex vna luris scientia hominem in omni disciplinarum genere fieri posse perquam doctum et sapientem. Hos ego profecto veterum Sinenfium quam simillimos esse dixerim, qui orbem terrae vniuersum imperii sui limitibus esse conclusum, neque extra Sinas gentem vllam vsquam consistere arbitrabantur. Ex quo illud sequitur, ut eiusmodi homines, quicquid

quicquid operae et laboris in aliis, praeter ipsam iuris scientiam, disciplinis comparandis impenditur, inanem temporis iacturam aetatisque dispendium putent. Quid si forte aut aliquod M. Tullii volumen, aut Caesaris commentarios, aut latinum poetam in studio alicuius iuuenis manibus videant, de illo pessime iudicant, et in foro nihil illum profecturum esse male ominantur. Putant nimirum, scientiam iuris esse opibus suis satis instructam, nec alienis literarum egere ornamentis: idcirco adolescentes Grammaticae et Dialecticae studiis, quantumcunque id sit, eruditos, maguos posse facere in iurisprudencia progressus. Stulti igitur Alciati, stulti Duareni, stulti Goueani, stulti Augustini, totque alii in iure clarissimi viri, quibus tamen illi, recte quidem et merito, magistris gloriantur; qui, cum id minus intelligerent, praeter doctrinam iuris, alia quoque disciplinarum studia impensissime coluerunt. At vero M. Tullius, cui summam vniuersi iuris scientiam nemo vnquam sanae mentis negavit, inculenter affirmat: non ex edicto Praetoris, nec ex duodecim Tabulis, sed penitus ex intima Philosophia iuris artem esse hauriendam. Igitur tantum abest, ut Philosophiam ceterasque disciplinas doctrina iuris in se vna complectatur, ut ipsa potius Philosophia, tanquam foecunda bonarum artium parens, in suo sinu ipsum ius civile alere atque educare videatur. Verum asciscant ad iuris studia, quotquot volunt, adolescentes rudes, indoctos, imperitos et bonis literis minime excultos. Nonne vident homines insulsi, hac ratione se rabulis amplum iter ad forum recudere, legumque dignitatem, quam ipsi extollere maxime cupiunt, miserum in modum minuire atque deprimere? Nam nisi ad forum accedant, qui

non modo ingenio praediti, sed literis quoque et disciplinis perpoliti, doctrinam iuris elegantia sermonis et eloquentia scienter pertractare queant, quid aliud erit ab huiusmodi hominibus expectandum, praeter gerras et male confutos centones? Neque enim, ut opportune M. Tullius ait, castitatem orationis, et optimas disciplinas homines in foro discere, sed docti in forum venire debent. Quid vero, (te ipsum testem, M. Tulli, appello) quid, inquam, si adolescentes hoc tempore, praeter aliquam iuris notitiam, in forum non afferant, nisi contemptum et ignorantiam literarum? Quo tandem euadet vetus illa Romani fori gloria, quae, te, totque aliis tui similibus, grauissimas causas perorantibus, vsque ad vltimas terras peruagata est? Enimvero apud hos minimum valeant et Romani fori dignitas, et doctrinae splendor: sed iam quaero ab ipsis: quonam pacto perdifficiles quosdam iuris nodos expedire, et vim legum illarum percipere poterunt, quae ab intima latinae linguae cognitione, quae a ritibus et institutis Pop. Rom. maxime pendent, si literarum rudes, si ieiuni et imperiti ad ipsam iuris scientiam accedant? Et reuera plurimas quidem magnique momenti leges ob eruditionis eiusmodi inopiam a multis magni nominis iureconsultis perperam intellectas fuisse ostendunt Pancirollus, Gentilis, Heineccius, Noodt aliique clarissimi viri, de Romano iure optime meriti. Atque hinc satis apposite Iustinianus Caesar ius Romanum, cum pelago procellis scopulisque infesto, comparauit, quod scilicet nautae peritiam indutriamque singularem exquirat. Continet illud plane multa verbis ac sententiis obscura, continet res varias et alicubi etiam sibi aduersantes, quae ingenium promptum, literis exercitatum,

tum etiam eorum temporum rerumque peritissimum postulant. Proinde iaceret adhuc in tenebris, neque in illud gloriae fastigium, in quo nunc est, euasisset iuris scientia, nisi literarum lumen et disciplinarum notitia accessisset, qua illam primo illustrarunt ex Italis Alciatus, Decianus, Menochius, Pancirollus, deinde ex Hispanis Ant. Augustinus, Covarruvias, Coueanus, Pinellus, ex Gallis Bndaeus, Cuiacius, Dna-renus, Tiraquellus, Contius, Hotomannus, Balduinus, Brissonius, ex Germanis Zasius, Sichardus, Viglius, alique pluri, qui non tantam ingenii acumen et par ingenio iudicium, sed elegantiam quoque latinitatis, literarumque Graecarum scientiam ad illud ex omni parte exornandum attulerunt. Quorum volumina summo ingenio exquisitaque doctrina elucubrata, cum omnium oculis pateant, nonne satis nobis argumento sunt, pleniori perfectaeque iuris scientiae elegantiores literas et disciplinas fundos fieri oportere? Et erit quisquam tam audax, atque ore tam duro, qui hoc tempore stultitiae iuris iuuentuti bonas literas in-

utiles esse, imo etiam, si superis placet, perniciosas affirmet? O praeposteram nostrorum temporum ignaviam! O singularem sciolorum impudentiam! Quam bene in ipsos quadrat illud Graecorum, eos nempe auloedos esse, cum fieri non potuerint citharaedi. Cum enim in foro gloriam assequi, et inter iurisperitos clarere non potuerint, inter rabulas consistere coacti sunt; quaeque ipsi non sunt assecuti literarum ornamenta, a foro curiaeque reiciunt. Sed finem dicendi faciam. Satis iam intellexistis, unde haec tanta sciolorum propago prorumpat in dies ad omnium labem disciplinarum. Nimirum magnam eorum partem alunt immaturae laudes magistrorum, qui plus nimio adolescentium ingenii assentantur ac plaudunt. Partem vero nutriunt contemptus veterum sapientiae parentum, ac perniciosae de optimis artibus in studiosam iuuentutem disseminatae opiniones. Quod quidem multiplex literarum malum nisi aliquando tandem exterminetur, actum est de honestissimis disciplinis, actum de sapientia vniuersa.



DE  
LAUDIBVS  
LEONIS X.  
IN  
ANNIVERSARIIS EIVS  
PARENTALIBVS

ORATIO VII.

HABITA PRIDIE IDVS FEBRVAR.  
AN. MDCCXXXVIII



**N**EMINEM vestrum, P.P. amplissimi, aut eorum, qui adsunt, ignorare arbitror, quae fuerint Leonis X. in omni vitae genere egregiae admirandaeque virtutes. Profecto satis superque omnium gentium literis ac praedicatione commentatur singularis illius sapientia, incredibilis animi fortitudo atque constantia, summa denique pietas et religio: quibus virtutibus tanquam gradibus in ipso aetatis flore ad summum Pontificatus apicem non tam ascendit, quam aduolauit. In ea vero celsissima et caelo proxima sede dignitatis, qua maior in terris dari non potest, quot labores impigre susceperit, quot quantasque res praeclarissime gesserit, siue ad tuendam, siue ad amplificandam Ecclesiae dignitatem, ille vnus fortasse ignorauerit, qui eius memoriae celeberrimae annales neque viderit vnquam, nec sancto audierit. Quamobrem ne putetis, me hodierno die temeritate quadam velle in immensum hoc mare ingredi, vt inde nonnisi difficillime euadere atque enatare possit oratio. Deest profecto mihi tanta dicendi vis et eloquentiae copia: deest amplitudini rerum eiusmodi pro dignitate dicendarum opportuni temporis ratio. Praetermissis itaque iis, quae vns saepe alias tum a me, tum ab aliis eloquentissimis viris de Leone X. ex hoc ipso loco audiistis, id vnum spectabit oratio mea, quod annuam huius diei celebritatem vnice spectare videtur, perrarum scilicet et singulare ipsius Leonis erga literas et literatos studium et voluntatem. Etenim hac vna virtute, ceteris omnibus missis, sapientissimus Pontifex de hac nostra studiorni Vniuersitate, de Pop. Romano ac de omni posterorum memoria sic est optime meri-

tus, vt, licet grata quotannis eius beneficentiae recordatio apud nos renouetur, nunquam tamen satis, nunquam pari cum eius meritis laude possit praedicari.

Mnlti sane extiterunt in omni memoria principes viri, maxime reges, qui erga homines doctos ac literatos se admodum propensos, tum etiam magnopere liberales praestiterunt, qui tamen imperiti literarum erant, atque omnis doctrinae expertes. Habuit nuper magnum Gallia regem Ludovicum XIV. literatorum quidem omnium amantissimum, et supra quam dici potest, beneficentissimum, qui nihilominus nullis literis ac doctrinis excultus fuisse dicitur. Neque id mirum vobis, PP. amplissimi, videri potest, qui optime nostis, quot labores, quot vigilias, quot denique grauissimas animi curas sibi doctrinarum studia deposcant. Omittendae sunt, dicere solebat M. Tullius, voluptates, relinquenda studia delectationis, ludus, iocus, conuiuium ac sermo paene familiarium omnium deferendus. Cum autem cuncti fere principes in auro et purpura molliter educati sint, mirandum plaue non est, si vitae genus asperrimum, quod a studio perpetuo literarum disiungi non potest, anersentur; literatos tamen, tanquam singulare ac prope diuinum genus hominum, amore prosequantur ac foueant: quod nimirum intelligunt, eorum doctrina reipublicae salutem, leges ac iura ciuitatum, bona denique ac fortunas populorum conservari; imo et nominis sui immortalitatem et decus ad posteritatem et memoriam temporum propagandum, eorum ingenio ac literarum monumentis magna ex parte plerumque niti, optime norunt. Non ita vero Ioannes Medices. Non ille literatos



ratos tantum viros, sed literas quoque amauit plurimum, matureque coluit. Quanquam enim in ea fuisset amplissima ac prope regia domo natus, quae summo splendore atque opibus inter ceteras emineret; nunquam tamen otio ac deliciis molliri potuit, nunquam inanibus puerorum oblectamentis, nunquam equorum, quadrigarum, aliisque, quas nostri vocant equestres, exercitationibus se dedit: imo nec feruentioris aetatis cupiditatibus, quae iuuentutem cum a literarum studiis, tum ab omni honestate abducere solent, vnquam se abripi passus est, sed recto illo, tametsi difficili ac salebroso, ad virtutem itinere sibi proposito, se totum ab ineunte aetate literis tradere, nullis nisi literatis hominibus vti, cum iis sua communicare studia, eorumque iudicium exquirere solenne habuit. Recitetur hic Angeli Politiani vlti doctissimi grauissimum testimonium, qui ad Innocentium VIII. Pont. Max. de Ioanne scribens, haec de illo conceptis verbis testatus est: ita natus et factus hic est, ita altus et educatus, ita denique eruditus atque institutus, vt nemini secundus ingenio, nec aequalibus industria, nec praceptoribus literatura, nec senibus grauitate concesserit. Haec Politianus. Quid autem, per vestram fidem, non dico de impubere, aut de homine adolescente, sed de viro iam annorum maturitate confilioque confirmato grauius dici, aut laude magis dignum excoGITARI vnquam potest?

Neque vero Ioannes Medices literis et doctrinis mediocriter informari, ac dicis causa de illis instrui, quod nobiles ac primarii adolescentes plerique faciunt, contentus fuit. Sed postquam satis in poeticis, ac rhetoricis studiis profecit, postquam tum Graecorum, tum Romanorum diligenter historias euoluit, postquam denique multiplices philosophorum sectas, o-

rigines, aetates ac dogmata accurate comperta habuit, tum ad Ciuilis et Pontificii iuris scientiam addiscendam Pisas profectus est. Verum quonam tempore Ioannem id fecisse putatis? Non ille sane priuatus erat, cum id consilii cepit, sed cum iam in maxima hominum celebritate positus, ab Innoc. VIII. Pont. Max. amplissimus R. E. Cardinalis fuerat renunciatus. O singularem sciendi cupiditatem! O rem portenti similem, videre Cardinalem praeclarissimum, nobilitate, opibus atque aetate florentem, patria charissima, ciuibus, ac magnificentissima domo relictis, in Pisanam Academiam commigrare, vt in ea iuris interpretes audiret, seque eorum disciplinae erudendum quasi rudem discipulum daret! Quis hac nostra tempestate, non dico Romanae purpurae splendore auctus ornatusque, sed magistratu aliquo vel inferiore in Vrbe cohonestatus, exire domo, et ad hanc studiorum vniuersitatem doctrinae causa accedere a dignitate sua non abhorrens et alienum esse putaret? Expectant hodie ad multam diem in vestibulo aedium ciuilis iuris magistri nobiles adolescentes, dum illi hesternam crapulam edormiant, ac tandem somniculosi et oscitantes ad iuris lectiones andlendas descendant. Pudeat delicatulos istos, pudeat, cum audiant Ioannem Medicen, Florentinae principem iuuentutis, clarissimumque Cardinalem, in Pisana Academia iurisprudentiae operam dantem, nemini studio, labore ac diligentia concedere. Quid itaque miramur, quod ille postea Pontifex maximus, aetate etiam tunc florens, renunciatus, totus ad optimas disciplinas angendas et amplificandas incurreret, qui adhuc adolescens ciues suos, parentes, vitae commoda ac ipsam fere dicam Romanam Purpuram; doctrinae studiis deuouere non dubitauerit?

At vero, dicet quispiam, alii plurimi fuerunt principes regesque clarissimi, qui ab ineunte aetate sese literis dare, easque ad extremum vsque spiritum in deliciis habere consueverunt. Alphonsum quidem Hispaniae regem, ut innumeri alii praetermittantur, proditum est memoriae, solitum fuisse dicere: se malles priuatim vivere, quam eruditione carere. Quam vocem superiore saeculo aemulari sane visus est Franciscus Maria, postremus Urbini dux, cum diceret, se Urbino potius eiusque ditione, quam literarum studiis abdicaturum. Ego equidem non repugno, neque nescius sum, in omni fere aetate extitisse viros non minus doctrina, quam dignitate praestantes. Illud tamen contendo, ex iis plurimos fuisse, qui multum quidem erga literas, nullum vero erga literatos homines studium nullamque propensionem declarauerint. Sine enim non ea essent a natura liberalitate donati, ut bonas literas, et qui easdem profitebantur, pluris aestimarent, quam pecuniam; siue illi philautia tantopere laborarent, ut ceteros omnes praese nihili facerent; siue alienae doctrinae gloria nomen suum obrui, sibi que de fama ac dignitate ex aliorum ingenio detrahi putarent: illud certum est, limis oculis homines literatos aspexisse, atque illos nullis praemiis, nullis honoribus nulloque beneficio exornasse. Immo, quod incredibile plane videtur, animo a literatis ipsis prorsus alieno atque infesto eos palam fuisse, loquuntur historiae. Profecto narrat Dio, Hadrianum Caesarem studiorum suorum et bonarum artium aemulos, quos aequare non poterat, interfecisse, quippe qui literis, optimis artibus, et disciplinis vnus omnes anteire vellet. Sed, vetustioribus illis et immanitate barbaris exemplis praetermissis, possem hic multa minimeque obscura recentioris aetatis in

medium afferre, quae id satis ostendant. Sed cum de principibus viris sermo sit, de quibus aut bene, tanquam de Diis, aut nihil omnino esse loquendum sapientes affirmant, idcirco plura non addam: cum praefertim apud vos dicam, quos tum in vetere, tum in recentiore temporum historia maxime versatos esse non dubito. Huc accedit, quod Leonis X. virtus alienae vituperationis non indiget, quo ceteris altius asurgat, utque ipse vnus inter omnes emineat. Et sane dubitari non potest, quin ille tantum literatos amauerit, quantum et literas, amore videlicet singulari, summo ac prope incredibili. Pleni sunt eorum temporum annales, plenae sunt historiae, qui effusissimam et quasi immensam erga illos beneficentiam Leonis testantur. Nolo equidem tempore ac patientia vestra abuti, recensendo numerum fere infinitum eorum, quos ille doctrinae causa beneficiis affecit, praemiis auxit, fortunis opibusque cumulauit. Vnum hoc verissime dicam: quotquot Romae, quotquot in vniuersa Italia, in Germania, in Graecia aliisque prouinciis remotioribus extitere alicuius ingenii poetae, oratores, philosophi, mathematici, aut alius doctrinae cultores, omnes in Leone X. parentem amantissimum ac maecenatem beneficentissimum reperiabant. Tantus proinde factus est ad Urbem virorum doctissimorum concursus, ut florentissima olim Athenarum urbs rediuiua Romam commigrasse, aut certe aureum Augusti Caesaris saeculum Leonis tempore renocatum videretur.

At vero qualis quantaque fuerit munificentissimi Pontificis tum in literas, tum in literatos beneficentia et caritas, non ex iis tantum conici debet, quae ille breui annorum, quibus vixit, curriculum, liberalissime fecit. Enimvero ad omnem aetatem, omnemque posterorum memoriam lon-

ge lateque productam voluit hanc animi sui erga literas eorumque nmatores beneficentissimam voluntatem. Dubitatisne aliud illi tunc fuisse consilium ac providentissimam deliberationem, cum hoc Romanum Gymnasium a fundamentis excitare, in eoque clarissimos disciplinarum omnium praeceptores perpetuum stabilire constituit? Non alia profecto illi fuit mens, non alia voluntas, nisi ut Romanae bonarum artium arcem munitissimam collocaret, in qua sempiternam atque tranquillam haberent honestissimae disciplinae stationem. In hoc nimirum Sapientiae domicilio viros primi ordinis Theologos, eruditissimos Iuris utriusque doctores, Philosophiae, Geometriae, ac linguarum omnium peritissimos magistros, publico civitatis sumptu ali perpetuo voluit, ut ipse nullo ynquam tempore de ingenii disciplinis doctisque viris optime mereri desineret. Prospexit utique vir acutissimus misera quidem et luctuosa aliquando ventura tempora, in quibus literae barbarorum incursione, aut domestica inimicorum conspiratione ad supremum quasi interitum vergerent. Proinde firmam illis perpetuoque duraturam in vrbe omnium principe stabilivit sedem, quam

duplici Apostolica sanctione ita firmavit, ut eam nulla temporum calamitas, nulla improborum hominum vis, aut scelerata coniuratio conuelleret. O Pontificem sapientissimum! O parentem literarum et literatorum omnium amantissimum, sempiterna memoria dignum! Quas tibi ego gratias hodierno die, Leo Pontifex Maxime, Academiae huius vniuersae nomine agere potero, quae quidem meritis ac virtutibus tuis impares omnino non sint? Vtinam mihi esset tanta vis ingenii ac tanta dicendi facultas, ut rarum, maximum et incredibilem tuum erga literas et literatos amorem viuis eloquentiae coloribus si non exprimere, at saltem adumbrare potuissem! Vtinam magnitudinem beneficiorum tuorum, quibus non modo de tuis temporibus, sed de omni quoque posterorum memoria bene mereri voluisti, data mihi fuisset satis explicandi copia! Quod vero neque vnius hominis vox, neque exiguum semihorae tempus ad dicendum mihi constitutum, semel satis praestare possunt, id tibi Academia haec nostra, ad gratam et immortalem nominis tui commendationem, quotannis praestat perpetuoque praestabit.



DE  
OPTIMIS ARTIBVS  
NOBILI IVENTVTI  
NECESSARIIS

ORATIO VIII.

HABITA VII. KAL. DECEMBR.  
AN. MDCCXL.

---

SANCTISSIMO DOMINO NOSTRO  
BENEDICTO XIV.  
PONT. OPT. MAX.

PAVLINVS A S. IOSEPHO

**A**RDVVM hoc et morosum orationis genus nunquam fortasse suscepissem, BENEDICTE Pont. Max., nisi sapientia tua singulari mihi animum stimulosque addidisset. Cum enim omnis fere nobilitas hoc tempore bonarum literarum parum cupida esse videatur, quae nihilominus ad illam potissime pertinent, quaeque olim fuisse summis regibus in amore atque deliciis: rem inuidiae plenam esse videbam, in nobilissima ciuitate, de iu studiū verba facere, quae tam paruum a nobilitate ipsa gratiam inirent. Postquam vero ad te diuinitus delata fuit rerum cum humanarum, tum diuinarum potestas, tam iniqua optimis disciplinis fortuna, si non omnino immutari, at saltem longe melior fieri visa est. Quis enim antea vitae tuae cursum paulo attentius inspexerit, qui non videat, te ab in-  
eunte aetate, et in omni vitae genere, cum summa nobilitate doctrinam, et eximia cum doctrina virtutem mirum in modum coniunxisse? Atque hinc optimae artes in spem venerunt pristinae dignitatu suae recipiendae, ut posthac scilicet non humiles tantum lares incolere, aut in religiosorum hominum septis sese abdere sibi tribuatur, sed in patriciis quoque tectis sedem ac domicilium habere. Nemo quippe ignorat, ad exemplum principis totum, ut ille ait, orbem componi. Hinc ego quoque tam magno prouocatus exemplo, eam dicendi prouinciam sum aggressus, quae non omnibus fortasse temporibus probaretur. Dixi enim de literis et doctrinis nobili iuuentuti maxime necessariis; quae quidem necessitas tum longe maior esse solet, cum princeps literis sapientiaeque praeditus, eos supra caeteros ornat atque auget, qui non minus doctrina, quam nobilitate generis commendantur. Dicenti autem mihi non modo ii, qui multa frequentia, et ex  
omni

omni ordine aderant: sapientissimi viri, summa voluntate assenserunt, sed ipsi quoque magnae Gymnasii aulae parietes plaudere et exultare quodammodo videbantur, dum audirent, laudibus te nomenque tuum celebrari. Quid enim tella ipsa ad eius Pontificis Maximi nomen non exultarent, quem tot annos in eodem amplissimo loco vel curi candidatus lauream impertientem, vel rectoris munere sapientissime fungentem viderant; et a quo uno, id quod omnium diu maxime erat in votis, se in veterem splendorem restitutum iri confidunt? Haud miraberis itaque, BEATISSIME PATER, si, quae a sapientia tua oratio vim prope omnem ac decus acceperit, immortalis quoque nomini tuo inscribatur. Quamquam enim reuera tantae dignitati fit impar, amplitudo tamen loci, in quo habita est, et ipsa arguementi conditio, in se aliquid habere videntur, quod sufficiat quicquid in ea ornatu, aut eloquentiae desideratur. Huc accedit humanitas tua incredibilis, qua oratorem saepe alias in eodem Gymnasio coram te, ac iussu tuo, dicentem complexus es, cui sane nihil antiquius, quam acceptorum beneficiorum memoriam testari sempiternam.

**I**n maximis bonarum artium commodis, quibus respublica cumulatur, illud mihi singulare videbatur, quod hominibus tenui fortuna et ignobili genere natis, luculentum illae patrimonium fierent, eosque ab obscuro, in quo versabantur, loco in publicam lucem ac dignitatem producerent. Cogitanti enim mihi tum vetera, tum recentiora historiarum monumenta, occurrebat Pythagoras ille inter philosophos celebratissimus, sculptoris tamen filius; occurrebat alterum sapientiae lumen, Socrates, matre obsterice, patre marmorario in lucem editus. Quid vero Graecorum princeps oratorum Demosthenes, ut innumeros alios praeteream, quem in humili fordidaque fabri officina natum accepimus? Ex superiore autem memoria recordabar et Dominicum Tuscum, et Silium Antonianum, et Arnaldum Ossatum, amplissimos Cardinales, qui, nulla licet sanguinis claritate, nullis maiorum imaginibus praefulgerent, doctrinae tamen praesidio, et ingenii commendatione ad maximae dignitatis fastigium regali proximum euassent. Quamobrem singularem Dei Opt. Max. providentiam satis admirari non poteram, quod de bonis suis ita bene ac sapienter constituisset, ut alii quidem generis splendo-

rem, illustrium maiorum gloriam, opes fortunasque obtinerent, alii vero iugenum et literas, quibus fortunam sibi pariter, dignitatemque compararent. Itaque existimabam, nobiliores adolescentes literarum studiis, quo beate viuant, nullo pacto indigere: sed literas, quasi haereditatem suo sibi lure adeundam, esse pauperibus derelictas, qui ad laborem industriamque nati sunt. At vero contra, quam putaueram, rem se habere, tandem animaduerti. Intellexi enim, optimas disciplinas multo magis iis, qui amplitudine generis ac nobilitate ceteris antecellunt, necessarias esse, quam illis, qui obscuro loco, aut mediocri fortuna nascuntur. Hoc autem si tam perspicuum omnibus foret, quam certum reuera est, nequaquam hodie complures inuenirentur nobili genere iuvenes, qui literarum studia aut omnino negligerent, aut ea remisse et oscitanter excolerent. Quare nihil me facturum putavi auspicandis nobilissimis studiis opportunius, nihil ad amplitudinem huius loci accommodatius, quam si hodierno die, in hac tanta sapientissimorum hominum frequentia, statuerem, utrum tandem nobilitati prae ceteris ad honestissimas disciplinas incumbere necesse sit. Cui sententiae si auctoritas vestra iudiciumque, quemad-

quemadmodum spero, accesserit, non vereor, ne, quotquot hic adsunt clarissimi adolescentes, rationem habeant dignitatis suae, atque ipsi praeter ceteros bonarum artium studia diligentissime complectantur.

Verum nemo sit, qui suspicetur, me cuiuspiam vel infimi generis interclusum velle doctrinae aditum, qui optimo cuique ingenio semper patuit. Iniuriosum quidem in naturam, rerum parentem, foret, sapientiae laudem iis praeripere, quos ipsa celeri ingenio, memoria firma, ac summa discendi facilitate sic donavit, ut eos ad optima studia penitus effinxisse videatur. Illud tamen affirmo, eiusmodi homines nullam generi suo iniuriam, nullam reipublicae contumeliam esse facturos, si, reiectis studiis literarum, alio mentem animumque convertant. Quis enim eos iure reprehendat, si ad picturam, vel ad statuariam, vel ad sculpturam, vel ad aliam ex iis quas mechanicas vocant, artibus sese dederint, et in ipsis scite excolendis ingenium suum industriamque probauerint? Laudandi profecto sunt, si ingenuas disciplinas amplectantur, atque in illis progressus faciant maximos et admirandos. At minime vituperandi sunt, quod repudiatis huiusmodi studiis, ad quaestuosas potius artes omnem conatum suum ingeniumque adhibeant. Verum non eadem ratio, non eadem plane nobilitatis conditio est. Repugnat omnino, et a nobili viro prorsus abhorret, sese mechanicis et sellulariis artibus immiscere, quibus tenues homines se tuentur, atque sustentant. Quod quidem adeo a veteri memoria, communi gentium consuetudine, institutoque maiorum, receptum fuit, ut Herodotus, historiae parens, affirmet, apud omnes fere nationes eos ignobiles haberi, qui artificia discunt. Porro autem nobiles iuvenes, praeter optimas disciplinas, non habent

quicquam praestantius, in quo honestius et cum laude vitam traducere queant. Haec nimirum studia ingenio ac liberali viro digna sunt. Haec reuera principes viros, ut Plutarchus ait, maximosque reges exornant.

Sed literas, dicet quispiam, esse vera ac pulcherrima nobilitatis ornamenta, nemo unquam sanae mentis negavit. At vero quae tanta earum necessitas cum nobilitate ipsa intercedit? Magna profecto, si tum priuata, tum publica nobilitatis eiusdem ratio paulo diligentius attenditur. Quis enim ad rudis, adeo rerum omnium imperitus, ut ignoret, nobilium animos magis, quam ceterorum, in praecipites motus abripi solere, et in effraenatiores cupiditates? Siue enim sit opulencia et luxus paternae domus, siue multa clientum assiduitas et frequentia, multa amicorum procerumque officia, sen denique superbia, quam commune nobilitatis malum Sallustius appellavit; illud certum est, eos saepius, ac granioribus animi perturbationibus commoueri. Et sane nullum est fretum, nullus euripus, qui tot motus ac tam varias habeat tempestates, quot quantasque habere solent miserrimi eiusmodi iuvenes animorum iactationes atque procellas. Nunc illos videas incredibili laetitia gestientes, nunc moerore plenos et aegritudine paene confectos; iam ira inflammatos et furentes iracundia, iam metu pavidos, vultu animoque suspensos; tum saepissime voluptatibus et insanis amoribus prope perditos. Huc accedit otium, quo nobilitas abundare solet plurimum; et quo vno comite, omne vitiorum genus arcessi, ac virtutem omnem profigari necesse est. Ab otio enim, ut Cato ille Censorius dicere erat solitus, homines, nihil agendo, male agere discunt. Quo quidem eo procliuiores feruntur, quo amplior in illis esse solet impunitatis spes, quae, ut Cicero inquit,

inquit, est magna peccandi illecebra maximumque flagitiorum incitamentum. Quid autem tam aegrum et labentem nobilitatis conditionem sanare potest, praeter literas? Literae enim sunt virtutis parentes, vitiis expultrices. Hae nimirum corruptos mores emendant, et ad virtutem atque honestatem excitant vehementissime. Hae caecas animi cupiditates, quae furiarum instar hominem agitant, longe fugant atque dispellunt. Assiduus quippe ille studiorum labor mirum quantum ad impetus iuueniles compescendos valeat. Atque animus suauitate doctrinae paulatim delinitus, in placida quasi statione quiescens, tunc plane intelligit, quid aequum, quid iniquum sit, quid utile, quid honestum, quae pulchritudo virtutis, quae sapientiae dignitas ac praestantia: hinc autem sensim ad virtutem ipsam se totus sapientiamque conformat. Quamobrem fieri videmus, ut quantum homines literis et doctrina praestant, tantum consilio, grauitate, modestia ceterisque virtutibus praestare soleant.

Quod, si ex philosophorum sententia nobilitatis naturam exquiramus: magis aperte videbimus, quanta eidem nobilitati intercedat cum optimis disciplinis necessitudo atque coniunctio. Quanquam non sit vnum omnium philosophorum de nobilitate iudicium; cum illam alii positam velint in longa maiorum serie, ad posteros vsque cum laude tradenda, alii in splendore familiae, fortunis opibusque florentis, alii vero in praecleara aurorum, aut parentum gloria, rebus domi forisque gestis illustrium: attamen Plato, qui vnus philosophorum omnium veluti numen habitus est, tanquam ex ara et tripode pronuntiavit, nobilitatem omnium longe clarissimam atque germanam tunc haberi, cum quispiam propria animi virtute ac magnitudine excellit; ut proinde is vere nobilis censendus sit, cui non

aliena, sed sua ad nobilitatem virtus opitulatur. Atque hinc illud Iuuenalis celebratissimum: nobilitas sola est atque vnica virtus. Quae si vera sunt, illud quidem de nobilibus bene multis dici posse videtur, quod M. Varro Diis quibusdam patribus et Deabus matribus accidisse affirmabat: eos nimirum conuersione temporum rerumque vicissitudine a veteri nobilitate descivisse, et quasi ignobiles vulgo haberi. Quis enim non intelligit, quam longe a vera nobilitate absint illi, qui otio inertiaeque dediti, abdomini suo tantum nati esse videntur? Vbi enim in summa rerum ignorantia honestas et decus? Vbi splendor virtutis? Vbi vera animi magnitudo? Vbi denique reliquae virtutes, quibus sublatis, nobilitas ipsa consistere nullo modo potest? Turpe fuit olim in Romana republica patriciis et illustrioribus viris, literarum rudem esse atque imperitos. Peruulgatum satis est Q. Mutii testimonium, a Pomponio sempiternae posteritatis memoriae traditum: qui Sulpicio cuidam negligenter inepteque de iure disputanti: turpe est, inquit, viro patricio ac nobili, ius ignorare. Neminem praeterea fugit, quot vocibus et clamoribus M. Tullius tum C. Verri, tum L. Pisoni, clarissimo genere viris, exprobraret imperitiam literarum, quasi autem nobilitatem labe summaeque turpitudine affecissent. Hanc vero infamiae maculam nemini de plebe obiectam fuisse legimus, ut plane constet, optimarum artium studia non tam ad priuatos, quam ad patricios et nobiles viros iure quodam suo pertinere.

Sed abeant vetustatis exempla, abeant opiniones philosophorum. Alia sunt modo tempora, alii mores. Age vero, non intercedo. Itaque missam facio nobilitatem illam, quam ex istorum sententia Philosophia magis, quam natura formauit. Atque ad eos tota conuertitur oratio mea, qui hac nostra tempestate, propter

propter amplitudinem generis, atque opes, vulgo nobiles esse censentur. Enimuero nobiles ex isto genere homines, nisi forte velint se ab omni republica penitus abdicare, et in solitudine, belluarum more, versari, literis et doctrina praeter ceteros indigere conendo. Nam cui, per vestram fidem, magistratus, cui praeturae, cui publici honores, nostris quoque temporibus, deferuntur? nonne viris nobilibus atque patriciis? Profecto si civilem, aut ecclesiasticam rempublicam spectemus, eos fere consuequi videbimus imperia, fasces, purpura, qui claritate generis et splendore familiae nobilitantur, ut aliquando plus illis virtus prodesse videatur. Praeterea maximo fortunae beneficio tribuitur, si homo nouus ac tenui loco natus, virtutis tamen et ingenii fama praeclarus, ad amplitudinem honoris iter sibi tandem patefecerit. Inueteravit enim opinio, communi gentium consensione firmata, nobiles viros ad magistratus et honores, non tam promoueri, quam nasci. Proinde Cicero, ut consulatum suum singulari Pop. Rom. beneficio acceptum profiteretur, se, non in cunabulis, ut plerique omnes, sed in campo consulem factum esse affirmavit. Cum igitur ceteris, eminere ceterisque imperare, nobilitatis tam proprium sit, quam prope dicam generari ac nasci: quis non videt, ad ipsam quoque ea omnia fure quidem suo pertinere, quae rectam reipublicae institutionem, rectamque tum se, tum alios regendi rationem continent? Quis autem negauerit, honestissimas disciplinas domi militiaeque et consilii duces esse et imperandi magistros? Possem quidem hoc loco, oratorum more, in immensum campum excurrere; possem multa ex Graecis, multa ex Romanis in medium asferre, ex quibus planum fieret, quantum in nobilissimis eiusmodi studiis momenti sit, tum ad ciuitatem recte instituendam, tum etiam

ad bellicam virtutem et imperatoriae laudis gloriam comparandam. Neque enim gentes illae omnium sapientissimae tam impenso studio, tantisque honoribus ingenuas artes extulissent, si easdem nihil ad imperii felicitatem, nihil ad reipublicae tranquillitatem et otium, quibus illae rebus vnicuique studebant, conducero putauissent. Sed nimis multa dicenda essent, si eo descenderem, unde oratio exitum facile inuenire non posset.

Tria sunt praesertim, quae Aristoteles, in administranda republica, maxime necessaria esse putauit: consultatio de rebus agendis, magistratuum creandorum cura, atque iudicia. Haec autem singula quantam, Deus immortalis, postulant sapientiae vim ac robur? quantam tum publici, tum etiam privati iuris scientiam? quantam postremo et Politicae et Oeconomicae rei intelligentiam atque doctrinam? Ponite iam vobis ante oculos vnum ex istis aliquem, nobili genere natum, qui non libris, sed calamistrum et cincinnos, non literarum studia, sed ludos et iocos, non academias, sed nocturnos mulierum coetus ab ineunte aetate frequentauerit: qui tamen, fortuna rerum domina, aut errore hominum, ut inquit ille, ad magistratus et honores irrepserit: quod tandem sapiens consilium, aut quae in rebus gerendis prudentia ex tam vacuo et inani capite expectari vnquam possit? Fac grauis interim (ut solet) de re civili, aut politica, controuersia aliqua existat: illamne compopot homo rudis, qui nulla veteris historiae cognitione, nulla gentium, nulla optimarum legum scientia munitur? Haerebit profecto lapidi, aut trunco similis ridiculum caput: neque enim mutire audebit, cum nesciat (ut in veteri proverbio est) alba et atra discernere. At enim dat sapere regi, inquit Hesiodus, turba sapientum comes. Non desunt in omni



omni ciuitate docti legum interpretes, non defunt homines iuris vniuersi scientissimi, qui caussis et iudiciis praeesse queant: tamen etiam probe calleant, si qua res in consultationem venerit, docte et grauiter de consilii sententia pronunciare. Bene est. Equidem non ignoro, quanti facienda sit hominum forensium doctrina ac virtus: neque de eorum probitate ac fide puto esse aliquid suspicandum. Illud vero affirmo, miseram omnino eorum conditionem videri, qui aliena mente ad imperandum indigeant. Et sane multum interest inter proprium et alienum de publicis rebus iudicium atque sententiam. Aliud quippe est, posse secum prouide deliberare, suumque animum sapienter de communi bono consultare, ut Scipioni Africano morem fuisse accepimus; aliud prinatorum hominum egere consiliis, qui saepe in alterutram partem amore, saepe odio ducuntur. Mente qui prudenter pollet, is magistratum gerit, inquit Euripides. Quamobrem si cui alterius scientia, alterius iudicium, vnoque verbo, alterius mens ad gubernationem opus sit: is profecto non rempublicam regere, sed ipse ab aliis regi dicendus est. Praeterquam quod raro fit, ut homines imperiti alieno consilio vtantur, cum ipsi sibi sufficere, ipsi soli sibi sapere videantur.

Verum quae haecenus dicta sunt de nobilitate vniuersa, nemo non videt, ea maxime in nobilissimus iuuenes conuenire, qui rempublicam Ecclesiasticam cogitant. Perspicuum quidem est, tanto maiora ab istis requirenda esse doctrinae praesidia, quanto splendidiora sunt Ecclesiae munera, dignitatesque ampliores. Neque ad eas consequendas valent opes, aut illustrium maiorum virtus, et amplitudo familiae, nisi illis quoque scientia, quasi cumulus nobilitatis, accedat. Quae si forte desit, eam Pontificii iuris interpretes negant quandoque

posse nobilitate suppleri. Nolo autem hic, ne longior in dicendo sim, singula studiorum genera recensere, quae Ecclesiastico viro vel digna sunt maxime, vel omnino ipsi necessaria: quorum alia cum ceteris communia sunt, alia vero Ecclesiasticorum hominum sic propria esse censentur, ut, qui illis careant, quasi luce ipsa ac spiritu carere videantur. Praetereo itaque latinitatis et eloquentiae studia, quae, vix dici potest, quantum illis afferre queant dignitatis et ornamenti. Praetereo doctrinam temporum, et omnem tum sacrae, tum profanae antiquitatis eruditionem; qua neglecta, multa de antiquis Ecclesiae ritibus et caeremoniis, multa de ipsis Christianae rei primordiis ignorari necesse est. Praetereo denique Pontificii iuriscientiam, quam homini ad Ecclesiae gubernacula admoto, non tam praeclarum est scire, quam turpe ac periculosum nescire. Vnum tamen, pace vestra, libere dicam, neminem mihi satis eo vitae genere dignum videri, qui Theologiae studia ne extremis quidem digitis attigerit. Turpe igitur erit medico, Hippocratis, aut Galeni volumina, vnde ad vos primum medicina manauit, nunquam vidisse: turpe erit iurisperito neque Pandectas nosse, neque Codicem; Ecclesiastico autem homini turpe non erit ignorare fontes purissimos religionis, et nunquam diuinarum literarum volumina, nunquam sanctorum Patrum monumenta, aut veterum conciliorum sanctiones oculis suis vidisse, quibus, tanquam firmissimis praesidiis, et quasi subsidiariis copiis, germana ac solida Theologia instructa est? Dolet mihi plurimum, per temporis angustias me haud posse diuinæ istius scientiae necessitatem longiori oratione prosequi, in ea praefertim clarissima Vrbe, quae Christianae religionis propugnaculum est et caput, vnde sanctiora Catholicae Fidei mysteria, et Pontificiae sedis oracula gentes accipiunt. Quid vero de Ecclesiastica historia

historia dicam, quae non Theologiae modo, sed ipsi quoque Pontificio luri facem praefert? Persuadere mihi nequeo, sanae mentis aliquem exiltere, qui inficias ire audeat, eam esse Ecclesiastico cuiquam maxime necessariam. Homines puerorum simillimos M. Tullius eos vocabat, qui, quae olim ante se essent facta, nescirent. Quid vos de homine Ecclesiae addito existimandum putatis, cui Ecclesiae ipsius annales, et omnis Ecclesiastica historia incognita magis sit, quam Indorum mores, aut res gestae Sinarum?

Sed quid ultra abutor patientia vestra? Iam summa Dei providentia tempus illud aduenit, in quo sane dubitare nemo potest, quin tandem Ecclesiastico vito necessaria sint nobilissimarum studia disciplinarum. Divino enim consilio factum est, ut is nobis daretur Pontifex Maximus BENEDICTUS XIV., cuius quidem spectata virtus et singularis sapientia, tum etiam immensi probe ab ineunte aetate suscepti studiorum labores, non obscure indicant, quae tandem via, et qualis cursus tenendus sit. Ille enim, quod nemini vestrum latet, maiorum suorum gloriam, et auitae nobilitatis splendorem, non ad otium delidiamque traduxit: sed optimas disciplinas, quibus adolescentiam aluit, perpetuo sibi comites esse voluit, custodes, ac vitae magistras. His ducibus, non gratia aliqua, aut favore hominum, ad splendida quaeque munera, ad amplissimas dignitates, ad purpuram iter sibi munivit. Vna cum his tandem ad supremum Ecclesiae fastigium euectus, quanquam in rebus gravissimis occupatus, eas tamen abs se diuelli non patitur: sed, si quid otii sibi concedatur, illud omne in libris studiisque praestantioribus ponit. Hoc autem tanto et tam praeclearo tum ad dignitatem, tum etiam ad necessitatem literarum exemplo proposito,

eritne quisquam, qui adhuc dubitet, studiorum rationem ad nobilitatem potissimum pertinere? Quod si, ut fama est, sapientissimus Pontifex, ab ipso sui Pontificatus initio, pro optimis studiis voluntatem suam satis aperte significavit, se mirum, in magistratibus atque honoribus impertiendis, illos ceteris antelaturum, qui ceteris doctrina sapientiaque praestabunt: cui perspicuum non est, quanti demum intersit, nobilitatis decus bonis literis ac doctrinae laude cumulare? Gratulor itaque vobis, et, quanta possum voce, maxime gratulor, nobilissimi Adollescentes, quod tam felici faustoque tempore studiorum vestrorum curriculum ingenti animo ac magna spe suscepistis. Non irriti profecto cadent labores vestri, non inanes cogitationes. Quae olim virtutis et doctrinae praemia, sola generis commendatione, otium occupauerat, ea iam ingenio, virtuti industriaeque vestrae patere intelligitis. Si nobilitate ornati, si fortunis opibusque estis abunde instructi, bene est; siquidem his accedat scientiae splendor et doctrinae ornametum. Quid autem vobis deesse tum poterit? an prima reipublicae munera? an opes? an dignitates amplissimae? Profecto vobis hoc tempore. BENEDICTO XIV. Pontifice, non deerunt: qui, cum et literis et omni virtute ornatissimus, atque eius voluntas in literatos homines sit mire propensa, non committet, ut optimus quisque ingenii et laboris praemia desideret. Itaque academiis, quae iniuria temporum diu siluerant, in Vrbe restitutis, tum etiam aliis novis excogitatis, iam signum aliquod, ad bene de optimis studiis sperandum, fuisse videtur. Agite ergo, et qua virtute, qua liberalissimis disciplinis illud efficit, ut optimi principis voluntati pari diligentia ac studio respondeatis.

SANCTIS.



SANCTISSIMUM  
DOMINUM NOSTRUM  
BENEDICTVM XIV.

PONT. OPT. MAX.

ROMANAE SAPIENTIAE GYMNASIVM  
PRIMO ADEVNTEM XIV. KAL. IUNIAS  
A N. M D C C X L L

PAVLINVS A S. IOSEPHO  
NOMINE PROFESSORVM ALLOQVITVR.


*ILLVXIT nobis dies laetitiae et felicitatis plenus, in quo Sanctitas tua ad hanc Sapientiae sedem se contulit: quod tibi et bonis artibus bonum, faustum, felix fortunatumque sit. Ex optatissima quidem tui praesentia nos summo gaudio ac voluptate perfundimur; nobisque magnopere gratulamur, quod Vniuersi Catholici Orbis te moderatorem conspiciamus, quem olim habuimus clarissimi huius Gymnasii prouidum ac sapientem rectorem. Complura hic extant et magna (quod nemo non videt) singularis summorum Pontificum erga Romanam Sapien-*



tiam liberalitatis et beneficentiae monumenta, quibus Leo X. prae ceteris, Sixtus V., Urbanus VIII., Alexander VII. alique de optimis disciplinis bene mereri praeclarum sibi duxerunt. Haud minora sane abs te paterni amoris et benevolentiae argumenta exspectamus, quem de sapientia, de doctrina literarumque studio, nemini concedere certo scimus. Summi quidem Pontificibus de Pop. Rom. optime meritis a Senatu Populoque Romano ex aere, aut marmore statuas in arce Capitolina ad posterorum memoriam collocatas fuisse videmus. Sed in hac ipsa Sapientiae arce statuas tibi positas posteritas admirabitur, et longe quidem clariore titulo nomini tuo monumenta inscripta leget, nempe :

BENEDICTO. XIV. PONT. MAX.  
ROMANAE SAPIENTIAE. PARENTI. OPT. MER.  
RESTITVTIS AVCTISQVE. BONIS. ARTIBVS.

Ad publica haec vota unum superest, Beatissime Pater, ut saepe et per annos plurimos ad nos feliciter redeas: quo omnes intelligant, te non olim tantum, sed nunc etiam esse perpetuoque futurum studiorum nostrorum praesidem et custodem.



DE  
P R O B I T A T E  
V I R O L I T E R A T O  
N E C E S S A R I A

O R A T I O IX.

HABITA VII KAL. DECEMBRIS  
AN. MDCCXII



EMINENTISSIMO PRINCIPI  
SILVIO VALENTI  
GONZAGA

S. R. E. CARDINALI

PRIMO SANCTISSIMI  
DOMINI NOSTRI MINISTRO.

PAVLINVS A S. IOSEPHO.

**T**ANTVS est virtutis splendor, tanta sapientiae dignitas, ut, in quibus ejus lumen conspicimus, eos et amemus plurimum, et obseruemus quammaxime. Itaque haud miraberis, Eminentissime Princeps, quod te in isto amplitudinis gradu positum, et in tot tantisque negotiis occupatum ego homo tenuis ac vulgaris interpellare ausim. Cum enim mihi contigerit, ut te huic adirem, teque huic alloquerer, statim praeclara quaedam in te sapientiae lumina, quaedam singularis ac reconditae doctrinae lineamenta animaduerti, quae quidem omnes, nisi quis stupidus homo sit, admirari debent magnopere atque suspicere. Tum equidem intellexi, quo pacto tibi magnorum Principum benevolentiam, cum Pontificum Nuncium apud eos ageres, adeo conciliaueris, ut illi te plurimi facerent, et liberalissime atque honorificentissime tractarent. Hinc pariter nemini permirum esse debet, quam obrem tantam a Clemente XII. Pont. Max. gratiam inieris, ut ille valde te amaret, paucisque annis, quod quidem perraro fit, ad maximam, quam potuit, dignitatem extolleret. Quid vero dicam de BENEDICTO XIV., acri iudicio ac sapientia singulari principis, qui, Pontifex Maximus vix renunciatus, protinus te unum, aetate ista florentem, ex omni grauiusculorum Cardinalium senatu administrum sibi selegit, ut una tecum infinitas prope Pontificii imperii curas partiretur? Quo sane in munere qua dexteritate, quo consilio ac iudicii maturitate, his praecipue temporibus turbulentissimis, te geras, nemo non videt. Enimvero virtutes tuas praeclaras et admirandas recensere, non est huius loci, aut temporis. Illud tamen silentio non praetermittam, quod huc maxime spectat, te scilicet bonas literas impense amare; neque in grauioribus tantum disciplinis, quod plerique faciunt, acquiescere: sed complurium praeterea linguarum, Latinae praesertim, elegantiam et castitatem probe nosse: tum etiam Geometrica studia et Analytica subtilitates, quicquid demum solidam eruditionem sapit, in sinu atque oculis ferre. Proinde nec mihi venit in mentem subueneri, ne orationem hanc peramanter benigneque exciperes, quas

quae maximam tam literarum, quam literatorum ornamentum promouet, probitatem nimirum et decus. Quid enim literae in homine nequam et improbo, nisi gladius in vesani ac furiosi manu distractus? Tristissima quidem hac de re sexcenta habent Ecclesiae annales exempla, quae nulla unquam aetas satin lugebit, nulla delebit obliuio. Quare Christianae reipublicae interest plurimum, ut una cum integritate purisque moribus optimarum artium studia conspirent. Quod profecto eueniet, si viri principes eos prae ceteris ament, eos foucant viros literatos, qui ceteris antecellunt non sola ostentatione doctrinae, sed fama quoque probitatu. Itaque prodit in publicum oratio haec mea, amplissimo nomini tuo inscripta; quo et perpetuum extet meae erga te obseruantiae testimonium, et non obscurum tuae erga probos literatosque homines beneuolentiae argumentum.

**N**on immerito maiores instituerunt, ut, qui oratoris personam pro dignitate sustinere vellet, is non ingenio tantum et dicendi copia valeret, sed vitae quoque integritate ac viri boni fama praestaret. Intelligebant enim viri sapientes, nihil fore priuatis publicisque rebus eloquentia perniciosius, si illa homini nequam, tanquam latroni fida, concedatur. Et vero quod malum, aut quae calamitas hominum generi metuenda non esset, si dicendi facultas, maleficiorum terror et innocentiae praesidium, improbitatis fieret comes et scelerum ministra? Proinde M. Cato, vir prudentissimus, oratorem eum esse censuit, qui vir bonus esset et dicendi peritus; adeo ut prius ille haberet in oratore virum bonum esse, quam eloquentem. At Quintilianus, quo nemo melius rectam oratoris institutionem expressit, eo usque in huiusmodi re progressus est, ut oratorem non modo virum bonum esse oportere contendat, sed ne futurum quidem oratorem, nisi virum bonum. Cum enim omnis dicendi vis in hoc potissimum posita sit, ut audientium animos flectat, impellat, planeque persuadeat ea, quae bona et honesta sunt, quo pacto id faciat vir malus, qui in virtute atque honestate sibi minime constat? Aliud dicat profecto necesse est, quam sentiat. Prodit autem se, quamuis sedulo custodiatur,

diuturna vitae simulatio: nec erit vlla tanta eloquendi facultas, aut industria, cui non titubet atque haereat vox, si forte ab animo verba dissentiant; adeoque aut vir probus, aut plane nullus existet orator. Ego vero quamquam semper in hac ipsa summorum virorum sententia fuerim; quamquam eloquentiae, quam rerum humanarum reginam Euripides appellabat, non inuitus hanc tantam laudem tribuam, ut vnus idemque animus, eadem mens eloquentiae sit ac virtutis: illud tamen mihi satis persuadere nequeo, eam vitae integritatem ac boni viri famam ita vnus eloquentiae esse propriam, ut ad ceteras quoque honestissimas disciplinas non traducatur, eodemque inre ad singulas pertinere non debeat. Quasi vero minus oporteat virum probum existere, qui philosophus, aut qui medicus, aut qui theologi personam sustinet. Profecto aut ego nihil intelligo, aut omnes, quotquot sunt optimaes artes, non minus quam eloquentia, arctissimam habent cum virtute necessitudinem; nec potest quispiam eas satis honeste colere, aut in illis quicquam proficere, nisi ad ingenii elegantiam et doctrinae copiam accedat quoque praeclara vitae commendatio. Quare omnino sic statuo, integritatem morum non ad vnam eloquentiam, sed ad omnes singulasque disciplinas eum vtilitate ac dignitate promotendas,

fitendas, esse maxime necessariam. Quo quidem argumento vix aliud quicquam ad bonarum artium laudem magnificentius fingi, aut excogitari posse existimo. Quid enim praestantius de liberalibus studiis dici possit, quam ea esse per se arctissimis vinculis cum virtute coniuncta? Atque hinc etiam optimi adolescentem, quorum potissimum causa hodierno die haec oratio instituitur, facile intelligent, frustra se in literarum studiis dies noctesque consumere, nisi pari voluntate eodemque studio et ingenio excolendis, et moribus ad virtutem conformandis operam dederint.

Sed erit fortasse statim, qui complures in omni disciplinarum genere viros celebratissimos nobis obiciat, qui tamen nulla probitatis laude commendantur. Quot enim siue poetas, siue oratores primo Graecia, deinde Roma admirata est atque suspexit, quos tamen propter ebrietatem, aut libidinem, aut auaritiam pessime audiuisse, memoriae proditum est? Profecto neque Demosthenem, neque M. Tullium, homines integerrimos fuisse, iure quis affirmauerit, cum ille auri cupiditate, hic nimio gloriae studio, et infano quodam maledicendi furore conflagrauerit. Nemo tamen oratorem summum, maximumque ingenti quasi portentum, vtrumque extitisse negauerit. Quemadmodum enim Demosthenes cum esset dicturus, e tota Graecia ad eum audiendum concursus fieri solebat, ut Plutarchus testatus est: ita Cicero tantum dicendo valuit, ut plures eum eloquentia victorias, quam Romanos armis, consequutum fuisse, Caesar assereret. Haeret hic animus, non est quod dissimulem. At vero non desunt viri clarissimi, qui in eiusmodi vicis tum Demosthenem, tum M. Tullium excusent; ut plura in eos ab inimicis conficta crimina, quam illi reuera admiserint, arbitrentur. Ego tamen libere dicam,

quod sentio. Fuere in illis, negari non potest, vitia nonnulla: at virtutes quoque plurimae ac maximae, quae magno sui splendore secerunt, ut vitia illa ex oculis hominum quasi euanescerent. Quanta enim fuit animi fortitudo atque constantia, qua alter saepe Philippi, potentissimi regis, conatus elusit, alter tum Catilinae coniurationi, tum Clodiano furori sese opposuit? Quantus in vtroque patriae libertatis amor? Quantum in liberis, focis, aris, fortunisque ciuium suorum defendendis studium, quo illi ad supremum usque spiritum inflammati fuerunt atque incensi? Itaque mirandum non est, quod aliquot vitorum nubeculas tam eximiae splendidaeque virtutes luce sua obruerint, ac paene deleuerint. Enimvero si quis nihilominus celeberrimum vtrumque oratorem virum probum fuisse pernegauerit, non repugnabo. Fuerit quidem vterque vir malus: quid tum? Nonne miserimus eorum finis, quo vterque viuere desiit, satis superque ostendit, eloquentiam in homine malo diu valere, diuque non posse consistere? Misere vterque periit: vterque dedit contaminatae eloquentiae grauissimas poenas. Illud sane est memoria dignum, quod C. Plinius iunior ad Corelliam Hispulam, foeminam primariam, viro suo orbatam, scribit de eloquentiae magistro adolescentulo eius filio perquirendo. Etenim cum illi Iulium quendam Genitorem, hominem non minus integritate vitae et morum grauitate, quam dicendi facultate praeclarum praetulisset: huic, inquit, eum trade, Diis iuuantibus, praeceptorum, a quo mores primum, mox eloquentiam discat, quae male sine moribus discitur! O dictum sapientiae plenum! O vocem vel Christiano homine dignam! Audierat nempe Plinius a Quintiliano magistro id, quod antea diximus, non posse oratore

rem



rem existere, nisi virum bonum; audierat maxime referre in puer, ut is a praeceptore probitatem mature doceatur, sine qua vel nulla datur eloquentia, vel, si qua forte datur, sit ipsi homini eloquenti, tum aliis quoque, pernicies summa atque calamitas. Quid vero dicam de tot non modo vetustiorum temporum, sed recentioris quoque aetatis clarissimis poetis, qui, quod ingenii elegantiam viuendi turpitudine, aut loquendi licentia dehonestarent, partim exilio, partim diuturno carcere, partim etiam capite debitas sceleris sui poenas persoluerunt? Testes sunt Euripides, Nafones, Marini, Murtulae, Boccalini, alique sexcenti, de quorum calamitate ac tristissimo vitae exitu annales loquuntur.

Quod si, poetis et oratoribus praetermissis, ad philosophos conuertamur, quanam, Deus immortalis, existit in tota rerum vniuersitate hominum natio, cui magis quam philosophis, a vitiis abesse procul, et virtutem in sinu atque oculis ferre, consentaneum sit? Vna semper fuit sapientum vox, Philosophiam esse honestatis, continentiae, fidei, iustitiae ceterarumque virtutum parentem et magistram. Illam proinde M. Tullius humanae vitae ducem, virtutis indagatricem et expultricem vitiorum appellat; illam Plato donum et inuentum Deorum immortalium, quo homini maius, aut melius datum non fuerit. Quanquam enim a primis vsque temporibus indagandae veritatis studium philosophos ipsos in sectas paene infinitas propagauerit, adeo ut M. Varro aetate sua ad ducentas supra octoginta numeraret: omnes tamen siue Stoici, siue Academici, siue Peripatetici, aut alio quouis nomine philosophi, mirifice consenserunt in iis, quae in honestate vitae morumque disciplina versantur. Vna omnium fuit mens stabili-

lisque sententia, prauas animi cupiditates coercendas esse, ac virtutem rebus omnibus antefereendam. Itaque Plato pulcherrimae illius reipublicae, quam ipse optimis legibus et institutis ad formam ceterarum sic effinxit, ut omnia in illa ad bene beateque viuendum conspirarent, non aliis magistratus et imperia destinauit, quam philosophis: quod hi nimirum, ut ipse ait, homines sint temperati, fortes, iusti, magnanimi omnique virtutum genere instructi. Atque hinc illud sapientissimi eiusdem philosophi apud omnes peruagatissimum, tum demum beatas fore ciuitates, cum aut philosophi regnarent, aut reges philosopharentur.

At, dicet quispiam, cur ergo philosophi e ciuitatibus fuere saepius eieciti? Vnde tot absurdae distortaeque opiniones, ut, teste Varrone, nemo aegrotus quicquam tam infandum somniet, quod non dixerit aliquis philosophorum? Ita sane sit. Enimuero si qui sunt, aut olim fuerunt philosophi, qui indignas homine voluptates, ut de Epicureis fama est, commendauerint; vel qui vtile ab honesto seiunxerint; vel qui, Deorum immortalium sublato metu, in omne scelus iter patefecerint: hos ego vere philosophos fuisse pernego, sed Philosophiae probrum et sapientiae hostes improbissimos magna voce pronuncio. Spurius quidem et adulterinos philosophos vocabat Socrates homines eiusmodi, qui non sapientiam, cuius se falso amatores praedicant, sed temeritatem, non doctrinam, sed errorem pessime confestantur. In hunc profecto gregem coniciendi sunt Pomponatius, Abailardus, Caesalpinus, Cremoninus, alique complures, qui, vita moribusque corrupti, absurda quaedam et improba de immortalitate animorum, ac de sanctissima nostra religione somniarunt, quique, praeter inanissimum Philosophiae

nomen, nihil solidum, nihil Philosophia dignum posteritati reliquerunt.

Iam vero alio me vocant praestantissimae disciplinae, Iurisprudentia et Medicina, duos scilicet Romani huius Gymnasii clarissima lumina. Quis autem statim non videt, quam innocenter integreque vivere debeant ii, qui alternitius nobilissimae facultatis studium operamque suscipiunt? At nemo certe, nisi amens sit et omni ratione destitutus, fortunas, aut incolumitatem suam commissam velit homini, non dico nequam, sed de cuius probitate ac fide vel minimam suspicari quis possit. Actum esset de republica, si huius generis disciplinae, quibus et opes, et communis salus continentur, perditorum hominum licentiae ac libidini traderentur. Et reuera quo pacto sanctissimarum legum maiestatem, quae virtuti praemia, flagitiis supplicia decernunt, tueri queat vir malus, scelerum suorum conscientia plane convictus? Qua fronte in aliis peccata reprehendet, in quibus ipse conscius et socius habetur? An promissa, pacta, conuenta nobis seruanda esse suadebit is, cui humana et diuina iura pervertere locus sit? Sed esto: perfrictae frontis homini id concedatur. Iurisprudentiam cum multis in rebus, tum in consultatione consiliisque dandis, plurimum valere certum est. Nemo enim tenere, nulloque aduocato consilio, testa, penates, liberos ac dignitatem suam foro iudiciorumque tempestatu committit. Quis autem ignorat, quantum in consiliis vim habeat spectata virtus, fidei et religionis opinio? Omnes scilicet virtute, aut virtutis specie et opinione ducimur. Nulla vero in consilio inest vis atque auctoritas, ubi de consiliarii integritate ac virtute dubitari villo modo possit. Quare Solon, vir sapientissimus, admonebat, ut non tam iuriiurando quam

probitati fides haberetur. In foro autem quis non videt, quantum valeant, praeter ingenium et doctrinam, splendor nominis, existimatio hominum et vitae praeclare actae dignitas? Contra vero saepe fit, ut nulla fides, etiam vera dicenti habeatur; et talis aduocatus videatur esse malae causae argumentum. Hinc Asinius Pollio, qui pro Urbinae heredibus in forum venerat, statim ac Labienum, aduersariorum patronum, aspexit, eam causam malam esse exclamauit, quod a Labieno defenderetur. Itaque non immerito Quintilianus oratori, quem ad forum et iudicia exercenda instituebat, Philosophiam moralem apprime necessariam esse asseuerat; neque posse aliquem sine accurata morum disciplina fieri bonum vtilemque causarum defensorem.

De Medicina vero quid loquar? Satis est, Hippocratis libros vel leuiter percurrisse, ut quis intelligat, quam saepe et grauitur vir sapientissimus Medicinam professuris inculcauerit religionem Deorum immortalium, honestatem vitae morumque integritatem. Nam praeter memorabilem illam de purgatione morali lucubrationem, in qua ipse non tam medici, quam philosophi moralis, et viri sapientis munus sustinens, a medico prauos mores, auaritiae labem, et effraenatas animi cupiditates exulare iubet; quocirca neque Socrati, neque Platoni de sapientia quicquam concedere videtur: cui maximam admirationem non moueant ea, quae in lib. de iureiurando memoriae tradidit? Mirum, quantum in eo pietatem et reuerentiam erga Deos commendat Medicinae cultoribus, quibus mandat, ut, nisi diuino numine inuocato, in aegros curandos non ingrediantur. Quod quidem institutum vtinam aetate quoque nostra teneretur: fortasse ipsi Medicinae magistri in tantis difficillimae artis tene-

tenebris nunc minus offenderent. Quoties autem vir magnus conditionem eorum, qui sese ad studium tam arduae scientiae daturi sunt, diligenter expendit: toties monet, vna cum scientia praeclaros mores esse coniungendos. Habeant, inquit, doctrinam, bonos et generosos mores. Intelligebat enim vir prudentissimus, medicae facultatis, per quam homines publicae salutis praesides constituti ad Deos prope ipsos accedere videntur, dignitatem omnem esse interituram, nisi ad illam utendam homines probi ac bene morati admoventur. Intelligebat, medici improbitatem nemini non fore periculofam, et magis, quam morbum, infectam ac metuendam. Verum quid vos diutius in re minime obscura detineo? Quasi vero, ut antea dixi, homines tam amenes, aut oscitantes dari possint, ut, cum eorum agitur salus, ad alium, quam ad probum et praeclari nominis virum re ipsa confugiant.

Quid autem statuendum esse putatis de iis, qui non humanae alicui facultati, sed omnium integerrimae ac diuinæ, Theologiae nomen dederunt? Eritne quisquam, qui dubitet, singularem animi probitatem ad virum theologum pertinere? Ego equidem sic existimo, neminem dici posse theologum, cuius vitae ratio theologo plane digna non sit. Profecto ipsum Theologiae nomen adeo per se sacrum et diuinum est, ut quicquid, non dicam improbum et flagitiosum, sed humanae imbecillitati affine est, ab huius scientiae cultoribus abhorreere prorsus videatur. Irridebat Cicero Epicurum, quod is temperantiam quidem landaret, interim vero in voluptate, quae temperantiae inimica est, summum bonum collocaret. Quid si forte fieret, ut, qui serio perpetuoque agunt de Deo immortalis, de virtutibus Christiano homines dignis, de felicitate sem-

piterna beatorum, et, si vis etiam, de poenis impiorum apud inferos praeparatis, de quibus omnibus persuasissimum nobis esse volunt, ipsi autem longe alias viuendi rationes sequerentur? Anne minus huiusmodi homines essent irridendi? Mores integri et incorrupti. Aristoteles inquit, fidem praecipuam faciunt: Qui aliter viuunt ac docent, hi profecto eorum similes esse videntur, qui agunt in scena, quiq; statim ac a scena ipsa recesserunt, nihil eorum curant, quae paulo ante summa voluntate curare videbantur. Ex istorum fortasse licentia permanavit in vulgus eum religionem amittere, qui amicitias colit theologorum. O vox improba ac nefaria, quae crimen paucorum in vniuersum theologorum sanctissimum coetum detorquet! Quot enim sunt ante oculos nostros in hac ciuitate clarissimi viri, qui non minus pietate et religione, quam theologicis studiis excellunt, quique integerrimae vitae ratione calumniam huiusmodi diluunt prorsus atque refutant? Enimvero ex hac ipsa vulgi opinione, qualiscunque demum ea sit, illud manifesto consequitur, rem absurdam et incredibilem videri, aliquem posse sine splendore virtutis theologum existere, quod nimirum theologia et religio, religio et virtus, vno eodemque spiritu viuere videantur.

At vero quanti demum interfit ad omnes generatim disciplinas innocentia morum et virtus, ex iis, quae breuissime dicam, facile dignoscetis. Nemo in literis tam hospes, aut tam parum exercitatus est, qui illud ignoret, ad praeclarum aliquem in bonis literis progressum faciendum, praeter ingenii acumen et intelligendi solertiam, maxime requiri sedati placidique animi tranquillitatem. Experientia quippe docemur, si qua alia in re, tum praecipue in literarum studiis, id quod

Cicero longo rerum vſu praeditus dicere ſolebat : turbatum animum non eſſe aptum ad exequendum munus ſuum. Quae autem maior, aut quae optimis ſtudiis magis inimica animi perturbatio, quam quae a vitiis, prauisque cupiditatibus ortum habet? Obruunt prorsus omnem ingenii vim eiſmodi motus; et alacritas illa mentis, quam literarum ſtudia depoſcunt, in ea animi iactatione languet ac deficit. Atque hinc quemadmodum, qui infirma ſunt oculorum acie, lucem ſolis intueri ſine moleſtia haud poſſunt: ita, qui aegro animo ſunt, ab ſtudiis prope abhorrent, et literarum genus omne faſtidium atque auerſantur. Huc accedit, quod iſtiusmodi homines a literatorum virorum ſocietate, atque ab omni cum illis amicitiae vſu prohibeantur. Amant quidem homines eruditi familiaritatem et iucundiſſimos amicorum congreſſus. Illa enim ſive ingeniorum, ſive ſtudioſorum ſimilitudo facit, vt ſeſe mutuo videre et alloqui gaudeant; ibi multa de optimis diſciplinis, multa de rebus domi forſique praeclare geſtis inter ſe loqui ſolent; atque ita moleſtiſſimas diei horas ſuauiſſime ſermonis placidoque otio traducunt. Quis autem in hoc tali virorum coetu diu ferat hominem, liberalibus quidem ſtudiis excultum, ſed moroſum, ſed iracundum, aut maledicum, qui ad omnia prope irascatur, qui de republica, de principe, ac de religione quoque ipſa liberius imprudenterque eloquatur? Amicitia profeſſo a natura data eſt, non vitiorum illecebra et incitamentum (vt apud Ciceronem Laelius contendebat): ſed comes et adiutrix virtutum; eiſque maximum ornamentum tollit, qui ex ea tollit id quod rectum et honeſtum. Idcirco ſapientes, niſi in bonis et honeſtis viris, amicitiam dari poſſe pernegarunt. Ego olim meiſui quosdam in hac Vrbe li-

teratos, homines reuera non mediocriter doctos, quorum tamen conſuetudinem familiaritatemque plerique fugere et auerſari ſolebant, non aliam ſane ob cauſam, quam quod omnis literarum reſpublica eorum ſupercilio niti videretur. Amabant omnes, quantum ego intelligebam, multiplicem eorum doctrinam rerumque maximarum, quibus illi inſtructi erant, ſcientiam: ſed nemo aequo animo ferre poterat ipſorum vanitatem et arrogantiam, quod nimirum ſe ſolos doctrinae principes facerent, quod parem ſibi neminem vellent, quod omnia denique ad libidinem ſuam vituperarent. Itaque viri prudentes fatius eſſe putabant, milites illos Plautinos fugere, quam pati proiectam eorum audaciam atque ſuperbiam; quae plerumque cauſa eſt, cur tot clari literaturae viri omnibus deſpectui ſint, et nullum eorum ingenia praeſtium, nullam dignitatem conſequantur. Conqueruntur ſaepe multi de infelicitate literatorum, et quotidiano ſere ſermone percrebuit, iam prope conclamatum eſſe de literis; neminem hoc tempore, in Italia praefertim, exiſtere, qui, vt olim, gratia, auctoritate, tum etiam opibus, literarum ſtudia foueat atque amplificet; principes quidem alias bonarum artium cupidos ſtudioſorumque fautores, iam longe aliud moliri, et minime omnium de optimis diſciplinis cogitare; adeoque cum Maecenates deſint, mirum non eſſe, cur non dentur, vt poeta ait, Marones. Ego equidem nolo publicae huiusmodi querelae me opponere; nolo tam peruagatae opinioni repugnare: illud tamen dico, ſaepe literatorum vitio fieri, vt nullum habeant literae patrocinium. Quis enim domi alere, aut fortunis opibusque augere velit homines, certe quidem ingenio et eruditione praefiſtantes, ſed turbidos et ingratos, (in quo ſane vitio nihil mali

malis non inest) tum etiam ad diffidia et rixas prope factos, qui dicacitate, aut scribendi licentia nemini parcant? In domum recepit splendide satis ac liberaliter superiore memoria Carolus Emanuel, Sabaudiae dux, Io. Baptistam Marinum, poetam eius temporis celeberrimum, quem praeter alia beneficia, quibus illum large cumulauit, sanctorum quoque Mauriti et Lazari militari ornatum decorauit. Quid postea? Homo aequè imprudens ac beneficiorum omnium immemor, libellis quibusdam editis, tum aliis causis, ita optimi ac beneficentissimi principis animum offendit, ut, nisi mite illius ingenium et a caede hominum abhorrens obstitisset, Marinus temeritatis suae poenas capite persoluisset. Quid vero de Ioanne Ciampolo loquar? qui propter elegantiam ingenii et singularem eruditionem cum apud Vrbanum VIII. Pont. Max. summo loco et gratia floreret, homo superbus et inflatus, nimia loquendi libertate carpendique vitio id effecit, ut a liberalissimo Pontifice tum ab aula, tum etiam ab Vrbe, specie quadam honoris, dimoueretur: quem deinde, ut se reuocaret, neque suis, neque amicorum precibus exorare unquam potuit. Dies me citius, quam oratio deficiat, si plura id genus enumerare velim, quae apud Ioannem Pierium Valerianum, Cornelium Tolleum atque alios extant de infelicitate literatorum argumenta sane Inculentissima, quibus liquido apparet, ingenium et doctrinam sine probitate pestem hominibus calamitatemque importare. Non ergo errori hominum, aut fortunae temeritati tribuendum, quod persaepe videamus, viris perexiguo ingenio et mediocri doctrina ornatis dignitates et honores amplissimos deferri: contra vero alios in obliuione iacere, qui, quod acriori essent iudicio, et scientia ampliori abun-

darent, iam esse in vado, et in portu nauigare videbantur. Plus illorum profecto valuit doctrinae mediocritas, ab integris purisque moribus commendata, quam stulta et inanis istorum sapientia, qui sibi minus, quam aliis sapere didicerunt. Neque enim viri principes putant, reipublicae multum interesse eloquentiam, scientiam iuris aliasque liberales disciplinas, nisi his quoque grauitas et honestas morum, vitaeque magistra prudentia accedant. Itaque M. Tullius, vir singulari consilio sapientiaque instructus, Marcum filium grauitè admonuit, ut viri boni nomen prae ceteris rebus tueretur, atque illud commodis et fortunis omnibus anteferebat. Non est, inquit, vlla res tanti, aut commodum vllum tam expetendum, ut viri boni et splendorem et nomen amittas. O praecellaram et admirandam hominis sapientissimi vocem! O diuinum et salutare optimi parentis monitum! Non opes et fortunas, non fasces et imperia comparanda filio proponit: sed viri boni et honesti nomen. Utinam nostra quoque aetate parentes in liberos suos, egregia indole et ingenio ornatos, tam sapientes animi sensus infunderent! Utinam illos patria charitate monerent, ut honestatem et famam in oculis perpetuo ferant, nulla cum re conmutandam: qua semel amissa, tum de ingenio, tum de omni doctrinae spe, actum esse intelligant. Quod si forte parentes caeco amore ducti liberos suos, non tam ad virtutem et honestatem, quam ad opes et magistratus assequendos cohortantur: ad vos illud spectat, clarissimi bonarum artium magistri, qui parentum ipsorum vices auctoritatemque suscepistis. Vos, inquam, adolescentes ipsos, auditores vestros, pro dignitate vestra ac sapientia saepe commonere debetis: doctrinam sine virtute exitium fieri atque infortunium, frustra se

Romae

Romae ab optimis studiis opes et honores quaerere, frustra principum virorum expectare benevolentiam et gratiam, nisi praeclara vitae ratio scientiae ingenioque praeinceat; Non esse Romae, quod quidam improbi distillant, omnia exposita; et pecuniae magnitudine, aut potentis alicuius gratia, ad omnia aditum patefieri. Fuerint haec vitia temporum praeteritorum. Nostra quidem, tum superior aetas, eos vidit sanctissimos principes, qui non minus innocentiam vitae, quam doctrinae praestantiam ante oculos habuerunt. Horum nemini profecto concedit BENEDICTUS XIV.

optimus ac sapientissimus Pontifex, qui cum in omni vitae genere praeclarissimarum rerum scientiam cum maxima vitae honestate ac singulari virtute coninxerit, non est dubitandum, quin hominum commendationem cum ab ingenio, tum a virtute ducat; atque eos, prae ceteris maximis praemiis, honoribus ac beneficiis sit ornaturus, qui, ipse non dissimiles, et doctrina et probitate praestabunt. Tam magnum et praeclarum summae auctoritatis exemplum cohortationibus vestris, optimi praeceptoris, fidem et robur, idemque orationi meae terminum dabit.

DE

# VI ET POTESTATE LITERARVM

## ORATIO X.

HABITA VII. KAL. DECEMBRIS.  
AN. MDCCXLII.

EMINENTISSIMO PRINCIPI  
NICOLAO IVDICE  
S. R. E. CARDINALI

PAVLINVS A S. IOSEPHO.

S. P. D.

**S**INGVLARIS illa tua ac nemini non perspecta humanitas, qua me primum ab eo tempore, cum, Clemente XI. Pontifice Maximo, Apostolici Palatii praefecturam summa cum laude gereres, complexus es, et qua deinde a Benedicto XIII. Cardinalis renunciatus, me semper, quaecunque se dedit occasio, singulariter,

singulariter, certe postulare videbatur, ut observantiam erga te meam aliqua literarum significatione publice testarer. Sed cum satis exploratum mihi esset acce illud ac perspicax tuum de bonis literis studique doctrinarum iudicium, facile intelligebam, nihil tibi probatum fore, nisi quod esset ingenio summe elaboratum atque perfectum. Itaque diem expectabam, in qua tandem rade donatus, ab hoc publico diuturnoque docendi munere seruari possem; tantumque mihi otii suppetet, quantum Geometricis quibusdam, quae saepe tecum communicaueram, cogitatus meis perficiendus limandusque satus esset: quae quidem nomini tuo nuncupare statueram, ut tuorum essent erga me beneficiorum perpetuum monumentum. Sed cum interim docti quidam viri exis, qui domum tuam, tanquam bonarum artium et sapientiae officinam, frequentare solent, ad te detulerint, se illo die summa cum voluptate in Romano Gymnasio de singulari vi ac potestate literarum in animis hominum pervincendis me dicentem audiuisset, cum scilicet solenni oratione studiorum initia celebrarem: postero die unus ex familiaribus tuis ad me venit nomine tuo mihi perhumaniter gratulatum, qui mihi affirmavit, te orationem ipsam perlegendam valde cupere. Nihil moror: ecce illam, qualiscunque ea sit, ad te mitto; obtestorque te plurimum, ut, quicquid in ipsa minus emendate, minus polite diserteque dictum offenderit, illud omne censoria animaduersione libere notes, expungas, corrigas. Nihil enim mihi gratius, nihil optabilius accidere poterit, quam, talem virum sapientia, doctrina, litterarum excultum, studiorum meorum iudicem ac censorem habere. Interea vero pro tuis erga me meritis dum tibi aliquam referre gratiam, ut antea dixi, cogitabam, nouo me beneficii genere tibimet deuinctum esse intelligo. E Collegio Nazareno VI. Kal. Decembris M DCC XLII.

Quo plura sunt, PP. amplissimi, quae ad optimarum artium laudes celebrandas quotannis ex hoc loco afferuntur, eo certioribus argumentis intelligere potestis, nullum esse lumen ingenii, nullum eloquentiae flumen, nullamque dicendi copiam, quae earum dignitatem circumscribere possit, certisque terminis definire. Nam cum iam toties de illis, celeberrimo hoc die recurrente, clarissimi oratores verba fecerint: adhuc tamen tam multa, tam varia, tamque splendida sese offerunt argumenta, ut non tam inuenire quid dicam, quam seligere quid potissimum dicendum sit, res mihi omnium longe difficillima videatur. Vix enim literas cogito, cum statim occurrunt animo utilitates et vberissima commoda, quibus illae hominum vitam augent; occurrit splendor et gloria, quam cuique amplissimam afferunt; occurrit voluptas maxima et incredibilis iucunditas, qua nos

in omni fortunae gradu cumulatissime afficiunt, ut proinde in tanta rerum dicendarum copia quid agam, quo me vertam, aut quam viam insitam, prorsus ignorem. At vero in tam ancipiti deliberatione cum diu mulumque versatus essem, vnam tandem animo prospexi literarum praestantiam ceteris praeferendam, longeque ceteris illustriorem, quam et celebritate huius loci et sapientia vestra dignam fore iudicaui. Animaduerti scilicet, eam esse literarum vim incredibilem ac prope diuinam, ut in animis quoque hominum imperium habeant ac potestatem. Qua quidem re quid praeclearius ad bonarum artium dignitatem dici, aut quid maius excogitari vnquam possit, minime video. Neque enim tenuis, aut vulgaris agitur doctrinae triumphus, si elatos mortalium animos ac natura superbos illa vincere queat, sibi que subicere. Itaque nemi-

ni,

ni, quemadmodum spero, inin-  
cunda erit oratio mea: nam et  
vos Adolefcentes optimi, qui  
tandem futuri sint studiorum  
vestrorum fructus, iam inde co-  
gnosceris, et vos, PP. amplif-  
simi, taciti reputabitis, quae  
sint dignitatis vestrae ornamen-  
ta, et in quo gloriae fastigio  
vos ipsa literarum studia collo-  
cauerint.

Quanta sit doctrinae vis,  
quantumque in animis hominum  
valeat, poetae fabulis pulcher-  
rime fictis rem non obscure ad-  
umbrarunt: Orphei praesertim,  
quem dulcedine lyrae non mo-  
do sylvas et saxa ad se trahe-  
re, sed etiam feras immites et  
flumina cantu detinere finxe-  
runt: qui proinde crudeles ti-  
gres et rapidos leones lenire  
ab Horatio dictus est. At vero  
non ille sylvas, ut D. Grego-  
rius Nazianzenus ait, sed syl-  
varum incolas vi et suauitate  
loquendi traxit; non saxa, sed  
dura hominum pectora molli-  
uit; non feras, sed efferatos  
hominum mores mitigavit; in-  
stremo non flumina, sed iuue-  
nes in omni voluptatem de-  
fluentes continuit. Equidem hac  
ratione primis illis temporibus  
conditae vrbes, et ciuitates con-  
stitutae sunt. Sic abducti ab agris  
et sylvis homines, fera agre-  
stisque vita mutata, leges ro-  
gatae, iura iudiciaque descri-  
pta, sapientis videlicet viri do-  
ctrina atque eloquentia. Neque  
aliud certe fuit regnorum ini-  
tium, regumque nomen et po-  
testas non aliunde profecta est.  
Nam cum aliquis in ciuitate  
existeret, qui ceteris sapientia  
praestaret, et, quid aequum,  
quid iniustum, quid utile, quid  
honestum sit, sapienter defini-  
ret; quique praeterea res tum  
priuatas, tum publicas optime  
administrandi rationem trade-  
ret, populus ad eum frequens  
conuenire, ab eo tum de bello,  
tum de pace consilium capere,  
atque ex eius imperio, non vi  
et armis, sed voluntate et ob-  
sequio omnia facere consuevit.

Sic ille Nestor, cuius ex ore  
melle dulcior fluebat oratio, Pi-  
liis imperasse dicitur; sic Euan-  
der in Latio imperium tenuit  
auctoritate, quam sibi apud  
rudes populos admiratione lite-  
rarum conciliauit; sic denique  
Numa Romanis leges praescrip-  
sit, singularis sapientiae fama  
et Egeriae Deae colloquio cele-  
bratus. Itaque quod strenui du-  
ces ac fortissimi imperatores co-  
piis atque exercitu instructi, et  
omnia vi, minis, igne ferroque  
vastantes, vix tamen obtinent,  
ut populos in ditionem suam re-  
digant, id olim per se nullis  
armis nulloque terrore militum  
obtinuebat doctrinae ratio, cum  
tot illi gentes ac populi sese vi-  
tro dederint. Consecutis inde  
temporibus, omnes optime in-  
stitutae ciuitates, omnes liberi  
populi, omnes praeclarae res  
publicae semper apud se doctif-  
simos viros habere studuerunt,  
quos de politicis rebus, de oe-  
conomicis, de legibus, de iu-  
diciis ac de omni ciuili scientia  
confulerent. In his fuere Solon,  
Lycurgus, Zoroaster, Trime-  
gistus alique plurimi, qui san-  
ctissimis legibus et institutis ci-  
ues suos sapientissime guberna-  
runt. Neque vero mirum, quod  
populos ita doctrinae fama sibi  
subiecerit, cui clarissimi quoque  
duces et imperatores terrarum  
orbis victores, manus dare, et  
ab ea vinci praeclarum sibi di-  
xerunt. Philippus, rex Mace-  
donum, vir magnitudine animi,  
et bellicis laudibus cum paucis  
comparandus, Athenienses bello  
gravi diuturnoque vicerat; cum-  
que Athenas in suam potesta-  
tem redegisset, communis fuit  
tum ducum, tum etiam amico-  
rum regis sententia, ut rex vr-  
bem sibi, ac Macedonum nomi-  
ni tot annos infestissimam, ali-  
quando euerteret, euersamque  
solo aequaret. Sed Philippus,  
eorum spreto consilio, recusa-  
uit, urbem doctrinae, ut ipse  
ait, et literarum theatrum ex-  
scindere. Quid vero Cn. ille  
Pompeius, tot tantisque victorijs  
Europa,



Europa, Asia, atque Africa terra marique partis iure optimo magnus, qui Posidonii philosophi auditor fieri, eiusque positibus laureatos fasces submittere gloriae sibi duxit? Quid C. Caesar, qui M. Tullium, Pompeianas partes secutum, post Pharsalicum praelium non modo in gratiam recepit, sed eum quoque deinde perpetuo et coluit et singulari humanitate complexus est; quod diuinam eius eloquentiam tanti faceret, ut illum omnium triumphorum laurea dignum affirmauerit, multo praeclarius esse asseuerans, ingenii et Romanae linguae terminos, quam imperii fines promouere. Enimuero admirabilem esse literarum vim inde clarius intelligetis, si in peruersis hominum moribus castigandis, prauisque affectibus leniendis eas plurimum posse animaduertatis. Omnes quidem, quotquot homines sunt, probe norunt, perturbationes animi morbos esse graues et periculosos, quibus ille longe deterius, quam aestu febrique corpora, conficitur. Quid enim aliud est amor, odium, metus, voluptas, dolor, nisi grauissimae animorum aegritudines, quibus illi misere cruciantur? Quarum saepe tanta vis est atque acerbitas, ut homines ab iis intendant, vel impatientes morbi voluntariam sibi mortem consciscant. Quot, quaeso, amor vsque ad insaniam induxit? Quot dolor exulcerauit? Quot moeror ad mortem adegit? Sed plures profecto sanauit pharmacum illud, quod Homerus Nepenthes nominauit, sermo scilicet doctrinae conditus. Hoc nimirum Helena Telemachum hospitem ingenti moerore confectum ad hilaritatem reuocauit, cum inter pocula paternam Ulyssis virtutem, resque ab eo praeclare gestas commemorans, adolefcentis animum reddidit alacriorem. Et sane quorsum spectabant Tusculanae M. Tullii quaestiones de tolerando dolore, de aegritu-

dine lenienda, ac de reliquis animi perturbationibus sedandis? Quo tendebant Platonis, Clitomachi, Carneadis, et aliorum de luctu minuendo opuscula? Quo virorum illustrium tot de consolatione commentaria, Sulpitii ad Ciceronem, Ciceronis ipsius ad semet de interitu filiae consolandum, Senecae consolatio ad Polybium, ad Marciam, ad Heluiam matrem, Plutarchi ad Apollonium, ad uxorem; et scripta alia, quibus viri sapientes parem magnitudini doloris medicinam attulerunt? Intelligebant enim eiusmodi viri, extremis malis, extrema remedia esse adhibenda: proinde Philosophiae praeceptis atque omni doctrinae genere vsi sunt, qua sola potentissima vi sese malorum acerbitati mederi, et languentes ac prope desperatos animos ad sanitatem posse traducere putauerunt. Audite, quid M. Tullius in Tusculanis quaestionibus de consolatione dicat, quam ipse sibi ob amissam carissimam filiam paene doloris vi exanimato, a literis et doctrina quaesiuit. Aegritudinis sedatio, inquit, et hesternae disputatione sedata est, et in consolationis libro, quem in medio (non enim sapientes eramus) moerore et dolore conscripsimus. Quodque vetat Chrysippus ad recentes quasi tumores animi remedium adhibere, id nos fecimus, naturaeque vim attulimus, ut magnitudini medicinae, doloris magnitudo concederet. O magna doctrinae vis, quae acerbissimum vulnus paterno pectori recens inflicum si minus sanare, ac certe lenire potuit.

Verum inter ceteras animi aegritudines, quibus homines, quasi mortifero morbo vrgeri, atque admodum dies noctesque vexari solent, duae sunt omnium maxime periculosae, libido atque iracundia. Sunt hae profecto geminae furiae taedis ardentibus armatae, quae hominem

nem in omne flagitiorum genus praecipitem agunt: neque villa vis est, aut virtus, quae illum cohibere possit atque retrahere. Non parentum obsequia, non amicorum consilia, non suppliciorum metus, non ipsa vitæ discrimina quicquam valent, ut animus ab alterutra huiusmodi face inflammatus queat a concepto scelere dimoueri. Rationis enim lumine orbatus, in praeceptis ruat necesse est. Sed o admirandam literarum virtutem! o vim doctrinae incredibilem! attendite, quaeso, factum singularem admiratione dignum, quod nisi Valerius Maximus, Diogenes Laertius, Lucianus, tum etiam ex nostris sanctissimi viri Hieronymus, Augustinus et Ambrosius, literis tradidissent, vix cuiquam credibile videretur. Erat Athenis Polemon, adolescens luxuria perditissimus, a summo mane ad vesperam vsque ebrius et crapulae indulgens, quem Athenienses, ut Lucianus refert, se nunquam sobrium vldisse affirmabant. Hic, lucente iam sole, e nocturno conuiuio domum rediens, ut erat vnguētis delibutus, floribus coronatus et pellucida veste amictus, Xenocratis celeberrimi philosophi scholam, doctorum hominum turba refertam, ingreditur. Atque hic crapulam exhalans vinoque languidus, non modo inter honestissimos iuuenes eo lasciuiae habitu confedit, sed etiam ore impuro disputationem interpellare ausus est. Tum omnes indignitate rei commoti, stomachari, fremere, indignari audacissimi hominis petulantiam. At Xenocrates, vultu nihil immutato, omisissis iis, de quibus diserebat, de modestia ac temperantia loqui coepit, tanta quidem vi et grauitate, ut Polemon, quasi graui somno experrectus, statim resipiscere visus sit. Proinde primum coronam capite detrahā proicit, deinde brachium in pudoris et modestiae signum

intra pallium reducit, demum effusam oris hilaritatem contraxit, atque omnem prorsus luxuriam ac turpitudinem abdicauit; adeo, ut et philosophus postea clarus euaserit, et ipsi magistro in schola regenda successerit. Equis, quantum doctrina valeat, plane non videt, si ex vna Xenocratis lectione iuueuem perditum luxuria, pudicum et continentem, turpissimum ganeonem, philosophum praecclarum fieri videat? Quid si dicam illum ipsum in reliqua vita e grauitate, temperantia ac pudore se gessisse, ut ad eum scorta accedere non auderent? O inauditam sapientiae virtutem, omnium literis et praedicatione dignam! At vero de iracundia, quam Ennius infaniae principium esse dixit, haud minorem victoriam attendite. Hanc autem eloquentia, quae flexanima non immerito a Paciuio poeta dicta est, veluti propriam sibi vindicat; quam proinde vobis, studiosi eloquentiae adolescentes, longe iucundiores fore non dubito. Oderat C. Caesar Q. Ligarium acerbo animo atque infesto, quod ille pro Cn. Pompeio in acie Pharsalica steterat, tum etiam, quod multa alia contra dignitatem suam eum fecisse non ignorabat. Quamobrem constituerat apud se cum eo nullo vnquam tempore reconciliari. Cum autem Ciceronem pro eodem Ligario sibi supplicaturum audire non recusasset, amicos praemonuit, Ciceronem abs se, non ignoscendi animo, sed officii gratia auditum iri. Quid enim obstat, ait, quo minus M. Tullium pro Ligario dicentem audiamus, quem iam pridem hominem improbum et hostem nostrum esse constat? Age porro dixit Cicero pro Ligario, at tanta dicendi arte atque ingenio, tanta ipsius Caesaris propter clementiam commendatione, tantaque erga reum miseratione ac precibus, ut Caesar, mutata voluntate, iniurias omnes Ligario condonauerit, atque in gratiam

gratiam receperit. Sed audite rem a Plutarcho diligentius expositam. Postquam Cicero (inquit) dicere orsus est, mirifice eum commouit; variisque affectibus et mira gratia eius oratio ita progressa est, ut colorem identidem Caesaris facies variaret, perspicuumque omnibus esset, eum animi motibus concitari et ad misericordiam flecti. Denique ubi pugnam Pharsalicam orator attigit; usque adeo animo perculsus est, ut toto corpore contremuerit, atque ei de manibus libelli aliquot, quos tenebat, exciderint. Itaque precibus expugnatus, Ligarium crimine absoluit. Audiuitis, Auditores, Caesarem illum virum fortissimum atque inuictum, qui tot victorias reportauerat, quot bella gesserat; tot gentes populosque domuerat, quot praelia commiserat, a Cicerone eloquentiae vi expugnatum, oratori dare manus, reo parcere, atque inimicum in gratiam amicitiamque recipere? Quae victoria tam noua et incredibilis, quae cum hac comparari vnquam possit? Quae tanta virtus ac potestas, quae victorem gentium et imperii Romani moderatorem cogeret ad hominem sibi insensissimum complectendum, cui hostem se perpetuum fore obfirmata voluntate declarauerat? O quam vere ipse M. Tullius eloquentiam animorum dominatricem centies et millies nominauit! Quam recte Euripides aiebat, quaecunque ferrum moliri, atque efficere potest vis hostium, ea omnia confici oratione viri eloquentis. Profecto ne dies deficeret, si clarissimas et innumerales commemorare velim victorias, quas eloquentia in omni temporum memoria detulit, principum regumque animis expugnatis. Sed hic non eloquentiae laudes celebrandi locus est, cum in praesent omnium disciplinarum causam agendam susceperim. Quae quidem singulae tantam in se vim

continent, ut animos hominum natura caelestes et diuinos sibi subiicere queant. Quid enim de medendi facultate, quid de iurisprudentia dicam? Vtinam illae in nobis haberent minus auctoritatis et imperii! profecto nos earum cultoribus fortunas, opes, vitam denique ipsam haut tam facile crederemus. Medicos quidem, eloquentes praefertim, vitae necisque nostrae imperatores statim fieri, C. Plinius senior iniquo animo ferebat. Enimuero honorem illis nos liberaliter deferre, sacrae literae iubent. Inrisperitos autem, in hac potissimum ciuitate, tanti facimus, ut eorum iudicio consilioque cuncta fere dirigi, gubernarique videantur. Hinc est, quod tamen saepe homines, non splendore saepe generis, non opibus, non aliqua ratione praeclaros, sed obscuro et aliquando etiam infimo loco natos, videmus apud principes viros et clarissimos reges amicitia, gratia et auctoritate valere, quorum ipsi doctrina consilioque omnino nituntur. Equidem memoriae proditum est, Alexandrum Seuerum nihil vnquam, nisi ex doctorum hominum scientia, gerere consueuisse. Nec nobis hic vetustiora consecrari opus est: quot modo sunt in Vrbe ante oculos omnium nobilissimi Praefules, et amplissimi Cardinales, qui hominum doctrina praestantium sententiam in grauissimis negotiis exquirunt, eorum consilia sequuntur, omnia demum ex vnus sapientis viri iudicio deliberant? Et erit quisquam, qui dubitet, magnam inesse doctrinae vim magnamque auctoritatem, cum videat viros genere ac dignitate primarios, tum etiam aetate graues, qui omnibus imperare, nemini parere consueverint, homini tamen literato sese vltro subiicere, suoque illius praeferre iudicium, qui cum iisdem sit neque aetate, neque ceteris vitae ornamentis vlllo modo comparandus?

M

Valeant

Valeant ergo, valeant, qui hoc tempore de literarum studiis demisse cogitant, et perperam obloquuntur. Non iacent profecto literae; non otiantur; neque despectui sunt vili, ut isti dicitant, literarum cultores. Habet, habuitque semper suam vim, suum robur scientia et doctrinae praestantia; atque id non solum in vulgo et in multitudine imperitorum: sed etiam in regum et clarissi-

morum principum animis, qui a uemine vinci, nemini cedere, nisi sapientibus viris, praeclarum sibi esse ducunt. Quamobrem, Auditores, si quis erit in posterum, qui, vobis audientibus, literarum dignitatem contemnere audeat, aut doctrinae studia nullius utilitatis, nullius gloriae, nullius denique momenti esse iudicet, hunc vos vel amentem, vel dignitatis suae parum cupidum esse putatote.

DE  
LAUDIBVS  
LEONIS X.  
IN  
ANNIVERSARIIS EIVS  
PARENTALIBVS  
ORATIO XI.

HABITA VII KAL. MARTII  
AN. MDCCXLV.

**T**RISTIS semper et acerba mihi accidit illius diei memoria, in quo Leo X. Pont. Max. incredibili bonorum omnium moerore summaque totius Urbis comploratione et lacrimis interijt. O diem reipublicae ac religioni funestissimum! O luctuosam tristissimamque Pop. Rom. calamitatem! Iam quinque supra viginti et ducentos enumerantur anni, ex quo ille publicae felicitati praereptus est, et, tanquam recenti refricato vulnere, adhuc miseris modis dolemus. Solenni quotannis officio in hoc religionis et literarum domici-

lio Leoni ipsi insta perfoluimus, clarissimam illius memoriam singulari laudatione prosequentes: sed tantum abest, ut pietatis huiusmodi significatione satis nobis fecisse existimemus, aut in nobis extincti desiderium minuatur, ut illud contra magis ac magis in dies augeri sentiamus. Etenim tanta fuit Leonis X. virtus, tam incredibilis sapientia, tanta in omnes, praefertim vero in viros doctos, liberalitas ac beneficentia, ut, quotquot iisdem temporibus extiterunt scriptores, illum summis laudibus ad caelum extulerint; illam munificentissimum principem,

principem, illum Pontificem optimum, ac sempiterna recordatione dignum, vnanimi consensione praedicauerint. In tanta igitur celebritate laudum tantoque virtutum plausu, quo me vertam, aut quid consilii capiam, prorsus ignoro. Neque enim possunt, tam breui ad dicendum tempore constituto, amplissimae Leonis virtutes vel numerando recenseri: neque mihi mens est ire per singula praeclarissima eius facta, et vos diutissime in audiendo defatigare. Itaque digitum ad fontem, vt aiunt, intendam, atque operam dabo, vt paucis intelligatis, Leonem X. hoc tantum sui desiderium reliquisse, hanc tantam gloriae diuturnitatem esse consecutum ex liberalitate in literarum cultores, ex summo denique optimarum artium patrocinio. Hinc profecto ille sibi nominis immortalitatem comparauit, atque hinc quoque hodierno die erit mihi praecipuum ac proprium de eius laudibus argumentum, ceteris quidem ab eo praeclare gestis silentio praetermissis, quae fere singulis annis ex hoc amplissimo loco celebrari consueverunt.

Digna sane viro principe laus est liberalitas, quam primam et peculiarem imperantium dotem Alexander Seuerus nuncupare solebat; qua si qui careant, vix illi principis nomine digni esse videntur. Nimirum qui rerum potiuntur, hac vna virtute populorum beneuolentiam sibi maxime conciliant, imperiumque sibi beneficiis longe melius, quam armis tuentur. Quod cum satis optimi principes intelligerent, illud dies noctesque cogitabant, quo pacto possent de omnibus bene mereri; ac diem illum, in quo non aliquem beneficio ornatum sibi que deuinctum dimisissent, sibi met omnino periisse putabant: quemadmodum prae ceteris de Tito Caesare, de Traiano imperatore, aliisque plurimis historiae loquuntur. At ve-

ro quanquam principes ipsi liberalitatis laude tantopere commendentur: sit tamen saepe, vt ea ipsa sic abutantur, vt propter illam, non tam in laudem quam in sermionem et vituperationem hominum veniant: quod nimirum, qua in re liberalitas eiusmodi sita sit, minime intelligant. Alii enim in venationibus, in ludis sumptuosiss et spectaculis magnificentissimis pecuniae magnam vim profundunt; alii in tabulis pictis, signis et marmoribus; alii denique in magnificentia aedificiorum, in fontibus ac pyramidibus ad caelum vsque extolendis, immensas publici aerarii opes insumunt atque disperdunt. Verum errant, profecto errant, si non in publicis commodis, sed in vanis huiusmodi substitutionibus verae liberalitatis laudem contineri sibi persuadeant. Falluntur, inquit Tacitus, quibus luxuria specie liberalitatis imponit: perdere multi sciunt, donare nesciunt. Hinc est, quod Plinius, vt veram et germanam Traiani ab inani et fucata praetoriorum Caesarum, liberalitatem distingueret: ambitio, inquit, et iactantia et effusio et quiduis potius, quam liberalitas existimanda est, cui ratio non constat. Et Isocrates regem suum Nicoclem admonerat, vt splendidissimus quidem esset, sed in his rerum sumptibus liberalitatem ostenderet, quae fructum nunquam interiturum esse parerent.

Quae cum ita sint, plane dubitari non potest quin Leo X. verae liberalitatis laudem probe nouerit, eamque fuerit perfecte assecutus. Ex regia enim Medicea familia natus, et in paterna domo, munificentiae et splendoris veluti officina, liberaliter educatus, cum ipso paene nutricis lacte germanae virtutis et laudis sensus altius imbiberat. Nouerat quidem adolescens, mira ingenii dexteritate praeditus, Graecis praeterea ac latinis literis sapienter instructus, quan-

tum discriminis inter veram et fucatam liberalitatem intercederet. Nouerat, maiores suos, immortalis memoriae viros, Cosmum proauum, Petrum auum, et Laurentium patrem, summo reipublicae bono, in optimarum artium commoda immensas fere opes summa cum laude prodigisse. Proinde ipse quoque in omni vitae genere, et Cardinalis, et Pontifex, hanc eandem Mediceae domus gloriam, literarum patrocinio comparatam, quasi propriam sibi asseruit, et, quam maxime potuit, amplificauit. Nam vt silentio praeteream, quam liberali gratoque animo egregius adolescens se gereret erga Angelum Politianum, Demetrium Chalcondylam, Scipionem Carteromachum, aliosque viros, literarum dignitate clarissimos, quos ad humanitatis studia, ad eloquentiam, ad philosophiam et ad omnem eruditionem tum Graecam, tum Latinam magistros habuit; vt nihil loquar de officiis ac liberalitate, qua vsus est plurima, erga viros doctrina praestantes, cum ab Innocentio VIII. Cardinalis in ipso aetatis flore renunciatus, in Academia Pisana versaretur, vt inri addiscendo operam daret; postremo vt misum faciam omne illud fortunatissimum tempus, quo paterna eius domus opulentia, fortunis, gratia, auctoritate opibusque maxime floruit; cui mirum non videatur, quod aduersante deinde fortuna, et communi Italiae fato, Mediceae quoque domus ruinam et vastitatem inuolvente, ille nihilominus idem erga literatos homines studium, eundem animum eandemque voluntatem perpetuo conseruaret? Nemo vestrum ignorat tristissima ea tempora, quae bellorum tumultibus agitata, seditionum turbarumque tempestate quadam Italiam fere vniversam misere iactarunt. Ea tunc fuit Mediceae gentis calamitas, vt ciuium improborum inuidiae, furori ac telis cedere, patriosque

splendidissimos lares fuga deserere cogeretur. Cumque ex hac flamma periculoque Cardinalis Medices euolasset, decem et octo annos per Italiam, Galliam atque Germaniam peruagari compulsus est. In hoc autem tam misero, tam difficili diuturnoque exilio quis crederet, Ioannem Medicem facultates, quas sibi reliquas fortuna fecerat, literatis hominibus liberaliter nunquam destituisse impertiri? Et lane etiam tum fuerunt Romae, fuerunt Mediolani, fuerunt Gennae atque Florentiae, viri literarum cultores, quos suis ille sumptibus alebat, et, quibus poterat, opibus sustentabat. Vix cuiquam credibile videretur, aut oratorum more a me verbis audum et exaggeratum id, quod dicam, nisi Paulus Iouius, Nucerinus Antistes, rem literis testatam faceret. Talis erat, inquit, Cardinalis Medices, etiam dum exularet, erga viros doctos liberalitas, vt non defuerint aliqui, qui iuuenem serio admonerent, vt sibi ab eiusmodi largitate temperaret: venturum enim tempus, quo ipse, propter rei familiaris inopiam, neque alios, neque se sustentare posset. Sed ille: egone, ait, viros doctos deferam? Ego ab illis vnquam dinelli patiar? Malo equidem cum ipsis exul atque egenus extremum vitae spiritum ducere, quam sine illis in patriam reuerti atque regnare. O praeclaram vocem, magnanimo viro dignam! O incredibilem erga literarum studia animi propensionem! Iam vero minime decebat, vt tanta ac tam singularis virtus, quam immortalis Dei prouidentia amplificando communi literarum bono destinauerat, diutius delitesceret. Itaque, extincto Iulio II. Pontifice, ipse Cardinalis Medices ad summum Pontificatus apicem Leonis X. nomine, ingenti Pop. Rom. plausu et bonorum omnium gratulatione euectus est. Quis autem hic breui orationis ambitu

ambitu complecti possit, quae et quanta ille in Pontificatu liberalissime fecerit ad dignitatem literarum prouehendam? Si homo priuatus, patria pulsus, exulans atque egens tam liberalem se praebeuit eruditis hominibus, quam modo audiuitis: quid eum putatis, cum Romanus Pontifex, Ecclesiae caput et princeps fuerit renuntiatus, esse facturum? Non ignoro equidem, quandoque fieri, ut hominum mores, maxima dignitate accedente, immutentur, longeque alii, ac prius, esse videantur. At constans eademque semper fuit Leonis X. erga literatos voluntas, creuitque in eo summa cum dignitate liberalitas. Quare vix Lateranensi Concilio, quod Iulius II. inchoauerat, feliciter abfoluto, vix sedatis iis, quas Caruaial et Sanseuerinus, Cardinales, in Pisano conuenticulo excitauerant, turbis; vix denique Italiae rebus pace et tranquillitate compositis, cum continuo literarum studiis ad Urbem, vnde per varias temporum acerbitates diu exulauerant, reuocandis omnem animum adiecit. Verum optimis disciplinis in Vrbe restituendis tempus nimis inopportunum et alienum nactus es, Leo Pontifex Maxime. Nonne Pontificii aerarii opes diuturnitate bellorum prorsus attritae? Nonne Ecclesiasticae ditionis provinciae aut igne ferroque vastatae, aut nullo aere alieno obstrictae? Nonne demum Roma ipsa, imperii sedes, grauissimis oppressa vestigalibus? Haec profecto uemo non videt, qui Pontificatum Iulii armis perturbatum ac plus nimio bellicosum omnino non ignorat. Sed haec principes alios percellant impediantque, quo minus erga literas et literatos se munificos ac liberales ostendant; non autem Leonem X., qui nominis sui magnitudini parem habet animum ac beneficentiam. Itaque iam ex Italia vniuersa, ex Graecia, Germania, Gallia, aliisque remotissimis prouinciis ad

Urbem properant, Leone ipso magnis propositis praemiis inuitante, viri doctrina, literis et eruditione clarissimi; atque omnes in Leone; non tam Maecenatem aliquem beneficium, quam amantissimum literarum parentem inueniunt. Etenim quotquot Latinis Graecisque literis eminebant, quotquot dicendi elegantia, aut poetica facultate clari, quotquot Philosophia, sacrarum literarum, aut iuris scientia praestabant, cuncti quidem vberissimos doctrinae fructus a liberalissimo Pontifice reportarunt. O liberalitatem singularem! O fortunata ac vere aurea tempora! Laudauerunt veteres annalium scriptores Augustum Caesarem, quod Publ. Virgilium, Lucium Varum et Horatium Flaccum amplissimis praemiis cohonestauerit, tum etiam quod ingenti liberalitate cum M. Vitruuio Pollione usus sit. Laudauerunt alii Vespasianum Caesarem, hominem aliquin pecuniae cupidum, quod praestantes aliquot poetas coemisset, et Bassio Salscio, egregio vati, quingenta sestertia donasset. Laudauerunt alii postremo Hadrianum Caesarem, quod eos diuitiis honoribusque deco- rauerit, ac vacare vitae reliquum iusserit, qui Romae docuissent, et propter ingrauescentem aetatem muneri suo satisfacere amplius non possent. Haec autem quota pars est eorum, quos Leo X. summa liberalitate excepit, fortunis auxit opibusque cumulauit? Dies, aut memoriae vis me deficeret, si dicendo numerare velim oratores, historicos, philosophos, iurisperitos, geometras aliarumque disciplinarum cultores, eius beneficentiae testes locupletissimos? Non commemorabo, id quod apud omnes peruulgatum est, viros amplissimos. Bembum et Sadoletum sibi ab epistolis esse voluisse. Silentio praetereo duo clarissima Graeciae lumina, Lascarem Rhyndacenum et Marcum Musurum Cretensem, quos

summo honore coluit, et vtrumque sacerdotiis et infulis decoravit. Mitto Ioannem Antonium Pollionem, Mutium Aurelium, Camillum Paleottum, Iulianum Camertem, Latinum Iuvenalem, Io. Franciscum Roborem, Guidonem Posthumum aliosque sexcentos, quos paternae benignitate complexos et opibus, et praefecturis, et magistratibus amplificavit. Sed tacere omnino non possum praecleara illa duo Dominiciani Ordinis ornamenta, Thomam de Vio et Sancten Pagninum, quem meum: quorum alterum Theologicis studiis et doctrina celeberrimum ad Romanae purpureae dignitatem enexit, et ad refragandam Lutheri audaciam in Germaniam legatum Apostolicum misit: alterum vero, Graecis Hebraicisque literis nemini secundum, Florentia Romanam attraxit, ut eruditissimum in Vrbe absolueret de sacris literis commentarium, praeclearum sibi fore existimans, si illud nomini suo inscriberetur. Quid plura? Audite Pauli Iouii grauitimum testimonium. Nulla in re, inquit, ardentius et effusius, quam ad liberalitatis gloriam anhelavit; eos principes indignos existimans, qui nequaquam benefica manu fortunae muneribus uterentur. Nemo enim vel ciuis, vel peregrinus, qui paulo nobilioris artis famam teneret, nemo vel male sanus poeta, nemo alicuius opulmarum literarum partis non ignarus vnquam fuit, qui benignitatem humanissimi principis non senserit. O si tales Principes, quae Leonem consecuta sunt, tempora nobis attulissent, profecto Vrbe minus pulchram at longe doctiorem haberemus. Neque enim hic magnificentissima testa ac moles, neque tot fontes fluminum instar defluentes peregrini atque aduenae tantopere suspicerent: sed infinitam doctorum hominum multitudinem beneficentia principis sustentatam, quae,

doctrinarum studio, vel sacras literas illustraret, vel scriptis haereticorum tela retunderet. At vero, quae fuerit vel in hoc sapientia Leonis, attendite. Cum intelligeret homo sapiens ac prouidus, hanc tantam suam liberalitatem nihil literis profuturam, nisi beneficentiam eiusmodi ad venturas quoque aetates protulisset: Romanum hoc amplissimum Gymnasium in media Vrbe a fundamentis excitauit, stabile ac perpetuo mansurum bonis artibus domicilium. Nouerat enim vir sapientissimus, benefacta principum, praecleara quamuis et illustria, parum emolumenti ac laudis habere, si breni eorum vitae curriculo circumscribantur, neque ad posteritatem sese vlllo modo extendant. Caelestibus flammis ea quidem simillima esse videntur, quae aliquando fulgore insolito radiantes in aethere apparent, et ad se omnium oculos et admirationem trahunt: sed fere statim ex alto ruunt atque euanescent. Amavit quoque literas et literatos Eugenius IV., de quo Platina scribens: liberalis fuit, inquit, in omnes, tum maxime in literatos, quorum familiaritate delectabatur. Nam Leonardum Arerinum, Carolum Poggium, Aurispam, Trapezuntium, Blondum, viros doctissimos, inter suos admisit. Amavit literas et literatos Nicolaus V., homo sapientia et doctrina cum paucis comparandus, qui viros Theologia et quoniam alio optimarum artium genere conspicuos summa liberalitate ad se recepit, et conquisitis ex tota Graecia voluminibus, hisque in Latinam linguam conuersis, adeo ingenia fouit excitauitque, ut eius temporis historici de illo affirmare non dubitauerint, disciplinarum omnium studia Romae nunquam magis, quam eo imperante, effloruisse. Amavit denique literas et literatos Pius II. vir ingenio, literis et eloquentia clarissimus, qui in summo



mo quoque Ecclesiae fastigio collocatus, nunquam doctrinae studia intermisit, tum etiam viros doctos pecunia iuui, maximisque honoribus decorauit. Verum quid postea? Nemo est eorum temporum sic ignarus, ut nesciat, Romanis hisce Pontificibus vita functis, omne pariter cum ipsis literarum decus et patrociniū interisse. Nimirum vno eodemque tempore, in quo Pontifices illi sapientissimi exiisti sunt, occidit quoque omnis doctrinae lux, omnis literatorum hominum spes atque felicitas. Enimuero Leo X. singularem suam erga literas et literatos beneficentiam, non caducam, neque breui vnus aetate spatio definitam esse voluit, sed sempiternam et immortalem. Voluit scilicet in hoc Romano Gymnasio veterem eloquentiam perpetuo regnare. Proinde Ianum Parrhasium Cosentinum, id temporis dicendi facultate clarissimum, ducentorum aureorum stipendio proposito, ad hanc provinciam arcessiuit, datis ad eum literis humanissimis; quem deinde Amasaei, Beroaldi, Mureti, Manutii, Cotelii, Antoniani, Vgonnes, Fontanini alique primi ordinis oratores consecuti sunt, qui pro Romana eloquentia ac bonis literis contra barbaros eorum corruptores, tanquam pro aris et focis, strenue decertarunt. Hic duas iam aetates Philosophia, parens ac magistra virtutum, tranquillam habuit stationem. Hic mathematicae disciplinae, hic medendi facultas, hic ciuilis et Pontificii iuris scientia, hic denique sacrarum literarum doctrina, perpetuos habuere, et nunc habent, magistros sapientia et eruditione praestantes, quos omnes per censere, aut de singulorum laudibus dicere, nimis longum foret, ac permolestum. Quid vero loquar de iis, quae ad huius academiae dignitatem firmandam perpetuoque stabiliendam,

Leo X. prouidentissime constituit? Quid hic referam praedictarum et satis amplum stipendium optimarum artium professoribus de publico aerario liberaliter decretum? Quid demum binas illas Apostolicas sanctiones commemorabo, quibus, duplici veluti propugnaculo, hanc bonarum artium arcem ita firmavit et communiuit, ut nulla vnquam futurorum temporum calamitas, nulla eam posset improborum hominum vis et audacia labefactare?

Quaenam igitur tam prouidae ac tam singulari beneficentissimi Pontificis liberalitati par oratio inueniri vnquam poterit? Non modo ille, quamdiu vixit, honestissimas disciplinas ac viros doctos munificentia propria regia persecutus est: sed ad posteros quoque, et ad omnem aetatem propagari voluit beneficentiae suae fructus vberrimos. De vobis ille, Quirites, de liberis vestris, serisque nepotibus anxius fuit atque sollicitus, cum in Vrbe de Pontificio aerario optimarum artium sedem perpetuumque domicilium stabilivit. Quo maiore ille tandem poterat beneficio de hac ciuitate, de Pop. Rom. de vniuersa literarum republica bene mereri, quam hoc celeberrimum toto orbe Gymnasium constituendo, in quo tum Romani cives, tum peregrini atque hospites haberent semper ad omne disciplinarum genus peritissimos duces doctissimosque magistros? Quae cum ita sint, iam finem dicendi faciam: at prius, quantum poterō, voce contendam, ut cuncti hoc exaudiant: Leo X. ex optimarum artium patrociniū iure et merito immortalis tot saeculorum fama viuuit; et tandem profecto viuēt celebritate gloriae, laudatione grataque posterorum memoria immortalis, quamdiu bonis artibus et decus, et nomen, et laudes manebunt.

# FELICITATE VIRI LITERATI ORATIO XII.

HABITA IDIBVS NOVEMBRIS  
AN. MDCCXLVII.

**V**ETVS est, et apud omnes fere homines pervulgata opinio, sorte sua contentum esse neminem. Etenim alter alterum beatum putat, seque prae illo miserum, suasque res deteriores esse fortunae conqueritur. Quamobrem milites fortunatos in primis mercatores: mercator vero milites beatos praedicat; agricola otium et commoda civitatis habet ante oculos: ciuis agricolarum vitam placidam, et procul a negotiis positam reputat beatissimam. Proinde fit, ut suae quaeque fortunae poeniteat; nemo sibi in suscepto vitae instituto placeat, sed alienam suae praeferat sortem, suaeque feliciorem inuideat; quemadmodum rem hanc Vennsinus poeta in sermone primo ad Maecenatem elegantissime prosequitur. At vero quanquam in terris, si verum fateri volumus, nulla sit rerum conditio, nulla hominum fortuna tam splendida atque opulenta, quae absolutam possit plenamque hominis felicitatem efficere, quam nimirum nobis in altera et immortalis vita Deus Opt. Max. in caelo servatam voluit, ut proinde nemo vnus in terris felix, nemo sit vere ex omni parte beatus: nihilominus, dum mihi sapientis viri status ante oculos obuersatur, dum omnem eius vitae rationem tacita cogitatione con-

templor, mutata profecto opinione, hominem certe quidem beatum apud nos reperiri posse minime dubito. Ita plane auditores: ego equidem in hac sententia sum, hominem doctrinae studiis deditum, hominem doctum, vnoque verbo, hominem sapientem esse plane beatum, suaeque sorte, iure et merito haberi ac dici posse contentum. Haeretisne animo, et rem quasi omnino incredibilem vobis propositam esse putatis? Nequaquam. Sed si id mirum propter rei novitatem, aut minus probabile propter auctoritatem eorum, qui repugnant, vobis esse videatur, oro vos atque obtestor, ut ne me leuitatis, aut erroris, indicta causa, damnare velitis, sed rationes et argumenta, quae me in hanc sententiam pertraxerunt, benigne attenteque audiat. Quod quidem si nunquam alias, hodierno die minime dubito, vos esse facturos; neque enim levis, neque vulgaris, at multo grauissima res agitur: illa scilicet vitae felicitas, quae nobis in hac ipsa, quam vivimus, vita contingere potest, et quam omnes tanquam maximum et extremum bonorum summopere expetunt et vnice quaerunt.

Neminem vestrum dubitare arbitror, quin vera mortaliu[m] felicitas in animi quiete ac tranquillitate

quillitate potissimum sita sit. Sed qua tandem ratione eam quis assequi perpetuoque frui possit, non est communis atque vna omnium sententia. Putant plurimi, immensis opibus congestis, sese beatissimos omnium fore, quod nimirum cuncta, ut aiunt, pecuniae obediant, quod opes hominem nihilo indigentem sufficientemque sibi faciant. Sed minime advertunt, quod molestias gravissimasque curas afferant opes illae, quae adimi, quae amitti possunt, quae denique in arbitrio ac potestate fortunae positae sunt. Taceo, quod nunquam satiatur, sed crescit in dies cupiditatis sitis, atque animus haec inhians nunquam id tantum habet, quo expleri queat, cum avaritiae nihil vnquam sit satis. Hinc Horatius Flaccus sapienter pronunciauit: non possidentem multa vocaueris recte beatum. Alii vero pollicentur sibi felicitatem, si ad primariam aliquam dignitatem, si ad supremum magistratum iter sibi munierint. At, pro Deus immortalis, quae res tam lubrica et incerta, quam quae vel a multitudinis favore, vel a praepotentis hominis voluntate et gratia pendet? Quam saepe magnas spes et bene confirmatas vna nox, aut aliqua parua rumoris aura subuertit? Non est in hac Vrbe res noua oculis nostris, aut insolens. Quid vero homines illi, qui deliciis affluunt, qui gemmis auroque ornati, qui vnguentis delibuti incedunt, ac somno luxuque perdit in otio ac quiete vitam ducunt, nonne tibi lauti ac beati esse videntur? Errat vehementer, errat, qui eiusmodi homines (si homines magis, quam pecudes dicendi sint) tranquillam ac beatam vitam agere, sibi persuadeat. Anguntur illi saepe animo, ipsisque displicet, otio inertiaque marcescere; et cum nihil splendidum, nihil se suisque maioribus dignum agere possint:

vitam doloris ac molestiae plenam traducunt. Cum igitur nec diuitiarum copia, nec bonorum splendor, nec vitae mollioris otium, quae bona plerique homines prima et omnium longe praestantissima putant, sinceram in animo tranquillitatem pariant, neque ex iis optata vitae felicitas ex peti possit: quid aliud restat, nisi ut in sapientiae studio, aut nusquam alibi, beatae vitae rationem consistere posse iudicemus? Hinc M. Cicero, quid est, inquit, per Deos, optabilis sapientia? Quid praestantius? Quid homini melius? Quid homine dignius?

Verum ut ad id, quod propositum est, propius accedamus, cogitate mecum, Auditores, quid tandem sit pax illa et animi quies, quam sapientis propriam esse dicimus, nisi hominem ab omni sollicitudine animique perturbatione vacuum esse ei immunem? Hoc autem consequi profecto, praequam sapiens, nemo potest. Cum enim animus noster in duas veluti partes, ut philosophi volunt, diuisus sit; alteram rationis participem, alteram vero expertem et nobis cum brutis animantibus communem: persaepe fit, ut in hac motus turbulentissimi, tum ad iracundiam, tum ad cupiditatem impellentes exoriantur; ex quibus permultae aliae aegritudines ac perturbationes, tanquam familiae, in nos deriuantur: in quas nisi ratio, quasi dux et moderatrix, imperium teneat, in maximas calamitates gravissimasque aerumnas hominem delabi necesse est. Hinc enim odia, hinc liuor, hinc ambitio, hinc sexcentae aliae teterrimae pestes, quae rationis iugum excutere, eamque de sede sua deturbare conantur. Vnde autem homini in tanto rerum discrimine summoque periculo arripienda sunt tela ad iustissimos eiusmodi hostes confodiendos longe-

que propulsandos, nisi auxiliares sapientia manus viresque conferat? Ita est profecto. Bonarum artium studia, philosophorum monita, historicorum exempla, musarum cantus, sunt quaedam quasi propugnacula, quibus hostium impetum et aggressiones homo sapiens repellit. Proinde nullum tam triste infortunium, nulla tam acerba calamitas occurrit, ut vere possit elus animi tranquillitatem perturbare. Cogitat enim, quid forti et sapiente homine dignum sit, quid grauitas, quid animi magnitudo, quid vita haudenus praecelere acta, quid literarum studia, quid denique publica dignitas abs se postulet, atque in eo statu rerum efflagitet. Possem hoc loco tum ex veteri, tum ex recentiore historia infinita fere eorum exempla in medium proferre, qui e literarum sinit tantum quietis ac tranquillitatis hauserunt, ut asperissima quaeque aequissimo animo tolerauerint. Non de Anaxagora, non de Dione, aut Xenophonte loquar, quos in acerbissimo filiorum funere nihil ingemuisset, nihil animo commotos fuisse, memoriae proditum est. Satis sit ad memoriam vobis reuocare Dionysium illum, Syracusanum tyrannum, qui, propter improbitatem et fastigio regiae dignitatis deiectus, et in exilium pulsus, ad eam miseram conditionem reductus est, ut Corinthi pueros grammaticam doceret. Hic aliquando interrogatus, quid Plato, quid Philosophia tandem sibi profuisset, libere respondit: id sibi profuisse, ut iacturam regni et atrocitatem fortunae placide tranquilleque perferret. O magnae doctrinae vim, quae facit, ut tyranni quoque, quorum animus conscientiae stimulis, tanquam ardentibus furiarum taedis agitari perpetuo solet, dulcedinem suam degustent curarumque leuamen inueniant! Sed fortasse Dionysius poenam il-

lam aequo animo tolerabat, quam iustam, ac sceleri suo debitam esse intelligebat. Quid si homo innocens, imo spectatissimae virtutis exemplum, bonis omnibus, honoribus, patria, carissimis filiis, vita denique spoliari se, summa animi tranquillitate, summaque constantia spectet? Seuerinum Boethium dico, clarissimum illud Romanae virtutis lumen, qui consulari dignitate, amplissimis opibus, ac patria amissis, nihil est animo commotus, sed eadem mentis atque oris serenitate et diuturni carceris squalorem tolerauit, et carnificis vultum telumque excepit. Erat ille Romae ex illustri Torquatorum familia natus, Graecis ac Latinis literis ab adolescentia eruditus; erat Geometriae studiis instructus, in Arithmetica, in Musica apprimè versatus. Quicquid ex Logicae artis subtilitate, quicquid ex naturali scientia, aut morali disciplina fuerat ab Aristotele subtiliter, obscureque literis traditum, summo ille ingenio, commentariis, doctisque expositionibus illustrauerat; cumque Ticinum, conspiratione malorum a Theodorico, Gothorum Rege, relegatus fuisset, pulcherrimum illud de consolatione volumen conscripsit, in quo M. Tullium sibi proposuit, qui, ut extinctae filiae desiderium leniret, de animorum immortalitate disceptans, Tulliam vitae superstitem comprobauit; ita Boethius de falso ac vero bono, tum etiam de prouidentia disputans, nihil sine diuino numine mortalibus euenire declarat. At Ciceronem ipsum in eo superasse videtur, quod cum ille carmen non attigerit, Boethius, quo vile dulci misceret, rem tum oratione, tum carmine ita est profectus, ut ad vtrumque sibi ingenium non defuisse demonstrauerit. Ecce vobis in hoc clarissimo viro non adumbratam, sed expressam veram sapientis, imaginem!

imaginem! Vidistis animi tranquillitatem in solabilem maximis curarum turbibus minime perturbatam. Vidistis constantiam nullis aduersis casibus perculsam, aut oppressam. Vidistis denique, quid possint doctrinae studia ad assequendam mortalis vitae felicitatem. Quemadmodum enim, qui Olympi verticem attingunt, procellas quidem et tempestates infra se positas vident, dum ipsi interea nullis ventorum turbibus, nullis imbribus obnoxii sunt, imo semper eadem caeli facie, eademque serenitate gaudent: ita sapiens turbulentissima quaeque despiciens, semper quietus ac tranquillus, placidissima vitae ratione perfruitur. Omnis quippe animi aegritudo leuari potest suauissima meditatione literarum. Atque hinc est, quod Aristippus homines doctrinae deditos non immerito Deorum simulacra nuncupauerit: quod nimirum, sicut illi sempiterna pace ac immutabili vitae tranquillitate laetantur, ita sapientis animus in beatissimo literarum otio perpetuum conquiescit.

At, dicet quispiam, si tanta literati hominis pax est, et tam firma animi tranquillitas, quid est, quod saepe inter illos odia et contentiones acerrimae de leuissima etiam re, deque vno verbo excitentur, et maledicentissimis sese libellis inuicem proscindant? Quis ignorat rixas et tragaedias inter Laurentium Vallam et Poggium, inter Politianum et Merulam, inter Accursium et Budaeum, inter Marinum et Murtulam, aliosque permultos magni nominis literatos? Vt nihil loquar de acerbissimis inimicitiis, quas in Italia, memoria nostra, eruditi quidam inter se palam gesserunt. Imo, si, quod res est, fateri volumus, ab ipsis fere literarum incunabulis aemulatio, et luperbiae comes, inuidia, literatorum animos occupauit.

Etenim Homerum Zoilus, etiam post ipsius fata, scriptis aduersus eum libris, ausus est insectari, vnde illi cognomen *Ὀμαρκεύτης*. Sic quoque Antiochus Lemnius Socrati, Cydon Pythagorae, Xenophanes Colophonius Hesiodo, Amphion Cous Pindaro, Timocreon Simonidi, Asinius Pollio M. Tullio, ob inuidiam facere quam maxime insensum. Vt taceam Rhemaium Polemonem, Alexandrinum grammaticum, qui M. Varroni, viro doctissimo, tantopere inuidit, ut illum acerbè reprehendere ausus sit, et non Varronem, sed Verrem, per summum contemptum, appellauerit. Darem profecto, Auditores, aduersario manus victas, et causam omnino caderem, nisi vos singulari mentis acumine, et sapientia, praeditos cogitarem, qui veritatem a cauillationibus discernere optime nostis. Continent sane literarum studia in se sublime aliquid ac diuinum, per quod non minus doctus ab indocto, quam a brutis homo, distinguitur. Habent vero id cum ceteris rebus commune, ut, quantum optimus earum usus vilis est, et ad vitae felicitatem opportunus, tantum earum abusus ac peruersa ratio reipublicae noceat. Quid stomacho conducibilis, quam vinum? Quid tamen illius copia, et ebrietate, perniciosius, cui Lycurgus, quo viam prorsus intercluderet, vites omnes excidi imperauit? Quid humano generi ferro et igne, ad omnem vitae usum, magis necessarium? Quibus nihilominus, si ad populorum internecionem, et urbium incendia, homines abutantur, nihil est, quod magis noxium et exitiabile excogitari possit. Ita quoque nihil est doctrinae studiis ad humanae vitae felicitatem opportunius; nihil ad extirpanda vitia, faecesque cupiditatum restringendas, magis aptum, si quidem illis probe utaris. Quod si eisdem

dem ad gloriae cupiditatem et ambitionem, si ad lites et iurgia, homines abutantur, tantum abest, ut eorum animi tranquillitate perfruantur, ut potius inquieti, queruli et angoribus pleni in maximas se calamitates impingant. Beata vita, inquit Seneca, sine virtute esse non potest: proinde miseri et infelices eiusmodi homines ad nos non pertinent. De homine quidem sapiente disputo, ut iam antea dixi, non de literatoribus, qui aetatem in litibus flocci aestimandis, in gerris et nugis, conterunt. Pernego vero illum esse, aut dici posse, sapientem, qui sibi non sapit. Neque is sapere plane videtur, qui non intelligit, nihil esse homini invidia perniciosius, magisque cavendum; nihil magis virum literatum dedecere, quam maledicentiam, et alienae laudis obreftationem. Itaque longe abest a viro sapiente, de quo loquimur, aemulatio; longe abest invidia, odium, atque contentio; longe abest demum, quicquid a leni placidoque animo prorsus abhorret.

At enim quod quispiam, sedatis animi motibus, curis vacuam et perturbationibus vitam ducat, eritne idcirco beatus? Profecto beatam vitam, ut M. Tullius ait, non depulsione mali, sed adoptione boni iudicemus oportet. Itane? Quasi vero animum pace ac tranquillitate tanta frui, bonum maximum dicendum non sit, ac ceteris omnibus praefendum. At quis adeo rudis, adeo rerum omnium ignarus existit, ut nesciat, quanta sit semperque fuerit hominum literatorum gloria, quanta dignitas et amplitudo, quae, ut corpus umbra, illos consequitur? Quis ignorat, eiusmodi bona sapientiae studiis constituta semper fuisse, quasi fundum autum et amplissimum patrimonium? Sunt haec per se clara, neque in iis opus est argumentis, aut tempore abuti. Ple-

nae sunt historiae, pleni literarum annales. Verum non opes, non honores, non dignitates, non gloria, non triumphus comparandi villo modo sunt cum ea felicitate, quae solet ex optimis studiis vberissime degustari. Te, Caesar Auguste, testem appello, qui, imperio terrarum potitus, perduellibus profligatis, ferocissimis nationibus domitis, tot clarissimis triumphis actis, totoque Orbe pacato, maximam potentiam adeptus, et in altissimo gloriae fastigio positus, nihilominus de fortuna saepe conquestus es, quod ea vitae tranquillitate careres, qua homo priuatus in literarum otio perfruitur. O incredibilem literarum vim! O singularem doctrinae suauitatem, quae, sapientissimi viri iudicio, longe praestat immensis opibus, et victoriis omnibus ac triumphis est omnium maxime anteferenda. Sed, haec Augustum quasi ad emphasin pronuntiassent, forte quis suspicetur. Non ita profecto. Nam ceterae omnes tum animi, tum corporis voluptates habent sua tempora, certasque periodos, quas ultra progredi minime possunt. Venatio, palaestra, ludus, aliaeque oblationes plurimae, quibus iuuenilis aetas tantopere gaudet atque exultat, pariunt senectuti molestiam. At vero firma perpetuoque stabilis est suauissima voluptas, quae ex doctrinae studiis degustatur. Imo tantum abest, ut, quae delectatio in discendo sentitur, ingranesciente aetate, minuatur, aut satietatem taediumque afferat, ut experimento potius constet, eam in dies augeri, et maiorem sui semper in animo cupiditatem excitare. Etenim ex annalium memoria accepimus, sapientes fere omnes, et iam aetate longaeuos, ad extremum vsque spiritum doctrinam in amore ac deliciis habuisse. Gorgiam quidem Leontinum, Isocratis magistrum, legimus, ad centesimum et septimum aetat-


his annum doctrinae studio nunquam abstinuisse: Isocrates autem, quem eloquentiae patrem Cicero appellare solitus est, sex et nonaginta annos natus orationem panegyricam scripsit, et ad nonum usque et nonagesimum, in quo e vita decellit, rhetoricam docuit. Carneades quoque, cum esset nonaginta annorum, non prius philosophandi, quam viuendi finem fecit. Quid vero Plato, ille diuinus, qui octogesimo aetatis anno, in scribendo defixus, mortuus est? De quo illud merito dixerim, quod Valerius maximus de M. Varrone sene pronunciat: in eodem lectulo et spiritus eius, et egregium operum cursus, extinctus est. Neque minorem e doctrinae studio voluptatem perceperunt sanctissimi PP. Gregorius Nazianzenus, Basilus, Hieronymus, Ambrosius, Augustinus, alique inter Graecos et Latinos sexcenti, qui in literis canescere ad summam senectutem, eundemque sibi vitae ac doctrinae terminum esse voluerunt. Silentio praetereo, ne in dicendo longior sim, innumeros fere recentioris memoriae viros, sapientia et eruditione clarissimos, qui nuper in Italia, in Germania, in Gallia, atque Europae regnis floruerunt: quos, integram, et bene longam, aetatem in optimis studiis exegisse, plurima illa et immortalia, quae nobis reliquerunt, volumina satis superque testantur. Verum quid longinqua, aut externa conquirimus, cum domesticum nobis ante oculos, clarissimumque huius rei obuersetur exemplum? Nemo vestrum ignorat, quot quantosque studiorum labores Benedictus XIV. Pont. Max. iam inde ab adulescentia susceperit, et quantopere se in doctrinae studia ingurgitauerit. Ego quidem, ut verum fatear, hac de re olim minime mirabar pro eo, quo maxime, pollet ingenio, tum etiam, quod aetate tunc florens, et virium

robore firmior esset. Huc accedit, quod in ea studiorum genera incumbere deberet, quae munus ab eis susceptorum ratio postulare videbatur. At vero quid illi opus fuit, ut, ubi primo Anconitanus Episcopus, deinde Archiepiscopus Bononiensis renunciatus est, nihil omnino de iis, quae ad optimum Ecclesiae pastorem pertinent, mittens, se tantum sacris studiis daret, quantum plurima eius volumina de Canonizatione Sanctorum recte instituenda, aliaque multa de Ecclesiasticis ritibus et institutis enulgata typis nos docent? Quid postea? Pontifex ipse Maximus factus, cum iam sextum supra sexagesimum ageret annum, Romanam Ecclesiam septem iam annos sapientissime gubernauit: at quanta inierim, Deus immortalis, contentione, perpetuoque labore studiorum? Quem diem procul a libris studisque traduxit immunem? Quot sanctiones Apostolicas, quot encyclicas epistolas, quot decreta saluberrima pro Ecclesiastica disciplina, aut restituenda, aut facta tecta seruanda, solus ipse vnus commentatus est, ordinauit, perscripsit? Iam inde tot prodierunt volumina sacrae eruditionis et antiquitatis plena, ut non ab vno homine, summa iam senectute confecto, et infinitis prope Christianae Reipublicae negotiis impedito, sed a multis potius, vel ab eo, qui viribus integer sit, et otio plurimo abundet, profecta esse videantur. Cum igitur sapientissimus Pontifex nullum alium sibi de Pontificatu fructum decerpserit, praeter ingens istud perpetuumque doctrinae studium, quis tandem non intelligit, quam magna sit ac paene incredibilis doctrinae ipsius voluptas, quam neque annorum diuturnitas, neque imbecillitas senectutis, neque ipsa denique mentis lassitudo minuire potest? Ita est profecto. Dicam voce qua maxima potero: doctrinae studia

studia nullum taedium, nullam afferunt satietatem; imo semper augetur inexplebilis eorum sitis et immensa cupiditas. Contra vero honores amplissimi, et suprema ipsa dominandi ratio, quam propter, si ius violari fas est, maxime violandum esse Iulius Caesar affirmare ausus est, tot curas et angores animo creat, ut in omni fere aetate summi reges clarissimique imperatores, tranquillioris vitae causa, sese imperio abdicare non dubitauerint. Proinde mirandum non est, quod literati hominis tranquillitatem et otium Augustus adeo cuperet, adeo doctis inuideret, ut mallet inter eos priuatum agere, quam orbi terrae vniuerso imperitare.

Quae cum ita sint, iam satis intelligitis, sapientis vitam esse omnium longe felicissimam, eamque opibus, et triumphis, et gloriae fumorum imperatorum iure et merito esse ante-

ferendam. Exulant enim sapientis animo perturbationes ac vitiorum teterissimae pestes, quae mortalium felicitatem, ac dulcissimam pacem usque quaque perturbant. O fortunatos nimium sapientes! O viros plane beatos, qui procul a caecis cupiditatibus, scelerumque tumultu, semoti, in placidissima vitae statione quiescunt! Quis tantam illis, ac tam stabilem, felicitatem non inuideat? Quis eodem sorte sua vere contentos esse non arbitretur? Utinam vobis, Adolescentes optimi, hoc ipsum vnum beatissimae vitae genus experiri tandem aliquando liceat! Utinam vos diligenti intentoque doctrinae studio eo demum perueniatis, ut id, quod dicimus, reuera ita esse, intelligatis; nimirum inter varias et molestissimas huius mundi curas, inter grauissimas humanae vitae sollicitudines, solum sapientem esse beatum!







# INDEX

## RERVM MEMORABILIVM

### A.

- Academia Viennensis*, a quo fundata [27. b](#)
- Parisiensis*, a quo fundata et instaurata *ibid.*
- Accursius*, an barbare scripserit? [§1. a](#)
- Actionis*, in peroratione vis [66. a](#)
- Adolescentes*, quantum nimia laus iis noceat? [143. a](#)
- Adrianus*, v. *Hadrianus*.
- Aegyptii*, eorum delubra, qualia? [138. b](#)
- Albana domus*, literarum alitrix [15.](#)
- Albani*, Alexandri, laus, [6. 7](#) Paulini Discipulus, *ibid.*
- Albani*, Annibalis, laus [15.](#) literarum amor *ibid.* liberalitas in Vrbinatenſe collegium *ibid.* in Scholarum Piarum ordinem. *ibid.*
- Alexander M. Choerilum*, poetaſtrum, beneficiis cumulat. [109. b](#)
- Alexander Severus*, quanti doctos fecerit? [177. b](#) quomodo liberalitatem vocauerit? [179. a](#)
- Alphonſus*, Hispaniae Rex, quantopere literas amauerit? [152. a](#)
- Alvarus*, Emmanuel, eius Grammatica omnem Scientiam comprehendere a quodam dicta. [146. b](#)
- Amicitia*, quid ad eam requiratur? [170. a](#)
- Amoris vis* [79. b](#)
- Animus*, nobiles magis et frequentius eius emotiones patiuntur, quam ignobili loco nati [156. b](#) eius tranquillitas, in quo conſiſtat? [185. b](#) eius motus pernicioſiſſimi *ibid.* eius tranquillitas ad bonarum literarum ſtudium neceſſaria [170. a](#) eadem vera eſt felicitas [184. b. ſeq.](#) eius emotio literis vincitur [173. b](#) eius perturbationum vis et furor [179. a](#) quomodo hae ſedaudae? *ibid.*
- Antonianus*, Silu. doctrinae et ingenii ope dignitates conſequitur [155. a](#)
- Antonius M.* totius eloquentiae baſin dicit imitationem [116. b](#)
- Aphthonius*, de laudibus poetices commentatur [124. b](#)
- Apollonii,*

- Apollonii*, Alabadenſis, in eligendis ingeniis ſtudiū 39. *a*
- Aquilini*, C. eloquentia valens 111. *a*
- Archidamus*, cur Periandrum obiurgauerit? 91. *b*
- Areopagitarum*, decretum de eloquentia 62. *a*
- Aristarchus*, quot libros ſcripſerit? 80. *a*
- Aristippi*, dictum de indoctis *a*. *b* quomodo doctrinae deditos nuncupauerit? 187. *a*
- Aristoteles*, quot annis Platonem audierit? 78. *b* et 133. *b* eius dictum de mente humana 88. *a* de oratore ſententia 62. *a* et de eloquentia 65. *a* multos ſcripſit libros 79. *b* num recentiores ipſi praeferendi? 135. *a* quanam in adminiſtranda republica maxime neceſſaria exiſtima-uerit? 158. *b* eius elogium 110. *b* eius in eloquentiam merita *ibid.*
- Arithmetica*, pueris a Pythagora propoſita 92. *b*
- Arrogantia*, inſcitiae comes 44. *b*
- Artaxerxis Longimani*, muſiſcentia 96. *b*
- Artes*, vanae et ludicrae, quae ſint? 139. *b* bonarum cum ignorantia bellum 135. *a* bellum earundem cum ſciolis atrociffimum 136. *a* praecipuum earum commodum, quod homines ab obſcuro loco in publicam lucem produ-  
cunt 155. *a* earum dignitas certis terminis definiri vix poteſt 173. *a* ſeq. earum vis contra perturbationes animi 185. *b* ſeq. quomodo iis abutimur? 187. *b*
- Aſellius*, Caſpar, lacteas venas inuenit 131. *b*
- Aſtologia*, medicis utilis 72. *b*
- Auctores*, qui vitandi? 6. 12. *a* qui legendi? 11. *b*
- Auctorum*, veterum lectionis utilitas 6.
- Auguſti*, domus, poetis patens 22. *b* eius liberalitas 181. *b* ſe beatum non eſſe conſi-  
tetur 188. *b*
- Auguſtini*, ſententia de feſtinatione 74. *b*

## B.

*Baelii*, Petri, teſtimonium de Leone X. 97. *a* notatus *ibid.*

*Baillettus*, Adrianus, de ingeniis praecocibus ſcripſit 79. *a*

*Balbus*, L. Luc. eloquentia praestans 111. *a*

*Balduni*, Franc. laus 50. *b* in Inſtitutiones commentarius *ibid.*

*Baldus*, an barbare ſcripſerit? 51. *a*

*Barberius*, Corn. de literatorum infelicitate commentatur 136. *b*

*Bartolus*, an barbare ſcripſerit? 51. *a*

*Bafius*, Ioannes, Ictus, vanitas eius et iactantia 138. *a*

*Beatus*, quis vere ſit, et quis non ſit? 188. *a* nemo ex omni parte 184. *a*

*Bellinus*, Laur. rerum ſtru-  
cturam et uſum oſtendit 132. *a*

*Bellum*, ignorantiae cum opti-  
mis diſciplinis 135. *a*

*Bembus*, Pet. eius de imitatione iudicium 121. *a*

*Benedicti XIII.* P. R. laudes 98. *b*

*Benedicti XIV.* P. R. laudes 154. ſeq. eius labores et ſcripta 189. *a* et *b* aliae eius laudes *ibid.* 160. *a* et 172. *a*

*Beneficium*, quod maximum? 36. *b* Beneficiis imperiū melius, quam armis, conſer-  
uatur

untur [179. a](#) ad posteror, bene est, vbi se extendunt [182. b](#)

*Bian*, eius de ventosa sui opinione iudicium [133. b. seq.](#)

*Boethius*, Seuerin. eius eruditio [186. b](#) quem ex Philosophia fructum hauerit? *ibid.*

*Bocotii*, quo ingenio? [88. b](#)

*Bonifacius VIII.* studiorum formam Romae praescripsit. [31. b](#)

*Borellius*, Io. Alphons. musculorum motum docuit [132. a](#)

*Brutus*, Marcus Iunius, de eius eloquentia iudicium [118. a](#) quare Ciceronem culpet? *ibid.*

## C.

*Caecilius*, versus integros ex ipso suis immiscet orationibus Cicero [128. b](#)

*Caelius*, M. defensio a Cicerone *ibid. a*

*Caesalpinus*, Andr. sanguinis periodum inuenit [131. b](#)

*Caesar*, C. I. quid de delectu verborum censuerit? [61. a](#) quanti Ciceronis fecerit eloquentiam [175. a](#) eiusdem eloquentia victus. [176. b](#)

*Carnolus*, Belmont. vanitas huius scoli ridicula [137. b](#)

*Caietanus*, v. Vio.

*Caligula*, C. Caes. eius in bonas literas bellum stultissimum [136. b](#)

*Calvus*, Licin. de principatu eloquentiae cum Cicerone contendit. [118. a](#)

*Cani*, Melchioris, sententia de Theologis [74. b](#)

*Carneades*, eius de nobilium diuitumque studiis iudicium [143. a](#)

*Caruialis*, similitudo cum Romana Ecclesia [91. b.](#) a Leone X. in gratiam receptus [86. a](#)

*Cato*, bonus esse, quam videri mauult [15.](#)

*Catonis*, legendi studium [80. a](#) de festinatione dictum [76. b](#)

*Cato*, M. Por. quid ab Oratore requirat? [165. a](#) eloquentiam mirum in modum adamauit [111. a](#)

*Celsus*, Corn. quam fuerit eloquentiae studiosus? *ibid. b*

*Choerilus*, poetaeaster, Alexandro M. charus [109. b](#)

*Chrysippi*, stilus qualis? [65. a](#)

*Chrysostomus*, Dio, Menandrum commendat et Euripidem [129. a](#)

*Ciampolus*, Io. ingratus et superbus sua ipsius culpa infelix [171. a](#) quam ridicule Virgilium et Horatium carpat? [137. b](#)

*Cicero*, M. T. cur in iudiciis regnare dictus [59. b](#) cum Platone errare mauult [22. b](#) eius laus [49. b](#) et [110. b. seq.](#) [114. a. seq.](#) eius iudicium de Isocratis et Platonis oratione [63. a](#) eius stilus qualis? *ibid. b* quomodo se in Cluentiana causa gesserit [65. a](#) eius industria [79. b](#) eiusdem in eloquentiam merita [114. a. seq.](#) eius imitatio est ad eloquentiam via breuissima, eademque optima *ibid.* stilus eius Asiaticus [116. a.](#) a quibus, et quare culpetur? [117. a. seq.](#) num solus sit imitandus, et quare? [119. a. seq.](#) in vno ipso pulcherrimum et perfectissimum eloquentiae genus habemus [120. a](#) ipse alios imitatus est *ibid. b* sed idem eadem felicitate efficere non omnibus datur *ibid.* num verbosus nimis fuerit? [122. a](#) negatur illud de plerisque eius scriptis *ibid.* quantum ex poetis fructum in eloquentia tulerit? [125. a](#) hinc et cum ipsius studio poetarum lectio, ipso Cicerone Auctore, sedulo erit coniungenda [127. a](#) eius pro M. Caelio orationis argumentum, et de eadem iudicium

iudicium 128. *a. seq.* vnde iuris scientiam hauriendam dicat 147. *a.* patriciis ignorantiam exprobrat 157. *b.* de eius moribus, virtutibus, et vitiis, iudicium 166. *a. seq.* viri boni nomen maxime commendat 171. *b.* a Caesare in gratiam recipitur 175. *a.* ex philosophia consolationem haurit *ibid. b.* quomodo Caesaris iracundum lenierit 176. *b.*

*Eiconia*, Stroz. eius de Sympathia stultissimum opus 140. *a.*

*Clemens V.* literas Hebraicas, Arabicas, Chaldaicasque Romanae instituit 35. *b.*

*Clemens XII.* eius in rem literariam merita 110. *a.*

*Clementiae*, vis 85. *a.*

*Clementis XI.* Pontificis laus et eruditio 14. *seq. 26.* in literas fauor 21. *a. b.* 24. *a.* in scholarum piarum ordinem beneficentia 26. eius liberalitate architectura ac pingendi sculpendique facultates Romae restitutae 41. *b.* eius eruditio cum virtute coniuncta 45. *b.*

*Contentus*, nemo est sua forte 184. *a.*

*Copia dicendi*, num reprehendenda? 118. *b.*

*Cosmus*, Mediceus, pater patriae cur appelletur? 83. *b.*

*Crassus*, L. eloquentia insignis 111. *a.* eius de omni eruditione indicium 146. *b.*

*Cuiacii*, Jac. iudicium de digestis 50. *b.* eiusdem laus et stilus elegans 16. *a. b.*

## D.

*Delectus verborum*, quem usum habeat? 64. *b.*

*Delubra Aegyptiorum*, quid fuerint? 138. *b.*

*Demosthenes*, eius incredibilis diligentia 9. *a.* eiusdem natales 17. *b.* eius dictum de actione 66. *a. b.* artium bonarum beneficio famam et opes acquirit 155. *a.* interdum Ciceroni dormire videtur 117. *b.* de eius moribus iudicium 166. *a. b.*

*Desidia*, 8. *b. seq.* Cur in eam nulla lex constituta? 39. *a.*

*Didymus, Alexandrinus*, quot volumina scripserit? 80. *a.*

*Digestorum laus*, 50. *a.*

*Dignitas*, etiam in oratione, cordi nobis esse debet 109. *a.*

*Diligentiae vis*, 37. 88. *a.*

*Diogenis dictum*, de explorandis hominibus 91. *b.*

*Dionysius Syracusanus*, quid philosophia ipsi profuerit? 186. *a.*

*Discendi via*, quae optima? 77. *b.*

*Disciplinae*, cultus earum et decor nostra aetate minime negligendus 109. *b. seq.* earum splendor, usus, et dignitas 130. *a. b.* quid circa eas vitandum? *ibid.* quanta sit cuiusque amplitudo? 131. *a.* earum inter se nexu et intima coniunctio 133. *a.* earum difficultas 135. *a. b.* quid ad eas requiratur? 165. *b.* arctissimam habent cum virtute necessitudinem *ibid.* accedat iis, necesse est, mortum gravitas, et prudentia 171. *b.* earum cum ignorantia bellum 135. *a.* earundem victoria et triumphus *ibid. b.* earum contemptus scilorum numerum auget 144. *b.* num vni soli opera danda, ceteris neglectis? 146. *a.*

*Diuitiae*, num felicitatem praebeant? 185.

*Docendi*, methodus, quae optima? 6. *seq.*

*Doctrina*, sine virtute exitium causatur 171. *b.* quantum valeat? 174. *b.*

*Doctus*,

*Doctus*, qui iure dicatur? [134. a](#)

*Domitianus*, Caesar, quantum in literas saeuierit? [136. b](#)

## E.

*Ecclesia*, ad eius munera dignitatesque quid requiratur? [159. a](#)

*Elegantia*, in oratione requiritur [109. a](#) eius neglectus eruditioni quoque, et eruditio, nocet *ibid. b*

*Elocutio*, ad oratores a poetis est profecta [127. b](#)

*Eloquens*, quis? [63. a](#)

*Eloquentia*, quid? [61. b](#) an in delectu verborum quaerenda? [65. a](#) eius virius, quae praecipua? *ibid.* utilitas [7. a. b](#) in foro olim interdicta et iudiciis [62. a](#) vsus eius hodie in foro [66. a](#) Hug. Grotii de ea sententia [63. b](#) in ea, cur pauci excellent? [9. a](#) etiam olim in foro vsitata [61. a](#) eloquentia naturalis qualis? [67. a](#) magno constat labore [71. b](#) cum aliis et grauioribus disciplinis coniungenda [108. a](#) veterum in eam merita [110. a](#) perniciofa in homine nequam [165. a](#) quantum distet a loquacitate? [112. b. seq.](#) sine ea nemo olim sapiens habebatur [113. b](#) maxime expeditum ad eam iter *ibid. seq.* eius basis imitatio [116. b](#) et praecipue Ciceronis imitatio [117. a. seq.](#) poetarum etiam studium ad eam multum confert [124. a. seq.](#) eius splendor et decus ab eloquutione potissimum proficiscitur [127. b](#) homini ecclesiastico necessaria [159. b](#) in quo eius vis posita sit? [165. a](#) quomodo ab Euripide vocata? *ibid. b* Plinii de ea iudicium [166. b](#) in homine malo diu non potest consistere *ibid.* eius vis [177. a](#)

*Etruscus*, Q. quomodo iracundiam vocauerit? [176. b](#)

*Eruditi*, an magistratui gerendo apti? [44. a](#) cur nostra aetate pauciores? [79. a](#)

*Eruditio*, multis virtutibus coniuncta [44. a](#)

*Euander*, in Latio imperium tenuit [174. b](#)

*Euclidus*, discendi cupiditas [78. b](#)

*Eugenius*, IV. P. R. eius liberalitas [182. b](#)

*Euripides*, eius natales [17. b](#) ab Archelao. Macedoniae Rege, altus *ibid.* quomodo eloquentiam vocauerit? [165. b](#)

*Eustachius*, Barthol. renum glandulas inuenit [131. b](#)

*Excellentes*, in arte aliqua facile patronos inueniunt [22. a. 23. b](#)

## F.

*Fascinum*, homines in Africa illud circumferentes [143. b](#)

*Festinatio* studiosis noxia [70. a](#) de ea sententia Augustini [74. b](#)

*Fortitudinis*, praemia apud Romanos summa [19. b](#) qui ea descriperint *ibid.* cur instituta? *ibid.*

*Francisci* L. Regis Galliae, in eruditos amor [97. b](#) Academiae Parisiensem instaurat *ibid.*

*Franciscus* Maria, Urbini dux, sedulus literarum cultor [152. a](#)

## G.

*Galenus*, Claud. eius in eloquentiam merita [111. a](#) eius dictum de stultis [42. a](#) Astronomiae deditus [72. b](#) multos scripsit libros [79. 80](#)

*Gellius*, A. verborum forensium interpret [52. a](#) eius in Ciceromalligas sententia [118. b](#)  
N 2 *Geometria*.

*Geometria*, scioli cuiusdam de ea sententia 144. *a*

*Glossaria*, qui scripserint? 61. *a. b*

*Gonzaga*, Silu. Valenti, eius laudes 164. *seq.*

*Gorgias Leontinus*, quam diu literis operam dederit? 188. *b*

*Graecarum literarum*, usus in Medicina 72. *a*

*Graeci*, eloquentia delectati 49. *a*

*Grammatices*, abusus 70. *b*

*Gregorius Nazianzenus*, quomodo fabulam de Orpheo sit interpretatus? 174. *a*

*Grotii*, Hug. ingenium praecox 76. *a* eius de iureconsultis sententia 64. *b*. eius laus *ibid.*

*Gymnasium*, Romanum, eius instituendi consilium 134. *b*

## H

*Hadrianus*, Caesar, literas amat, literatos odit 152. *a* eius liberalitas 181. *b*

*Harueius*, Gedeon, sanguinis periodum inuenit 131. *b*

*Heinsii*, Dan. ingenium praecox 76. *a*

*Hermogenes*, optime poetices laudes praedicauit 124. *b. seq.*

*Hieronymi*, studium legendi 80. *a*

*Hippocrates*, astrologiae studiosus 72. *b* eius in eloquentiam merita 111. *a* probitatem a medicis requirit 168. *b* eius de studio medico iudicium 133. *b*

*Historia sacra*, quam necessaria sit? 159. *b. seq.*

*Homerus*, eius laudes 125. *a* eum Zoilus infestatur 187. *b*

*Homo*, quo ab animantibus ceteris discernatur? 40. *b* eius corporis studium quam late pateat? 131. *b*

*Honores*, cur mores mutant? 83. *b* num felicitatem praebent? 185. *a* quid noceant? 190. *a*

*Horatius*, eius de sciolis sententia 138. *b* eius laudes 126. *b*

*Hotomanni*, Francisci, stilus elegans 56. *b*

## I

*Ignauus*, quid? 40. *b* in eos nulla lex, nulla poena constituta, cur? 39. *a*

*Ignorantiae*, vitia 44. *b* eius cum optimis disciplinis bellum atrocissimum 135. *a* quantum eius tela nocuerint? 136. *a*

*Illiteratorum*, infelicitas, quae maxima? 40. *a. seq.* 42. *a. b*

*Imitatio*, minime in literis de medio tollenda 116. *b* multo minus in eloquentiae studio *ibid.* difficillima multorum imitatio, melior vnius 121. *a*

*Immortalitatis*, studium insitum 35. *a*

*Impunitatis*, spes est peccandi illecebra 156. *b. seq.*

*Indolenti*, quid? 40. *b*

*Ingenia*, an hac aetate deteriora? 78. *a* non omnia literarum studiis apta 88. *b* eorum varietas 89. *a* metallis a Platone comparata *ibid.* *b* eorum delectus habendus 91. *a* de praecocibus quis scripserit? 79. *a. b* optima etiam multiplici labore ad literarum cognitionem solidam perueniunt 133. *a* ingenii sui vana fiducia quantopere homines seducat? 143. *a* eorum similitudo grata 170. *a* mediocritas interdum summis honoribus ornatur 171. *a*

*Innocentii XIII.* laus 82. beneficentia *ibid.*

*Inscriptionum*, barbaries recentium, si cum antiquis comparantur 129. *a*

*Ionis*,

*Leuii*, Pauli, de Leone X. testimonium 96. a

*Iracundia*, eius vis et furor 175. b quomodo vincatur, 176. b quomodo ab Ennio vocata? *ibid.*

*Isocrates*, quale Nicocli monitum dederit 179. b senex docet rhetoricen 189. a dictum de ingeniiis felicibus 89. a eius oratio qualis? 63. a

*Italia*, ibi poetae bonas literas veteri splendori restituere 129. b

*Iudice*, Nic. eius laudes 172. seq.

*Iudicem*, corrumpat quis? 62. b

*Iulii II.* pacis studium 95. a

*Iuriconsulti*, eloquentia instructi, qui fuerint? 73. a stili elegantia, qui praediti fuerint? 51. b. et 65. b an ipsis noxia? 57. a iudicia de iis 177. b

*Iuriscivile*, amplitudo 74. a Ius civile et canonicum ab Innocentio IV. institutum 35. a

*Iniurprudentia*, cum omni literarum genere coniuncta 53. b ad hanc morum probitas requiritur 168. a

*Iuris scientia*, num sola doctum et sapientem faciat? 147. a

*Ius Romanum*, iudicium de eo 147. b a quibusnam ex orco quasi reuocatum et illustratum? 148. a

*Iuvenes*, nimia laude corrumpuntur 193. a

## K.

*Knittelius*, Caspar. lepida eius versus cuiusdam Virgiliani interpretatio 139. a eius arrogantia *ibid.*

## L.

*Leboris* vi 10. a et 92. a

*Lacedaemonii*, ciues suos statim a pueris silentio coercuerunt 144. a. b quam studiorum rationem inierint? *ibid.* huius cum nostra comparatio *ibid.*

*Lascari*, Ioannes, Bizantinus, a Leone X. Romam vocatur 97. b

*Latina Lingua*, quot vigilias et labores ea postulet? 132. a auctores de eadem *ibid.* eius necessitas 159. b latine nescire turpe 42. b

*Latini sermonis*, cultores 11. b eiusdem studiosi iurisconsulti 49. a. 51. b. 73. a. seq.

*Latinitatis*, impurae origo, unde? 11. a an methodo docendi tribuenda? *ibid. b* an inopiae magistrorum *ibid.* librorum impurorum lectioni maxime tribuenda 12. a

*Laurentius Medicus*, cur Italiae deliciae dictus? 83. b

*Laus*, nimia adollescentes corrumpit 143. a eius amor nimius, quantum noceat? *ibid.*

*Leetio*, sine delectatione qualis? 64. b.

*Leges*, primis temporibus unde ortae et quomodo? 174. a. earum utilitas 33. b

*Legislatores* antiquissimi, qui fuerint? 174. b

*Leo X. P. R.* Archigymnasium Scholarum piarum instaurauit 21. a 28. b viros eruditos accessit 31. a 34. a 86. b et 96. a. Lateranense concilium compleuit. 31. b et 86. a Romae optimas artes instaurauit *ibid. seq.* eius in aedificando studium 35. b multas leges fanciuit 36. a eius liberalitas 82. 86. b magnanimitas 82. b. seq. sapientia et prudentia 83. a. seq. eius maiestas cum amore coniuncta *ibid.* eius familia *ibid.* et maiores *ibid.* ab Innocentio VIII. Cardinalis creatus N 3 82. b. 84.

83. *b.* 84. Legatus totius Etruriae *ibid.* exercitui a Iulio II. praefectus 84. *b.* ab exercitu adarmatus *ibid.* captivus Mediolanum ductus 85. *a.* quanto applausu Pontifex renunciatus 85. *b.* eius clementia 86. *a.* nuncios et epistolas ad Abyssinorum regem et Moschorum Ducem misit *ibid.* statua ipsi marmorea decreta 87. *a.* eius celebritas *ibid.* in literatos fauor 94. *b.* literas promouendi studium 96. *b.* ei debentur libri V. Annalium Taciti 97. *a.* Bibliothecam Vaticanam amplificavit et aperuit *ibid.* *b.* Graecos professores Romam vocavit *ibid.* eius laudes 150. *a.* eius erga literas et literatos studium et voluntas *ibid.* *b.* ipse literis operam dedit sedulo 151. *a.* purpuratus renunciatus iuris scientiam didicit *ibid.* *b.* eius in literatos munificentia 152. *b.* Gymnasium Romae exstruendum curat 153. *a.* eius laudes ex liberalitate in literarum cultores ortae 178. *a.* eius educatio 179. *b.* maiorum eius laudes 180. *a.* gentis eius calamitas *ibid.* ipsius, cum esset purpuratus tristitia fata *ibid.* qualem se Pontifex gesserit? 181. *a.* eius constantia *ibid.* eius in Romanum Gymnasium meritum 182. *b.*

*Liberalitas*, digna principis laus 179. *a.* ea interdum principes abutuntur *ibid.* *b.*

*Libido*, eius vis, et furor 175. *b.* seq. quomodo vincatur? *ibid.*

*Libri*, eorum titulos et indices tenere viri docti laus non est 134. *a.*

*Licinius*, Imp. literis infestissimus 136. *b.*

*Ligarius*, Q. quomodo in gratiam cum Caesare redierit? 176. *b.*

*Literae*, humaniores summo constant labore 9. *b.* 19. *b.*

56. *b.* ab Ictis exultae 65. *a. b.* earum amplitudo 71. *a.* earum utilitas 7. *b.* 29. 30. 32. *a.* 57. *a. b.* in iurisprudentia cum primis 64. *b.* earum amor in maioribus 9. *a.* earum fautores 17. *b.* 43. *a.* earum profectus, quid impediat? 8. *b.* quid promoveat? 20. *b.* 77. *b.* an maecenatum penuriae tribuendus earum neglectus? 10. *b.* 11. *a.* 16. *b.* duabus causis adscriptus 8. *b.* qui iis excelluerit 23. *b.* earum in animis hominum imperium 173. *b.* earum sub Leone X. felicitas 181. *a. f.* quomodo iis abutamur 188. *a.* artissimus elegantiorum cum grauioribus disciplinis nexus 108. *a.* earum necessitas et haud magna difficultas *ibid.* cum arte poetica coniunctio 125. *b.* earum impedimenta 130. *a. b.* sunt virtutis parentes, vitiisque expultrices 157. *a.* earum olores, quam parum contra illas proficiant? 136. *b.* num iuris studioso noceant? 148. *a.* earum studia magis adhuc necessaria sunt nobili loco natis. quam iis, qui mediocri fortuna vtuntur 155. *b.* vera sunt nobilitatis ornamenta 156. *b.* qualis earum cum nobilitate necessitudo 157. *a.* quot labores et curas postulent? 150. *b.* sunt et consilii duces, et imperandi magistrae 158. *a.*

*Literati*, quare a principibus foueantur? 150. *b.* multorum infelicitas 136. *b.* auctores de eadem *ibid.* eorum de variis et ludicris rebus frequentes et turpes contentiones 143. *a.* seq. quae causa infelicitatis eorum? 170. *b.* eorundem auctoritas 177. *b.* quae causa rixarum inter illos? 187. *a.*

*Loquacitas*, eius descriptio, quantumque inter illam, et eloquentiam intersit? 112. *b.* seq.

*Loquendi*, facultas, qua ratione discatur? 12. *a.*

*Lucullus*,



*Lucullus*, literatorum familiaritate delectatus. 15.

*Ludouicus XIV.* Galliae rex; iudicium de ipso 150. b

*Lysias*, eius eloquentia 110. b

## M.

*Magistratus*, quid ad huc requiratur? 158. b non alieno consilio vti debent 159. a

*Malpighius*, Marcellus, pulmonis structuram et usum monstravit 132. a

*Manlius*, Torquatus, cur imperium recusauerit? 44. a

*Marinus*, I. B. ingratus homo 171. a

*Maximilianus*, Caesar, literatos amat 97. b Academiā Viennensem erexit *ibid.*

*Medici*, praestantes 73. a iudicia de iis 177. b

*Medicina*, provincia ardua 72. b f. quanta eius difficultas et amplitudo? 131. b quibus literis originem debeat? 72. a quibus iuuetur studiis *ibid.* b morum probitas ad illam requiritur 168. a

*Menander*, pueris olim ediscendus dabatur 129. a

*Menckenius*, I. B. laudatur eius in sciolos declamationes 140. a

*Mens*, humana, cui ab Aristotele comparata 88. a

*Metrachus*, dictum de literis 10. a

*Mirandulani*, Pici, ingenium praecox 75. b. 76.

*Mitylenaeorum*, in victos poenae 30. a

*Morbi*, an ex astris diiudicandi? 72. b

*Mores*, corrupti literis emendantur 157. a eorum integritas ad omnes disciplinas est necessaria 165. b. seq. eadem fidem facit 168. 169.

*Mureti*, M. Anton. eruditio 23. b

is a Gregorio XIII. Romae arceffitus *ibid.*

*Musae*, ubi habitent? 10. a et 18. b

*Mutius*, Q. eius de patricio ignaro sententia 17. b

## N.

*Nativitatis*, splendor, superbiae fons 83. a

*Nestor*, Piliis imperat 174. b eius eloquentia *ibid.*

*Nicoles*, ab Ilocrate institutus 179. b

*Nicolaus*, V. Pontifex romanus, eius liberalitas 182. b

*Nobiles*, prae ceteris ad bonas artes incumbere debent 155. b

mechanicae artes iis minime conveniunt 156. a quot incommoda patiantur? *ibid.* b

quomodo ignobiles fiant 157. b

cur etiam nostri nobiles literis operam dare debeant? 158. a

quare ad magistratus et honores potius, quam alii promoveantur? *ibid.* seq.

*Nobilitas*, eius cum optimis artibus necessitudo 157. a quidnam sit? *ibid.*

*Numa*, Romanis leges praefecit 174. b

## O.

*Opinio*, de suo ingenio studio sae iuventuti omnium maxime vitanda 131. a quantum noceat? 134. b

*Oratio*, quid? 57. b ornatus in illa etiam requiritur, ut in aliis rebus et artibus 108. b. seq.

*Oratorum*, quodnam officium, 61. b. seq. quid ab eo requiratur? 165. a

virum bonum cum esse oportet *ibid.* b

*Origines*, quot libros scripserit? 80. a

*Ornatus*, in oratione requiritur 108. b

*Orpheus*, interpretatio fabulae de eo 174. a

*Ossatus*, Arn. ingenii commendatione ad dignitatem pervenit 155. a

*Otium*, eius damna 39. b. seq. quantum noceat? 136. b nobilitatis vitium *ibid.*

*Quidam*, laus 18. a eius exilium *ibid.*

## P.

*Pagninus*, Santes, Leonis X. liberalitatem experitur. 182. a

- Papiniani*, laus 50. *b*  
*Parisiensis*, Academia, a quo fundata et instaurata? 27. *b*  
*Parrhasius*, Consentinus, Ianus, a Leone X. magister eloquentiae constituitur 183. *a*  
*Pascalii*, Blasii, ingenium praecox 76. *a*  
*Patroni*, quomodo comparandi? 21. *b* seq.  
*Pauperes*, a literarum studio non excludendi 156. *a* nec tamen male faciunt, si mechanicis artibus operam dant *ibid.*  
*Paupertas*, ingeniis praeclaris noxia 18. *a*  
*Pequetius*, Ioannes, ductum thoracicum inuenit 131. *b*  
*Periander*, malus poeta 91. *b*  
*Pericles*, fulmina vibrare dictus 61. *b*  
*Philippus*, Macedonum Rex, eius in literatos beneuolentia 174. *b*  
*Philosophi*, eorum libertas philosophandi vnde orta? 145. *a* iis Plato magistratus et imperia *destinauit* 167. *b* quare sapientius e ciuitatibus fuerint electi? *ibid.* falsi philosophi *ibid.*  
*Philosophiae*, utilitas 31. *a* studium quam amplum? 71. *b* in suo sinu ius civile alere videtur 147. *a*  
*Physicae*, studium, quam amplum? 71. *b* seq.  
*Picae*, humanae vocis imitatrices, 88. *a*  
*Pindarus*, eius natales 17. *b* ab Hierone Syracusano alius *ibid.*  
*Pius II.* P. R. eius liberalitas et literarum amor 182. *b*  
*Plato*, a Dionysio rege quomodo exceptus? 22. *a* eiusdem laus *ibid.* quos audierit Praeceptores 78. *b* eius dictum de ingeniis 89. *b* eius de oratore sententia 62. *a* eius oratio qualis? 63. *a* quomodo philosophiam vocauerit? 167. *a* in scribendo defixus moritur 189. *a* eius de nobilitate iudicium 157. *a* eloquium eius 110. *a. b* eius in eloquentiam merita *ibid.* quamdiu studiis operam nauauerit? 133. *b* eius contentus, quam stultus? 141. *a*  
*Plantus*, eius laudes 126. *b*  
*Plinii*, C. dictum de tempore 10. *b* eius laus Ciceronis 49. *b* eius de eloquentia iudicium 166. *b*  
*Plutarchi*, de Artaxerxe Longimano sententia 96. *b*  
*Poesis*, an naturae tribuenda? 75. *b*  
*Poetae*, an nascantur? 90. *b* quomodo doctrinae vim fabulis adumbrarint? 174. *a* quantum ad eloquentiae dignitatem studium eorum conferat? 124. *a* seq. quanto apud antiquos honore affecti? 125. *a* in Italia bonas literas et eloquentiam veteri splendori restituerunt 129. *b* ab iis omnis latinarum literarum elegantia et eloquentiae laus in nos deriuatur 125. *b* eorum versibus maximi oratores vtuntur 126. *b* magis, quam alii, delectant et mouent; ergo etiam facilius persuadent 128. *b* eorum utilitas multifaria 132. *a. b*  
*Poeticae*, quanta sit huius artis cum eloquentia et bonis literis coniunctio? 125. *b*  
*Polemon*, a vitis per doctrinam reducitur 176. *a*  
*Polemon*, Rhemnius, Varronem conuictis infestatur 187. *b*  
*Politianus*, Ang. eius de Leone X. sententia 151. *a. b*  
*Πολυγλωσσον*, exempla 79. *b* seq.  
*Pompeius*, Cn. quantopere literas amauerit? 174. *b*  
*Pontificum*, ius eius necessitas 159. *b*  
*Praecepta*, num multum ad eloquentem hominem effingendum valeant? 114. *a*  
*Praeceptorum*, utilitas 47.  
*Praemia*, vtum alant literas 20. *a* quare non hodie vt olim, bonis artibus tanta sine proposita? 109. *a*  
*Principes*, liberalitate interdum abutuntur 179. *b* cur literis minus dediti literatos tamen colant? 150. *b*

Pittaci,

*Pfittaci*, humanam vocem reddunt **88. a**

*Pythagoras*, silentio suos probat discipulus **144. b** quantum bonis artibus debuerit? **155. a** qua ratione ingenia exploraverit? **92. b**

## Q.

*Quintilianus*, necessariam dicit imitationem ad eloquentiam **116. b** eius de poetarum vsu sententia quid ab oratore requirat? **126. b** quid a caussarum patrono postulet? **168. b**

## R.

*Reipublicae*, salus, quo nitatur? **33. b. seq.**

*Religio*, prouinciae fundamentum *ibid.*

*Res*, ratio earum non modo habenda, sed verborum etiam **110. a** sine horum studio illarum scientia fere iuutilis euadit. **112. a**

*Respublica*, in illa administranda quid maxime sit necessarium? **158. b**

*Retractiones*, qui scripserint? **76. b**

*Rixae*, inter literatos, earum caussae **187. a. b.**

*Roberti*, Annaei, Stilus qualis? **56. b**

*Roma*, ibi innocentia vitae ante oculos habetur **172. a** ibidem turpe fuit olim, patricios literarum esse rudes **157. b** sub Leone X. maxime floruit **152. b** Gymnasium ibidem institutum **153. a**

*Romanum gymnasium*, eius historia **183. a**

*Romanorum*, beneficentia **86. b** amot in eloquentiam forem **49. a**

*Rudis homo*, quam male ad rem publicam administrandam adhibeatur **158. b**

## S.

*Saeculum*, nostrum cultus et decoris studiosissimum **109. b. f.** non scientia rerum, neglecto

verborum ornatu, contentum est *ibid.*

*Sannazarius*, Iac. quot annos libris de partu virginis impenderit, **75. b**

*Sanseuerini*, cum ecclesia Romana simulatas **95. b** is **a** Leone X. in gratiam receptus **86. a**

*Sapiens*, nemo sine eloquentia olim putabatur **113. b** solus beatus **184. b** quis vere sit, et quis non sit? **188. a**

*Sapientia*, perturbationes animi sedat. **185. b. seq.**

*Scaruola*, Q. eloquentia illustris **111. a**

*Scholarum*, plarum laus **32. b**

*Scioi*, optimis disciplinis bellum inferunt **136. a** quantum detrimenti bonis literis inferant? *ibid.* plus nocent, quam ignarissimi **140. b** ergo quam maxime sunt vitandi *ibid.* a quibus foueantur **142. a. b** a studiosa inuentute sunt vitandi **136. a** quid sint? **137. a** iudicium de iis **139. b.** cum Aegyptiorum delubris comparantur *ibid.* Horatii de iis sententia *ibid.* eorum inscriptiones **139. a. seq.** eorundem triuolae quaestiones. *ibid.*

*Scriptura sacra*, num omnes ex ea disciplinae proficiantur? **146. a** docti ad illam accedere debent *ibid.* quae artes huc pertineant et scientiae? *ibid.*

*Senes*, num difficile mutantur? **47.**

*Sermo*, doctrina conditus quantum ad persuadendum valeat? **176. a**

*Silentium*, ab antiquis valde commendatur **144. a**

*Socrates*, eius natales **17. b** eius praeceptum de iracundia **40. a** quomodo explorauerit ingenia? **57. b.** ab Alcibiade sustentatus **17. b** quomodo capitis causam dixerit? **62. a** laudatus **72. a** quid artibus et scientiis debuerit? **155. a**

*Spinulae*, Ioan. Baptistae, Cardinalis fauor in literas **38.**

*Stili*, elegantis in foro vsus **48. b**

55. *b* an molestus 53. *a* eius utilitas in foro 57. *a* neglectus 58. *a* et ex neglectu eius orta incommoda *ibid.*  
*Studia*, eorum labor quantum ad mores valeat? 157. *a* eorum similitudo grata 170. *a*  
*Sulpicius*, Seu. eius purae latinitatis studium 49. *a* is multos scripsit libros 80. *a* eloquentia clarus 111. *a*

## T.

*Tabulae XII.* quid profint? 73. *b*.

*Taciti* libros quinque annalium priores quis restituerit? 97. *a*

*Temperamentorum*, vis 89. *b*

*Temporis*, cura a veteribus habitata 10. *a* Temporum doctrina homini ecclesiastico necessaria 159. *a*

*Terentius*, laudes eius 126. *b*

*Thebani*, quo ingenio? 88. *b*

*Themistocles*, quid Miltiadistropaea eum iuuerint? 19. *a*. 68. *a*. eius querela de breuitate vitae 72. *a*

*Theologiae*, praestantia 74. *b* magno constat labore 75. *a* quam necessaria sit homini ecclesiastico 159. *b* eius studium maximam probitatem requirit 169. *a*

*Theophrastus*, Paracelsus, eius arrogantia 138. *a* multa scripsit 80. *a*

*Tollius*, Corn. de litterarum infelicitate scribit 136. *b*

*Traianus*, eius laudanda liberalitas 179. *b*

*Trebatii*, C. libri de iurisprudencia, cur sprete? 49. *a*

*Tubero*, Qu. Aelius, cur a romanis minus probatus? *ibid.*

*Tuscius*, Domin. quid scientiis debuerit? 155. *a*

## V.

*Valenti*, v. Gonzaga  
*Valerianus*, Pier. de litterarum infelicitate exponit 136. *a*

*Valla*, Laur. quanti Poetas fecerit? 126. *b* iudicium de Digestis 50. *a*

*Vanitas*, a literatis abesse debet 170. *b*

*Varolius*, Constantius, originem neruorum inuestigauit 131. *b*

*Varro*, M. a Sulpicio de verborum significatione consultus 49. *a* Valerii Maximi de eo iudicium 189. *a*

*Verba*, eorum ratio habenda, non rerum solum 110. *a* an etiam in foro 51. *b* quae ferenda? 56. *a* eorum delectus an profit? 64. *b* seq. rerum scientia illorum neglectum minime excusat 111. *b*

*Veritas*, quantis tenebris inuoluta delitescat? 131. *a*

*Vesalius*, Andreas, eius anatomicae studium 91. *a* oesophagi glandulas inuenit 131. *b*

*Vespasianus*, Caesar, eius liberalitas 181. *b*

*Veteres*, et Graeci, et Latini, verborum et rerum rationem aeque habuerunt 110. *a* contentus arrogantiam parit 145. *b*

*Viennensis*, Academia, a quo fundata? 27. *b*

*Vio Caietanus*, Thom. de, Leonis X. liberalitatem experitur 182. *a*

*Virgilius*, quot annis Georgica et Aeneida scripserit? 75. *b* eius laudes 125. *a* et 126. *b* ex eius quodam versu septem ad animi modestiam argumenta quidam depromere sibi visus est 139. *a*

*Virsungus*, Ioannes Georgius, ductum pancreaticum inuestigauit 131. *b*

*Virtus*, quantam in consiliis vim habeat? 168. *a*

*Vitia*, ab iis maxime oritur animi perturbatio 170. *a*

*Vocabula*, noua, quae ferenda? 56. *a*

*Voluptates*, num felicitatem conferant? 185. *b* sola quae ex doctrinae studiis oritur, voluptas, stabilis est 188. *b*

## X.

*Xenocrates*, Polemonem a vitiis dimouet 176. *a*

*Xenophon*, eius eloquentia 110. *b*


## Z.

*Zeuxis*, cur diu pinxerit? 75. *b*

*Zoilus*, Homerum insectatur 187. *b*

*Zonuelben*, Io. Heytmers, antiquos codices MSS. perquisiuit 96. *b*







005655316

